

張元濟書札



沈君去冬年

李月廿四日

此上代傳中國書信王本香坊信一紙計焉

張元濟 啓

東者原編致未見夢公此未也後時面

華印信宜王本香坊信一紙計焉

版者特別致印信信若為罕見上本則不

指實其板而致王夢公為元定日書

元定印信

一書字之能正為夢公一紙見抄信校

王夢公夢公

收訓其外後後致再致王夢公為元定日書

首後也

鄭一錄信日王夢公王夢公同達夢公之

商望遠

信是行事錄布致

名

張元濟

此信已致王夢公

商務印











张元济书札



商务印书馆

1981年·北京



张元济书札

商务印书馆出版

(北京王府井大街36号)

上海商务印刷厂印刷

统一书号: 10017·13

1981年6月第1版

开本 850×1168 1/32

1981年6月北京第1次印刷

字数 220 千

印张 8 3/4 插页 2

目 次

致繆荃孙 筱珊	1
致沈曾桐 子封	8
致汪康年 穰卿	9
附汪诒年信	48
附致沈洁斋信	49
附请中止暨浦铁路节略	50
致梁启超 任公	56
致熊希龄 秉三	63
致孙宝琦 慕韩	64
致张謇 季直	67
致岑春煊 西林、伍廷芳 秩庸	69
致傅增湘 沅叔	70
致朱希祖 逖先	125
致张寿春 伯苓	161
致胡适 适之	162
致顾廷龙 起潜	167
致励乃骥 德人	180
致高梦旦、陶惺存、杜亚泉	182
致高凤池 翰卿	184
致鲍咸昌	195
致孙壮 伯恒	196
致胡文楷	205
致丁英桂	207

为辞商务印书馆监理职致商务印书馆董事会信·····	263
复亲友询辞职缘由·····	265
写与源侄·····	266
旅学弦韦——给年儿·····	270
为乐志华案致上海宁波同乡会·····	273
营救被捕学生函·····	275
致蒋中正 介石·····	276
张元济书札跋·····	顾廷龙 277



致繆荃孙 筱珊

【1】 小山老前辈大人左右。廿七日赐教敬悉。具稔冲和弥褻。日以古书浇胸。涤炎氛而消长夏。清福高致。健羨无似。都中图书馆待鸿硕经始。而金陵所构复得长者观成。北彘南金。皆供掌录。斯又何如盛事耶。吾浙丁氏藏书既归金陵。一时未得散见。敝处搜求佳槧。殊苦不易。拟就其甄录一二。为推广流传嘉惠之旨。度于事无不可。祈得一言许诺。未知尊处觅取写手尚易得否。或须代为预定。钞资若何计算。均望先行核示。俟选择就绪。再行函恳。想不以烦渎为罪也。别示书目。亦容得闲访之。专此。敬请道安。暑次崇卫不宣。 馆晚生张元济顿首。六月朔。

【2】 小山老前辈大人阁下。奉初六日手教。备承指示。感荷不尽。袁氏书索价过昂。无可与商。只得还之。近闻袁海观备价收回。于义固当也。来书慨然于旧书之将绝。此亦时会使然。要在有一二先觉者出为转移。自有挽回风气之日。承示图书馆宜多备通行书。甚是甚是。但难得之旧本。若无公家为之保存。将来终归渐灭。丙午春间。韶宋楼书尚未售与日本。元济入都。力劝荣华卿相国拨款购入。以作京师图书馆之基础。乃言不见用。今且悔之无及。每一追思。为之心痛。尊处拟抄瞿书共有若干种。可否录示一目。元济拟照原书板口印成格纸。将来影钞。悉如原式。以期不失真相。不知尊处是否如此办理。并乞见示为荷。从者北行。约在何日。届时取道上海否。江宁图书馆已否许人纵观。并恳示知。肃复。敬颂著祺。 馆晚生张元济顿首。七月二十日。

【3】小山老前辈大人侍右。奉手教。并录示船山儒统论一篇。期许过当。岂所克任。近以坠简网罗。实犹郑司农搜故书。留舍人抱礼器之意。事关国脉。士与有责。重承宏达赞成。敢不益加勉勉。袁伯遼久未晤及。经手人亦已它往。所询容探得再告。罗叔蕴两书诚佳。但字迹过小。不能影印。书已归之。元济欲求钞之书。俟纸格印就。即行寄呈。瞿氏书亦俟选定种数。再请主其事者将每种纸式代为影摹一叶。以便照印。庶钞本可存真相。杨氏书已托人商问。尚未得复。果有售意。必尽力图之。自来收藏家鲜百年长守之局。近溯咸同。犹止数十年耳。而烟云幻灭如陆潜园者。正已不少。然而斯文未绝。吾道不孤。必且有尽发名山。以光盛世之一日。此可博掀髯一笑也。秋雨初凉。惟撰履增胜。仍希时惠教旨为盼。此叩颐安。余惟心照不宣。馆晚生张元济顿首。八月十一日。

【4】小山老前辈大人尊鉴。前者撰杖来游。获申款洽。奉睽倏又经时。闻都下图书馆一席。远迓蒲轮。为之喜跃。中原文献系属老成。国之光也。所商影印古书一事。一再受教。谨志勿援。此时尚应者寂寥。而鄙意期于必得。终当有翕羽之雅。慰我嚶鸣。且先生方入综上流。庶几于高掌远跼之余竭力提倡也。近缘钩考诸家书目。知聊城杨氏之海源阁收藏甚富。江建霞前辈为刻其书目。言杨氏子曾自编楹书隅录。未经刊行。而杨氏自跋中举及此书。亦只有校写既竣之语。忆尊序善本室藏书志。则似谓其书已有行世。未知系近甫出版。抑别是一本。幸即开示孤陋为感。荷暑渐炽。脂车首涂。自可从容一时。再行踰吉耳。肃此。敬请道安。祇维爱照不宣。馆晚生张元济顿首。五月廿二日。

【5】小山老前辈大人赐鉴。迭奉初九廿三日手书。开缄诵悉。补钞刘克诗说三卷收到。第二卷并蒙代校。感谢感谢。其九

十两卷当取陆氏群书校补校勘也。非诗辨妄既承假钞。即祈嘱写官缮录。能托人代校一过否。士礼居题跋元济只见潘刻六卷。江刻二辑尚未寓目。近假得一钞本。有书七十种。有与潘刻本重出或类似者。然不多。未知即是江刻本否。然不宜与潘刻本重出。现已赶紧录副。异日当寄呈清览。敝处购入之书有堯老跋者。已属典守者检出汇录寄奉。综计不及十种也。江南图书馆何魔障之多。一至于此。丰润明达。当能主持。然公若弃去。后来必不堪设想。倘果有人持变价之说。则元济甚欲得之。但不可拍卖。恐有日本人来出重价。一笑。前见元刊宋史。似系明印。且索价过昂。只得放手。睹精本而不能得。反不如不睹之为愈也。先六世祖曾刊李壁王荆公诗注。当时缺去魏鹤山序及卷三十卷五十末叶各一。甚以为憾。魏序后已觅得。而两末叶终付阙如。近见杨惺吾日本访书志。有朝鲜活字本王荆文公诗注。此两叶均存。不知此书已否归惺吾。当托人询问借钞。久不得复。闻惺吾藏本陆续散出。恐此又成虚愿。但不知尚有他处可觅假否。务祈见告。元济颇欲补足影印也。贱躯迹日稍觉强健。明春将有环球之行。约以半年为限。此间购书抄补等事。均托无锡孙君星如经理。谨为先容。伏祈推爱。时赐教益。不胜祷盼之至。肃复。敬请著安。兼贺岁禧。 馆晚生张元济拜上。十二月廿四日。

【6】小山老前辈大人阁下。奉初二日手教。敬悉观书罟里。秘笈有流通之机。甚盛甚盛。南北两馆先后建设。后生小子得闻先圣之遗绪。识固有之文明。不致徇外而忘己。皆老前辈之赐也。江宁图书馆藏本允予录副。甚感。容选定后开单奉托。格纸由敝处自备。庶较整齐。瞿氏进书百种。尊处择罕见者设局照钞。是否遣人赴罟里就录。敝处拟附钞数种。不知主者能许我否。老前辈能代为一商。感荷不尽。顷有书估交来旧书一单。每种各附一册。晚观其书。似尚可购。惟索价甚昂。不易还价。兹

将原单寄呈。并摘其较优者若干种。别录一纸。敬祈核阅。代定一价。晚颇拟劝商务印书馆抽拨数万金收购古书。以为将来私立图书馆张本。想老前辈亦乐为提倡也。书估急索复音。核定实值。可否乞于一二日内电示数字。电费当照缴。琐事上渎。惶悚之至。肃此。敬请道安。 馆晚生张元济顿首。十月初五日。

附拟电文如下。六六八八菊。书值〇〇两。

【7】 小山老前辈大人阁下。奉前日复示。敬诵悉。所示各书。沅叔大都寓目。道德经集注。元本赵松雪万宝诗山。均经购入。惟松雪缺卷一之三。未知是百二故物否。礼记正义晚还以千元。不知售否。沅叔问。在盛氏见唐语林有茺圃跋。尊处如欲得之。可录寄。乞示复。又闻谭韩在东卖书。均不利。亦一佳音也。敬颂著祺。 馆晚元济顿首。六月十三日。

敬再启者。今日有人持一鲍参军集来。称为元本。检第八卷行路难第七首。樽樽及逐字均未改。当是在正德刊本之前。元本之说果信否。毛斧季校与爱日精庐所载一一吻合。然彼系旧钞本。此为印本。疑是过录。然敝处有斧季校本。其笔迹又甚相肖。疑不能决。敢祈鉴定。索价百元。实值若干。亦求示及。再叩大安。 元济拜上。六月十三日。

【8】 小山老前辈大人阁下。今晨奉手教。谨悉。宋明两种活字体。陶子麟来并未道及。元济拟令仿古逸丛书之草堂诗笺体。或摹黄善夫史记。但必须就其所长。方能优胜。老前辈知之最深。故特奉商。现拟先刻一副。如合用。再续刻。不能决定五套也。三希堂帖有日本人愿买。敝处却欲留之。拟请老前辈转商。可否稍贬其值。让归敝处。（拟出五百元。并附致授经一信。请先介绍。以后当直接通信。不敢过渎也。）区区保存之意。想老前辈及授经必乐赞成耳。道藏所在承见示。容即设法。毛校鲍集二册。适在手头。先送去。阅毕乞赐题数行。至祷至祷。黄尊素

说略尚未取出。容再呈。肃复。敬颂著祺。 馆晚张元济顿首。四月十四日。

【9】小山先生史席。诵手教。敬悉。海滨外史一册收到。陆刻史通送上。计六册。乞检收。红笔为潜夫所校。系据叶石君校定本。顾思适复据宋本及嘉靖本对勘。且有增补之叶。似不可谓非善本。一经法眼。必能审定。倘蒙赐题。垂示来学。尤为感荷。再顾据宋本校定各条。均用票签。久之必至脱落。元济拟移录书眉。想先生亦以为然也。景宋钞挥麈录。或能谐价购入。成交后当再呈览。前示积余骤遭家难。未知何事。甚以为念。乞再见告。肃此。祇颂著安。 张元济顿首。十一月二日。

【10】小山先生赐鉴。盛暑维起居安吉为颂。旧本夷坚志十册。顷已装订完竣。送去。乞察入。抄补既毕。即希掷还。北京敞分馆来信。匄斋家人属询尊处代印壬寅消夏录。已否成书。印资尚缺若干云云。敬祈示复。以便转告。又沅叔寄还邨架鬼谷子一册。另翠微南征录二册。拟求先生代为逐录鲍校。一并送上。敬乞检收。外附意园书目五纸。为沅叔选定。拟与敞处合购者。谨以呈阅。阅过仍恳付还。另购得意园书数十种。前日业已寄到。中有景元钞足本元秘史。最可贵也。有复宋宣和遗事。嘉靖本长安志。亦罕见。余不一一。 馆侍元济顿首。七月廿四日。

【11】小山先生赐览。今午奉诵复示。谨悉。顷有人持数书来。一。自警编。似宋刻。有三分之一为汲古抄补。一。吕东莱集。有补配甚多。亦似宋刻。不知是宋印否。一。东坡七集。疑是成化本。然与近翻印本比对。版口略小。而字体亦不同。培老谓或系宣德本。今各呈上一册。敬求鉴定。尚未开价。可值几何。并祈核示。祇颂晚安。 张元济顿首。五月四夕。

明晨遣人走领。因物主不允久留。即须取去也。

【12】小山老前辈大人惠鉴。前日刘张两书估承命送旧本

来。感谢之至。中以影宋钞芦川词、苏天爵名臣事略为最佳。有朱子大全。疑非宋槧。培老亦疑之。究为何本。老前辈必能评决也。芦川词(顷已买定。价约摊得百四十元。尚有他书并买也。)有茆老跋。未见刻本。今录呈。共四纸。并附沅叔来信一函。祈察入。书凡五册。(一百十五番。)索值三百元。事略、大全两种。培老拟截留。索价一千又六十元。可谓奇昂矣。又有吕氏乡约。亦佳。止四十番。开价二百四十元。该估所望过奢。恐难成议。然元济终欲购一二种。以副盛意也。岛田翰来。至顾鹤逸家。购去士礼居藏元刊古今杂剧。明本杂剧十段锦。残宋本圣宋文选。闻出资皆不少。令人为之悚惧耳。肃此。祇颂著安。晚元济顿首。旧历端节。

【13】小山先生阁下。前奉复示。谨诵悉。古今文钞。先生既欲得之。当如所拟之价(八元)。让归尊处。书六册送去。乞察收为幸。近日见宋刊元明补配论衡一部。其埜成丘山、污为江河下一页。不缺。惜已补至嘉靖。宋刊存者亦无几。且颇漫漶。不知所值几何。敬祈核示。又有旧抄碧云暇一种。系带经堂故物。其书似极罕见。与姚舜咨手抄玄中记合装一册。书才廿六番。乃索值五十元。恐亦无购存之望矣。现正诸价。如能购妥。当呈览。肃此。敬颂著祺。伏候示复。张元济顿首。一月十四日。

【14】小山先生有道。酷暑不审起居已复原否。驰念之至。意园藏书。敝处所得者。以景元抄元秘史为最精。其他有景宋钞事实类苑、孙公谈圃、明复宋墨子宣和遗事亦尚不恶。类苑墨子两种尚存沅叔处。沅叔有信来。极赞是书之佳也。闻陶子麟已来沪。可否仍乞介绍。欲与商刻字事。想蒙赞成。又闻渠已成聚珍活体字不少。不审确否。并祈询示。肃此。敬颂台安。张元济顿首。八月初三日。

【15】小山老前辈大人阁下。昨日奉手教。祇诵悉。道园类

稿审系明刻。索价至五百四十金。又有残元本黄文献集二十卷。索百四十金。另道园续集。取视乃遗稿。非续编。且系新抄。开价亦极贵。均已还之矣。摹印道园类稿三纸附还。乞察入。黄尊素说略蛀损甚。已付装。装竟即送上。敝处现筑新馆。刻正预备迁移。逐日将旧书移储别室。部居凌乱。俟部署稍定。再将旧抄搜集检呈。至祈鉴亮。刻丛书事。久蓄此志。拟稍闲暇。将现有写本逐一检阅。选定后再祈教正。肃此。敬颂台安。并贺新禧。馆晚张元济顿首。二年一月一日。

【16】小山先生有道。昨晚奉复示。敬诵悉。承假后村大全集十册收到。谢谢。已校两卷。与敝处一部颇有异同。拟一一校录于上。沅叔昨晚在此尽观近得各种。颇惜先生及培老均不能来。拟俟天气晴和。当再奉约。抄本续墨客挥犀一册附去。乞察收。敬颂著祺。张元济顿首。十二月九日。

近又收得春秋经传集解宋刊一部。略有残缺。所难得者来自东瀛。而又为涉园故物耳。

致沈曾桐 子封

子封老前辈大人阁下。春间道经羊城。获聆教诲。欣幸无似。别后海程一月有半。始达英伦。其中以印度洋为最平稳。每日登船头。观飞鱼游跃。向晚日落。余霞成绮。尤为奇景。入红海后。气候极凉。渡苏彝士时。夜半须披重裘。迥异乎昔之所闻也。欲至开罗不果。在坡赛登岸。道弗可行。知埃及之不国矣。地中海无异大洋。欧人谓波蓝天蓝。其语诚信。过支布洛达适当夜半。然两岸灯火相望。偷渡不易。英人设险守国。真不可及。舟出大西洋。经比司开海湾。波涛极恶。然元济起居一如常时。亦大幸事。先绕道至荷兰。抵安蒙士达丹。舟行运河间。凡九十里。舟人云四十年前此运河之地皆海也。今皆为腴田矣。友人谓荷兰人能造造物所未及造成之地。荷兰人闻之。亦甚自负也。至海牙游一故宫。中藏吾国绣货雕器极多。云系纯庙赠彼国君者。荷兰通中国最早。事当不诬。访平和宫。版筑方兴。未能入观。殊以为憾。到伦敦后不数日即遇英王之丧。先一日元济偶经其宫门。见民人之踵门问疾者。络绎不绝。医官频频宣布病状。闻一凶讯。则嗟叹之声相续。立宪国君民之相亲固如是乎。彼方国丧。游观不便。故先往爱尔兰。爱岛故号贫瘠。然其都城之大学有学生至千二百人。贝尔法士某船厂能造世界最大之舰。（济曾往观。闻能载重四万五千吨。）则亦未可轻视。英行强迫教育。仅二十余年。元济专考其初级教育之事。乃知仅言兴学。学固不能兴也。财政警察交通。无一事不相联者。未知何日吾国始能几及。为之浩叹。旬日后即赴比国。观博览会。然后至瑞士避暑。天气稍凉。尚欲至罗马一游也。拉杂书此。言不尽意。敬承起居。 馆侍生张元济拜。 宣统二年五月十八日。

致汪康年 穰卿

【1】 穰卿我兄同年阁下。去春得惠函后。又于伯唐处读手书。知弘农之不可交。荷君相爱。衔感无极。自愧学业罕进。不堪为故人道。故迟迟未复也。前月又得一书。借稔近状。时弟将赴津迎母。归来又为内弟襄办喜事。俗冗纠缠。为之不快。稽滞者又两月矣。疏懒之病。惟阁下鉴之。前年交下会计稿本。查缺贵州一省。慕韩已归。无从询取。后将丁漕厘税数项编出。其中条目。愈出愈歧。且亦繁寡不同。分合莫辨。慕韩于去夏北来。急欲取还各件。据云贵州一省原未抄得。窥其词气。似难久假。弟思既不完备。又欠整齐。即勉强成书。亦归无用。故遂还之。我国家度支之数。其户部所掌者。盖亦一真而九伪矣。吾辈识之。亦何所用耶。书局之开。是吾华一大喜事。浮云蔽日。旋即消散。寿州闻尚有心。弟曾有书上之。后屡谒而不得一见。观其行事。亦终难扫除朝贵气习。所刊局报。多系芜词。阁抄格言。最为可笑。洋报偶有微词。译署原文咨送。均被删削。其人如此。概可知矣。昨晤伯唐。谓尊处报局粗有章程。并云译印在即。必能出此间万万倍也。鄙意新出紧要图籍。尤宜从速译印。质之尊意。以为何如。今之自强之道。自以兴学为先。科举不改。转移难望。吾辈不操尺寸。惟有以身先之。逢人说法。能醒悟一人。即能救一人。弟此意颇为卓如所许。兄固具大慈悲者。尤望有以教我。弟近读公羊。兼习公法。才智太短。进不能寸。惟志在必成。断不中止。英文已习数月。仅识数千字。而尚难贯通。前月业已从师。拟即日迁寓馆中矣。所学不过如此。务乞教我。至恳至恳。卓如想常见。曾惠我新学伪经考。希为致谢。匆匆不另

作函。外事一无所闻。回变恐成不了之局。然亦无确音也。容再详布。肃颂文祺。 四月廿七日。

【2】 穰卿我哥同年。夏间肃奉一函。计达左右。朔风戒寒。伏想起居佳畅。时务报读过八册。崇论宏议。以激士气。以挽颓波。他年四百兆人当共沐盛德。此举诚不朽矣。友人自南来。历述贵馆创始之艰。尤足见吾兄之足以任重致远也。钦佩。钦佩。近得见公度观察。言论丰采。令人心醉。闻有简使英国之信。朝廷用人果能若此。或者邦交其尚可恃乎。弟本无聊。姑应译署之试。今竟记名。深恐一入樊笼。将来必成废朽。远游夙志。至此益坚。凡鸟固不可与伍。而择木亦不可不慎。公度诚可与共事者。而又不肯假压力以相轻也。刻下行止。尚难自定。聊抒胸臆。以当晤谈耳。近来尊况如何。报务之外。有事著述否。卓如赴粤。何日言旋。归时乞致意。穗卿一函附去。并恳转交。贵报尝译东京日日新闻暨时事新报二者。友人颇欲购阅。可否即托贵馆古城先生代办两分。该值即由弟处汇缴。敬乞转商。至恳至恳。(事倘可行。到后即附贵报寄京可也)手复。即颂文祉。 弟元济顿首。十五日。

少棠兄信一件。乞转交。又托。

【3】 穰卿老哥同年惠鉴。得十月廿七日手书。诵悉。承注感荷。感荷。公度事忽中变。今虽已白。终不复行。弟有成约。亦只可作罢论。今日之事。苟欲稍异庸俗。彼苍必多厄之。天变盖可知矣。卓如知己返沪。闻将有美洲之行。任公非真能爱才者。渠意未知如何。若果能尽所长。先与约法数事。则为大局计。为卓如计。均属有得。公谓何如。请为我告之。来书谓日夕忙迫。尚有余闲自课否。时于报中得读大著。令人奋发。闻外人有译观者。未始非扶持残局之一助也。弟习英文尚无所得。第亦不觉其难。现同志日益。愿来学者已有二十余人。明年拟于天津

聘一教习。常驻馆内。学舍亦已赁妥。简始梅夏。酌定章程数十条。容后录呈台阅。强学复辙不远。一切概从静晦。想不致有意外也。沪上为新学枢纽之所。倘有贯通中西文字。兼知他项西学。而言行不苟。足膺讲席者。愿岁以五百金为聘。公其为我留意。附致少棠一函。并鹰洋拾枚。请转交。另书目一纸。请托少棠一购。弟由家拨款至沪。(将来由万通酱园交呈伍拾元。即请查收可也。)一时恐未能到。需费不资。不知能垫付否。或先择有圈者购之。亦可。津河冰解。即乞觅便寄下。公夙具菩提心。亮不以此见责也。风雪严寒。不克多述。复此。敬叩年禧。并颂文安。

弟张元济顿首拜启。十二月十四日。

任公均此致意。惠赐西学书目表。谢谢。

【4】穰卿老兄同年。去腊肃奉一函。并附呈洋银十元。计达左右。春日至今。其象更新。天时人事。必当相应。君与卓如固宜首任之。以新此世界也。卓如闻缓行。然否。贵报久不来。能否设法邮传以饷阅者之望。五十元曾否交上。弟已函催速拨。同人准于十一日开馆。三纯文法待用尤迫。津河开冻。能觅便速寄。尤感。他件若全数一并购寄。最妙。学舍规模粗具。同人欢忻踊跃。或能有成。将来需用图籍。俱拟求尊处访购。执事夙宏救世之愿。想不以此责我也。前书请觅教习。务望留意。近来西报议论若何。风便。祈示我一二。报中想未必全载也。专此。即颂文福。弟张元济顿首。正月初四日。

卓如前函云将以数百言相贶。望之切矣。何尚不来。乞为我速之。卓如少棠两公。均此道念。

【5】穰卿仁兄同年。去腊十四日新正四日二月二日。迭寄三函。计均达览。又属万通送呈洋泉六十元。得其来函。知亦交到。津河冰解。友人南来。询知近状。借以欣慰。恳购书图未见惠寄。亦未得公一字。颇为悬企。如无妥便。乞先将三顺文法书

交邮局一寄。馆中需用甚急也。卓如赴鄂。比已返未。简桴将南。容再详布。附函希转交。即颂文祉。弟张元济顿首。二月十二日。

【6】穰卿老哥同年。新正四日曾肃一函。计荷垂察。比来起居何如。甚念。前托万通交呈洋泉十元。未知已收到否。兹又由家乡筹拨捌拾元。仍托万通带交。敬乞察收。学堂小有规模。需用图籍颇多。兹又开呈一单。请为代购。觅便寄都。前函恳购各件内有三顺文法及各图。待用尤迫。此时刚直开河。北上者众。务恳即觅一便寄下。至恳。至恳。款如不敷。请代垫。即寄缴。若有余。请存兄处。尚有续恳也。美使伍公有翻译周子诒者。(山东人。久居粤东。)闻其不欲随往。不知尚归同文馆否。如其来归。同人拟延之入馆教授。公倘识之。请为我递一消息。(每天半日功课。月修卅金。)并参以活笔。缘此意亦未大定。任公美洲之行闻已中止。确否。七十老翁之脑髓筋竟有所为感动者。请为我告之。都中依旧太平。士夫争以恒舞酣歌为事。德使觐见。竟出文华殿中门。敬子斋一牵挽之。拂袖而去。次日复以无礼责我。而译署竟为之负荆。可叹可叹。琐事屡渎。抱歉无似。然非公亦不敢以此相干也。专此。敬请撰安。弟张元济顿首。

任公均此致意。琐事丛集。不另作书矣。

少棠兄并祈道念。

附信一件。请飭送为荷。

【7】穰卿我兄同年。初旬由邮局递呈一函。计当达览。昨日得电三十一字。敬悉。杨吴两处容转告。闻彼处亦已派报。尚未全耳。弟向由周节生处取阅。十六七两册未到。邮程稽滞。亦常有之事也。知新报弟与夏虎臣拟各阅一分。请代登号。仍寄节生转交。报资亦即交彼处寄奉。前恳代购东京日日新闻暨时事新

报。得君书。谓已函订。如已寄来。并乞附时务报寄下为荷。洋文图籍未知购得几种。日来想已在途。尤为企盼。琐事屡读。无任悚歉。敬复。祇请著安。弟张元济顿首。

任公少塘两兄。均乞致意。

【8】穰卿我兄同年。盼君书久矣。前日忽奉到大札。开缄雒诵。如相晤语。快极快极。应复各节。如命条列于左。一。来书深以迟答为憾。何必如是。兄事太繁。弟深知之。幸勿自责也。嗣后有事相托。即仅复数言。亦无不可。一。此间学馆名曰西学堂。已呈请译署备案。来学者已有二十余人。报名者尚络绎不绝。都人士尚无异辞。但能支持一二年。有数人稍著成效。可望长久。如晤简始。可详询之。一。此间只有常驻教习一人。帮教一人。系同文馆学生。因添早课。不能兼顾。故以奉恳。廿一发去一电。计十三字。廿七又发去十二字。计均察入。近日简始想已到。当必代订定矣。同人延盼甚切。如已定。请速驾。一。托购格致等图(除天文图百鸟图已购外。余均请代购。并图说各一册。天文图说二册。百鸟图说一册。)并各种书籍。如兄事太忙。或仍托少塘一购。已托友人拨付卅元。再送尊处。不敷允代垫。甚感。遵缴。一。馆中需用各物。蒙允代办。公虽不厌其烦。而弟终不胜歉仄。其何以为报乎。无已。则请励同学以副公望。一。公度事德意诚已转圜。惟不肯认错。索埠头之说有之。此事藕虽断而丝仍连也。一。公度为人。诚如公云云。即后幅之所评者。亦甚确。弟不能尽识。而识者固如是矣。弟尝言吾辈今日做事。但求有益于人。一己之身名。可勿爱惜也。似与公言相合。一。卓如病痊。近已愈否。乡人有年逾七旬素称守旧者。读其文且慕之。且赞之。其摄力何若是之大耶。阅报者仍注意前数页。而后载西事均不甚留意。亦可叹也。一。公所心赏之人如有来京者。请为先容。并畀我一函。当往访也。一。德使之事虽是无礼。然

其咎仍当归之译署。盖事前并未送仪注单。田贝为领班。向译署索之。乃仅复以照旧一言。一署数十人不知所办何事也。现诸使并欲于东华门栅栏内下轿。向译署力争。而恭邸乃曰此吾侪下轿之地也。彼辈何能至此。人之待我若此。而我之自待又若此。何夜之长而梦之沉乎。一。日本来询彼国太后之丧。我皇持服否。事诚有之。浅见者引为百世之耻矣。然彼正非无礼。去年醇王福晋薨。各使臣以何日下旗询诸译署。而各堂曰此必须出奏。然奏则东朝必不乐。不如拒之。则人固未尝无礼于我也。今日已为列国之世界。而在朝诸人胸中横梗一统二字。宜其措置之乖也。一。俄索文张安锺诸人无所闻。一。伯唐不随张使英。并不常见。渠已迁寓东城根仁钱试馆。相隔太远。伯唐身为馆羁而不能遂其所欲。甚矣。贫之为病也。一。公度常相见。意兴尚好。道缺已屡见。仍不能得上意。正不知如何。一。都中无甚新闻。惟内廷招集百人。日钞戏本进呈乙览。外城气象已复太平。团拜演戏日有所闻。若深恐其不可多得而故纵其欲者。事变之来。盖不远矣。一。杨子通有密折入告。谓俄人包藏祸心。数年内必大举。一。东报一分。系友人托购。半年价值邮资是否洋泉十一元七角六分。示知。便转告。该款即由弟处扣还可也。一。上海发售图籍之洋行共有几家。其所有图籍能乞其一目否。一。贵报宜亟于西北各省广求销路。尊意以为何如。一。闻杭州已改东城讲舍为学堂。以张燕孙陆冕侑董其事。二人何如。能任事否。公志果成。可喜也。请安。弟元济顿首。二月廿九日三鼓。

任公处不另作函。乞道念。少塘一信。请转交。拜托。拜托。

【9】穰哥同年。二月廿九日肃寄一函。计当达到。建斋来交到手书并东报。敬悉。费神。谢谢。谨各条复于左。一。建斋人极开爽。亦力求振作之党也。彼已捐大花样知县。又多一好地方官。快。快。一。来渝所询俄人阻各国假款之事。无所闻。（前复

日使因其国丧来询我皇是否持服。亦无其事。惟讣告而已。)一。前月十八日寄来一函。早已收到。前月廿九日所寄一件。即系复函也。一。知新报迄今未见。时务报(二十册)云附送。何不来。同人盼切。一。农学报请挂号取阅三本。一夏虎臣。一夏棣三。一系弟自己。仍由时务报附来。交周节生转交最妥。报费亦交节生寄上。一。第二单恳购各种图书。格致室无之。请于广学会及洋书坊一询。天文百鸟百兽暨光电水热各种一切图说。均系益智书会本。谅必有之。请代购全分。(惟天文图说需两分。)至各种图。如沪上无之。可否即日示悉。当托友人在外洋购之。一。简始到沪。仅来一电。云教习难定。候信详。然信竟未来。未知何因。此间现有一人。当可定局。张兼三现仍在沪否。抑往他处。简始谓难定。则必未曾与定也。吾兄无来信。则尤无疑矣。惟明年仍须另请。求缓为留意。一。此间既有两位常驻教习。而学生尚未足额。功夫尚闲。拟于午后翻译书籍。惟京师无从得书。兄能为我觅几种否。篇帙不宜太多。取其易成也。宜政事一门。(最妙莫如国会章程及泰西各国条约。)彼此通行。指现时言之。取其有用也。专属英文。为教习所习也。此事乞与少塘一商。如有书。请由邮寄。一。卓如患疟。近已痊愈否。为我道念。一。贵报所译地名。每无一定之字。能熟外国地理者能有几人。似宜留意。乞裁酌。一。公度拟于月内出京。然尚未定期。目前尚未递呈。如此人材。置之闲散。更何望乎。一。简始到沪必已晤谈。其人公谓如何。一。子培署同文馆提调。差强人意。一。恳代购书籍及简始代买纸笔各物。请仍附便寄下。(前托其寄存尊处。)一。敝馆来学者益众。可以告慰。惟真用功者亦不多得。则尚有憾耳。一。已托万通再行筹付洋三十元送尊处。如送来。请查收。余续布。请安。弟张元济顿首。三月十九日早。

【10】 穰兄同年。十九日发一书。计当达到。昨得本月十一

日手书。诵悉一是。谨条复如左。一。盛办事不妥。都中亦有人言之者。惟在上者深信不疑。询之军务处人。一切已置之不问。盖以为切实可靠矣。来谕谓非意出于翁。恐未必然。一。赫之用心叵测。知之者多且久矣。然今方倚以为重。明知尾大将不掉。而故苟安于目前。奈何。奈何。一切容探闻。一。荣公闻尚有血性。亦颇知外事。然旗人习气。终未能免。且所接者。无非昏愤之徒。亦难望其有济也。其人揽权纳贿。素所不免。夫纳贿而能揽权。固为今日之人材矣。惜乎。其所揽之未当也。一。马眉叔之于西学。弟早知之。亟欲一见。来谕云云。弟可决其无益。芦汉铁路。朝贵斤斤于洋人附股一层。观此可知矣。兄谓何如。一。彩票一事。究觉名有未正。吾辈今日做事。摘瑕伺隙者。不计其数。少一不慎。即为所毁矣。岂惟仇我者有然。即自谓趋时者。方其半明半昧时。于此等事。亦必致触发其旧毒也。此时筹款。真无善策。惟有示人以可信而后再求人。或尚有济。时务报馆之所为。盖先得我心矣。一。格致化学等学会。其名甚美。而其实未必有益。盖此时尚嫌躐等也。此时急务。总以鼓动人心为第一义。贵报已膺此任。其次即为培植人材。兄有志于学堂。宜即开办。不必待来年也。来日苦短。何可再因循乎。一。力顾大局数策。极为有见。然能与言者。已不可多得。况行之乎。有难行者。有可行者。敢贡愚忱。伏祈指示。一。保全局一条。必同志有多金者。有居高位者。然后可图。多金者或有之。居高位者必无其人也。则难行。若仅赂要人。使同志能办事者速得大权。则无不可。一。第二条。苦无资本。则垦荒难。隔阂不通。则结外援难。义民多系虚骄。不足与有为也。且无事之时。亦不可得见。事亟而已无可措手矣。则此事又难。一。第三条最为上策。然十八行省。谁能当之。南皮诚俊杰矣。其能见及此否乎。若仅捐道府。恐仍无用。一。第四条即吾辈今日所当办之事。无论其

成否。惟尽吾之心力可耳。一。吾兄办事。从报入手。最为中肯。今天下未尝无有心人。苦于隔而不通。散而不聚耳。今渐通矣。聚矣。凡有同志。或至馆相访者。或以文字相赠者。吾兄宜加意牢笼。毋使倦懈。始则观听系焉。继则臭味洽焉。终且为我所用矣。一。贵报似宜多论西人有益之事。以歆动群伦。一。任景丰售报。渠自言仅得四五十份。每份年值京钱四十吊。合京银三两二钱有奇。似乎少昂。又闻人言。渠亦言。京中销路难广。一。学堂中并无司事。且熟人中都已有之。销售较难。如必欲见委。或请先寄十分来。当徐图之。一。知新报亦大佳。惟嫌其太无含蓄。非不知作者苦衷。欲自附于忠言药石之义。然明者不言而自知。其半明半昧。忽明忽昧者。以此入之。每易激其回护之私。而坚其退阻之志。其仇我者更无论矣。且议论时政。(如记铁路事)臧否人物。(如载公度事。)均足以触当道之忌。于事仍无所济。且此事等寻常报中类能言之。鄙意莫若不载。京外近事并上谕。亦皆删去。专纪外国新政新学。似乎较有裨益。虽与原订章程不符。然天下事贵求其是。不患其变也。兄如谓然。请转达为幸。该报似不宜于都中求售。恐反累及贵报也。一。农学报如搜采赅博。译述详明。弟当代为销售。请酌行。一。洋务实录。当觅弢夫一询。杨吴处当并告。一。不发抄折件拟托人代抄。惟尊处已得不少。恐致重复。徒费无益也。一。密要事如有所闻。必当奉告。惟弟不好与熟人往来。即有所闻。恐亦不实。兄视为道听途说可也。一。来函请寄厂甸最便。私拆夺观均无虑。一。公度欲兄离报馆。前曾微闻其言。云兄只可专总大事。而一切琐事宜择人分任之。并无贬词。其口气甚欲吴铁桥入馆办事。一。学堂教习。现在都中已有眉目。惟尚未大定。经费太绌。兼三未能遵聘。费神。感谢感谢。一。另单开列中西书籍。请代购。其西书需用尤迫。洋字书名系文法。如无其书。请择其同类者购

之。毋太浅。并三顺文法五册。请先由邮局寄下。至禱。至禱。一。此间有教习两人。日有余闲。拟令译书。兄处有篇帙无多而适用者。祈假我数种。并恳速寄。若于京城觅书。大难事也。一。同学有二十余人。另纸开列。翊高刚甫。均不可多得之才。惟不免溺于旧学。勇于从公。致于西文一道。等诸游戏。弟淳劝再三。未能动听。卓如善于说法。曷请其一运广长舌以作棒喝乎。请为我恳之。一。广西百色有教案。闻死一洋人。失三洋人。法使仅来相告。尚未开议。一。法求开铁路至南宁百色。并开通往滇之路。英使又来言。法如得格外利益。英亦必续请。循生迭起。其有已乎。一。澍贝勒之事。并无大过。闻出自东朝之意。盖欲有所警也。(澍固为人后者也。)一。邹译地图股份。弟曾购一分。系 414 号。价已交吴铁桥。又代售唐蔚芝 461。罗小山 463。颜伯勳 464。杨海筹 465。邵季英 466。并援例取半票 123 一张。共值一百五十元。或银或洋。日内当可收齐。即交李孟符处。(月内准交。)因票由彼处交来也。公会有四月望截止之说。祈为查对。一。贵报一分。学堂中亦已收到。谢谢。一。公度前欲出京。闻各贵人多留之。未知何意。渠行止尚未大定也。余续布。请安。并候任公少塘。弟叩。三月廿五日。

【11】穰兄同年。前月十九廿五日迭寄两函。想都到。迭接廿三廿六日两次手书。敬悉。知兄将北来。故不及复。今已半月。而台从未临。大约因事中止矣。承询各事。条复于左。一。胡府尹以义赈诸人。侵州县之权。确有之。杨之劾否。则未知。一。盛奏铁路里价若干。未得其实。一。中俄密约确凿无疑。其条目无从探讯。当时有阻翁之定义者。翁曰。时势所迫。无可如何也。每与居高位者谈及。似不以各报所译者为非。盖可知矣。一。许竹簣监造东北铁路。简放已久。驻俄。无其事也。一。土药税现在已飭查。历年所入之数。上已有飭赫包办之意。司员中

尚有争之者。亦未定也。一。赫代借千万磅及索赔邮政费三千万之说。均无之。一。俄已设邮局于东交民巷。银行则设于四驿馆。其欲夺盛铁路事与否。未有闻。一。延教习事。前函已详。敝馆现已订定。明年尚须另聘。还乞留意。一。嗣后兄如发电致弟。住址用北京涉三字。已向电局挂号矣。(以上复廿三日信。)一。次亮来京不过三日。弟已闻其有毁吾兄之语。其时尊函尚未到也。此人素不相识。后有所闻。必为力辩。台从能进京一行。尤妙。尤妙。一。来谕云卓与陈李开公论报。弟揣其名。似已不妥。时尚未至。恐损多益少也。盖为卓如言。并达鄙意。一。知新报已收到。第九册以后请属该馆径寄。一。少塘来信代买图书。吾兄共代垫四十三元七角九分。弟款久划不到。已属万通先行借奉卅元。余即筹还。决不迟误。东报(二分半年。)知新报(二分一年。)农报(三分一年。)共费若干。统乞先为代付。一并奉缴。一。前函妄论知新报事。未知尊见以为何如。一。闻有董绶金名康者。常州人。在贵馆选译洋报。云用功不及一年。并无师承。居然贯通矣。然否。一。京城拐案迭见。谣言谓教堂不轨。不知能消释否也。一。召吕镜宇至京。人皆谓有简使德国之意。一。前悬代购墨子闲诂一部。乞惠邹译地图样张一纸。便时寄下为盼。请安。卓如少塘两公均念念。弟元济顿首。四月十三日。

【12】穰卿吾兄同年。前月十三日寄复一函。计当达到。四月廿五日方燮尹来。诵手书。敬悉。天文图四幅。又中国一幅。图说九册。洋书六本。均收到。燮尹又云。台从即日首途入都。今又二旬矣。尚未见临。企盼无已。亟欲与兄畅谈。姑先寄一函。然不能尽所欲言也。一。不发抄折件前商诸枢廷供事。云当设法。兹又催之。乃直言事有未便。稍关紧要。渠等亦不克见。允酬以资。亦谓不能。章京中无可恃之人。此事不能报命矣。愧极。愧极。一。俄使到京。无甚新闻。闻有铁道改路之请。然未得

其详。中俄银行已于前月廿六开张矣。一。俄使到京。各津要均有馈遗。厚薄大不相同。约视其人平日之廉否为断。廉者则薄之。否者则厚之。时哉。时哉。其馈东朝之物。亦较厚于皇上也。一。农报已到。同人极为称赞。盖非我公主持其事。乌能臻此。一。周节生已丁内忧。奔丧回籍。其经手各报现交该馆长班派送。云至六月以后即不复经理。弟前承淳属。亟欲效微劳。然不知节生账目已经清楚否。果一无蒂欠。弟可接办。请惠我一函。以便告知阅者。且不宜迟。迟则各阅者知节生已行。必另行订定矣。如不能与节生画然两截。则弟亦不敢承受。以节生已行。一切无从询问也。公谓然否。一。买书款共寄尊处九十元。除还去年五元外。共得八十五元。少棠经手共九十五元五角四分。原开九十八元七角九分。今日得渠信。云误开三元二角五分。除扣还尊处外。尚欠十元〇五角四分。又知新报两分。(计一年。)东报两分。(计半年。)图说九册。洋书六册。统共该洋若干。请示悉。以便汇缴。(尚有天文地理歌各一册。)-一。东报早已到京。此本系夏虎臣所托。彼固不识东文也。此后不复阅。已径函知该报馆矣。一。地图股价已交与李孟符。另函致公会。请飭查为幸。闻孟符人甚迂缓。该款如截止之前尚不寄到。无碍否。请斡旋为幸。一。来函谓怅然者久之。然意尚未绝。果教习之事欤。只可俟诸明年矣。一。不缠足会意思极佳。然刊册选董。毋乃过事张皇。此日人智渐开。贵报更剴切言之。自能令人兴起矣。然否。一。农学尤不可空谈。沪上诸公果何以征其实效。题名者皆为会中办事欤。一。时至今日。培养人材。最为急务。以公之能力。何不速开一学堂。似收效比诸事为大。公前函亦已言之。何至今未成也。一。铁桥作古。闻之痛心。其人真不可多得。而天复靳之以年。岂吾道之不昌欤。果因何病。歿于何所。尚望示及。一。邹图既出。贵报可否全用其地名。阅者固易醒目。而该图亦可畅销于今。不

朽于后矣。全图不即出。可否请其先成一全球地名表。此亦留心译事者所当加意也。请酌行之。一。公果何时能来。同人见时无不互相询问。公何惮此一行乎。一。公前函谓次亮木斋劝卓如开公论报。迄今未见。其已罢论欤。次亮迄未一晤。然近来无毁公者矣。一。敝馆比来渐生魔障。弟惟以坚忍持之。不知果能抵制否。盖自有考差乡试而云雾迷蒙。几无复能见青天矣。伤哉。比来俗事丛集。心绪恶劣。书不成字。祈勿责。请安。弟张元济顿首。五月十六日。

【13】 穰卿同年。前月十六日寄一函。计达到。前月杪接十七日手书。敬悉一切。谨条复如左。一。寄来各函均转交。马函仍封入刘信内。马君已见数面。西文甚精。惟于初学之门径。似不甚措意。现已迁居城内柴火栏矣。一。魏冲叔交来洋书两包。计文法六十本。又少塘所假者二本。另万国公报两册。谕旨四本。善书一部。未知何用。请示悉。(万国公报书后有一纸条书陈杏孙收。是否即交杏孙。)一。邹印舆图头批已出三十册。时务报云各人自行持票赴沪领取。都门购者不少。可否觅便寄来。由经手人填票给领。候示。一。弟处代售五分及半票一张。该值均已清交李孟符。惟第三十册贵报未登号数。购者颇来诘问。曾指贵报告白中。定票未付银者。即缴价领图数言告之。孟符想决不至误。请斡旋为幸。一。四月杪托万通酱园送上洋泉三十元。已得贵馆收条。惟来书未曾言及。敢询。一。弟处托购图书报三项共应缴还代价若干。请查示。附去清单一纸。请核。一。卓如来书云藏书楼可成。又设局译东文书。甚善甚善。然学堂尤宜亟举。已于卓函言之。请取阅。贵馆闻已译成数书。何尚未印成。盼切盼切。一。属抄不发抄折件前曾托一枢廷供事。后又来言不克报命。前函似已言之。然记忆不真。再告。一。徐桐新上一封章。极诋新学。大致谓文体正则人心正。张仲忻又有严定磨勘之

议。怪乎不怪。一。盛杏荪所办之事。台谏多有劾之者。然恐难动也。一。常镇道不以畀公度。而以畀一三十余年之老章京。恭邸用人。可谓怪极。然为公度计。则甚得。湖南固可为之地也。一。公言北来已有数月。何迟迟不行乎。尚有余暇能践前言否。企盼不置。一。敝馆近来阻力环生。几不能支。致卓如函言之已详。有何妙策可以维持。乞赐教。至幸。弟张元济拜上。六月初六日。

再贵报第二十九册第十二张阴页。勃而甘利阿及奥惟阿及罗马尼亚等岛。似误。鄙见所及。不敢不告。乞垂察。

【14】穰卿同年。六月六日寄奉一函。计达览。善戴二公交来两次手书暨外信十一件。书两包。均收到照送。惟毛笈骸不知何人。无从投递。请示悉。一面仍当探问也。各事条复于左。一。节生经手各报。弟已出一知单。询问是否接阅。大约接者少而不接者多。售报章程已见第三十一册。如有专章。请寄示一份。一。缩印报本属为代售。必效劳。惟恐不易售。为欲读者都已购得原本也。此宜多发往售报最后之处。其销路必旺。兄谓然否。一。李孟符性极迟缓。已屡催其将图款寄上。闻渠尚未汇呈也。弟经手各分已纷纷来问。兄允为留起。甚感。惟不知能托便人带来否。续款仍交李孟符。抑或由弟径寄。请示行。一。来书云开学堂已定章。三十二期报必印。是否。农学堂。此事收效迟而大。惟创之较难。祈努力。切恳切恳。敝馆虽不得谓之学堂。然究系已成局面。若竟中蹶。恐难复振。此事亦与公度商之。渠曾劝以坚定。将伯助予。兄其许我乎。一。滇桂两省铁路并未与法订约。不过云俟后日察勘情形。如必欲兴办。当专延法人为之。是虽免目前烦扰。而已种后日之根株矣。此亦衮衮诸公之故智也。伤哉。一。来书云同年赵仲寅来。未见其人。乞详示。当往访。一。洋务实录。子培处有同治一朝。书约有百余册。咸丰朝则无。有

光绪朝。子封云曾稍稍见之。亦可想法。须从缓。兄前已抄同治朝廿余卷。弟意不若续钞。惟已抄卷数请将目录开示详晰。以免重复。子封云钞费每本约须一金。弟当觅人办理。务从撙节。至于校勘。则原本已错谬不少。入内检查。恐做不到。亦子封所云也。贵老师处所有者。子封云亦系同治一朝。然则不必往询矣。经费不必寄来。售报费可留用。不足或将弟经手五分地图应续缴之一百元扣留若干。何如。统候示行。一。巴西招工。自是美事。前秘鲁领事许九香为弟言。巴西招工意甚迫。若不允。仍私自招去。所以不允者。恐其虐待也。私招而虐待。反无道以保护之矣。则何如辟此途径乎。此言甚确。惟译署办事总以清净寂灭为主。其奈之何哉。一。不缠足之关系。朝老岂能见及。无论言官。必不肯言。即言之。朝廷亦不过付之一笑而已。鄙见如此。兄其察之。农会奏请。或能有成。以此事近于生财也。今之所急者财而已矣。其所以表里之者。不知也。故日言理财。而财终不出。犹之乞人。日乞于途。而不能自饱也。哀哉。一。初学书不可不急撰。问答体尤宜。歌诀只便幼童。再进则非所急。中国史书舆地宜亟编。不能不为后来者一乞大君子之手援矣。一。甸臣函语。并无所碍。已缄送。甸臣固讲官学者。弟谓其未必真有心于世事也。一。琼州事有人云赔三十万。法人何以为辞。容探闻。一。密电一册收到。谢谢。一。译署雇比人。系备顾问。每月七百金。其官阶名姓未悉。闻数月以来。堂司均不在意。有事派学生一人。略加询问而已。就令有才。其何所表见乎。一。杨公密折。京中言之已久。裕公则无人道之。容探得再告。一。尊处已译有数书。何不速印。弟意译成一书。必仔细推敲。其稍有疑难之处。必与原译者悉心讨论。务祈明白晓畅。方为有用。此事果谁任之。兄尚能兼及之乎。一。前函开呈购书清账一纸。请核示。为荷。弟明日拟赴津。旬日必返。并告。天时酷热。祈格

外珍重。 弟元济拜复。六月十三日夜。

卓如均此。

【15】 穰兄同年。弟于望前到天津。游览各学堂已毕事。明日将返京矣。读三十二册时务报。知尊处代售湘学报。久欲购阅。苦于末由。今得此信。为之欣跃。请代寄一分至京。从第一册起。该价乞代付。将来总缴。余续布。即请道安。 弟张元济顿首。六月廿四日午。

任公均候。

【16】 穰卿同年。前月初八日寄一函。廿四日在天津又发一函。计已达到。抄书事（洋务实录）即拟开办。请将抄过卷数示知。以免重复。东京日日新闻。友人只拟阅半年。而该馆仍源源寄来。（去年西历十二月初一日起。应于今年六月初一止。不谓该馆已寄到七月十六矣。）如吾兄未代付下半年资。请即代为告知。速即停寄。（报资即续付至能停止之日。）如已付资。则尽此半年。以后不复阅矣。费统示遵缴。时事新报则专函来询。弟早已辞之矣。吾兄大约未必来京。前得任父信。谓将入都。今不见到。岂亦如公之中止耶。感冒甚剧。不多述。即颂台安。 弟张元济顿首。七月初三日。

公度先生如未回粤。并祈道候。

任公均此。

前来各信。均已送去。毛筭陔住虎坊桥。亦将信送去矣。

【17】 穰卿我兄同年。七月初三寄一函。计达览。委抄洋务实录。已经觅定一人。即请将已抄卷数示知。以便开办。委接节生手代派贵报。必当效劳。第三十四册（如周数）请即从速寄下。以便分派。售报章程亦请寄我一分。盼切盼切。匆匆不多述。即请台安。 弟张元济顿首。七月十一日。

任公尚来京否。乞示为幸。

【18】穰卿我兄同年惠鉴。日来碌碌。半月未能上书。甚歉。甚歉。迭奉初一十九两次手书。敬悉一切。条复于左。一。杏孙书件早已送去。毛信亦早探送矣。一。来账有漏抄者。有重出者。弟另抄一纸寄呈。并附还原账。请核示。家中有一款。约九月可以收齐。当即托人送上。以清此欠也。一。地图已到。另有一纸复令棣。一。密折终恐难得。未入总署。恐无以报命也。委觅访事人。亦无能胜其任者。除枢译两处外。无论无知之者。即知之。亦恐未的确。使我以重利饵之。而彼以空言了之。又将何如。一。委抄洋务实录。前已商之子封允借矣。弟已觅定抄手。吾兄书到。拟往取书。而子培忽尔不肯。云此书前为康先生及卓如借阅。散失不少。至今言之。为之痛心。此时不欲授此书于人。弟再四恳商。竟而不允。并云此书已残。抄去亦无用。属将此言告兄。兄其将何策以处之耶。教案交涉。本拟与之一商。因此又有未便。只可从缓。此外竟无可托之人。孟符颇有新意。而办事迂缓。终归无用。伤哉。一。王弢甫处屡访。终不得见。俟晤谈后。再奉复。一。卓如去杭。果为何事。同人拟议必外有大阻力相加。而卓故见机而去。然欤。否欤。此间颇有人言公与卓意见不合。彼此参商。卓果避去。弟大不谓然。彼此同办一事。意见岂能尽相符。辩论之处。终不能免。然终不当以此贻误大局。稍有识者且能之。况兄与卓之日讲群学者乎。守旧之徒。方目吾辈为无成。果无成。为彼类所笑。患犹浅。使外人所笑。其害不尤深乎。甚愿公与卓之一雪此言也。闻香帅拟设鄂学报。杭州出经世报。均与贵报为敌。此何足惧。卓亦当不为此。然阻力之来。竟有出人意料之外者。夫欲成一事。阻境愈多。而进境亦愈广。西人知之。故日进。中人一遇便缩。故一事无成。卓岂不知之。而何以故蹈之。此事真令人索解不得矣。尚祈详以示我。一。东南人材。当无不在兄夹袋中。何来书屡云不得其人耶。天

下事可以分任之。其不尽如我意者。只要大致无差。俱可听其自为。久之必有效。公谓何如。一。夔帅月助敝馆百金。甚属难得。现在严定课程。添购书籍。招募幼童入学。明岁拟请常住教习两人。愿以千金聘一英汉俱通者。(须明教人之法。)不知能否。公请为我留意。至恳至恳。一。常熟近颇失东朝眷遇。为盛铁路事也。南海使美貽穀劾其跋扈。总署亦不以其赴俄为然。一。公度现已赴湘否。履新否。其日本国志何时可以寄京。盼切。盼切。一。卓如赴杭。果谁为替人。抑卓仍遥领。乞示。一。兄前云拟设一藏书楼。现已成事否。所藏者中书欵。西书欵。尊处必有西书目录。可否惠假一阅。阅后即寄还也。敝馆亦欲稍稍买西书。而苦于无所知。教习又不能言之。伤哉。一。又有西书两种。拟请转托李一翁再为访购。价值一并奉缴。此亦馆中所需也。待用甚迫。速惠尤感。一。来书云宁人以土机织倭布。寄来样六种。未见。想装箱时忙迫。未及检视。能补寄否。一。农学报京中尚能销售。都人士多以为然。谓为实学。亦可喜也。弟意此事。不可轻于尝试。必须实有把握。方可示人。否则。一蹶不可复振矣。中国昔日之言西法者。皆坐此病也。报言有人捐地千百亩令试办。故言之。公谓然否。一。敝馆拟阅湘学报一分。请惠寄。另有一纸致贵馆账房。请送阅。弟元济顿首。七月廿七日。

【19】穰卿我兄鉴。前月下浣(约在廿六七。)寄复一函。计荷垂察。兹托朱志侯带呈时务报资四十八元。计三十分。乞查收。余事条列于左。一。寄来报共四十分。只销去三十一分。其中一分系喻志韶三年票。故不取资。一。三十分报资收半年价。系六十元。照章以八成缴。故寄去四十八元。一。前日得令棣信。属将喻志韶所购地图一分。设法眷付。弟共有两份。遵命拨付一分可也。一。属抄洋务实录。子培不肯借。前函已详。冯莘

垞处亦托人往借。云无有。乞酌夺。一。寄李亦园信无住址。询查未得。乞示。后有转送信。均乞开明住址为幸。一。卓如现已赴杭否。果为何事。前函所陈。当蒙吾兄鉴宥也。一。闻香帅谕令书院。生徒不得阅贵报。有其事乎。凡作一事。必有许多魔障。吾兄千万以坚忍持之。一雪黄人之耻。过此以往。未始无坦途也。兄谓何如。一。前函另抄陈书账一纸。请查核示复。又有洋书单一纸。仍请代购。价值一并寄缴。本不敢多渎。缘外此实无人可托。务求原宥。一。湘学报贵馆经手代售。乞惠寄一分。馆中同学所公阅也。一。闻东朝今年又欲称庆。已发款数百万矣。一。此间亦拟设一藏书楼及阅报所。然力量太薄。将来贵馆译印各书能捐送一分否。南方有新出书籍。均请随时代购寄下为盼。一。公度现已赴任否。附去一信。求转寄。弟元济顿首。八月初九日。

【20】 穰卿仁兄同年。月之九日托朱志侯带呈一函并时务报资四十八元。计已达左右。昨接初七日手书。诵悉一切。谨条复于左。一。抄洋务实录。戮夫谓同志无人供事。又少一切。诸形不便。只可缓图。渠复字一纸附上。一。公与卓如。弟固谓必能融洽。惟屡有所闻。故以贡于左右。欲得君一言以释群疑耳。尚祈坚以持之。天下事有待于两公者。固甚众也。一。卓如果何时赴杭。将来报事当能遥领。明年尚应礼部试否。其弟来京。竟欲一访而不得。以不知其住址也。一。藏书楼何以不成。卓如前信云将开一局。专译东方书。其事何如。一。兼通中西文者。公云已见数人。其人品何若。其西文之功夫何若。(虽重英文。而中学须略知门径。)曾得个中人一测其浅深否。其专门之学何如。曾否出洋。其人隶何处。一一均请开示。最要者。精通西文。(专指英言。)而能以汉文达其意。马枚叔将回南最妙。请其一为考验。敝处愿以每月百元为聘。(来往盘费暨伙食均在内。并无别项。)不知能

得人否。乞指示为幸。一。洋书二十四册收到。前账如已核定。请寄下。已托乡人汇寄八十元。秋闱后当可送上也。农学报此间均已付直。兄处代付之资请取还。一。湘学报请惠寄一分。从第一册起。一。地图定二十日散发。常卷石。严淪聪。(来函有住址而觅之不得。)吴聚垣。无从访问。仍请函询湘局查取名号官衔住址寄示为幸。一。此次寄来日本国志等十一种并有毛君一函。毛君未知何人。亦请将名号住址示悉。前曾代送一函。系毛筭陔。其人系官工部。而此公则系刑部。或云毛实君。然亦户部而非刑部也。一。此间有人愿办西山铁路。以便运煤。闻仍系洋本也。一。杨虞裳奏请仿铸金磅。如目前金尚不足。先铸先令。闻已交部议。常熟尚以为然云。一。俄人云东三省铁岸码头税司不得归赫德派用。此公近颇不悦。云不久亦将回国矣。然恐未必行符所言也。一。李佳白在沪。公曾见之否。其尚贤堂之举果能测其用意否。其教士之慈悲乎。抑好名之心乎。一。盛杏荪所开之公学堂究竟何若。能觅示其章程否。一。前云巴西招工事。现在情形若何。乞示。弟元济顿首。八月十七日。

【21】穰兄同年如握。前廿二致颂兄一函。附图资一百二十元。廿六日又合致兄与卓公信一件。计均达到。迭奉十三二十廿五三次手书。敬悉一切。条复于左。一。十三函中云初七寄一函。属促陈锦涛回湘。此信未曾接到。一。吴质钦已晤谈两次。颇有志趣。毫无武营习气。可交也。一。华机纺织日布样已收过两分矣。谢谢。以上复十三信。一。弢甫信已去。彼近来常值潮班。故不易见。前次与商。窥其意颇觉为难。容再遵谕往慰。一。李亦园毛筭陔住址均悉。毛书送去。已往天津。尚未交款。代催。一。琐事屡渎而公不以为厌。感荷无极。同学受惠非浅矣。一。送书一层。不过以私诣相请。而非欲公之普施也。若有为难。不必强从。以上复二十日信。一。卓如赴鄂。果为何

事。湘中电招。又出谁意。乞示。一。寄来名单一张。敬悉。如管轮诸君。鄙意决不肯来。有愿就者。每年拟奉千金之数。(每日功课约七八钟。)伙食往来川资均在内。如兄有可信之人。即乞与商。能得其所译文字寄示。尤佳。其材大约以精文法算学奥地并能通中文者为的。兼通法律理财学者。尤妙。如品学俱有可恃。即乞速示。以便定夺。再敝馆已呈请总署具奏。援皖设学堂例。教习每届三年。可得保奖。闻已一切照准。尚未出奏。大约日内即可上闻矣。此层可不必说实。再胡浚康是否在天津。育才馆并无此人。或在苑生所办之大学堂。已函询苑生矣。不知能让与我否。李联璧陈寿平此二人。弟皆知之。不能来也。并告。一。书账请即核寄。以后又添两款。一六元七角。一五元有余。一。湘报有续到者能寄我一分否。不必从第一册起也。一。铸金钱事近尚未有所闻。公欲行两本位之说。此中关键。精奥异常。弟不敢妄对。一。蒋公来京。绝不知其人。闻鄂粤铁道亦已商妥。恭邸谓须由外口奏请。决无不准。一。农学会得公主持。尤能切实办事。鄙意总须亟开学堂。能有人奏闻。又得天语以奖激之。必能大有作为。公盍图之。一。抄念劬信已悉。能却之最妙。蛰亦非平正人也。如公复信之意。则为必不得已之策矣。凡欲成一事。必有阻力。成就愈远。则阻力愈大。惟望公与卓如始终坚持。毋为所动。庶几其有济乎。前月廿六一函亦已将此义陈告左右矣。以上复廿五日信。一。闻法人注意琼州。谓此地不得让与别人。言虽未出诸口。而意已跃跃欲动矣。一。子培昆仲于前月廿九丁忧。同人皆惨之。此后或稍有蔗境。而今又阻矣。一。有龚杰者。元和附生。李平泉荐诸徐研父。襄校天文算学。其人云在沪。前已恳卓如访察其品学。恐彼未归。乞公探示。至恳至恳。一。学幕莫不订定。子修处亦已满额。浩吾须俟缺出再补。伯皋云渠先未知其脱馆。故未与为力。后得电方知。现已力商修老

矣。再卓如以曹公荐诸伯皋。而两旬无回音。亦已另聘。此事真不易谋。研夫可收一人。乞卓速复也。研所选者为龙焕纶。汤为刚。汤衍泽。一。贵报附刊之重译富国策。何以卒然中止。此事甚要。此书甚佳。公其促成之。一。张樵野未知何时进京。公识之否。如有事。亦可与商。此人尚晓事也。一。贵馆译书已有成者否。乞示其目。弟张元济顿首。九月初八日。

【22】穰兄如晤。初八日寄一函。计达览。林曦谷交到手书。谨诵悉。林公甫下车即来。与谈数刻。绝无浮嚣气。其人可谓精锐矣。亦愿入馆读西书。从此又得一美材。可喜之至。执事大公为怀。而外人之诟谮纷集。诚为可愤。然事只能问其在我。千万不可与之争。亦不可因此自沮。久之必能大白。(万国公报云云。弟亦见之。蔡本无耻小人。又何足介怀哉。)至于交接之际。则中人结习。往往不能以己度人。此事非文明大启。未易猝革。转移风气。亦惟有心人任之耳。余详致颂兄函。不赘述。即请大安。弟元济顿首。九月十五。

戮夫来信附阅。事恐不成矣。

【23】穰兄同年。昨日午后五钟。电复十字。计荷垂察。本与心莲订定中后即电达。而彼不以改名告。故末由知也。通讯时乞先为道歉。昨晚得电二十字。属将第四十期报暂勿分派。此期到已六七日。弟处早已派完。他处亦已派送不少。谅尊处亦必知之。何必电告。(且报中亦无忤时之言。)今晨得第四十一期。论系述君政民政相嬗之理。或是因此而电报偶脱一字乎。即将函告各处。暂且勿送。专候电复。至盼至盼。前日托子鸣同年带呈图值洋银六十元。又毛筍陔还书资九元。想亦即到。余续布。即请台安。弟张元济顿首。九月十八日。

教习事务请留意。

研父托卓如事乞速复。又及。

【24】 穰兄同年。昨日甫得前月廿六日手书。敬悉一切。弟久不寄兄信。非由疏懒。实因馆事过繁。且译署传到。日来奔走。几无暇时。以有用之精神。而耗之于此。甚无谓也。所询各事。条复于左。乞垂察。一。养牛书确系译署送南洋转飭上海道交农学报馆译办。其咨文并云并将办理情形咨复本署。尊处似可就与南洋一商。能请其奏闻。最为便捷。惟此时不知南洋已声复否。若已声复则不及。只可另筹办法矣。弟何以谓由南洋较便。缘自子培出译署后。其中多系非洲太古之人。之无可与言者。弟系新进。亦无从得其头绪也。敝馆请代奏递呈已两月。稿已办齐。各堂亦已画过。至今尚未出奏。而异议纷起。署中人竟有仇视之者。亦可想见野蛮队中之举动矣。一。招工事俟晤西平再议。并拟先与子培一商。署中人地名对音表未见。容觅。一。地图又发出三份。托沈淇泉同年带去六十元。(并毛书价九元。共六十九元。有信。)如未交来。乞询之。近日又收二十元。余均未取。前存一百二十金。如需用即示知。当先汇缴。一。敝馆教习。现有议请西人之举。然不过为同学所逼。弟意本不欲办。如不能成。还当聘一汉教习。尊处如有人。仍请留意。以作备卷。至迟下月必定局也。一。山东巨野有两德人被杀。寿张教堂又复被劫。(幸非闹教。不过盗伙临时行强耳。)德使正欲大肆要索。今忽自我开衅。贻以口实。恐将有非分诛求。正不知何所底止也。一。美使田贝。人甚和平。今美廷忽将撤去。易布侃恩充驻华公使。布系芝加皋银行董事。一。美使伍公寄回译美国验进口茶章程。甚为详细。拟抄寄尊处。印入报中。忽被同署一黑人所见。谓为漏泄军机。哀哉。今日甚忙。不克多述。容再续布。敬请道安。弟元济顿首。十月廿一日。

卓如今年尚回沪否。乞示。

敬贻早已赴沪。目前必在馆办事矣。并希致意。函即作废。

不复寄还。

【25】穰兄鉴。前月廿一复一函。述农报事。计达到。东省教案。恐无了期。岂但难了。且恐有非常之变。我公夙有维持大局之意。今祸已噬脐。其将如何。黄种岂不复兴。惟有志者善为之耳。致公度信一件。言此案颇详。请观之即加封速寄。(严紧速妥)至恳。至恳。此外勿示一人。吕镜宇在沪。必不可使知一字。(千万千万。)余续布。即请台安。弟名心叩。初二日。

致任公信一件。乞封入公度信内。

【26】穰卿我兄同年。十一月初二日寄奉一函。初四日又托盛萍旨带上一函并洋六十元五角。计先后可到。顷接初六日函。敬悉一切。条复于左。一。招工事总为相机。一。山东事初二日函已详。言现在商议尚无头绪。德使初次会议。必欲将李秉衡及兖沂道并州县六七人重惩。而此间未肯允从。余者亦复未能议及。恤款兵费尚未开价。德兵已至即墨。胶州则已派一德人蔡姓者为巡抚。令该牧造具村庄城邑清册。并欲征钱粮。章高元一军初七早朝旨令退至烟台。闻近日章已释。弟两日未到署。不之知。翁张前日赴德馆久商。其所言亦未知也。一。敝馆教习事。有数同学必欲延洋师。弟亦如兄意。总不谓然。然亦不能违众。目下尚难定夺。兄意中有汉人足膺斯任者。仍请留意考察。作为备卷。一。整理海军章程无所闻。容入署考查。日来电报纷纷。两日夜几无暇晷。且同志甚少。故欲知彼中事。亦至不易也。一。闻友人言。贵馆事颇有阻力。离心力。弟谓凡成一事。此为例所当有。惟其有也。即为进境。惟望兄坚力持之。无论如何为难。苟能抵挡得住。则过此又有无数坦途矣。海内属望此举。愿我公毋负之也。徐君勉文字欠佳。卓有间断。何不仍用麦君大笔。此亦颇有关系也。报日多则物竞愈甚。当速图争存之策。鄙见所及。

聊贡一二。乞采择。以下复颂兄书。毛欠及寄售书。均已收到矣。附及。一。李孟符云彼已筹画有着。图报等款即可清楚。属先告。一。叔峤云次亮处已函商。不复。难于再催。其病未痊故也。闻其将赴沪。可面议矣。一。彦复报账。既属糊涂。而报本又复残乱。弟亦不得已。勉如其请。知新报亦复如此。该馆无熟人。祈转达。报资统由彦复算付。弟不过代为分派耳。至恳。一。馆中购书报账。请穰兄核示。能早日寄下。尤感。一。溥将军处报照送。荣仲华处相隔太远。只可一月一送。何如。信则均已送去矣。冯志先百元未交来。图款百二十金日内拟托汇丰寄上。弟元济顿首。十二日。

穰兄再鉴。秀水盛萍旨大令出宰山西。政声颇著。此次卓异引见。乞假南旋。极仰慕盛德。欲至沪奉访。属为先容。祈推爱接见。彼奉蘄生中丞之命。就访农务。一切求详细告之。倘能示以平易之方。当可望施行也。专此。再请道安。弟元济又启。

【27】穰卿同年鉴。迭奉三函。一系十三日。未知何月。一系冬月十七日。一无月日。邮局印系十二月初一日。一切均聆悉。因母病月余。百事废弛。故裁答迟迟。乞恕之。各事条列于后。一。敝馆教习已请定。系由严又陵经手。由伦敦聘来。每岁修金二千两。系教会董事代请。故修费不昂而可得良师。但不知果能如其言否。又不知将来相处浹洽否。弟本不欲办。且经费并未充裕。何能出此巨修。无奈同学坚执。若不如其所愿。将来必又有许多不便之处。故只得放胆为之。少塘素所钦佩。弟本有此意而未便启口。现敝馆既已他订。则只可作罢论矣。合肥允极力相助。惟未知如何相助。将来倘能扩充。必当多延教习。葛张二公留贮夹袋可也。一。贵报馆既能坚持。弟信此后必有进境。离心力阻力愈大。则进境愈甚。凡事皆然。惟我公竭力为之。一。

李孟符报款图款云已有抵款。到后即可寄去。其人尚有志趣。不至如来谕所云。盖其性极缓滞。非干事才也。一。另设日报。固是要事。惟此事头绪更繁。尊处果有胜任者否。招股访事。均甚不易。恐难报命。尚信斋不知何许人。访事最要的确。觅人恐至不易。弟有所闻见。必为函达。惟不知能否久在署中。现在进署不过三月。已不能相容。弟因不能再读西书。亦颇有退志矣。一。农学堂能办成极大之利。沪上能赞襄吾兄者尚有何人。何成事之多也。此间则皆能言不能行者。可叹可叹。一。农学堂开后似可请南洋具奏。欲于都中筹款。弟等思之尽矣。无可措手。惟有乞大老提倡。敦劝外省督抚。然亦安能济事。利源当自己开。兄其图之。一。建斋已闻电回江西。两函均附还。乞察收。图款已划付七十四金。尚存四十六金。因事耽搁。未曾汇寄。兹又嘱划报款十元送沈子培。报款前已寄上。清单附颂兄函中。弟尚有应还书款。俟取到信后。再行代送可也。以上复各信。一。尊处售报事分散各处。往往有先后不齐之弊。且各人均有所事。未必能专心办此。则亦安能望有起色。杨叔峤冯志先亦皆以此为言。日前彼此晤商。拟于明年代觅两三间屋。专用一二人司其事。并雇一二人分送各报。名为时务报分馆而附以各报。即以所提二成经费作为开销。弟等随时督察。款项仍由弟等按期汇奉。未知尊意以为何如。如兄以为然。请自明年正月起。京城售报各处。均行停寄。暂时专归叔峤或志先处。弟两日一入署。不能常在馆中。恐有耽误也。弟等专候兄信。一面先行觅屋访人。即于明春开办。上海各报现在归弟等经手者。有农学知新蒙学译书公会实学等报。此外如萃报求是当亦可以归并。求吾兄再与一商叔峤。又言制造局长蒋少穆愿于京都广售新学各书。并欲减价畅销。最好亦归并一处。则力量较厚。可以持久。京中此等书近来畅销。惟苦无处可购耳。售报事颇有关系。吾兄苦心经营。而弟等愈不敢不

郑重将之。若听其涣散。将来必致日销日减。而已销者又无一定可得之款。吾兄其何以处之。此信到日。求电复。弟可持告杨冯两公。促其速办。弟则无不极力。而身非己有。故不能不求助于人矣。杨冯两公皆甚关切。冯与弟不甚相熟。杨则极可恃而不能十分勇往耳。一。敝馆已经奏准。兹将总署奏稿(改称通艺学堂)寄呈。乞刊入尊报。能加按语以表扬之。尤感。呈稿暨章程随后寄。请登载。再有一事奉恳。敝馆亦欲筹捐。将来所收捐款。每季拟请尊报登载一次。未知能邀俯允否。乞示。旬报销路广。专登旬报。不登日报。一。王弢甫来言。前吾兄欲钞三朝(道咸光)洋务档案。现在将修清档。渠愿觅人私钞一分。(前已钞有若干。缺者尚多。)惟需款甚巨。欲吾兄任一百数十金。然只能钞一分。将来尊处即可借彼钞得之本。另行自钞一分。并须约明不得付刻借人阅看。未知兄意以为何如。求示复。此事彼甚秘密。乞勿为外人道也。一。德事闻已定局。胶澳租与德国五十年。并准其开铁路至济南。因母病未瘳。弟旬余不进署。不知其真实情形也。一。蒙学报实销若干。尚未可知。以后请照寄可也。弟元济顿首。十二月二十一日。

【28】懷卿
頌穀我兄同年。去腊廿一日寄上一函。计达左右。迭奉手谕。敬悉一切。条复如左。一。访事人。同辈均不能胜任。此外又无从识之。此事关系紧要。求速设法。股事亦等难。前函已详。不赘述。一。农学兴亚二事。兴会如何。日人肯为出力否。其兴亚会章能否见示。至盼。一。敬翁各信已送去。祈致意。一。康先生并无赏五品卿衔之说。弭兵会亦已罢论。惟高位者颇能为所歆动耳。一。前存图款四十六两。昨又收二十元。欲托源丰润汇去而费甚大。故托友人划呈。乞查收。弟处应还书价。亦即日奉去矣。一。前函钞洋务实录事。售报事。敝馆托登收款事。均祈示复。(制造局书能劝其寄京并售。尤妙。)一。德

案办结。奏稿已由孟符抄上。其矿务章程。铁路合同。尚未订定。海使挑剔廿三谕旨。不能尽如所允之言。指为有意违背。欲借此翻案。现在并未撤兵也。一。英人欲假千六百兆磅于我。而索利益六条。一。开南宁。湘潭。大连湾口岸。(大连湾因俄不愿。已作罢论。)二。勒允长江不让别人。三。由缅甸造铁路过滇达江口。四。内地行船。五。明定抽厘数目。六。租界内不得抽厘。所商颇有边际。而俄国知之。竟来相阻。英闻之亦甚不愿。昨日总署诸公大有左右为难之意。于此而犹不自奋。其犹得之有心乎哉。幸有一事差堪慰者。则变通科举也。初六出奏。奉旨后。即日寄去奏稿登报。能得南皮及佑帅推广言之。尤妙。尊处能设法否。此事必准。先此布告。

以上所言。切勿外达。至恳。

【29】穰兄鉴。正月二日上一书。计达到。连得两电。敬悉。条复于左。一。售报事。叔峴志先均同此意。而皆不愿出诸口。缘恐受专利之谤。弟专设席邀其来商。故始定议。然尚恐他处人不愿。必欲尊处自行将各分售处辞退。自今年起。统归一处办理。此议亦甚是。务求兄允行。前账概不接管。亦以今年正月初一划界。惟赁屋。用司事。雇送夫。需费约四百金。非得各报汇于一处。恐尚不足。妙在已有七八处归吾三人。此外只有求是报自行分售。惟以上各家。亦恐寄售他处。而弟不知者。求吾兄妥商并办。以昭划一。弟等并无所图。不过欲无负诸公之盛心耳。能将制造局书寄来并售尤妙。万一经费不足。尊处能略为津贴否。弟等必为切实经理也。一。开科事前允将复奏折稿抄呈。后见明发谕旨。人心可以少慰。而弟事亦太繁冗。故遂迟迟。今日接电。甚悚歉。奏稿抄去一分。谕旨亦寄呈一分。祈察入。其严修原折。已见初十日国闻报。不再录寄矣。荣相高给谏各折。觅得再抄奉。此诏下后。沪上人心如何。士气如何。此南海侍郎之

功。而亦伯唐赞成之力也。一。前函托登载敝堂奏稿。并请将来附载。捐款事能邀俯允否。即求示复为恳。一。同学公致蒋少穆一函。(阅后封送。)闻其人极晓事。且肯提倡。故有乞书之举。拟求我兄再为吹嘘。此乃公举。并非自便私图。想尚不难措词。如果行。并乞将各书装箱代寄为恳。一。英俄借款。前以彼此相恃拟各借一半。现闻均难成。第四日不进署矣。日来甚病。今又一日不食矣。匆匆不克多述。 十一日。

尊报在京分售共几处。每处若干册。祈详示。能并乞各报馆照样开示。尤妙。

【30】 穰卿惠鉴。今年迭寄两函。计荷垂察。迄未得复。甚为盼望。各事条列于左。一。售报事得电。又商志先叔峤。谓未知在京共销若干。又恐已经手者不愿交出。又恐更改售地。恐销数反减。无以对阁下。其所虑亦未必不然。然天下事岂有万全之策。不过可行则行耳。读书人之不能任事一至于此。可哀之至。现在两君尚未定见。弟既要入直。又顾学堂。且有迁移馆舍。(移顺治门内象房桥边。)添进生徒之事。家内又有病人。实属照顾不及。断难独任其事。而尊处信又不来。又不便往促冯杨两公。再迟数日。办事过促。恐一更售地。销数必要减少。缘此刻既不能先贴招纸。临时举办人何以知之。务乞吾兄速复一函。并须寄杨冯两公一函。至要。至恳。如万一举办不成。仍当电复一切。仍请吾兄酌办。惟弟处今年不克代为经售。缘事繁人少。反恐贻误。尊处夙寄他处分售。应如何办理。仍请吾兄自酌。至蒙学报。弟已经手发出十余分。仍请惠寄二十分。(亦乞速寄。千万。)并请速寄。弟仍当了此一年。若添多则亦有所不敢矣。吴彦复经手之件。当初声明。账由彼算。合并陈明。一。胶案议结奏稿。国闻登载。总署震怒严查。昨已有人电告尊处。一切请留意。日报之举若何兴旺。都中访事无能为谋。甚歉。一。前函请登敝学

堂奏稿。未知能否邀允。将来捐款。请由尊报附登。不知于体例合否。求示悉。能俯允。感荷不尽。一。前托友人汇上图款八十元。又请代还去年洋书等价八十元。乃接其复信。谓已送九十元。未知收到否。又不知其何故增多十元。又不知其何故减去七十元。已函恳续交矣。一。特科命下。人皆思看译本书籍。尊处似宜多译要籍。速印发售。可以津贴报章不少也。一。近日交涉情形。谨陈其梗概。德因即墨杀彼一兵。上谕又不符所允之言。粤东又有毆抢教士之案。增索沂州铁路一条。并山东全省商务应先尽德人承办。此事迄未商妥。而昨日又有违言。谓将出京强办。英俄款皆不借。俄在北方之权日纵。几不胜举。英亦急于图南。并请税司一席。嗣后永远用英人。已允之矣。日本偿款欲与商缓。而彼又不允。法索李约德赔款。至为无理。已给十万佛郎。容闳铁路已奏准。以上各节。务祈慎密。至恳至恳。乞阅此件后。速赐复一函。企盼之至。弟名心叩。正月廿四日。

敬贻颂虞少堂颂穀诸兄。均乞致意。

【31】稷卿
颂穀两兄均察。得书。敬悉一切。售报事大不得了。缘弟两日一值。而叔峤志先两公彼此绝不相商。时时待弟纠合。以致其中生出无数波折。现在极为棘手。兹将情形略叙如左。自正月初八日议后。即发电至尊处。得电后。即转知两君。总以清账未来。不敢即举。后数日。叔峤约志先与弟会商。而志先因事未到。有长素在座。闻知此事。极力撙掇。弟以无人能办为辞。不过数日。康君即倩人来言。已觅得张小义。(潮州人。户部主事。其人弟不甚熟。长素云极可靠。)与曾刚甫最熟。其人当必有品也。弟即往访康公。不得见。两日后康又有信来云。叔峤已将报账交割清楚。其时弟固未晤张小义。亦未晤叔峤志先也。叔峤遽行交账。诚未免太骤。因康致渠函有指其交僮仆经理之言。叔峤甚不乐。康又云已与弟商妥。其实弟并不知也。弟于初十日

见张君。即告以报数不多。设店用人。恐难支持。然不便竟行拒绝。何也。因叔峤已交报账也。十一日往访志先。志先云如此办法未妥。报馆原托吾辈。并未知有张小义其人。万一开办后有退无进。何以对诸公。且与张公素不相识。似未便插身经理。则报馆来问。将何以为对乎。拟不交出。听张小义专办叔峤所交之数可也。弟思其言。亦甚有理。后告知康公。劝其转达。暂缓动手。又告叔峤。叔峤允。如张公自知难办告退。仍可收还。十四日弟散直归。得张小义函云。一切已举办。势难中辍。复约志先叔峤两人饮。借以叙商。志先谓断难交出。叔峤谓断不收回。弟商志先。谓可否并归电局办理。志先以叔峤既已交出。我复揽归专办。迹近牟利。且电局亦无闲房。似难允行。弟思叔峤既不收回。弟处经手各分仍复并归张公。将来必不能妥协。缘经费既不敷。将来必仍亏空报资。弟为自己起见。急欲交卸。似与交张公。与叔峤一样办法。以后不复过问。非不得计。然于尊报大有关碍。故与志先商。将叔峤一分收回。叔峤不肯再为经理。专归志先又不允。弟只可暂行分认。其实弟无一刻之暇。亦不能经理。只可请学堂司事(即韩樾堂也。)暂为经手。又不知樾堂肯办与否。如不肯办。只可由弟自行经理。然至多不过一二次。多则断断不能。旋访张小义。告以此中情形。据云已费三十余金。势难中止。弟谓与其日后亏蚀有碍报事。不如此时撒手之为愈。彼有一同乡姓饶者约与同办。询弟以既经费钱。从何着落。似须向报馆追赔。弟谓报馆全然不知。无可如何。只可由弟承认。据云约费三十余金矣。费钱不甚要紧。售报事如此轆轳。甚为不妥。弟处断断不能常为经理。听其散漫。又为可惜。务请尊处派一人来。畀以全权。来此与各人斟酌办理。如经费所提二成不敷。能否再行津贴。亦乞预为酌定。两兄能自来尤妙。如派人来。必须给叔峤志先信。万不可专与弟一函。致各事均归重于弟。其来人所有之权分。务祈

详示。于各函均须载明。至为切要。卓如能否再理馆事。如已不与闻。则亦须函知冯志先及弟。缘卓如一到。康公必令其插身经理。必又生出无数波折。卓如仍旧与闻报事。则亦请与卓如商定详细办法。并由尊处函告志先叔峤。弟当专候来示。再约诸人妥商办法。既定以后。再行交卸。似问心亦可稍安。惟有请者。尊驾自来。或倩卓如代办。或另派一人来。务请不逾三月十五日。到京以前。弟总当暂为办理。若过三月十五日。尊处尚无人来。则此后恐难久持。此非弟之有意推诿。实因无暇兼顾。日后必至贻误。与其贻误于后。不若言之于先。至祈爱鉴。知耻会章程已到。该款随后再寄。肃此敬恳。即请台安。 十五日。

再前恳代送制造局蒋少穆观察一函。想已送去。能否邀允。并祈示知。能鼎力玉成。至感。至感。

敬再启者。缮前函后即致函张小义。属将已费各钱开示一账。并申说现时难办情形。令即停止。乃得其复函。谓事已如此。不能不办。只可就杨叔峤交到各分先行试办。同时又致叔峤一信。令将旧账再抄一分交弟与志先分办。以符昨日之议。乃叔峤传谕去人。谓已交付张小义。其意似不肯再抄矣。小义既不肯停办。叔峤又不肯再抄。弟实无从措手。弟原办之若干分。此刻亦毫无头绪。因两日一直。万不能自行清理。将来必至不可收拾。与其明知不可而为之。不如索性交与张小义。听其归并办理。在小义得此若干分稍加其力。或不致即行不支。然其事久必不妥。务请兄台速派一人来此。商定办法。(尊驾能自来最好。最妙。否则须派一明白妥实者来。至恳至恳。)再迟则恐更不易清理矣。此事由康公不知细情。遽荐张公。并不商诸各人再定办法。叔峤亦不商诸我辈。遽行交账。弟两日一直。事事断续。不能一气呵成。以致生此波澜。均属咎无可辞也。前函云三月十五日前由弟暂为经理。此函申明不能照此办法。缘张小义不肯再抄

账。特此再告。 弟元济顿首。

【32】 穰卿我兄同年。十一月十八日寄呈一函。计日可到。一昨接二月初九日函。条复如左。一。日报事已开办。极望其日起有功。此间售报事。弟无暇时可以兼顾。尚有办法。另详于后。一。劝赴东洋肄业。极合鄙意。惟室家累我。未知何日方能成行耳。一。农学堂总宜速开。陆纯伯未必能办。缘非有心人也。然否。一。销报归并一处。其中缪藕。前函已详言之。现在张小义约其友冯公度饶梅君。设总报局于琉璃厂土地祠内。已于二月廿日开局。杨叔峤固已交出报账。弟亦只可交去。现在寄来本年所出各报。均已交付该局。蒙学报亦一并交去。张君为人。弟不甚熟。然其乡评素佳。亦能办事。惟其骤设一局。恐所入二成支撑不住。弟所虑者此耳。渠既已开办。则亦只可设法维持之。缘既有此举。将来又复分散。必致阅报者无所适从。转恐有碍大局。何以维持之。则惟有将各报归并该局。助之以各项新书。庶足使其成立。该局果能立定。则于报事亦有益。惟银钱事弟不敢保其必无贻误。(缘与其人素不往还。)然其乡人素无贬词。曾刚甫尤为浹洽。想尚不致有误。然尊处必须派一人来此。订定一切。或将各处散售之报。设法归并。中西大药房今年报暂不送去。专候尊函办理。如冯志先处。则已送去矣。实学报、蒙学报、译书公会报。均由弟与叔峤函告该馆。令径与该局办理人张小义接洽。其他沪上各报。尊处前已出过知单。此刻亦只可归合。以符前议。各报上并须刻明寄售琉璃厂总报局。贵报亦然。总报局之名非弟所定。长素之意也。弟之意则固曰时务报分馆而兼售各报耳。弟极盼尊处人来。庶与该局接洽。鄙人从此可以脱卸。缘总署学堂家事萃于一身。实属照顾不到。恐致有负雅属。惟吾兄鉴之。再该局既已总报为名。前函有二成不敷。能否津贴一说。自宜罢论。缘各报既属平列。不便使尊处独吃亏。然何必

又请尊处派人来此商办。缘贵报固是大宗。即蒙学农学。亦系吾兄与闻之事。且今日各报不能不推贵馆为领袖也。萃报、算学、集成、农学、尚有求是、格致、新学、白话诸种。能归并该局最妙。然款项一层。亦须预为虑及。似宜先告各馆。尊处派人来此接洽。请各馆函告该局。令自保人。亦无不可。尊处务请速来一人商办。千万千万。再尊处代寄知新报。去年底为止。尚欠三十九四十两册。祈补寄。又代购湘学报一年。亦乞随时寄下为幸。一。售日报事已交该局核办。可托送京报人代送。国闻报亦系如此办法。惟送者不免多索报价。将来最妙于报端刻明售报价若干。则或者销路较广耳。其应如何办理之处。已由该局径复。一。制局捐书。来谕谓事必可成。甚快。甚快。现又由学堂致一公函与蒋公。托其将各书交贵馆代寄。吾兄见蒋时并乞再为催问。将来书如交到。若无便人。即出水脚交轮船带津。交紫竹林红楼后王苑生收下。敝堂再行往取。水脚若干示知。由堂汇缴。一。学堂奏稿登报。甚感。捐款允为登报。尤感。一。抄洋务实录。照来函复戮夫。戮夫颇不愿意。已作罢论矣。一。德租胶州。确系九十九年。一。子培款未交。因西平早已赴陕。问仲房有无尊处信。则云不知。故无由代送耳。一。矿务章程铁路合同如可抄得。无不照办。前日见借款合同。亦甚愿抄奉。缘耳目众多。无从下手。故前托访事不敢应允者。此耳。供事等弟又无由与之接洽。国闻报消息灵通。当系如此办法。然非弟经手。署中已三发封禁之议矣。兄其慎之。（国闻报事。太原颇保护之。想无妨。）一。承示贵馆办事之难。弟甚知之。吾人于合群一事。向欠讲求。故往往有素系莫逆。一与共事。即有意见者。卓如固不羁之才。然以云办事。则未见其可。亦其师承然也。中国固患无晓事之人。尤患无任事之人。愿与吾兄共勉之。一。英德商家借一千六百万磅于我。以苏州淞沪浙东九江货厘。皖鄂两岸宜昌盐厘作抵。归赫德

征收。长江不准让与他人。则复以长江系中国要地。岂能让与他人。可谓妙极。内河行轮已允限三个月。开办沅州通商。当系岳州之误。亦限在两年之内办理。一。容闳铁路现有改道避出山东之议。一。尊报弟共经售四十分。报费已寄訖。内有喻子韶一分。系三年票。张樵野一分。系送阅。均无资。应扣还三元二角。前寄上八十元。书价未知共该若干。祈核示。此三元二角。亦收入书账可也。一。俄索旅大为租地。(并筑铁路至旅大)限五日答复。已派许竹簪为头等使。径见俄君商办矣。近日未到署。不知如何。容再达。敬请著安。弟元济顿首。二月廿三日。

颂兄均此。

【33】稷卿
颂製同年均鉴。前月廿二日发去一函。言报事既已由张君开局办理。只可设法维持。免致变动云云。计已达览。一昨又由志先处交到前月二十二日所发手书。敬悉一是。谨条复如左。一。志先弟已见之。前次屡屡晤商。彼终不肯担承。张君将办未办之时。弟曾劝其专办。如彼时果能应允。弟固可扣留各报。不交与张小义也。现在已交付小义。且各处亦已分报。亦有已收报费者。弟固不能劝其中止。且亦无中止之理。如果强令不办。必于报事大有损碍。且各人俱弄成意见。务请垂察。勿以强办为幸。一。前月十五寄呈一信。后付一纸。声明不能不交付张君之故。廿二日一函。又言事已由张君办理。只可竭力维持之。并非前后两歧。实为尊处筹思。实无善策。只可将错就错。善为牢笼。免致决裂。弟为尊处设想。此时只可与张小义订约。令其觅切实保人。能得店铺最妙。闻彼与欧集甲同出邓铁香之门。其人如何。可以就近询之。彼果能觅保。尊处亦可放心。再尊处与张君订约时必须声明。各报馆均由时务报馆代邀。并须张公一律承担。如此则较为切实。未知当否。祈卓裁。一。张君果肯觅保。则尊报与各报似宜专归彼处办理。庶足以助成之也。一。尊处如

果与张君订约。弟可向彼陈说。劝其相从。然必须由尊馆致一专函。由弟转致。措词并请勿著痕迹。若曰事系公举。不能徇私。且各报馆均有付托。亦不能不与以可信之据。如此云云。未知可否。张公亦系体面人。故宜慎也。子培将到上海。渠亦知其人。请问之。一。楼欧翁带来之报。弟已全交张小义。冯志先处百分。仍由张君交去。惟中西大药房一分。自第五十一期后尚未送交。应否归并总报局。祈示复。一。第五十期弟处经手四十分。均已收到。自当派送。以了前事。惟吴彦复移交一单。应有数十分。此时尚未寄来。应请补寄三十本。以便了结前账。吴君经手各处。弟多有令其来取而竟不来者。故尊处寄吴君名下之报。前数期多有余存。然每期亦多少不一。彦复交来时业已如此。故以后亦万难清晰。弟事太繁。办理不善。亦祈原宥。一。漠河金矿阻止机器。大概因俄人渡江侵占之故。一。旅大事万分棘手。弟请假一班。未知近状。闻人言业已允之。详细情形。尚未之知也。英日必有举动。然利于我乎。害于我乎。明眼人当能知之。一。蒙学报。译书公会报。实学报。前叔峤与弟均已公函告知。移交总报局张小义经理矣。并告。一。尊处日报事。前已由张小义奉复。据云亦可办。想已察阅矣。比来戚友来京会试。酬应繁多。且译署学堂。东西奔走。又有家事杂事孳杂其中。心如乱麻。语无伦次。至祈鉴原。弟元济顿首。三月初五日灯下一点钟。

再总报局既已设立。尊处只可善为牢笼。订约觅保两事如果能办到。然后约各报统归该处办理。在该局固可自立。而尊报与各报亦未始无益。现在亦只有此办法。至祈酌行。弟又及。

再者。顷闻人言。尊处有不复寄报与张小义之说。此言当是讹传。若果有之。似乎未妥。弟原不以小义办法为然。然事已如此。只可将计就计。否则。于报事固有伤。于小义体面亦有碍。

于弟与叔峤亦有难于交待之处。(缘小义接办之后。弟与叔峤已函知各报馆径寄报本与小义矣。)鄙意现在只可与之定约。最严则令其觅保。(此层甚不易言。措词务请圆转。)尊处似可定一办法与彼。如彼能遵从。则此事亦从此妥矣。未知尊意以为然否。再请^{穰兄}_{颂兄}垂察。弟元济顿首。初六早。

再制造局如有捐助敝学堂书籍交到尊处。请代寄。水脚容缴。又及。

[34] 穰兄同年。连得三次手书。俗事冗杂。竟未裁复。罪甚。比来起居何如。至念。贵报昨奉旨派康长素督办。彼及其徒。素与尊处不协。此事将何布置。甚系鄙怀。至祈示悉。前所余书报。业已交付总报局。(存书不少。销去寥寥。收数甚微。故敢久延耳。)而弟事过繁。账目迄无暇清结。尊处事须交代。日内必统为清厘。再行函达。前寄夔帅及仲弢昆仲信。到即送去。日报已见。颇有欲观者。但不知销路何如耳。容君葵欲译新纂公法书。自是美举。弟在总署。无可进言之处。此事当告卓如。又不知其意若何。弟四月廿八日召见。约半钟之久。今上有心变法。但力似未足。询词约数十语。旧党之阻挠。八股试帖之无用。部议之因循扞格。大臣之不明新学。(讲求西学人太少。言之三次)上皆言之。可见其胸有成竹矣。不过近来举动。毫无步骤。绝非善象。弟恐回力终不久。但不知大小若何耳。大学堂事寿州派弟充总办。业已奏准。因其所用之人多非同志。极力辞退。此事亦恐变为官事。步官书局之后尘。可叹可叹。前蒋少穆观察惠寄制造局书一分。收到后肃函布谢。交万通酱园送尊处转交。计荷垂察。再执事能进京一行否。甚盼甚盼。专此。敬请台安。弟元济顿首。六月初九。

颂兄均此。外信两件。祈飭送。

[35] 穰兄鉴。近数月来公私交迫。无片刻暇。故久未上

书。非敢为疏懒也。迭奉两次电。均悉。时务报事。知已了。江夏复电亦来。无一语侵公。尚称平允。惟未收各账。均拨入官报。与公前畀佩葱函所言者同。未知公于此事无甚受累否。至念。至念。伯兄何日到沪。途次想安吉。昌言报事现在作何办法。鄙意公可摆脱最妙。中国风气未开。恐终难获利也。与其被累停办。曷若早为收束。未识尊意以为何如。伯兄属觅一抄录工商报料人尚未议妥。近来更心灰意懒。直不欲与闻人间事矣。康于初五日出京。初六日奉命拿问。（先至樵野处搜拿半日。怪极。）仅获其弟。在南海馆被获。此事因由。非一言所能尽。亦不忍为诸公言之。康固非平正人。然风气之开。不可谓非彼力。现闻尚未弋获。将来必有株连。事变之来。且更有不可意想者。自来变法。莫不如是。惟望新党勿为所摇夺耳。闻劾康者谓其勾通英日。谋危东朝。亦可谓至大题目。与名之人不少。知有周易。伯兄当知其人。本拟电复。恐被追究。特函告。阅后祈火之。再迟一二日或当在沪上相见也。 弟叩。八月初八日。

【36】 穰兄鉴。初旬寄一函。计达到。昨奉密电。敬悉。承注感感。弟事已定。即日南下。约重阳后可在沪相见。连日诏旨。均与执事有碍。但不知如何布置。不妨觅一奥援。尊意当谓然也。今日又有洋兵入城。而诸人睡梦益浓。深恐祸在旦夕。伯兄眷属在此。未知尚归来否。宜亟图也。乞转告弢等。身有所缚。不能自由。甚以为苦。往访亦不获晤。尊意必达到。肃复。敬请台安。 弟名心叩。廿六日晚。

伯兄均念。

【37】 穰兄鉴。前闻江南省学堂需聘教习。即以穗卿乞公推荐。穗卿天才至可爱。而处境又至可怜。省学教习。修脯谅不过菲。当可以贍其贫。后生之秀能得如穗卿者为之师。进益亦必较速。公可否即作一函。为之说项。当事者若未能深信其人。可

请一询曾重伯。(公能一告重伯。尤妙。)重伯交穗卿有年。当必能曲成之也。弟日内拟先函达穗卿。何如。即希示复为幸。弟元济顿首。初五日。

四月二十七日 〇月十五日 十二月十四日

以上各信当是光绪廿二丙午年之信。

正月初四日 二月二日 十二日 〇月〇〇日

二月二十九日 三月十九日 廿五日 四月十三日

五月十六日 六月初六日 十三日 廿四日

七月初三日 十一日 廿七日 八月初九日

八月十七日 九月初八日 十五日 十八日

十月二十一日 十一月初二、三、六日 十二日 十二月廿一日

以上各信当是光绪廿三丁酉年之信

正月二日 十一日 廿四日 二月十五日 二十三日

三月初五 六月初九日 八月初八日

二十六日 十二月初五日

以上各信当是光绪廿四戊戌年之信。

据汪诒年推定——编者。

【38】 穰公同年。两奉惠书。敬悉一切。墅浦铁路得公运动。事能中止。是我浙西亿兆生灵之福。具呈列名诸人皆有父兄。何以皆避去。此其心最为可诛。列名第六之许宝枢。系弟之内侄。其人行径。形同无赖。询其何以为此。则云冀将来可以得钱耳。沈洁斋亦舐犊之流。乃郎在沪终日嫖赌。乃谋此事。借供挥霍。乃翁不责惩之而反为之主持。真可浩叹。来书谓可以破各国势力范围之说。得毋为沈高子衡诸人之言所惑。中外日报有论说一篇。阐发此理甚明。弟不赘述。务望我兄竭力运动。坚持到底。事关大局。弟不敢以私言称谢。同文沪报所译小说数种。已商商务印书馆。据称近来销路极滞。暂拟勿购。已托薇斋兄奉复。谅荷垂察。余不赘述。复请台安。弟张元济顿首。五月十四日。

子封伯唐诸君均候。

【39】 穰公同年。我公廷试授职。并未致贺。以吾辈入官。本无可贺之理也。甓浦铁路得我公运动。竟尔作罢。浙西数百万生灵。同戴大德。弟不敢以私言称谢。善化师拳拳于弟。至为可感。惟数年以来。自镜稍明。如今时势。断非我一无知能者所可补救。若复旅进旅退。但图侥幸一官。则非所以自待。抑亦非所以对师门也。晤时如再询及。尚祈婉达鄙意。来书吾辈既为国民云云。诚然诚然。然亦只能尽其力所能为者。弟近为商务印书馆编纂小学教科书。颇自谓可尽我国民义务。平心思之。视浮沉郎署。终日作纸上空谈者。不可谓不高出一层也。伍侍郎返沪曾见两面。察其词气。正与来书所云相同。甚矣。人之不可有呆气也。外附复隐南同年函一件。敬乞转交为恳。肃复。敬请台安。弟期元济顿首。七月初四日。

见令兄伯唐。乞为我致意。

附汪诒年信

(1) 大哥如见。昨得十七日来函。旁晚又得一电。均悉。兹录于下。一。牧放浪代本馆探访一节。弟现亦不甚惬意。以其并无好新闻传来而反累我馆费去电费甚多也。拟试办一月。如竟无出色之新闻。则拟即辞之。兄之新闻与彼与否亦可随便矣。惟渠新闻却议明随时电达本馆。故渠不告知兄一层并非与初议相违。一。浙绅与德商合办甓浦铁路。其公文已见诸本月十一、二、三、四等日之新闻报。菊生说此事荒谬异常。却嘱弟不必声张。(恐其戒严也。)渠当致函与兄及京官阻止其事。今不意部议应允如此之速也。具呈各人。皆系纨绔子弟。(如钱锦孙乃子密之孙。朱燮乃前潮州府朱丙寿之子。徐文翰乃徐小云之子。袁荣燮乃袁爽秋之子。惟许宝枢未详。)一也。由潮至浦东并无大宗出产。且水路(下缺)

(2) 大哥如见。顷托欧甥带上小堂画一幅。又对联两副。又屏两堂。又雨衣一件。日记册三十本。另虾子簍一筒。茶叶四瓶。笋干二篓。此皆家中备就寄吾兄者。另郁堂兄托带笋干一篓。亦一并带上。到后均请分别检收。(大嫂托买之洋缎亦已买就。已交薇斋开账。其物件亦开在薇斋经手之清单内。)一。兄所整理政法纲要。居然从东洋报内觅得。惟系和文。故即托东译成华文寄上。一。枢

计二署访友。请速为留意。拟俟旅顺一破后，即将烟台访事辞去。而以其薪移请樾译二署密访。一。又寄上菊生致沈洁斋函（即沈守廉墅浦路之总理也。）。又本报论一篇。系菊生囑寄者。阅后即可知墅浦路之不可办矣。总之此事可以两言蔽之。则华人欲售地以牟大利。德人欲扩张势力于南方而已。此请大安。弟治年顿首。

附致沈洁斋信

昨阅新闻报。见乡诸君有创建墅浦铁路之举。公推长者主持其事。甚感甚感。惟是事关桑梓。元济有不能默尔息者。敢为长者一言。并请转告具呈诸君详加筹度。我国未能收治外法权。华洋合股利害本不相敌。铁路于民有无数密切之关系。流弊尤甚。惟部章既定。自不能禁人之不来。甬沪一线已归英商承办。呈词虑其独擅利权。设法牵制。用意似深甚远。然所谓牵制者。不过虑英人之吞并我浙江。而故借德人以相抵制耳。不知德人行政专以帝国主义为准。其进取之手段视英尤急。引与英抗。正无异招虎以拒狼也。如曰铁路有大利可以为吾民开拓生机。诚然诚然。然此线所经之地。川渠交错。水运极便。今风气未开。地利未尽。产物无多。水程尽足转运。无俟铁路以为之助。铁路一兴。则向来操此航业者。必致生计转蹙。此中情形不同。固不得援舟车辐凑之地以为解也。且购地、铺土、设轨、行车。事事与土人交涉。而必有洋人参错其间。内地民智晦塞。无异澳非。临事周张。不知有几许纠葛。未见其利。先受其害。又何取焉。且不见德人之在山东乎。请举两事可为龟鉴。友有偕西人赴济南者。见沿途乡民无不俯首鹄立。不敢言笑。询其何以如是。则曰见外国人不敌不然。此可见德人之积威矣。英人某游历山东。暮投一旅店。店主人将华人纷纷迁去。无何有德人至。见英人之先至也。令其让已。某不从。德人怒。几将用武。某曰吾英人非华人。何畏汝。德人无如何而退。德人无礼。遇其同类犹如此。而华人更可知矣。济南非通商口岸。而胶济路成。德即强派办事委员。司马昭之心路人皆知。而我又何可引虎入室乎。外人今日断不能瓜分我国。事机之熟其必在二三十年后。铁路大通之时。此理较隐。今姑不言。言亦人莫之信。然铁路之在中国。其必为资敌之具。则可决也。运会所至。我辈只手之力。亦岂能障狂澜而东之。然大祸之来。终窃窃焉冀其少缓。病在颊危难。明知其必死。而当其未死之时。未有曰汝终不免。毋宁早焉之为愈也。铁路非不可办。而在我国是傍徨内力萎缩之中国。则不可办。而民智未到。物产有限之浙西。尤不可办。洋股非不可合。而在我主权日削。外力增进之中国。则不可合。而强权自逞。凌厉无前之德人。尤不可合。元济不揣冒昧。谨代我浙西亿万生灵请命于仁人君子之前。务祈乘此将定未定之时。设法拒绝。若虑华股已集。势难解散。则或兴工艺。或修农业。皆可以挽回已失之利权。拓无穷之生路。一转移间。利害相悬。判若天壤。又何憚而不为乎。元济沉溺西学。久已见摈清议。然于此中外之界。利弊之分。则斤斤自持。不敢稍弛。亭林有言。天下兴亡。匹夫有责。元济不肖。窃援斯义。妄献刍蕘。幸乞省览。

附请中止暨浦铁路节略

敬略者。窃查本月十一日十二日十三日新闻报载。有浙绅请办暨浦铁路公牒。系由上海县境浦东起。经过浙江乍浦海口。复由乍浦至杭州城外湖墅止。推沈浩斋观察主持其事。已与德商荣华洋行订草议条款。各认股银二百五十万两。业经浙抚批示。咨行铁路大臣核办。原图并未得见。揣其路线。必经由江苏之南汇、奉贤、金山。浙江之平湖、海盐、海宁诸州县。查以上各处并非往来通衢地方。出产除茧丝外。并无他项大宗货物。川河交错。水路尽足转运。无须铁路以为之助。且民情虽懦。而风气极为闭塞。风水之说深入人心。洋人剖心挖眼之言。不绝于耳。青帮红帮伏莽丛集。将来购路设轨。洋匠群集。难保不酿成事变。方今各国环伺。平地尚起风波。若更予以口实。宁不乘机攫取。且德人自占胶州以来。山东交涉万分棘手。胶济铁路未成。即派员驻扎济南办理事务。趑趄乎有囊括席卷之势。近由北洋奏请开为商埠。隐相抵制。然局势已成。殆不可救。友人客游其地。归言德人种种暴横。土人种种觊觎情形。闻之痛愤。近来德人政策专尚进取。其手段之激烈。几驾乎诸国之上。无论兴办此路有害无利。即此与德人合股一节。已种其后来无穷祸根。而犹曰设法牵制。可免英国独占。岂非梦呓。且具呈列名诸人。皆非真正绅士。首为钱锦孙。系钱欣甫前辈之子。次为朱燮。系前任广东潮州府知府朱丙寿之子。三为徐文翰。系徐筱云尚书之孙。其胞叔祖胞叔均在。何以不由父兄出名。谓其父兄不与闻。则其事必不可恃。谓其父兄与闻而不肯出名。则其事尤为诡秘。其他顾浩、袁荣燮、许宝枢诸人。无非佻达少年。亦不能膺此重任。现在事未定议。亟宜设法挽回。否则无数虎狼入而窟宅。我浙西人又将为山东之续矣。

【40】 穰兄同年。久未通讯。伏维动定多福。连案初议由沪道令彼登一告白。便作了结。诿彼于同日又登一呈文。语意与告白绝然相反。弟等托人向沪道诘问。正值公堂案起。沪道亦无暇过问。遂请仲兄将告白暂停。现在公堂案结。专使亦行。而年关已逼。不便催促。拟候明春再行具呈。促令批示。便作了案。袁海观甚畏连。且将去。亦无心于此。故可了则了矣。中外报今年闻仍亏折。仲兄深以为忧。坚欲告退。弟与夏瑞芳竭力劝慰。然经济上无能为力。馆中办事人亦不敷。明年仲兄拟添请一二人。看来只可作守势。而不能取攻势矣。穗卿新正三日即东渡。昭辰已先行。馆中愈形寂寞。有事无人可与商榷。殊以为忧。吾兄有

何良策。甚愿闻也。学部奏调。弟意不愿入京。然亦未决。报馆又载袁为弟奏请开复。并调北洋。是否学部之事因而讹传。请兄再为一探。有无其事。政府如何回答。原折究作何语。统祈示悉。以便预备对付之策。祷甚。盼甚。肃此。敬贺岁禧。弟张元济顿首。十二月廿五日。

【41】 穰卿我兄同年。迭奉十二月廿一日正月初八日十五日三次手书。诵悉一是。谨条答如左。一。学部奏调函电络绎。敦促北上。此事究于前途关系至大。已允痔疾稍痊。即便就道。惟行期尚未定耳。到京之后。决不久留。如有人询及。乞代宣布。弟不欲与人争。不可不使人知我意也。一。连事本拟俟蜚仙到沪后再与袁商。我辈递一公呈。由袁径批。作为了结。即据以登报。收束前事。不谓汤至今未来。而袁已将去。无从措手。只得罢休。一。本省学务。真不得了。既生此土。乌能无情。去岁东京学界同人。交相诘责。已允担任义务。往来杭沪。筱帅初意颇疑绅办。今已幡然。屡次托人来约。招弟赴省。词意尚诚。已允俟古微侍郎至杭之后。追踪前往。但恐官场盘踞已久。不能下手。则亦只可望洋而返耳。来信谓见弟电。惟弟从未因此事发过一电。未知何人伪造。又谓仲老致朱君电云云。此电弟亦未见。颂兄又言接兄信。言同乡有公电致弟。亦未接到。何迷离恍惚若此。殊不可解。一。言购英料事及董事事。俟汤刘到沪后。即当转达。本月初旬。弟因事至嘉兴。旋即归里。十九日始归沪。诸事丛积。应接不暇。裁复稽迟。幸乞恕之。相见匪遥。诸容面罄。祇请道安。兼颂潭福。弟张元济顿首。正月廿八日。

【42】 穰公同年。承枉临。失迎歉歉。公函稿。费神之至。弟谨当附驥。惟由商务印书馆代收款项一层。不克从命。此事由公提倡。自应由尊处代收也。敬请台安。弟张元济顿首。九

月廿五日。

【43】 穰公同年。顷淇泉交到手书并诸同年信。敬悉一切。尊拟复信甚妥。偏劳尤感。项申甫闻住杭州。王星垣如系王舟瑶。则闻已丁忧。返居台州。其余诸人。弟均不识。无从奉答。甚歉甚歉。即请台安。弟张元济顿首。十二月廿二日。

【44】 穰公同年。不通音问已年余矣。去岁出洋为环球之游。至腊月中旬始返沪。闻贵体违和。频就令弟仲兄处询问。知迩来渐臻康复。欣慰之至。归国已两月。俗事纷集。竟无寸晷之暇。未尝以一纸通讯。乃仲兄传语。先承慰问。感悚无极。爰言报于去冬过日本时在伯唐同年所即已捧读。窃叹两三年来中国报界堕落极矣。起衰之责。匪我公莫属。返沪以后。复蒙颁赐一分。每寄到。无论何时。必亟展读。且不尽读不已也。年来胸有所蓄。无自吐露。公乃一一为我发挥。正如我意中所欲言者。天下快事。宁复有逾于此者乎。间有什之一二。所见不尽相合。则以公稍偏于旧派一面。然亦非要点也。今日读二十八号一纸。末幅言及吴氏三礼疑义。弟于前年搜求古书。购得张金吾诂经堂续经解清稿百数十册。此书在内。惟三礼均有残缺。(所缺尚不多。钱塘丁氏亦有残本。但只有周礼。礼记两种。且残缺较弟所得者为多。其为弟处所无。而丁氏所有者。周礼只八卷。礼记三卷而已。今不知此书尚存江南图书馆否。暇日当往查。)嗣偶遇湘人王君。(礼培。湘潭人。)来沪售书。携有礼记疑义一册。亦抄本。曾为张月霄所藏者。弟欲购之。渠又不允。但允代钞。且云其他两种已归他人。然借钞亦不难。即先付写资若干。并刻格纸寄去。今已年余。杳无消息。日内有人赴湘。尚欲一追其究竟也。知公拳拳于此。故及之。仲兄又传谕。问弟去年在巴黎看伯利和所得敦煌古书。曾否钞得目录。彼时本欲录存。无如法国国家十分郑重。不许常人观览。弟由公使馆介绍。特别许可。且由伯君伴

往。跬步不离。重房密屋。光线甚乏。而伯君又匆匆欲行。故只能略观大概。而弟亦以行期太迫。不能再往。因晤伯君。知英人某先彼至敦煌。所得亦甚富。到英访得。亦入国家图书馆矣。其珍密一如法人。四部不如伯君多。而佛经及其他古物。则远过之。其四部书亦已商妥。将来亦可影照也。民立报载弟演说词。错太多。现陆续将所记录写出。刊入东方及教育两杂志中。当邮呈海正。春寒千万珍卫。弟张元济顿首。二月廿三日。

【45】 穰公同年惠鉴。颂兄录示手书。敬诵悉。闻贵体尚未大痊。驰念无似。忧能伤人。况在忧国。愿吾兄稍纾悲悯之怀。葆此珍贵之体也。辱承雅爱。许为敝馆访求古书字画。感幸之至。前托孙伯恒兄代致下忱。少助舆马之费。未蒙晒纳。颂兄复为转达拳拳。弟何敢再行强聒。然不免因此多所奔走。公司以谋利益。公乃为尽义务。似无此理。仍乞公之不我却也。所询各节。条复于后。一。延昌地形志。陈士可不允借。可作罢。二。假印古书字画。必须酬报。但须视销路多寡为衡。字画出版已多。恐难获利。弟尤注意于古书。于开辟新营业之中兼寓保存国粹之意。印刷必须精美。成本较昂。非需要品而为奢侈品。故销路必不能多。现拟分两种办法。如专讲版本者。则石印。至多印五百部。其他则铅印。印数或可稍多。来示如定价一元者。或赠八十元。或赠六十元。视其表面。诚不为多。然此等书定价必昂。虽印五百部。不能不于一二百部内尽将工本收回。则计价为酬。未免过重。鄙意最好酬书。若必须酬钱。只可临时再酌。未知尊见以为何如。酬书之例。约以一成为率。如印五百本者。赠五十部。三。陈士可所藏于忠肃刘瑾之亲供。未必为当时官本。（于忠肃亲供。弟近亦见之。）谅不过传抄之件。然亦甚愿一观。倘系当时官物。则真稀世之宝矣。四。复印子书甚善。访世德堂六子久矣。迄今竟不可得。奈何。奈何。五。宣统三年统计表等。

已托伯恒走取。六。端午帅所摄柳书金刚经。不知如何。他人若先已印行。敝处不愿复印。七。攷古录拟购有考据者。晤伯恒时乞告之。八。西书论义和团事者。即濮兰德所撰。先已定购。刻尚未到。九。敝处所得旧书。只有明代野史。而本朝无之。然未曾印行者亦不多。但有异同而已。十。刍言报有关大局之论已出。各号并无有不合者。若将来发见。自当贡其管蠡。以备采择也。伯唐同年回京后能稍醒当道之睡梦否。望示一二。并为我致意。田际云案内容究竟若何。近闻杨度亦被拘留。是一是二。令人无从捉摸。甚愿一闻其详也。余不一一。敬请摄安。弟元济顿首。四月初七日。

（再闻国子丞徐坊藏古书甚富。能借影否。乞设法。又托。）

【46】 穰公同年。前夕晤谈后碌碌罕暇。故演说稿迄未送呈。顷奉手教。知蒙不弃。谨将字句略加修饰呈览。如以登报。还祈削正为幸。近日起居何如。甚念。明日晤叔允。当索阅大稿也。雨多道泞。不得走访。闷甚闷甚。弟元济顿首。六月廿八夕。

【47】 穰公同年。昨到会所晤叔允索观大稿。适为会员某取去。未克捧读。据叔允云。与吾辈意甚相同也。英国宪政丛书三册呈览。乞察收。近日起居如何。甚念。甚念。弟元济顿首。六月卅日早。

【48】 示敬悉。会员议案尚未编入日表者。似可不登。俟开议时或已编入日表。并登何如。史蒋之局极愿往。惟已得腹疾。届时愈否再定。肃上穰公同年。并询起居。弟元济顿首。六月卅又。

再议事录尊处是否派人往抄。各报所登多不符。今日宪报所载弟言不可解。已令更正矣。

【49】 刍言报阅竟缴还。弟在沪时已阅至四十八号。昨误忆为三十八号。致劳检理。甚歉。甚歉。新政之为害与夫京外各官

之不负责任。只便私图而不顾大局。无论改弦更张。即欲行专制政体。恐亦不得。循是以往。必致灭亡。公似可于报中谆切言之。稍暇再趋谈。敬颂穰公同年摄安。弟张元济顿首。闰月初五日。

【50】穰公同年。昨晚归寓奉手教。敬悉。新刑律修正案汇录二册收到。谢谢。其一册已转交伯鸿兄矣。昨日会场尚无冲突。惟外来会员已有成见。与学部反对。此中稍难对付耳。季直已行。润沅又病。今日仍须开会。弟不能不往究。不知将来稍有裨益否也。邵位西先生报本考亟欲得之。前闻伯纲有刊行之意。但不愿用铅印。不知近来如何。俟晤仲威时当婉商之。天雨新凉。唯珍摄为幸。弟元济顿首。十一日。

【51】穰公同年。奉手示。祇悉。伯鸿兄行期总在二十以外。月底之前。十六断来不及。令侄或与姚作霖杜海生两君结伴南旋。何如。但十六亦来不及。姚杜两君处弟可代为接洽。敬候示遵。连日到会。并不劳顿。但毫无归束。心志渐懒。今日亦请假矣。贵体如何。敬念。即请大安。弟元济顿首。闰六月十三日。

【52】穰公同年。十四日奉手教。敬悉。马克波罗游记稿收到。感感。是晚归寓几十二钟。故不及趋访。次晨正拟裁复。而汽车启行。时刻已到。又不获如愿。甚以为歉。弟于昨日行抵太原。地方甚为朴陋。旧书竟无一可购者。现定二十乘快车返京。如船期相凑。次晨即赴天津。恐不克奉访。天气渐寒。务祈加意珍摄。承示各节。稍暇再详复。肃此。敬请台安。弟张元济顿首。七月十七日。

日本法规大全预约券可在京分馆取书也。

致梁启超 任公

【1】任父我兄同年。十八奉复一函。计达左右。近见实学报经世报皆有显与时务报为敌之意。此皆例有之阻力。执事幸勿为所动也。经世报言多粗鲁。姑勿论。而实学报则最足以动守旧者之听。且足以夺貌新者之心。济料其声势必将日大。然一二十年后民智大开。又必不辩而自屈。则又何必沾沾于目前之是非也。其以天地日月例夫妇。仍不过八股之学。华盛顿传后极赞民主。与其平议宗旨大相矛盾。如此之类不胜枚举。又安能自成一家乎。非谓异我者即在所必摈。泰西报馆岂无异趋。所恨者以燭火之微而亦欲与日月争明。使为守旧之徒犹可言也。而为在世似新之辈夫。处今之世。即合此十百有志之士通力合作。犹恐未必有得。况复显分畛域。同室操戈。济处局外且深悲愤。而何论公与穰卿之身当其际者乎。虽然出一言行一事而天下翕然。则已为大同之世矣。而今尚非其时。济敬以两言相勗。曰勿与之相竞。勿因此自馁。迟之既久。必能共明。且此之接踵而起者。何一非公与穰卿之私淑弟子乎。此言公必自知之也。伯皋复示。前函附去。计荷察入。研父则欲于龙煥纶汤为刚汤衍泽三人中而乞公代择其一。其意固以学识为主。而相处之能久长与否。亦在所计及。（龙君明春必赴春闱。捷后恐未能再就此馆也。）公以为可。即乞代为订定。将来关聘从何处寄奉。亦乞示悉。彼约于十一月初抵武昌。不知能否在彼处会合。并望询示。再有龚杰者。江苏元和附生。精天文算学。（格致书院刊算学课艺不少。）李平泉（名澧。癸巳举人。亦在上海某书院。）函荐云。现居上海。研父并欲公代为考验。如不相识。可否设法令其来见。先观其品。继察其

学。(算学一门湘人颇重之。故不能不格外审慎也。)如果不谬。即可微示以意。而再函复研父。彼必欲得公一言。以为取舍。千万勿却。倘能速复。尤为妙事。据情上达。伏望垂察。姚菊仙处。闻只能缺阅算一人。尊处寄子培一单除曹陈外。并无通算者。故亦不复询之矣。台从果赴杭否。行期当在何时。并乞告我。都下无事可言。不赘述。

再。廿二日托汪怡卿带呈地图价洋银百廿元。未知收到否。又伯唐经手 411、412、413、416、419 五票有失去原票者。(伯唐近被窃故也。)一时尚未查明。属转告穰兄。票扣发。又李伯菲询。缩印西学启蒙十六种。每部值钱若干。乞飭询。又伯唐经手之半票。百十三号。见票亦请扣。

【2】任公同年。到神户。获相见。甚幸。蒙以盛筵相饷。尤深欣感。先是邮船会社告以丹波丸次日抵门司即行。故匆匆登程。不克与公作竟夕谈。诂舟抵彼处。仍下栓逾日。兀坐舱中。殊可恨也。抵沪旬日。碌碌鲜暇。昨始将委估国民常识印售价格详细勘定。别录一纸呈览。鄙意似用华装为便。本轻则价廉易售。庶与尊旨相合。所拟草案未审尊见以为何似。第六款云云。对于我公本可不设。惟公司为公共营业。虽事实所必无。而契约中势不能不载。尚祈鉴核。附去版权共有章程一纸。系专为普通者言。尊处系用特例。其与草案抵触各条。自不适用。其他如尚有不合。尽可裁订见示。再敝馆明正拟发行政法杂志。月出一册。冀以普通政法知识灌输国民。拟乞大文一二首。冠之简端。以增光彩。倘蒙俯允。酬报之数惟命是从。弟与梦旦归国时。海中无事。编有选举图。筹借新年游戏之趣。为补助教育之用。谨各寄呈一分。伏祈教正是幸。肃布敬颂岁禧。 年小弟张元济顿首。十二月廿八日。

梦旦附笔问讯。

【3】任公同年有道。奉前月十九日手书。知公将有台湾之行。风景不殊。山河有异。正不知感慨何若也。政治杂志承赐叙言。感幸之至。来示勿许言酬金。然此间出版终带营业性质。故仍违命。寄呈日币三十元。勿以戈戈见责则幸矣。同人之意。每月欲得鸿文一篇。不审可慨允否。国民常识公能独立肩任。甚善甚善。倘有所委。无不殚力。日报为今日一大要事。京中要人无不各挟一报以自护。从此国中恐只有个人之私言。而无国民之公论。非有贤者出为拯救。世道人心真有不可问者矣。友人去岁购入时事报。弟归自海外。来相商榷。宗旨相同。约集得三万金。尚不能动手。餉械未足。不敢轻易出战。然已踵决肘见。窘态毕露。亦可见近日经济之困难矣。但祝天佑中国。早赐刀环。旌旆归来。定当虚左以待。但不知何日方偿此愿。承招邀。甚愿一见。从者能迂道至香港否。果能者。约在何时何地。幸先示及。濒行时。再以 Chang Yuanchi, Commercial Press, Shanghai, going Hong Kong 数字电告。弟即便启程。至与尊处通电。应如何接洽。祈预拟示。临颖不胜瞻企之至。肃此敬请台安。弟张元济顿首。三月七日。

【4】任公同年有道。得四月三日手书。知从者归自台湾。将本所闻见。著书行世。以苏国民。甚感甚感。承示各节。谨奉答如左。每月允撰一文界杂志登载。感幸之至。酬报拟援国风例。每千字七元。至选题立论。悉听裁酌。固不必拘拘于法律方面也。汤君觉顿去岁在神户得与接谈。议论宏达。甚为钦佩。愿与敝馆订译生计财政等书。并示润例。可以遵办。惟津村秀松国民经济学卷帙过多。销售不易。为营业计。不敢轻易下手。拟请另选他种。全书约拾万内者最佳。敝处亦姑为选择。择定后容再面订。大著台湾游记许以版权让与敝馆。至为欢迎。应如何酬报。乞核示。能视撰文之例酌减否。财政原论既为公数年心血所寄。

若能印行。必于国民大有裨益。数日前接到是书目录一册。展阅一过。实为今日拯亡极急之书。既年内可以脱稿。鄙意可不必分次出版。全书字数现恐尚难预计。至少总有五十万。就敝处营业情形而论。最好用租赁版权办法。附去本利预算清单。暨章程各一纸。伏祈察核。如尊意以为不便。则全然让与。亦无不可。即祈核示价值。以便商办。至欲取回若干部数（台湾游记言）馈赠同好。亦乞拟定见示。总之。公所委托。苟力所能及。断不敢稍有推诿也。日报近稍稍布置。拟即日更换面目。惟人才太缺乏。即云改革。恐亦不过如近日之新内阁。前书谓日报为不可缓之事。将至台湾有所谋画。不知果有端绪否。南海先生近在何许。起居若何。东游之议想已作罢。其太夫人近状若何。甚念之也。拟与通讯。当寄何处。乞示及。手复。敬颂著祺。阖潭均吉。小弟张元济顿首。四月十四日。

【5】任公同年。奉四月十八日手书。并国民常识学会章程。敬悉。与同人筹商。尚未答复。而廿六日书续至。展诵益增悚惶。弟何人斯。乃蒙公引重若此。惟弟对于此事。与公及子靖所见颇有不同。请申言如下。来书注重讲义。以为购读者可以得完全之知识。与仅购得零碎小册不过得断片的知识者不同。此言诚是。然此不过理想之效果。而按之事实。则适得其相反。吾国人生计多艰。必令预付若干金钱以购一二年应读之书。恒觉力有不逮。惠示章程。讲义月出一册。册二百叶。叶九百言。两年出完。分二十四册。约估售价至少每分定价当在十五元以上。二十元以下。恐出版之后。预订者必不如零购者之多。则又何贵乎定期出版。连续编纂乎。即令有人预定。而为数无几。欲多印以备续销。则不免搁滞成本款。印数与定数相埒。则后来补配为难。且无以应目前零购之求。盖预定与零购两者并行。虽每期印数相同。而以有零售之故。数月之后各期存数必致大有参差。而后来

订购者又往往必欲补购前出各册。期数愈多。欠阙愈甚。再印则搁滞愈重。而不印又无以饷购者之望。权衡利害。进退两难。此弟近数年以来所得之阅历也。尚有一难。则定期出版之物。万一编辑者遇有事故。或至愆期。或竟因此中辍。则预定者必生无数葛藤。至于学会之设。无非为联络同志。交换知识起见。然如来示所举之人。皆以一身兼无数事。断不能再尽心会务。若欲借其名誉以为提倡之用。俾人人重视此会之书之价值。则诸人之不能著书又为人所共知。故弟最以为无益。吾国多数人士大抵有辨别力者少。而仅恃耳食者多。等是我公著作甲隐名而乙则否。弟敢决甲之销数必大逊于乙。公著此书无非欲国民多读。乃欲于沧江饮冰之外别起一绰号。或别造一姓名以期避人口实。而求助于一班乌合之人。毋乃操术太左乎。天下事欲为则为。商之多人必有无数牵率。无数障碍。公与同志数人任编辑。敝处为公任印刷发行。彼此函商。并往复一二次。当不难就绪也。同人之意。为将来易于销售起见。仍以小丛书为宜。惟有人谓既称国民常识。似不能不补入科学一部分。敝处亦可有人担任。尊意若不欲搀杂。则或于定名之时再加斟酌。管蠡之见。如荷采择。则去年腊月廿八日曾将办法草案拟呈。敬候裁夺示复。并祈以此意转达靖公也。近在时报见公致上海各报社书。委婉曲折。以求谅于国人。展读既竟。念我良朋羁身异域。受侮不少。为之痛心。然弟以为公作此书未免示弱。此等谬悠之论本不足置辩。近日各报又复为狺狺之吠。若□□□公未免自失身分。或竟以极简单□一广告声明不理。亦是一法。还祈酌行。近来言论专制之害。真足以祸民而亡国。挽救之责。是又在吾辈矣。论文一首奉到。核字数得四千。谨援国风例以日币二十八元为酬。附函将去。幸乞晒纳。时事新报为弟与梦旦数人所组织。仍延仲谷综理社事。已属发报处按期邮呈。敬祈教正。言不尽意。敬承起居。并颂潭福。弟

张元济顿首。五月初四日。

附来子靖信两叶。敬谢。函中诸公。虽已□要。然会未成立。不妨中止。惟公审之。万一有人疑弟有专利之意。则请将去腊拟寄之办法草案取消。将来专任寄售亦可。惟如何以讲义出版。则寄售一层尚待筹商。还乞鉴谅。肃此再请台安。弟元济再上。五月四日。

台湾游记何时脱稿。甚以先睹为快也。

【6】卓如吾兄同年。前月初四日为复一函。论编国民常识丛书。仍宜由阁下出名。不必另立学会等事。计荷垂察。不审尊兄以为何如。台湾游记何日可以脱稿。甚以先睹为快。时事新报已属按日邮呈。其中舛谬之处务祈勿吝教诲。近日所谓舆论。无非一种偏激之谈。实不足以膺国民先导之任。敝报颇欲力矫其弊。而彼众我寡。不知何日方能唤醒群迷。想公闻之当亦为之扼腕也。学部奏设中央教育会。其意亦欲集思广益。以谋教育之改良。而图行政之统一。维所拟章程未必尽是。而用心尚属可嘉。弟被命为副会长。事关公益。不能不捱挡一行。约须两三月后方能返沪。奉商各事可即与梦旦通讯。勿再寄京。以免周折。至禱。再本国教育之事应如何改良进步。想公必有筹画。可否见告。弟可于会中提议。阅报知南海先生已到日本。是否亦下榻双涛园中。千万为我致意。肃此布达。敬承起居。弟张元济顿首。六月初五日。

【7】任公吾兄同年。自去年六月在京师与公通讯后。几及一载。世事沧桑。无复可说。故久久不通音问。得前月七日书。开缄捧诵。为之呜咽。吾辈既不能早化。且有子孙托生其间。设竟陆沈。宁勿悲痛。愿于万无可为之中。思所以拯救之策。鄙意殆非济以武力。不能使十年以前吾辈早厕身于士官等校。则今日亦尚能与诸少年驰骋角逐。事非竟不可为。而今已矣。坚公来此

晤谈数次。旨趣大略相同。今东归。当能为我代达。闻公思归甚切。去国十余年。又丁兹多难。眷怀故土。宁能忘情。然弟窃以为尚早。蛰伏亦既久矣。不妨更缓须臾。来日大难。我公有用之身。幸善自珍重。 弟张元济。八月廿五日。

*

*

*

第一信疑为光绪二十三年之信。

十二月二十八日 当为宣统二年之信。

三月七日 四月十四日 五月四日 六月五日 当为宣统三年之信。

八月二十五日 当为民元之年之信。

——编者。

*

*

*

【8】 承询敝处近日情形。弟之辞职确有其事。缘与总经理高君翰卿宗旨不合。弟意在于进步。而高君则注重保守。即如用人。弟主张求新。而高君则偏于求旧。隐忍五年。今乃爆发。嗣经董事会出为疏解。高君亦认弟之政策为是。并自辞职。另推鲍君咸昌（现管理印刷所。亦创办人之一。）李君拔可继任。添招年富力强有新知识相助为理。高君与弟皆改任监理。专司指导监察。而不问公司之日行事件。如此办法。是否于公司有裨。尚待试验耳。 九年四月二十六日。

【9】 任公同年。昨因座上客多。未能畅谈。顷欲趋诣。电询又已出门。甚怅怅也。中国历史演讲稿如须速印。请即寄交叔通或梦旦。如何排印。并请详细说明。又英人威尔士所著世界通史。弟已函知公司暂行停译。惟清华学生所译之稿。经我兄润饰。秉笔者既有数人。将来交商务发行。报酬一层。如何计算。应需若干。全书何时可能脱稿。统祈核示。商务印此书。弟拟于半年内告成。迟则失却机会。故甚欲预为商定也。 十年九月二十四日。

致熊希齡 秉三

秉三吾兄同年有道。聞公被命入閣。想望新猷。前見大電。謂不能與暴烈分子腐敗官僚相處。極是極是。今暴烈分子盡矣。所急須打掃者。此腐敗官僚耳。若輩誤國什伯於暴烈分子。根深蒂固。抉摘為難。然信公必能一雪此言也。月初由趙竹君兄傳達諄命。將以教育之事相委。此在今日為至重極要之職。觀于廣州南京官軍入城後之舉動。吾國民若不亟施以教育。後此將何顏立于世界。竊謂整理財政。固為當務之急。然以教育方之。則財政猶退居其次。若民德不進。即畀以法美之富。其不陷溺於狂蕩者幾希。是有財匪獨無益。而適以害之也。且聚無學之國民而與之言整理財政。方日為自戕之計。又安能循正軌以進行。無論從何方面着想。終不能不從教育入手。財政固根本問題。而教育則根本中之根本也。報稱晰子目為閑部。弟所見適與相反。正惟視之過重。故不敢輕易擔任。雖十餘年來未嘗舍此他事。況在今日正吾輩被發纓冠之時。稍具天良即不見招。亦寧忍自耽安逸。然自維庸劣。終不敢誤我良友。誤我國家。并誤我可畏之後生。當日即托竹翁代電決辭。區區此忱。當蒙鑒諒也。伯唐精細穩練。豈止十倍於弟。季直任公當肯為蒼生一出。然公等果何以慰國民之望乎。秋雨增涼。伏維珍衛不宣。 民國二年九月十二日。

致孙宝琦 慕韩

【1】久疏笺敬。伏审鼎履春和。为颂为慰。兹有读者。读报载四月八日府秘书厅公函称。风闻文渊阁一部四库全书。竟由沪上商家托词刷印。商明清室内务府人等。有即日装运出京之说。殊堪诧异。查全书卷帙繁重。印刷一切需费既多。延时必久。倘致散失不完。则中国宝籍即损少一部。关系文化。实非浅鲜。应由该院行文该内务府阻止。一面分别函交通部。飭警察厅。查禁装运此项书籍出京等因。无非为爱护古籍。格外慎重起见。捧读之下。无任惶悚。但此事本末。容有传闻失实之处。业经寒电略陈梗概。兹再详述之。查敝公司请印是书。先由高君梦旦入京。具呈贵院暨教育交通两部。均蒙批准在案。诚以此书关系中国文化。而卷帙繁重。印刷不易。需费尤多。敝公司为流通国粹起见。辄发宏愿。借期观成。本可在京请书影照。所以必呈准运沪之故。实因工程过巨。需用机器工手。为数至夥。必须由总公司用全力经营。方可克期集事。又全书同时领运者。实缘时局未定。万一道途间小有变故。而已印者不能中止。必致陷进退维谷之境。此中苦情。当荷明鉴。敝公司新建水泥铁筋图书馆特辟数室。专备庋藏。保可无意外之患。至长途转运。不无可虑。亦呈准交通部租用专车装载。并请转飭沿途照料。尤为安谧。曩者徐东海拟印此书时。政府曾招元济入都商议。版照原样。仅印百部。曾为估计需期廿年。代价不下数兆。工迟款巨。议而未行。今敝公司所印。系就原书缩照。定价较廉。意在广为流布。窃维与政府宣传文化。嘉惠中外之意。尚不相背。何敢为罔利之计。拟仍乞俯予援助。代恳极峰。准其放行运沪。至为感叩。民

国十三年四月十五日。

【2】 敬复者。昨得五月三日惠书。捧诵谨悉。敝馆影印四库全书一事。承属来京公同商议。辱荷关垂。曷胜感幸。惟谕称各方面或主张照原书式样。或主张在京印行。以鄙见度之。此直为不可能之事。回忆五年以前。东海在位。议印此书。桂莘誉虎两君。招元济入京。拟属敝公司出而承办。并允由公家拨款协助。当时众议。亦欲依原式影印。曾代估计。仅印一百部。需款约三百万元。国家财政支绌。岂易筹措。然尚有更难于此者。原书版式阔大。纵得英尺十二寸八分之四。横得十六寸。每一石版。只印一页。全书二百二十九万零九百十六页。合上海石印书局十三家。加入敝公司。每日平均只能印九十石。全年不过十万页。约须二十余年方能竣事。此工程之难也。既照原式。自不能不用本国纸料。迨来产额日绌。沪上为百货荟萃之区。犹复时时断缺。论者谓何不设厂自造。不知沿用手工旧法。出产必不能多。若改用新法。则中国制纸之原料。如何化炼成浆。用入机器制造。此时尚未发明。即欲设厂。恐亦非旦夕所能奏效。此材料之难也。上文估价三百万元。所有工料均指目前而言。若积至二十余年。不知又须增几倍。此定价之难也。原书版式宽广。全部凡三万六千二百七十五册。非得广厦一二十间。不能容纳。既出重价购书。更出巨资以建此藏书之室。世间能任此者。恐无几人。此售书之难也。元济当时曾刍议并代筹种种之变通办法。上诸政府。延阁数年。杳无消息。以政府之力。尚不能为。何有于商家。然则不依原式。改用缩印。何不可在京印行。曰是仍不能。敝馆工厂经营。几三十年。一切设备。糜金五百万。前议影印是书。虽不能以全力贯注。然须以大部分供给之。尚须五年。方能藏事。敝馆虽有分厂。设在京师。然若印是书。则必须加两三倍之建筑。其他机械工具称是。敝馆实无此力量。故曰不可能也。于是又有谓

不能在京印行。不妨在京摄照寄沪印刷者。敝馆计划此事。宁不筹虑及此。果如所言。器具技手。均须分拨若干至京。而于他项印刷工程。必多牵掣。在事实上实有难行。又照相之事。因气候之转移。时有变坏。故制版上石之后。不能不取原书复勘。如原书在京。则必须逐叶寄京校对。糜费既多。耗时太甚。商力绵薄。诟克胜此。故亦曰不可能也。明代永乐大典。亦尝写录三部。逮至乾隆四库开馆之日。仅存其一。且有残缺。然尚有二万余册。颇讶当时巨公。如竹垞谢山辈。仅知传钞。不谋剞劂。延至今日。此书仅留数十册矣。秘笈销沈。伊谁之咎。敝馆不揣冒昧。妄议影印四库。诚如来谕。无非为关系文化。冀广流传。或谓敝馆将借此以图厚利。果能售出五六百部。亦未尝不可希望稍沾余润。然每部须售三千元。恐求售亦正不易。元济在商务印书馆二十余年。窃欲为学界稍效壤流之助。今值敝馆举行三十周年纪念。故欲乘机以图。元济敢妄言。商务印书馆若不印此书。在若干时期以内。必无人能肩此任。此若干时期以内。又不知经几许沧桑。今仅存之三部。恐且为永乐大典之续矣。微闻人言。敝馆将盗取此书。转而售诸异域。此真所谓以小人之心者。此次日本退还赔款。有人建议提拨若干。以供翻印是书之用。且欲由敝馆担任印刷。敝馆以此保存国粹之伟业。不欲借重外人。故遂引为己任。岂料反以此招谤。诚非初意之所及。元济尚有天良。诟肯为此。当为左右所深信。如蒙鼎力。俯赐维持。仍照原案。准其运沪印行。非惟敝馆之幸。实为全国学界之幸。如各方误会。不易了解。尽可作罢。敝馆亦不再渎陈。惟望政府诸公。指拨帑项。妙选通才。克期兴工。毋再蹈五年以前之覆辙。此则元济祷祀以求。而不胜其惓惓者也。 民国十三年五月八日。

致张謇 季直

【1】 别经两旬。想文旌早还珂乡矣。溽暑初退。伏维起居安吉。中央教育会议自公行后。几无日不开会议。而言论庞杂。费时尤甚。故至闭会时所议决者仅十有八案。而未及开议者尚有四十七案之多。弟因应无方。致负委托。惟有引咎自责而已。一切详情信卿初之诸君南旋当能详告。沪上各报谅亦纪录无遗。兹不复述。今日甫将通过各案呈报学部。公事可毕。润沅顷已陆辞。弟亦不日出都矣。中国教育会蒙公允认发启。幸借德望。始能成立。而选举之际。元济乃愧在示前。当众请辞。坚不许可。惟有仍祈俯赐主持。畀以指南。俾得徐达改良教育之目的。不徒元济一人之私幸也。会章业经呈送学部。已蒙批准立案。附去刊印会章十分。并通告会员及募捐公启各一件。敬祈察核。至募捐一事应如何办理之处。伏候裁示遵行。肃布敬请台安。 辛亥年七月初二日。

【2】 阅报知公已受事。从此政府中始有真识工商二字之人。为国家幸。为商民幸。且为吾公司幸也。竹老出示电言。具悉盛意。苟有利于国。今为何时。庸敢自逸。但吾国现在实无与世界博览会之资格。工艺殆无可言。所可用者农产。农产亦何国蔑有。所可争胜者特长之品。平日绝无研究。而欲于一半年内搜求之。选择之。诂能有当。若任地方官及商会随意采办。我即以之陈列会场。是何异垃圾车入珠宝市乎。况军兴以来。我国财政是何情状。朝中一文钱。民间一滴血。而乃掷二百万之巨资为此献丑之举。当日政府诸人可谓全无心肝。然为之词者。必曰美首承认。既邀与会。为国交计。岂能拒绝。吾国人向以肯花钱拉拢

为善于应酬。即以此施之于国际。此通商以来之污点。改革之不遑。何可再为沿用。且人之相交犹贵有诚。国交亦何独不然。使以恳切之词。明告美使。谓国力实有不及。只可不与赛会。美人未必不我谅也。乃计不出此。徒剜心头之肉。以博友朋之欢。吾恐美人将窃笑于旁矣。此等举动于国交非独无益。且又有损。凡此皆元济所谓根本已误者也。公意欲元济担任。元济亦未尝不欲为公稍稍补救。但筹思再四。无一方面可以著手。此事对外既已宣布。断无取消之理。惟有将经费尽力减缩。鄙意少则十万。多则二十万。敷衍将就。了此公案。然非公当局。元济亦不献此策。惟公能视国事如己事。故敢为公一言。窃愿公排除一切。毅然行之。亦使吾安分良民少流无数血耳。反对者必大有人。且恐美使亦出而相争。然不妨以真情告之。或美人知我新政府尚有天良也。元济亦非尽持消极主义。后年之会不可与。五年十年后之会不可不与。一面宣布后年核减之办法。一面即规定五年十年后进行之办法。一令各省会及商埠渐设商品陈列所。二以时开物产展览会。此项经费即由节省巴拿马会费项下指拨。似于事势亦顺而易举。人皆为旦夕之计。我独为久远之图乎。公得毋笑其迂乎。闻伯唐议行强迫教育。卓如拟收回领事裁判权。此二者名皆绝美。然于实际皆办不到。民气正当浮躁之时。窃谓政府倍宜慎默。惟加税一端必当举行。但只宜以入口货为限。外人在国内制造卷烟岁销五千余万元。此事病民害国。不可不重征以困之。管蠡之愚。附陈一二。伏祈鉴察。 民国二年十月廿八日。

致岑春煊 西林、伍廷芳 秩庸

久未通问。瞬又凉秋。伏维为国宣劳。动定纳福。兹专启者。南洋兄弟烟草公司为粤人简照南昆仲所办。苦心经营。积十有余年始有今日之成绩。英美烟公司岁销八千余万元而南洋公司能争回五六分之一。不可谓非实业之健者矣。照南先在东瀛□□贸易。曾隶彼籍。总缘我孱弱无力保护。致使同胞托庇他邦。希免苛例。原心略迹。情至堪怜。粤闽数千百万之同胞。侨处异域。莫不如是。此二公之所深知者也。抵制日货风潮既起。争以照南复借相诟。病抵隙乘。无所不至。其始不过二三无赖之徒借端讹索。近则议员诘责。政府复推波助澜。农商部竟有撤销注册之令。此中鬼蜮不问可知。北廷失德。此可概见。夫以吾国实业之幼稚。而有待振兴。华侨资本之充盈而可以利用。为政府者宜何如推诚相与。爱护维持。乃不此之图。而一意蹂躏。致使已成之实业先受摧残。闻者寒心。言者发指。照南先已在部呈请回复国籍。犹复故示留难。不即收录。且照南而外尚有昆弟多人。国籍俱存。何得一网打尽。北廷无道。何足深责。然使数千百万之华侨引为前车。因而裹足。则于吾国诚有碍害。二公南天砥柱。民望所归。简氏昆仲久隶仁帡。应蒙矜恤。可否仰请以护法政府名义电致东海及仙舟诸君。责其倒行逆施之为。并将华侨复籍之不宜苛求。苛求足以阻其内向。为之慨切指示。一面布告全国。使知无道之行仅在此一隅。而数千百万托身异地之同胞不至灰身于国事。或者吾国实业尚有望乎。元济敢于义词。冒昧直陈。并索得南洋公司与北京政府往来文件一份。别纸录呈。伏维鉴察。 民国八年八月四日。

致傅增湘 沅叔

【1】 沅叔吾兄同年大人阁下。奉三月十八日第四号手教。敬诵悉。关君来取书。适弟卧病在家。书存馆中。无从检取。不克寄奉。当复关君一函。计当代达清听。现贱恙已愈。今日到馆阅报。知新铭明日开赴天津。谨将河岳英灵集两册。韩非子四册。一并封固送关君带呈。敬祈察入。河岳英灵集价二百元。已付王雪翁。嘱其暂勿交至莫宅。审定后。即祈径复王君为幸。事冗不克多述。专此敬颂侍安。 民国三年四月廿七日。

此信在馆中缮寄。不克编号。又注。

【2】 得手书。（无月日。）敬诵悉。掷还史通两部。又转交莫君之吴集。均尚未到。惟寄楚生信及银币五十二元已送去。取得收据附上。乞察入。教育案知已议定。无大变更。三学期实不便于社会。暑假年假寒假又春假。徒便于教员之躲懒。而失学生家庭之信仰。此实教育之一大障碍。想公必已筹议及之矣。观澜闻先已就江苏省教育会之演讲部事。不知果能北来否。承询有人欲入本公司股数千。是否一户。抑系数人。向执何业。现司何事。能以姓字见示否。果与公甚相习者。必为设法也。前函乞补寄浙江铁路股票。以便与先来之息单同时交换证券。又乞探询宜都杨氏藏书有无散出。不知均已达览否。未蒙赐复。甚以为念。天一阁书并未购得。想系讹传。近惟得嘉靖伍氏本张说之集一部耳。程树德条议令人沮丧。项城竟交部议。不知何意。公能知其内情否。肃复。敬颂著安。 弟张元济顿首。民国四年二月十二日。

【3】 昨晚送上致杭州分馆信。想荷察入。后山诗注携归细阅。究觉太贵。全书不过二百五十叶。每页计值一角六分。似不

值得。兹仍送还。敬乞转缴原主为荷。费神。感谢。肃此敬颂早安。弟张元济顿首。民国四年四月八日。

借校之书途中如欲阅看。乞示。即送呈。又及。

【4】沪滨小叙。犹恨未能畅谈。文旆北行。匆匆竟未趋送。至以为歉。顷奉旧历三月朔日自小孤山下所发手书。展诵祇悉。苏帖何以尚有疑义。便中可否见示。名臣言行录已以五百八十五元购入。是书避讳极严。如璦璦署偵徵等字均有缺笔。尚有耿偉璋等字亦在缺笔之列。则此颇鲜见者。究系何时刻本。尚未考订明晰。(下残) 民国四年四月廿四日。

【5】前上一函。计荷垂察。迩来起居何如。甚以为念。汪刻两汉仍属聂估设法。大约壹百九十元可以办到。现时尚未成交也。前于四月二十七日寄还季沧苇书目一册。又借校书五种。系装入京分馆第六十二次第一号货箱之内。不知已否送呈。如尚未到。务祈就近一询为幸。又代领浙路证券。清账承嘱补抄。当即函托叶揆翁。诂揆翁已赴河南。竟不得要领。顷已检查明白。谨将先复函件一并呈阅。尚有一张无息单者。其股票应如何办理。并祈示复。俾便遵行。再本馆开股东会。度台从未必能来。务乞指定代表。又江苏学校股分。系公所介绍。亦祈转达。至以为慰。东邻交涉。只算已往。欧战既了。来者无穷。风潮之恶。不啻什佰。未知当局何以处此。公有所闻。尚望见告。敬颂著安。民国四年五月十八日。

【6】昨上一函。计先达到。汪刻两汉昨晚取到其前汉。版式虽是。而汪文盛之名业已剗去。易为福建某某三人之名。聂君谓我兄前次只见后汉。未见前汉。不知尊意究竟欲得之否。姑将书价扣存。先将全书八十册交发书处附入第七十六次第一号货箱之内。托京分馆送呈台览。如果合用。即祈飞示数行。以便付价。否则亦祈即日寄还。无任感荷。再本馆拟印旧书。以应世用。拟

定名四部举要。第一集种类业已选出。约在一万卷以上。拟分三次出书。全部约定价二百元。亦分三期缴楚。欲零买者则照各部分定价。贵亦不逾三分之一。兹将目录附呈。伏祈代为察核。如有应增应减者。并求指示。但有所增。必有所减。因格于售价也。敝处藏本尚不敷用。将来尚拟就邨架借影。所缺书名已用朱笔标出。如所选之本有未善者。亦乞代为改定。不胜感禱之至。敬颂著祺。鹄候回玉。 民国四年五月十九日。

【7】 选奉十月初四日又无月日两次手书。均敬悉。津馆汇下壹百元亦收到。礼记昨始交到。共十册。卷数无误。叶数未克详检。察线装尚未尽脱。当无错误。适张君廷桂明日北上。即包固托其带呈。到乞察入。秦藩本史记亦已交到。凡二十二册。只可附入货箱寄呈。想不责其迟缓也。修词鉴衡。容遵命与商。如能照议。当代购。卢氏书索价四万元(一切中费均在外)。已令再核减。书目屡索尚未到。赵宅喜事。闻一时未能定期。吾辈礼物。似须早备。恐仓猝定议。邮寄不及也。仍祈随时探示。不胜感禱之至。肃此奉恳。即颂著祺。 民国四年十一月廿一日。

【8】 本月廿一日肃上一函。通知宋本礼记已托张廷桂带去。(收到后乞示。)秦藩史记则附货箱寄呈。计荷察入。旋于廿三日又奉十月十一日手示。展诵谨悉。银币六百已照数收到。当招古今图书馆送明本元遗山集来看。即付九十元。仍嘱其自行交邮寄奉。邱绍周探不在沪。而将尊函加封寄去。渠今日已来。书钱两交。来示谓有覃溪及兰石诸公跋。兰石何人。其荷屋之别字耶。两三日后来舍亲夏剑丞北上。当托带奉。敝处先将共和书更名普通。以为过渡时代之用。已送部复核。(照审查图书规程令。)乞代托张袁诸君。即予批准。陆氏在京。恐出而破坏也。专恳敬颂台安。 弟张元济顿首。民国四年十一月廿六日。

【9】 二月廿一日肃上数行。计当达览。西域同文志前谓二

百六十元。亦请代购。昨日伯恒来信云。蒙见告已为他人购去。可惜之至。学津讨原。知己购得。伯恒谓内有缺叶。拟请转飭原贾补抄。此等琐事。不敢奉劳。但祈告知其中缺卷。留意代配。可寄丁君处。伯恒来信谓易林缺卷一。毛诗古韵考缺卷五六。太平经国之书共十一卷云。李青莲集据谓并非己物。索价百六十元。至西汉详节则至少须百八十元。然两书均有缺叶。(清单附去。)而李集尤多。西汉详节则板本亦颇模糊。弟意两书各一百元。似已不菲。未知尊见以为何如。去原价尚远。弟并未与丁君说过。敬候裁酌。衲鉴样本即可制成。惟印本有美恶之分。斯制版有难易之判。兹将出版部来信一纸附去。敬祈察阅。并查明某种约若干叶。开一清单寄下。当订约估价时未尝计及此层。如费修工过多。尚须将价格商议。故此时不敢遽发样本也。近广东来宋本资治通鉴。首册每叶十行。每行廿一字。疑即是绍兴本。取江苏书局之资治通鉴校勘记对校一过。卷一至三不符者仅两条。此又未知何故。纸质墨色刀法无一不肖宋刻。云全书有元补抄配。尚未寄到。索价尚不甚奢。将来如能购入。尊处缺卷或能补足影印。亦未可知。余续布。 民国七年三月五日。

【10】再敝处修订教科书。尊意欲将欧战事加入。鄙意斯时颇难措词。拟俟战局既终。再行记述。前函已详言之。计荷垂察。近见日本报纸纪彼国教科书关涉此事者。意见大略相同。当嘱同人译汉。别录一纸。并附呈原报。即祈察核为幸。 弟元济再启。七年三月五日。

【11】三月六日肃上一函。计荷垂察。同时得旧历正月廿日手书。因已封缄。且事冗不及奉答。仅于函面附注数字。想蒙鉴谅。西域同文志。顷得三月五日书。知在古物陈列所借得一部。如能寄我一阅。甚感。甚感。学津讨原已寄到。见抄配甚多。于影印颇不便。不知尚可退还否。如过于为难。则亦不必。顷已派

人检阅。尚未竣事。故不能知其若干也。李诗及西汉详节已详前函。拟商丁君将首本寄呈台阅。嘱抄账单。别纸附呈。乞察核。陶兰泉处二百元迄未交到。 民国七年三月九日。

【12】 前日奉复一函。为影印道藏事。计蒙察及。宋本资治通鉴。全书业已寄到。印本尚不错。惜缺去序目及校勘衔名。抄补凡二百余叶。损破者亦数叶。避讳至宁宗嫌名与常熟瞿氏藏本相同。江苏书局所刊校勘记为常熟张君所撰。不明言所据。宋本为何氏所藏。然料必为瞿氏之物。取以对校间有歧异。亦有宋本似误。而此本已经改正者。则此本似当在后。第二百五十八卷末卷第行后有铲去字迹。辨是至元二字。其余不可复识。此外尚有数卷末叶卷第行后亦有剜补痕迹。又有数处恒恒敦等字。原为缺笔。后经镶补完成者。痕迹显然。(此事似未经前人道及。)岂此版至元时尚存。不欲留前朝之讳。故灭其迹耶。然镶补处极少。又何以不尽灭之耶。书中戍字多有作戊者。此字似非宋讳。若谓与曙字同声。则此外同声者多不缺笔。殊不可解。公闻见多。敢祈见教。前示百衲本有抄配明补。乞将卷叶开示。如能补足影印。亦大佳事。公方得衲本于前。而弟复得此本于后。天下事真可谓无独有偶矣。同来者尚有十行十六字王弼注周易。书亦致佳。惜系辞以下已系抄补。又宝祐本纪事本末已有嘉靖补版。然不多刻。正在谐价。千万勿为外人道。恐一传述。必有大力者起而攘夺之。至可惜也。丁氏李翰林集西汉详节两书已详前信。欲得之否。商退学津讨原已否定妥。便祈示及。敬颂台安。 弟张元济顿首。民国七年三月十四日。

【13】 (上残)来青阁来信(原信附呈。)谓须付一百五十元。弟未见付据。称再函商尊处。古书流通处先亦称须八十元。弟亦拒之。后请照付。已给之。收条附去。乞察入。学津讨原本专为影印之用。抄配殊不宜。只可退还。已经寄出。琐事屡费清神。甚

以为歉。所垫各款。殊不需用。弟近日售去公债数千元。(四年公债抽签已过期。何时举行。乞见示。)手中尚充裕也。李翰林集及西汉详节殊不佳。尊意既不欲购。是否即缴还本人。抑或酌示一价。如果便宜。亦可买也。衲本通鉴叶数清单已由伯恒寄来。敝处新得之本与所谓建本相同。然何以尺寸不符。疑影印时已缩小矣。然细细比较。彼此笔画亦间有不同处。殊不可解。已别录一纸。详述同异。敬祈鉴及。现在尚在谐价。大约不致变动。第三四月间拟北来作西山之游。公欲阅何卷者。乞开示。衲本抄补及明补为何卷。亦望示知。弟当携以呈阅也。本公司来月十四日开股东年会。已有公函寄呈。届时乞推代表莅会。官余利仍照去岁例。派一分五厘。并告。

百衲本 卷七十七第十二叶。半叶阔英尺四寸七分。长七寸二分半。后半叶第八行第五字讓字缺笔。

新买本 半叶阔五寸二分半。长八寸二分。栏外有耳为魏高贵乡公五字。中缝上有字数。下有刻工姓名。白口。讓字不缺笔。前半叶第五行第一字吴不毁。后半叶第四行第二字原系始字同。 七年三月廿日。

【14】 本月十一十四二十日迭寄三信。想均达览。所拟影印道藏办法。不审尊见以为可行否。合肥复出。报称阁员极少更动。又谓公仍留部。其言想确。则影印道藏事仍可进行也。前代收邱绍周处文苑英华太平御览两书。于阳历二月九日附入运致京馆第二十四次第一号货箱之内。想早递到。今日接邱估来信。托催书价。(据称尚少九十元。)应找给若干。乞示知。弟可代拨也。来青阁究应付与若干。乞并示。当遵办。现拟印宋人说部。欲得善本一校。较有声价。别录一目呈上。随笔数十种。并非全印。亦不敢多借。先借一二种。校完再换。何如。邨架必有精校名抄。拟求慨假。借备校勘。 民国七年三月廿六日。

【15】再前承开示选印宋人说部清单。顷已觅得计六种。冷斋夜话敝处有元本西溪丛语。鹤鸣馆本前已借影。兹所欲借者为老学庵笔记。（穴砚斋抄本。邓孝先藏。）及明项氏刻本之避暑录话。明楚山书屋之曲洧旧闻。皆邺架所有。可否乞借校一过。孝先如在京。祈代商。否则弟可另恳也。归田录活字本容商繆小翁。知注附及。 七年三月廿六日。

【16】三月廿六日肃上一函。已否达览。前日得三月廿三日由天津来书。诵悉一切。谨奉复如左。印道藏事别约发起人及招股等应需费用。可由本馆支給。惟叶数必须确查。方能定价。来示谓先查一柜。推知其余。恐有未妥。最好派人抄一清账。（或即用汇刻书目。）注明某书若干叶。若仅云某柜若干叶。则承办之人并不逐一检点。我处信为实数。则将来太费周折矣。如需用二三十元。可请伯恒照付也。惟此事必须速办。定约备案。发起招股。最好乘公在职之日。省事许多。合肥复出。如不更动。或公一时未必能脱身也。衲本通鉴样本即日起可出。但料半纸价增加。原拟预约价六十元。今改七十元。定价改八十元。余仍照旧。兹特声明。此事迟延。实缘照相影印。彼此诸多隔阂。甚为抱歉。邱绍周应找付九十元。昨日已汇去。陈立炎处先已付过七十元矣。补十元。已交付。取得收条附去。乞察入。来青阁已去关照。尚未来取。弟近来尚称宽裕。可不必亟亟见还也。学津已寄京馆。乞设法商退。抱歉之至。书到之日。伯恒当送呈也。新得通鉴确是建本。惟与衲本稍异同。前已详陈。想已达到。是书实值几何。望代评定。又有十行十六字王弼注周易一部。中缝有开禧重刊字样。似尚可信。惜系辞以下系抄配。又有通鉴纪事本末一部。虽补配甚少。然印本已在移入南廊之后。不足贵矣。四月十三日本公司开股东会。度公必不能来。乞推举代表。股息仍派一分五厘。本馆与湖南银行订约承印铜币钞票。该省经报明政府。

系谭组庵任内之事。中经兵衅。均未交去。现在局面更动。一切善后。首在财政。但前后恐不接洽。敝友夏君剑丞即日北来。思与财部及湘省新督军有所商议。届时尚乞鼎力相助。剑翁当趋诣面陈一切。某日去信为舍亲葛君乞八行。可允否。甚盼见复。即颂台安。弟张元济顿首。民国七年三月廿九日。

【17】再近晤蒋孟苹。言京中现有宋十行本十三经注疏一部。抵押于某炉房。渠已还四千元。未允。曾闻公言系匊斋之物云云。弟记得匊斋一部已为张勋购去。得价甚丰。恐此又别是一部。孟苹又言。曾见仪礼数册。确系宋印。前一部仪礼似非宋印。然则的是二物矣。究竟何如。公如知之望见告。书果佳。拟购也。七年三月廿九日。

【18】迭上数函。计登签掌。均未奉复。甚以为念。前日由京馆汇到银币二百六十一元二角。云系尊处嘱拨者。未知何用。未奉示下。谨当暂存。道藏叶数未知已否算清。白云观道人至今亦未南下。不审何故。高君梦旦北来。知己晤及。一切可以面谈也。百衲通鉴样本谅荷察入。南中友人可以分赠招请购买者。祈即开示。以便寄送。敝友夏君剑丞北上。曾托代向尊处乞假宋人说部数种。又舍亲葛君芄吉来京曾致一函。恳祈推爱嘘植。琐事屡渎。无任惶悚。民国七年四月卅日。

【19】五月廿一日肃奉一函。计荷垂察。道藏已经全数数定。每叶廿行。约十万叶弱。惟查短缺极少。方以为在此照相。诸事便利。已将借书办法拟就。而陈道人忽来。谓此间方丈阎某托辞避去。扬言有董事会。其离沪使此事可以作罢。陈方丈甚为愤愤。谓彼本可强迫。然不欲过伤感情。将来在京总可办理。并对弟等道歉。当为宽解。劝其不必介意。查该观董事有葛陈二君主持最多。鄙意葛陈二君或有揽权及觊利之意。亦不可知。否则竟系阎某别有所欲。故请葛陈二人出面。陈方丈已于今日北还。

弟往送行。据称续葛陈二君颇有转圜之意。云俟阎某归沪商定。再为函达。又据称卢子嘉护使极为赞成。可否请公函托卢君。请其从中怂恿。劝阎某赞成此举。敝处再向葛陈二君疏通。当可解决。未知尊意以为何如。陈道人即日到京。当可详述一切。因此之故。不能定价。诸事即不能进行。甚为纳闷。弟于旧历月底月初。亦拟北来。届时亦可面商。万一不能成行。容即函达。

民国七年六月四日。

【20】 迭奉两书。诵悉一是。百衲通鉴前半部知交袁观翁带来。闻之甚慰。报载已起程。想不久必可到矣。压字机有现成者。广狭仅纵面长半寸。殆必可用。惟铁价既增。工值亦昂。每具售价须卅六元。比去年加半。故未敢寄去。如不嫌贵。乞示下。当即运上。宋刊唐集袁二以千五百元购三册。可谓豪举。尚余三册。索价五竿。厂估谰言。大都如是。如不残缺。即以袁二之价得之。亦未始不可。但弟无力分购。尽归邳架可也。汲古钞本雪庵字要。弟在京日已还与孝先。但乞借我印入涵芬楼秘笈。孝先允托尊处寄下。如尚未交到。乞晤时一询之。白云观陈道人信。因归后碌碌。至近日始访葛陈二君。均允转商沪观监院。窥其意。似尚欲居奇也。元首改选。政局当有变动。但愿公勿去位。庶异时商办此事。较易观成。否则经营数月。率归泡幻。岂不可惜。新铸铅字用洋墨印终嫌火气。故用旧法试刷数纸。然墨色太浮。亦不匀净。据印工云须用宿墨。此为急就章。故不合也。寄去数纸。乞察阅。前闻公言拟印唐子西集。(尚有一家忘之矣。)已决意否。应用何式。祈酌示。唐人选唐诗顷拟开印。公校本可假我作校勘记否。委交文元堂。(收条顷已寄到。附去乞察收。)书价廿六元已付去。尚未有回信耳。半月前托张廷桂带还云麓漫钞一册。不知已交到否。乞示。敬叩侍祺。弟张元济顿首。民国七年九月十八日。

- 江淮异人录 宋吴淑 (傅注)道藏本
洛阳缙绅旧闻记 宋张齐贤 (傅注)翁弢夫有穴砚斋抄本。知不足斋本。
佳本云麓漫钞 宋赵彦卫 (傅注)校本。此以守山本为多。
岩下放言 宋叶梦得
分类夷坚志 叶祖荣编
可谈 朱彧 此书得四库本更佳。
玉照新志 王明清
东坡志林 苏轼
龙川别志 苏辙 (傅注)百川本最佳。
涑水纪闻 司马光
春明退朝录 宋敏术 (傅注)百川本
鸡肋编 庄季裕
却扫编 徐度
林下偶谈 吴子良
泊宅编 方勺
扪虱新语 陈善
席珍放谈 高晦叟
南部新书 钱易
珩璜新论 孔平仲
国老谈苑 王君玉
青箱杂记 吴处厚 (傅注)校本
独醒杂志 曾敏行
侯鯖录 赵德麟 (傅注)明两刻皆有错误。
桂苑丛谈 冯翊
塵史 王得臣
溪蛮丛笑 朱辅

高垒漫录 曾慥 能否得四库本。

甲申杂记随手杂录闻见近录 王巩 (傅注)知不足本佳。

罗湖野录 晓莹

五色线 三卷本

灯下闲谈 (傅注)抄本

归潜志 元刘祁

庶斋老学丛谈 盛如梓

汝南遗事 王鄂

砚北杂志 陆友仁 (傅注)校本

静斋至正直记

玉堂嘉话 王恽

瓮牖闲评 袁文

芦浦笔记 刘昌诗 穴砚斋抄本可觅否。 (傅注)黄校

本

癸辛杂志 周密

澄怀录 周密

墨客挥犀 彭乘

澠水燕谈录 王辟之 (傅注)校本

东轩笔录 魏泰

忘筌书 潘植

异林 李兼

随隐漫录 陈世崇

游宦纪闻 张世南

睽车志 郭象

江邻几杂志 江休复 (傅注)校本

嘉祐杂志 江休复

续谈助 晁伯宇

续博物志 李石

校本老学庵笔记 陆游

抄本家世旧闻 陆游 小山借去刻。

沈本曲洧旧闻 朱弁 明嘉靖义兴沈氏刻本可求否。

【21】 昨日寄去数行。由北京分馆呈上。计蒙察入。顷得十六日手教。知衲鉴前半部已交袁观翁带来。今尚未到。或者留滞金陵乎。大生分厂息折到后谨当代收。乞勿念。宝瑞臣同年收得大典可以见让。闻之甚喜。如经世大典可以联贯。或不联贯而章节各有起讫者。弟愿全得之。其舆图两册如绘画精细者。亦祈并购。但五册趸买。价当稍廉。拟请减作八折。还乞婉商。如可见允。即请代为购定。国史唯疑如未有刊本可作涵芬楼秘笈材料者。五十元亦愿收之。匆匆泐复。不及细检书目。敬乞代查。再行决定。新购水经注三册。每册百元。是否宋印。至为想望。唐集竟为人攫去。失之交臂。弟不能辞其咎也。 民国七年九月十九夕。

【22】 昨交京分馆送去一函。并缴还崇明大生分厂息折两扣。计当达览。午后又奉中秋日书并影印皇甫持正集一纸。遵命飭估印价。来书未言印若干部。已令以五百一千分估计。当不逾此数耳。仿宋聚珍排印样张似已寄去。兹再寄奉数种。仍托伯恒兄转去。乞察收。油墨较光润。然不如华墨刷印之雅。但华墨调制亦尚未合法。现正加意研究。或当有成效也。衲鉴已开印。尊处另印宽片。前请速寄纸来。尚未奉到。今需用甚急。望毋再缓。查预约售出之数。料半者八十二部。连史者八十五部。毛边者七十五部。合计二百四十二部。然截止之时。总计不过百数十部。故现在拟印四百部。取一折中之数。尚祈鉴察。相传丰顺丁氏散出之宋刻仪礼、毛诗要义、东都事略、盐铁论。已由公介绍售与王叔鲁。计值万二千元。积余昨以询弟。谅无此事。不然何来信绝

不道及耶。 民国七年九月廿五日。

【23】 昨上一函。托京馆转呈。计达览。用金属板影印皇甫持正集。顷由营业部估就交到。今寄上。乞察入。尺寸较宽而连史纸质稍软。为便于翻阅计。似宜衬纸。若单衬用次号纸。所加当不多也。借道藏事已晤商沪住持。语多推托。今日又派人往晤。陈葛两君云数月后当有复信。容再布。 民国七年九月廿六夕。

【24】 本月二十廿六廿七日迭上三函。廿三日又寄一函并缴还息折两扣。计荷察及。瑞臣处永乐大典。弟颇欲得之。前函已详。并托伯恒转达。务乞玉成。国史唯疑知已蒙代购。感感。兹有恳者。前敝公司呈请影照北京图书馆经典书籍。已蒙批准。谓该馆定有借钞借影规则。应与该馆接洽。当托伯恒往抄。据称前夏穗卿在馆时所拟。迄未奉部批发。惟闻每册须校若干元。鄙意未免过重。且与我公平日流通古籍之意相背。抄照之费甚属不菲。若每册再取数元。是阻人借而已。公家为此。本非所以谋利。若云补助馆员手续之费。则每册取银壹元。似亦已足。闻该馆正拟呈请将前定规则批发。务祈鼎力主持。弟非独为公司计。亦为公众计。想我兄必能见允也。肃此奉恳。 民国七年九月卅日。

【25】 得九月三十日两次手书。谨诵悉。奉答如下。衲鉴印成。预算彼时当可得三百部。留一百部备销。现均留铅片。如须再版。亦甚便也。寄来日本皮纸已交进货科持样就沪市访购。大约不过印数部。市上有货。遵代办。又示行净皮料半。夙未闻此名。未知产于何处。能寄示样纸。尤妙。是否购得此纸。日本皮纸即可不印。乞示。

顷接到九月卅日第三次信并附来福建仿造日本皮料纸。并拟用之。罗纹纸均囑进货科访购矣。又及。

皇甫持正集估价单。计已收到。所估尺寸直十二寸。阔六寸四分之一。（按英尺计。）此用全张连史析而为六比之衲鉴宽广多矣。仿宋活字印书。欲放宽版式。无所不可。机器尚可展拓。若中国纸则限于尺寸。槽户不肯变通。直是无法。必欲放宽。即如皇甫持正之尺寸可也。若用中国墨以手工印。则任何尺寸均无不可。但工价必昂耳。陈伯玉集已收回。当照排一叶。放宽版口。试印呈阅。陈君其权尚未来。来必见之。但此时殊难添聘新人。且看机会。压字机既不嫌贵。遵即飭运两架晋京。仍托京馆转呈。允借唐人选唐诗。甚感。国史唯疑伯恒信来谓已收到。费神。谢谢。永乐大典之经世大典三册。地图二册。每册百元。亦可购入。但需原装。倘系改装。则请从缓。已托伯恒转告。弟既整购五百元。尚有郎字韵一册。当然不及百元。可否以半数（即五十元。）让归敝处。乞代商。购成后即向伯恒处兑款可也。朱竹垞欧五代史补注稿本是否竹垞手笔。比之彭注详略何如。可否寄示一二册。能寄全书最好。如能印行。尚可收买。陈仲鱼校宋本太平广记五百卷。不知校在何本之上。是否通体校完。全书几册。校勘处每册平均计算共有几条。能与五代史补注并寄二三册否。能购与否。此时尚不敢决。借道藏事屡促尚无回音。真闷损人。不知江君曾与陈方丈细谈过否。有美国人施永高者能识汉字而不能操华语。在华盛顿国立图书馆充董事。酷嗜吾国旧书。于版本亦颇有经验。顷已入京。弟有信介其晋见。乞优待。 民国七年十月三日。

【26】 本月三日肃复一函。嗣又奉到前月卅日手示。并附来福建仿造日本皮纸一张。当囑进货科赴市探访。据称未闻福建有仿造之货。但东洋皮纸上海可以购买。货样尚未取到。云与尊处寄来一种相仿。计全长二十四寸。阔五十二寸。每张可开六张。为长十二寸阔十七寸。似嫌矮阔。然可于横处裁去少许。即便

合度矣。每包二千张。价约银三十两。衲鉴全书计四千七百十余叶。是每包只印书两部有半。再加印工装订成书。一部总须二十余元。多或恐须三十元。明日取到纸样。如果合用。即代尊处印五部。如嫌多。亦可以一二部归弟也。公司亦拟搭印若干部。定价出售。合并陈明。净皮料亦已觅得。纸样附去。其尺寸亦只能开六。而价贵于日本皮纸者倍。太不合算。只可作罢耳。瑞臣处永乐大典弟颇欲得之。曾托伯恒代达。不知已定议否。务乞玉成。费神。感谢。近日想大忙。尚有余闲校书否。起居何如。甚念。 民国七年十月六日。

【27】 本月四日肃上一函。详述采购东洋皮纸事。计荷察入。尚未购买。忽从本馆栈房中觅得相等之纸。但尺寸不同。只能开作四张。且纹系横行。价格略相等。而一则开六。一则开四。相差已不啻三分之一。但纸质较优。而尺幅亦较宽广。纵加寸半。横加二寸。即寄去陈伯玉集样张。甲号之纸也。尊意如以为可用。即乞飞示。否则即另买可耳。陈伯玉集照敝处抄本排成一叶。行款悉遵原式。惟尺幅略减。木版与活字本难密合。况此抄本未必影抄也。甲号即敝处旧存之东洋皮纸。每张四开。乙号即拟购之纵廿四寸横五十二寸之东洋皮纸。每张六开。丙号即连史纸。六开。丁号则毛边纸。亦六开。凡四种。随信附去。亦乞察阅。此书是否即排。用何种纸印。并祈示复。以便估价。胡玉孙来带到手示并明人墨迹及画一件。帖二件。当分别缴还柳杨诸君。祈勿念。永乐大典五册。想已如价购入。尚余一册。当然较廉。能以五六十元并得之否。校宋本太平广记。竹垞五代史补注。倘能以数册寄示。曷胜感幸。 七年十月十日。

【28】 昨日肃奉一函。方谓永乐大典五册必已由尊处代为购到。乃今晨得伯恒信。谓得公电话已经售与田中书。共八册。得价千元云云。闻之不胜懊丧。经世大典在我国已不可见。今竟有

三册之多。流入东邦。殊为可惜。故发去一电。文为宝书八册。请照东价壹竿截留。或酌加百番等语。此电即由伯恒译呈。不知能仗大力挽回否。万一不能。所有经世大典三册。如与罗叔蕴所印者(似在雪堂丛书之内)不相重复。务乞代悬瑞臣同年允我借影一分。俾不至绝迹于中土。不胜感禱之至。如能借到其书。可即交伯恒代照。至托。至托。尚有一事差堪奉告者。则近日购得宋刊宋印资治通鉴目录一部。缺去最后三卷。其书一无补板。出莫邵亭所见本之上。在海内亦不多觐矣。 七年十月十二日。

【29】 迭奉本月五日九日手示。均诵悉。承假校本唐人选唐诗十四册。又柯君新元史一部。均已奉到。元史印本何以如是恶劣。想以资本未足之故。甚可惜也。书价廿元已收尊账矣。永乐大典为田中攘夺而去。至为可惜。弟于十二日尚有一电一信。请加价截留。亦姑作万一之想耳。十九日来书谓已成交。必更无望。但不知借影一层能否办到。田中如在京。尚拟托伯恒与之商榷。公如可为力。并乞从旁赞助之。王培孙之太平广记。公校毕后如寄还王君。可否经由敝处。便可详阅一过。如可留用。当由弟径与议价也。唐诗八种。何义门评校者有七。而国秀集搜玉小集河岳英灵集只有评点。(敝处有毛斧季校旧抄本。与何本又不同。)间有校改。不知所据何本。现拟过录一部。至影印体例。尚须与公详商耳。十一日函附去陈伯玉集样张四纸。计已达到。不知可照印否。衲鉴应用何种棉纸。亦乞示及(本月四日亦有一信论选购棉纸事)。此时尚未开印也。 七年十月十八日。

【30】 前函缮就尚未发。又得本月十五日来书。展诵祇悉。永乐大典为美人分去。度即为施永高君。已函商借影。不知能办到否。五代史注既不如彭刘。无印行之价值。拟不购藏矣。甲种日本毛纸既不以横纹为嫌。准即开印。净皮料半每张开六。尺寸与甲种日本皮纸纵处相等。而横处尚短一寸。(甲种东洋纸纵十三

寸半。横十九寸。净皮料半六开。纵十三寸半。横十八寸。)而价则每刀九十四张。须银币四元六角。为数过昂。遵示不再购用。至陈子昂集皇甫持正集当飭估价。容后再行奉告。宋体小字样张不见佳。姑以奉阅。东海诗稿可以印行。可否即由公代请。吴三桂郑成功事实。似有同类之书。已见刻本。容查明再定。手此奉复。

七年十月十八日。

文德堂之说郭拟不购。因今年所费已不少矣。

【31】再借影道藏一事。屡托人前往催问。均未得复。前日弟往访陈君润夫。始露本意。谓该观正拟募资兴修殿宇。如能捐助巨工。便是护法。诸事都易商量。其意并欲先得现款。不欲于书中加价。前代陈方丈复信本有此意。既要得钱。何以不早说。真闷损人也。敝处同人之意。至多不能逾千元。且须分期交付。以免中途变卦。此时政局渐变。前允发起诸人及认购部数。不知此时无所变易否。如尊意以为可行。仍有把握。即祈见示。以便进行。缘此时既须先付现款。兼之广告样本所费。亦复不少。不能不稍加郑重也。京观陈方丈不知有无要求。江宇澄已否与之谈过。亦望示及。 七年十月十八日。

【32】本月十八日曾寄一函。计登签掌。昨得伯恒来信。传语道藏事可以进行。然续得陈葛二君及白云观来信。词意又多推却。同人之意。陈君曾执旧书业。其言外之意。以为石印书籍必有千百部之销路。故欲借此居奇。无论区区千元。即令倍蓰。亦难满其欲壑。故去信竟作拒词。看其下文如何。各信录呈台览。遇便并乞转示陈方丈。弟事冗不另致函。并乞为我道歉。皇甫持正集前已估价。今再补去一纸。又陈伯玉集亦估去两单。其尺寸均已注明。统祈察核。敝处抄本陈集全书共一九九叶。是否照式排印。并祈见示。用日本皮纸另印衲鉴。业已开工。附去一纸。其尺寸殊不小矣。东海诗稿未知曾代请否。如已取到。望即

寄下。敝处拟借影京师图书馆书。前部批谓须查照借书规则办理。嗣因收费过昂。曾函请核定平允之数。已荷俯准。该规则不知何日可以颁发。并祈飭催。无任感荷。 七年十月卅日。

【33】再陈君与可已来访。晤谈之下。知其于法律之学颇有心得。人亦笃实而无习气。所惜时局靡宁。公司正值撙节时候。不能延揽新人才。且陈君之意。不过暂时栖托。如此位置尤为不易。现时尚未能有以报命。愧歉之至。昨晤王雪澄。询及唐子西集何时可以付印。甚以先睹为快。又谈及北山集。谓此书极难得。海内恐无第二本。尊处既经借校。务必商准原主。从速影印。特为转达。统祈示复。南北和局果有望否。报纸所载。恍惚无常。令人目眩。我辈惟有吁天默祷耳。近日都下有新出异书否。回首京华。不胜想望。 七年十一月二日。

【34】本月十五日手示祇诵悉。夏剑丞函亦收到。已转致感荷。盛意不殊身受也。通鉴样本遵即飭寄三十部去。到乞察入。前函询原印蛀损能否描补。及第廿卷一叶。彼此均系抄补。乞查京师图书馆残本有无此叶。未蒙示复。至为悬企。附去封面样子。应请何人缮写。即祈酌定。缮就寄下。前承借阅校宋闻见录四册。日内有人晋京。已托带还。谢谢。来青阁下书价百元。退回不收。谓未议妥云。已遵付。收条附上。宋刻太平广记已校完否。弟近借得严修能手抄宋本夷坚志。即韶宋楼刊本。然刊本颇有错字。黄尧圃据宋本手校支志三志亦不全。敝处有分类五十卷本及今夏在京所得姚江吕氏本。均明刊也。尊处尚有别本否。务祈假我一阅。至恳。至恳。

再借影道藏事。此间复信去后。陈葛竟无回信。想其希望甚大。且陈君有同业相忌之意。又不仅在募捐耳。卢护军使在京。公能挽其出为说项否。惟此一著。或可有效。否则此事恐无观成之日。缘在京影照匪独费巨。且手续甚繁。需时过久。同人仔细

筹思。颇多望而却步也。 七年十一月廿日。

【35】 前月杪肃上一函。计当达览。东海注意教育。迭见明令。我公将有何策以为督进。甚愿闻之。前日见贵部七十五号部令公布读音统一会所定注音字母。此亦促进教育之一事。但字母业已颁布而不明言某字应注某母。则将来人自为注。省省不同。县县不同。必至读音欲期统一而适得其反。弟曩在京时已为公言之。敝处所出初级教科书及字书。此后自应加附音符。以蕲适用。惟无所凭依。又不敢妄自造作。查从前有王棣者曾著一国音检字。已经贵部批准。是否即据为准则。又闻贵部委托吴君敬恒编定国音字典。已经脱稿。呈请审定。且闻其中与王君所著检字有出入。鄙意贵部此时急宜颁一定式。指明某字注某母。违乎此者禁用。庶可渐收统一之效。敝处久将此项字母制成铜模。兹附呈察阅。吴君所编字典如经核准。可否即交敝处刊行。如须用官牒具领。当托伯恒就近办理可也。来青阁书价百元是否仍照付。又前月杪一函所详各节。并祈示复。 七年十二月六日。

【36】 本月六日曾寄一信。计达签掌。前日沈商耆来。带到本月初四日手书。展诵敬悉。奉答如左。

皇甫持正集玻璃片一箱已收到。尚未启视。不知能免于破损否。前估之价系用连史纸。一开六。今改用东洋棉纸。一开四。故价有不同。前为一百九十五元六角。今为二百三十七元一角。相差不过四十余元。而纸质既佳。篇幅又加宽广。似尚合算。估单一纸奉呈。现正赶印衲鉴。拟旧历年内竣事。皇甫集恐须少迟。

衲鉴新印残叶。容即寄去。

太平广记廿六册收到。所校殊不多。恐未必尽据宋本。书名下有注谈字者恐据谈氏本也。拟不留。当代送还王君。原信附缴。

道藏事恐难得当。此时未说妥。不能先售预约。若如来示用官力强迫道人。固无可矣。而我处发售预约万一不能满额。则仍不能印行。不免贻人话柄。同人之意以为。官力一层断不宜用。还请熟思。

诸史提要向来藏家似均未见。闻之极喜。

唐六典从未见过。北宋本虽只五卷。可称独冠。将来馆中拟印行否。

抱存以宋元本及抄校本卅二种押九千元。便宜之至。公何不得之。中有异本曾借校否。如尚有他种出押。望介绍。

杭州寿松堂孙氏有宋本名臣碑传。琬琰集一部。尚系四库发还原本。今拟出售。索价二千五百元。稍有缺叶。不知公欲得之否。

来青阁书价壹百元已付去。收据附上。乞察收。 七年十二月十日。

【37】 十一日寄去一函。并附来青阁收条一纸。计已达到。十二月初九日惠书诵悉。陈立炎屡访不见。所需各书昨在柳蓉村处获见数种。别纸开呈。索价荒唐无从与议。虞伯生诗闻已让至五百元。亦有抄配。鄙意至多不过一半耳。大戴礼至多值八十元。公如不欲得之。弟思为涵芬楼收之。昨又在蟬隐庐见一东野诗集。九行十八字。系秦禾复宋本。似比汲古本为胜。索价四十元。不知公愿买之否。又有景泰本李文公集。颇古朴。则开价壹百元矣。皇甫持正集估价单核准后即乞见示。当开印。百衲通鉴旧历年内可告成书面。如已缮就。乞寄下。弟亦另托子培写一分。以备缓急。闻公有学海类编欲让人。确否。定价几何。愿闻。 七年十二月十六日。

【38】 十二月十六日迭上两函。想均达览。前日伯恒寄到无月日手书一纸。谨诵悉。注音字典允交敝处印行。甚感。皇甫集

已属速印。但金属版须用折光镜照相。则落至版上。适成反面。可以即印。京中照相馆无此种镜子。此间须多翻一次。较为费事。恐北山录亦是如此。玻片尚未到。谅一时无便人之故。印价二百元昨由京馆汇到。先行收账。随后结算。将来如有古本需印金属版者。最好能交快邮寄下。由敝处径照。既可省时。又可节省。但恐有不能远寄者耳。东海有友人文集拟用仿古字排印。用何款式纸张。寄稿时乞详示。查氏书欲得何种。决定后亦乞示知。闻虞伯生诗续编已还至六百元。弟殊不信。或系柳蓉村之狡狴也。名臣碑传、琬琰集有意否。余续布。 七年十二月廿二日。

【39】二十三日寄去一信。昨日又寄皇甫持正集样书一纸。计当达览。十九日惠书（今日又得一信。不记月日。）属查顾若波耦园图。当时各件带到即托仙华转交。据称未曾收到。此件原笺附呈。即祈察核。柳蓉村之书顷往催问。知各书尚未寄出。据云尚有困学纪闻。已令速寄。大戴礼绝佳。如购成。务祈假我一影。时局渐定。购纸亦稍有把握。前拟印四部举要。即欲着手开办。新年（阴历）后便当发售预约。尚思从公借书。戴记亦是中所用也。道藏尚无办法。是书既经开手。同时断难并办。只可作罢。彼此经营许久。卒归徒劳。凡物之显晦。殆数有前定耶。秦刻东野集。景泰李文公集。容商定再复。近借得严九能影抄夷坚志甲乙丙丁四集。与陆刻本稍有异同。敝处旧藏清平山堂本亦可增补数则。此外又借得堯圃校宋本支志七集。三志三集。颇称罕秘。刻正仇校。拟一并印行。公前属选印宋人说部。明春当有十种出版。藉副雅望。

正封函付邮。续奉手教为答。注音字母事敬悉。并函知伯恒矣。 七年十二月廿五日。

【40】奉十二月廿九日手书。谨诵悉。明纸两束均收到。皇

甫北山两集各特印一部。已囑照办。惟北山玻片尚在天津分馆。已有信来。须有便人方能带沪。已一再催促矣。胶纸传有化学药水。用以上石。不能印书。非日本纸之谓。徐森翁囑印北山集。前示以东洋棉纸印一百部。连史纸印四百部。今来示云以此纸印一半。是否改印东洋棉纸连史纸各半。仍请示悉。恐有误会。敢再问。想不责其烦琐也。柳蓉村可恶已极。仅见寄方言困学纪闻两种与尊处。问大戴礼。则云已售去。问某某。则云尚未修好。其实皆系一种鬼蜮伎俩。已令将方言两种径寄去。书估面目。骄人至此。吾辈不可不有以惩之也。昨见明精印本白乐天文集三十六卷。(与兰雪堂马调元本编次皆不同。)无诗。有年谱。在卷末有德祐年序。遍察各家书目。均未载。不知公曾见过否。乞教之。专复。 民国八年元月四日。

【41】 本月四日寄去一信。想已递到。元日书来。展诵谨悉。方言及困学纪闻因柳估过于居奇。自视太重。故不愿代寄。前日往询。则云邮局令其作价。须先报关费。钱太多。尚未寄出。云云。弟已催令速寄。但不知有无变卦。大戴记探知。云售与孙星如。问诸孙君。云亦在磋议。尚未到手。究不知从中是何狡狴。柳估为人。可恶之至。秦刻东野集。又明刻李文公集。因罗子敬不在上海。其店伙未能答复。稍迟始有回音也。又来书云宋本书笺用贡边纸印数百张。未知何指。衲鉴不印书签。只有内封面。各从全书之纸。参以他纸。似欠大方。未知尊意以为何如。此时亦已印就矣。 八年元月八日。

【42】 得一月七日书。诵悉一切。北山录玻片搁住在天津。不知何故。已屡催。大约剑丞南归。总可带回。徐森翁欲全印日本纸。当遵办。旧纸附印。我欲添一部。乞速寄纸来。又另印料半纸十部。亦当照办。惟方言版口是何尺寸。敝处未悉。乞用英尺量准开示。以便饬知。博古斋之书前日又往催。允即于次日寄

去。不知已收到否。蟬隱庐孟李两集尚无回信。諒亦为他人攫去矣。承示衲鑑十二行本有缩小至寸余者。闻之甚訝。当囑每叶检查。复来一信。今以呈阅。弟亦酌抽数叶一看。原本确亦有参差之处。又称远近光线与夫天气燥湿均有关系。然工人粗心。管理者亦涉粗忽。现在均已印成。弃去太觉可惜。相差究属无几。諒购者不至有甚争论也。又查用敝处新购本有四十五卷。弟觉其太多。顷据开报理由。并称原书有缺字及破损者。前未经商准可以描补。故改用敝处之本。复得许描补。业已照成不少。兹将来单一并附去。统祈察入。 民国八年元月十五日。

白乐天文集却非董刻。是否郭刻。培老亦未见过。因无可考。不敢定其是否。公曾校过数卷。望见示。书内構媾穀等字均注犯御名。桓字注渊圣御名。每页十八行。行廿字。其他字均不缺笔。

【43】 本月十五日肃复一函。计先达到。搭印北山录。旧纸尚未到。不知已寄出否。方言版本尺寸。亦望速示。料半纸与东洋棉纸稍有参差。如方言尺寸与东洋棉纸所印尺寸可以相就。则不必另行上石。所省较多。皇甫集印样尚过得去。但墨色时有浅深之别。昨日与印刷部诸人详细考究。谓同样之墨。何以互有浅深。其原实在玻片摄照未能一律之故。或其弊并不关乎摄照。而由于原书。亦未可知。不久便可印竣。是否全行装订。抑须订毛片若干。并望示知遵办。京华印书局拟在顺治门内外稍偏之地购地四五亩。建筑厂屋。尊寓附近一带最为相宜。顺治门大街迤东亦可。不知公能介绍否。醇王邸宅有出售之说。然否。公必能知其详。并望示及。琐事奉渎。悚甚。前属交还杨馥堂帖二本。画一卷。曾蒙询问顾若波藕园图。据王仙华兄谓未收到。已于十二月廿五日奉复。昨仙兄于无意中发见三物具在。当时谓未曾收到。实系误记。兹将来信附呈。弟当时亦过于疏忽。未曾追问。

致延阁如许之久。甚为惭愧。昨已函询杨君。商询如何交付。祈勿念。 八年元月十七日。

【44】 先后奉函片三件。均敬悉。方言尺寸据来样。系料半纸六开。遵令附印十部。皇甫集亦当令先寄散片两分。至衲鉴改印。敝处藏本过多。据敝处出版部调查。其中亦有理由。容再查明奉达。尊意欲改印四卷。自应遵办。其印价即由公司认赔。以赎吾愆。并祈鉴宥。明抄说郭。屡承尊属。已告伯恒兄照购。蒙允假藏本抄配。曷胜感幸。此不全本公如欲留校。即请向京馆取阅可也。账款八十元。未知何项。容飭抄奉细账。 八年元月廿九日。

【45】 再徐森翁委印北山录。前已开呈估单。印五百部。用日本棉纸。照皇甫集式。每页计洋银二元一角八分。去年十二月廿九日来信云印日本纸一半。本年一月七日信又云全部东洋皮纸。前后不符。不知是印二百五十部。抑印五百部。祈明示。是书玻片尚未到。津馆延阁。屡催。顷甫寄出。不日必可到矣。八年元月廿九日。

【46】 旧历更新。伏维起居万福。迭奉前月廿七。除夕。又无月日三书。均谨诵悉。奉复如左。

书牌子即用仿宋活字印。公能加跋语最好。并乞速寄。亦用仿宋活字排印。何如。

皇甫持正集去腊本可完。适岁晚大忙。故又搁起。昨日开工。已催赶印。三日后可寄出。当付快邮。十一二日可到京矣。允假北宋本史记及庆元本五代史影印。甚感。如何办法。容与同人商定再复。影印道藏事去年为陈葛诸人所阻。忿恨已极。其后因所议不成。拟改印四部举要。刻已动手。两事并举。断来不及。尊意欲抽印。未知拟抽若干种。如工事与四部举要无妨碍。弟亦甚愿为之。但初时。先售预约。不及百部即还款停印之议。

此时不能行。缘四部举要必发售预约。信用有关。恐因此妨彼也。来书谓酌领公款。未知如何办法。倘有端倪。并望见示。白氏长庆集确系黑口软体字。除夕来书谓行款附上。未收到。想漏封矣。既将篇次改动。何以仍有犯御名。及渊圣御名字样。乞公教之。

北山录玻片已寄到。徐森翁需印若干部。是否全用日本棉纸。乞速示。 八年二月六日。

再闻李君赞侯新购张迁碑。系著名之宋拓本。敝处甚欲影印。度吾兄必与相识。可否乞代为商恳。将来即交京馆摄影。丝毫不致损坏。用珂罗版印。印成拟赠原主二三十部。李君雅人。必乐为古物流通。重以鼎言。谅必能慨允也。 八年二月六日。

【47】 本月六日寄去一函。昨复得二日手教。谨诵悉。衲鉴本只改印一二两卷。出版部来信附阅。弟前函云。四卷者误也。杨馥堂处之图帖三件。前已属王仙华寄苏州同业妥当者转交。近仙华适告假赴杭。二三日归后当再催问。乞勿念。北山录遵属印东洋棉纸五百部。惟玻璃寄到其底色远不如皇甫集。竟不能照翻胶纸。惟有先晒印照相片纸。再由片纸重照玻璃。为价既昂。且恐失真。据印刷所同人言。恐原本纸色不及皇甫集。或摄照时光线不足。最好请将原书借到寄下。由敝处另照。否则只可按上文所言复照办法。已属估价。另单开呈。伏祈察核示复。 八年二月八日。

再今日续奉二月四日手示并皇甫集封面一纸。敬悉遵办。书已印成。今晚交快邮递去。计三十部。共分四包。第一包内并附有旧纸附印一部。卒然一看。竟不能辨。若撤去首尾两叶。几可乱真。封面只可星期一二日再行寄去。书面用何纸。如何装订。乞示。是否全装。抑留散片若干。并见告。 八年二月八日。

【48】 本月九日肃上一函。另寄皇甫持正集散片三十部。计均达到。重照北山录估单尚未开出。只可先寄。匆匆未及声明。甚以为歉。次日始由印刷所交到。谓原片模糊。须先晒白金纸重行摄影。方能上石。每页须加工资五角。最好请将原书寄来。则重照较为便利。又据声称。前寄去七年十一月廿五日第四千九百二十八号估价单每页五百部。计二元一角八分。实系误将纸幅缩小一倍。故与皇甫集比较。约廉一半。其实印数同。纸质尺寸亦同。断无廉至一半之理。所言各节。察系实情。谨代声明更正。(每叶照皇甫集印价计四元一角正。)并乞转达徐森翁为幸。再全书计共二百五十六页。如能将原书寄下。不必另加先晒白金复照上石之费。亦尚须千元有余。是否仍印五百部。抑须酌减。缘既经更正。印价几须增及一倍。故不能不望斟酌也。又玻片既不清朗。弟虑即晒出白金纸。恐亦不能十分清晰。用以复照上石。仍有为难。当属先晒一纸。果甚黯淡。兹一并附去。敬祈察阅。此恐非将原书寄到重行摄影不可。设竟不可能。则惟有改用珂罗版。又令估价每页须八元。是又贵至一倍。恐太不合算。姑将估单附去。究应如何办理。敬乞转商森翁见示为幸。皇甫集封面三十页。又原样及旧纸印者各一页。昨交快邮递去。想不日必可寄到。书末应否印一牌子。如何措词。并望指示。衲鉴跋语亦乞早日寄下。无任祇盼。新购白乐天文集确系九行廿字。承示感感。

民国八年二月十三日。

【49】 奉二月二十七日手示并衲鉴跋语。谨诵悉。宋体字模四周均稍有余地。前寄去印样看去似疏。实已无可再密。次号字或可免。然现在尚未制成。只可将就。又原有每种卷数一一开列。经敝处抽换抄配及蛀损各卷。颇有不符。前示谓恐购者饶舌。今始恍然。然鄙意以为可以不必如此清晰。拟将来稿某种原有若干卷及右第几种之右字删去。其余一切照排。便觉无甚痕

迹。附记一段。于末句下加又影印之本。因为纸幅所限。故视原书尺寸。稍有减缩数语。于事实较为符合。想购者亦不至有抽换过多之嫌。想尊意亦以为然也。再北山录玻片业已逐一检查。据称皇甫持正集系用淡红牌干片。此系用大红牌快片。摄照时间较短而底色较淡。又适值北山录字迹较小。纸色较黯。故不能用。只可请徐森翁设法觅借原书。寄下重照。又重估更正印价。已于二月十三日寄奉。旋奉十七日复示。可以照印。想系承认更正之价。但是否仍印五百部。来示未曾叙明。故于二月二十三日又去函奉询。仍乞明示。不胜感禱之至。 八年三月六日。

【50】 四月四日十日迭寄两信。计均达览。奉四月初九日手教。谨诵悉。似四日一信尚未达到。何迟迟也。衲鉴预约截止。计总馆售去四十三部。又送袁伯揆张石铭各一部。分馆售去三百十二部。计料半纸总共售去一百十五部。连史纸一百三十部。(连送人两部在内。)毛边纸一百十二部。后来加印棉纸二十部。准如来示。定价一百六十元。料半仅存五部。定价一百二十元。殊不为贵。连史存十部。亦拟增为捌拾元。毛边存廿八部。即如前表定为六十元。现在存书无多。不久恐将售尽。售完之后如尚有人欲得之。拟专印阔大之本。并用佳纸。庶于目前加价发售无所妨碍。但亦必须凑集若干人。预定若干部。方能着手耳。元本通鉴承通假。至感。四部丛刊目。有暇务祈核阅并教正。道藏事如何。有办法。乞示下。缘丛刊即须动手。须兼筹并顾也。 八年四月十七日。

【51】 昨得上海总公司来信。谓资治通鉴无论销数若干。必须开印。请即检书寄去。弟南返尚须时日。后日有友人乘车赴沪。拟先托带一二十本去。未知尊意以为何如。敝处新购一部。所缺卷页别纸抄呈。将来配印。必须避出。即祈核对为幸。明日观书在何处。(图书馆地址弟亦未详。)以何时往。乞见示。昨访叔

鲁。云已赴北戴河。赏奇斋八种已成交否。尊处如有校过或善本宋元说部。仍祈借校。此不急急。弟归时带往可耳。 八年六月廿九日。

【52】 昨日道人之意。似尚未能慨然允认。拟过旬日后再请公催询。最好乘弟在此定议。可省却许多周折也。百衲通鉴尊处抄配各卷与敝处均不相犯。可以补足。小字本残破者如卅卅一卅二卅三各卷。亦均有之。惟小字本难照者内有四十八卷。(抄第十八页。)五十二卷。(抄第六页第十四页。)七十三卷。(抄第六七页。)又一百廿卷。(第十八至廿二页有破损补写处。)似不能用。应否仍以尊处藏本影照。敬乞裁酌。前带来四册。如已阅竟。祈检付去俾带回为荷。 八年八月六日。

【53】 都门小住。聚首多时。快慰无似。公司函促南归。匆匆登程。未及走别。甚以为歉。廿五日登车途中。天气凉爽。至为安适。次日依时到沪。足纾锦注。唐人集曾否踪迹。究在何所。能分数种与弟否。丰顺丁氏有宋板四种。为毛诗。仪礼要义。东都事略。盐铁论。到沪后因议价不谐。已携以入京。贡诸左右。不知近日已见及否。索价几何。并乞见示。闻人言艺风还八千元。弟不敢信也。 八年八月廿九日。

【54】 到沪后两日曾寄一信。计先达览。唐眉山集已归翰怡。培老复信附阅。其退回之六十元只可收入尊账。杨寿祺之五十元已取得收条一纸。亦附去。乞察入。大生纱厂息折。五年十一月(想系阴历。)十一日来书寄下。弟于阳历十二月廿五日交津分馆一百八十三号信内附还津馆。同年五十一号信复称已经交上。并寄下收条。收条却未留存。尚祈察核。此件既不在京。试于天津尊寓一寻之。衲鉴用金属版印较石印为精。抽印单张放宽天地可以办到。望速寄下纸张。一俟开工。即可附印。惟寄来原书系下半部。未知何故。惟同人之意仍拟循序开印。万一工事稽迟。外人

责望。可以前半部先付购者。亦先事预防之意。想卓见亦以为然。其前半部仍乞觅便即行寄下。甚盼。属购紫小楷紫毫十枝。弟未归时。先已寄交京馆转呈。计蒙察入。丁氏书曾寓目否。索价几何。已归邺架否。乞示及。寄存李紫东处之宋版通鉴。拟不购矣。又及。 八年八月卅一日。

【55】 本月十八日肃上一函。计达清览。道藏发起人(改称出版委员会。何如。发起二字名实似不甚称)拟加入黄任之。渠此时正在京。不知已与说妥否。伯恒来信谓徐森翁甚忙。照书事尚未与老道接洽。东海既已催促。此时自宜即速进行。望催森翁为幸。先后由京馆寄来宋本陆宣公奏议一本。影抄林和靖集一本。中州集及乐府两本。郭刻李太白集全部四函。嘉靖大统历一本。皆由吾兄属寄者。陆宣公奏议。潘明翁以有残缺。无意购藏。孟莘嫌价贵。问可否核减。书尚在孟莘处。云留观两三日当交还。林和靖集想即兰泉托抄之物。印竣当即寄缴。中州集字小行密。诚不易照。孟莘有一明弘治本。字较大。亦清朗。拟用以影印。而以尊处之乐府附行于后。想卓见亦以为然。(顷查弘治本实有乐本。系被遗失配以他本。似不伦。拟即用授经新雕本影印。好在授经向主流通。不以翻印为嫌也。)李集据伯恒来告。疑必是元刻本。闻之极喜。此间已买得一郭云鹏本。且发照矣。得信之后。即令停止。今日寄到。乃知亦是郭本。然比之敝处一部。较为清朗。亦甚可补其不足也。嘉靖大统历想公为我代购。未知需值几何。前得一本为嘉靖廿六年。此为廿九年。将来更能多觅数年。令其联贯。则尤有趣矣。近见青莲阁刻本穆天子传。系万历刊本。印刷尚好。此书可值几何。并望指示。都下有无善本发见。前年所见之宋本百川学海。兰泉谓尚有希望可以复出。不知现在曾到手否。椿树胡同某报馆之孝经后来有无消息。是否已经售去。甚念之也。此间有原版图书集成一部。缺去数十本。开价尚

不甚贵。京中旧书店能补配否。尚望示及。柳蓉村还来堯言一册。记是公所借与。由敝处交去。谨当代存。有便再寄上。王培初书目能否取来寄我一阅。甚为企盼。书至此又得九月廿二日手书。谨悉。大统历价如不昂。弟拟留。现暂存候示。水泾通鉴及用日本纸所印各书散片。容属清出。一并寄呈。余纸即属搭印续古逸丛书一部。此书现仅印说文解字。(尚未完。)其余拟俟预约截止后再行开印。鄙意销路虽不畅。然希望可得二三百部。日后单行本仍可销售者。当酌量宽印。幼平欲以明纸搭印集古录。望转告即寄纸来。恐日后彼此忘记也。又广成集借自孟莘的系明钞。然讹字颇多。欲另觅一本印行。不知公有其书否。杜为蜀人。想其著述必在收藏之列也。文旌月内南来。欣盼之至。八年九月廿七日。

【56】连日得本月廿一廿二廿四廿六等日手书。又孙端甫交来一片。谨诵悉。惠寄三百元亦已由天津分馆转到。容分别转交。俟取到收条再寄呈。敝处垫款尽可从容。不必急急。披沙集两本遵托孙君带去。另附一部。并祈代校。感荷不尽。缺序及目录并末叶。祈觅人代钞补为托。又韩香奁集二本。李长吉集二本。一并检呈。统乞查收。其明本唐人集。则书篋尚未整理。须少缓方能邮奉。景祐汉书。业已补缀完竣。正在装订。台从南来。定当奉借。沈培老处之翰林珠玉集。容代函商。得复再奉达。如可影写。美浓纸上海不易购。即以罗纹纸代之。何如。承示在京所得精品。可贺。佛祖统纪极罕见。致培老信已阅过。属代查核。愧无以应。谅培老必有以报命也。柳外集曾见过一次。书颇精。惜价太昂。沪市非复去年可比。弟近毫无所得。宗旨亦与公同耳。百川学海用嘉兴府粮册纸印。甚愿一见。所示有一县今无。不知是崇德否。又寄下和陶诗写样一纸。未知何用。是否借抄翰林珠玉集时依此笔意。并祈明示。承询公司推广计画。原

议注重印刷。夏间因战事将所定机器酌量退去。现在营业稍稍恢复。已遣印刷所长鲍君赴欧美考察印刷事。宜期以明春归国。再定进行之策。惟同业竞争极烈。用力不免相消耳。

再影印京师图书馆宋元印本。拟集股开办。弟极愿赞成此举。惟今岁在上海营筑数椽之屋。所费甚巨。现只能附一股。尚祈鉴谅。元刊灵枢素问能索寄一阅。最感。前云有元刊图绘宝鉴。不知已售去否。念念。 八年十月卅日。

【57】 迭奉本月十五日十七日廿一日手书。均谨诵悉。因有估价之事。辗转行查。不能即时裁复。甚以为歉。兹奉答如左。

东海退耕堂诗稿两册已收到。容即付排。但恐不能甚速。尚有数种未知何书。俟诗稿印成是否满意。再议何如。

通鉴样本已属寄数十册去。如不敷。乞示悉。尚可从他处收回补寄也。来示谓无余利可分。似有误会。弟属出版部约略一查。就现在销数论。尊处约可得二千数百元。如能多销。所获较丰。原信附呈。阅之可知其详。但仍乞掷还为幸。来示属寄通鉴。已印零页检数十张寄去。为续招股之用。未知何指。或即是所需样本耳。

附印日本纸十部久经开印。已成三分之一。补印断来不及。不另制版。不计纸张。即印工每部亦需二十余元。(以二十部计。)如补印。必须将千六百余张重行制版。则成本更重。断不犯着。如在敝处多印十部。有人定购。将来亦可作价售去。尊处亦可照分余利也。每部成本约须五十元之谱。将来售价至少恐须定一百廿元。惟尊处附印十部。则只收工本耳。

陈伯玉集前已估过连史毛边两种。今不用连史。改用东洋棉纸百部。则毛边纸或须减少百部。亦未可定。已属分别棉纸百部。毛边四五百部。另估一单。又北山录专用东洋棉纸印五百部。亦估定一单。并样张尺寸附去。统祈察入。如蒙示复。乞将

估单号数抄入。庶易接洽。

皇甫持正集前已有估单寄去。今欲改用日本纸。须另估。原来样张存王君处。顷告假。须俟回馆后方能估奉矣。

衲鉴允就原本描补付影。自当酌量妥办。尾卷钞迹甚新。疑是尊处新钞。故欲得其原本。来示云云。想是旧钞则无可查究矣。补换只能用全卷。断无抽换一二叶之理。惟内有一种与敝处所购孔氏本行款相同者。前后衔接则不妨耳。

孔天胤本在百衲本未印以前甚为罕贵。今衲本既可出世。则其价必大跌。三百元太贵。拟不购矣。

来青阁书价壹百元。前送去不收。昨日来信云已商妥。属送去。是否。乞示遵。余事匆匆。不及尽述。 八年十一月卅日。

【58】 一昨自海盐扫墓返。上海诵留示。谨悉。木老处假书事又蒙说项。极感。倭纸百衲通鉴。敝处已无存者。惟有毛边纸两部而已。宋本通鉴目录已得之否。台从返京途中想甚安吉。战祸能免否。如有确讯。乞示知。

再道藏结算。共售出三十一部。希望尚有数部。但欲印百部。必须售出六十部。否则尚须垫本。尊处发出信件。务祈设法进行。今之阔人费去数百元真不过沧海之一粟。想此事总不至无希望也。 十二年四月十五日。

【59】 奉五月十八日手教。谨诵悉。兹答复如下。

道藏已经开印。现又定出五部。印数壹百。售数总可望五十部。仍乞鼎力吹嘘。抽印单行本务乞代为一选。能得与精于此学者商之。尤妙。

涵芬楼宋元板书当印成样本出售。然馆中并不定价。拟用竞卖之法。由购者自行出售。最高者得之。将来可以代为留意。

续古逸丛书由公介绍。仍照预约缴价。可以遵办。但乞谆属

购者勿告他人。期限则在阳历六月以内。朱幼平兄处并乞代告。

续古逸单行本暂缓发行。尊见甚是。容与主者商定。如已发表。则不能中止矣。

元文类粉连纸者一部。遵呈上。已附入货箱寄去。但递寄迟缓。到恐在半月以后耳。其毛边纸一部。请交京馆收存。

钱牧斋七言联当属速印。印成即寄上。

命开借用敝处账款。另开清单。乞察核。兄如不宽余。不必亟亟还我也。 十二年五月廿三日。

【60】 久未得君信。正深怀想。有人言已去庐山避暑。不知确否。前日致徐森翁信曾询及之。昨得八月廿五日书。知果有匡庐之游。近已归京。伏想起居安善。甚念。古逸余利属拨付陈立炎。兹已送去。取得收条。今附去。乞察入。来书谓别与陈立炎一函。介绍购道藏。属减为九五折。此函未见。想已径寄。如来买。当遵办。尊处介绍尚有若干部未来。附呈清单。可否请设法催问。再过一个多月第一期可以出版。由天字至官字为洞真部。全书预约出书之期原定十月。今可无误矣。敝处所买残本。另钞清目呈阅。欲得何种。日后当再商议。尔雅单疏(并非残本。)即续古逸丛书之一。尊处附印。每种两部。全数送去。我兄已有收条。系六月初八日收到。祈一查为幸。 十二年八月卅一日。

【61】 八月三十一日肃上一函。并附上陈立炎收银条一纸。计蒙察入。昨奉九月一日手教。借悉胃病复发。需用平胃散。于接信后即伤人往购两瓶。装一小木匣。本拟作为快件寄上。因邮局章程必须启验。故改用挂号。想亦不至甚迟也。近日已痊愈否。甚以为念。补印尔雅残卷。弟竟不复记忆。无以报命。歉仄之至。再承代选道藏单行本。感谢之至。惟卷帙过多。且专属道家言者。不易销售。尚拟删减。合先陈明。 十二年九月五日。

【62】 十月二日六日送上两函。已于先一日寄上橄榄膏一

罐。计均达到。久未得手书。不审迩来起居何似。前云中秋节后将南下去西湖觅一养静处所。迄今未到。至为驰系。道藏预约共售出六十三部。后半印价当可足用。第一期即日出书。为洞真部。全部共计一百六十四册。依照通告期限出版。并未爽约。所有已收预约之价。已饬结算。容再寄呈。以后如有人来买。似应加价。是否务祈速示。尊处招揽在先者应有分别。亦祈示知姓名为幸。书至此。适奉十七日手书。谨诵悉。徐森翁校过悟真篇尚未收到。因出书期迫。早已属照原本印装矣。续古逸丛书遵饬寄去。暂记尊账。后来结算。夹贡纸两部。料半纸叁部。并连孟庄二子。惟庄子系印成在先。被工人切而小之。殊嫌不称。然已无法。日后再版与否。殊难必也。贵体想已大痊。然南行何以忽止。都中当可无事。厂肆有无好书出现。徐梧生旧藏果有待价消息否。幸为留意。弟将于廿七日去香港。大约以一月为期。复信仍寄宝山路总务处。由李拔翁开拆可也。 十二年十月廿三日。

【63】 杭州分馆寄还尊简。谨诵悉。西湖之游曾云以一星期为度。今屈指殆将归矣。刘翰怡复信呈阅。甚为失望。徐晓霞处尚未有复音。石铭处亦即转伊转达。徐君近颇收书。然亦未必肯出重价也。史记估单附呈。宣纸价太昂。似以料半纸为合宜。原叶数清单附缴。此信系昨日所缮。备今日送。昨已面达。故不另缮。翁日记一部送上。乞查收。 十四年六月一日。

再昨面恳代缮一函。致杭州梅花碑文华古玩铺。索取许玉年先生夫妇画册。如蒙缮就。即祈掷下。当寄杭馆转送。 六月一日。

【64】 白氏六帖原分六册。每册四卷六卷不等。叶号蝉联而下。计共五百四十六叶。首册卷一二已在内。惟序目未计入耳。旧信两纸夹在书中。今检还。乞察入。 十四年五月廿三日。

【65】 午前遣赵君廉臣趋谒。得电知我兄定于今晚启程。惟弟意租界戒严。宜乘七点钟车为宜。赵君想已转达。傍晚当再造谈。京馆来信饮膳正要已经售去。不知确否。我兄到京。还乞查示。布袱两件附还。并祈察入。 十四年六月二日。

【66】 别来旬日。伏想安抵都门。起居顺适。至为驰念。一昨张石铭徐晓霞来寓看我。兄寄存各书石铭颇爱。山谷放翁两集单上并未开价。属为奉询。乞核示。此外如客亭类稿、击壤集。亦颇欲得之。徐君则甚喜白氏六帖。属问系何折扣。弟意抽购数种。得价有限。是否可以脱手。又客亭类稿开价四百元。亦似太廉。究竟如何。统祈裁酌示遵。文友堂有明稗杂钞。中有衍一种。系海盐王文禄所撰。如尚未售去。乞代抄一分。又文英阁有胡文岫诗一卷与众集一卷。如系海盐人所撰。亦祈诸价代买。费神之至。海上风潮至今未了。长此相持。大祸即在目前。奈何。奈何。前数日寄还府报一件。谅蒙察入。 十四年六月十六日。

【67】 前函缮就。正拟封发。续得闰月廿二日手教。谨诵悉。宋刊名贤文粹有先文忠公遗文数首。检阅文集。均已有之。别纸开出卷叶。大约我兄偶未检及耳。惟春秋讲义集中只录三首。来示称四首。缺去一首。乞录示为幸。明钞剡源集容检出另寄。承假新五代史。已照完。弟以殿本校过一半。其足以勘正殿本者无多。而不如殿本之处却不少。甚有脱去两句几及一行者。不知吾兄前曾校过否。钱竹汀指出目录各条。谓非欧史之旧。此亦完全相同。盖为当时坊刻。亦辗转传钞之本。影印大本。恐不值得也。 十四年六月十八日。

乡党统论 见卷五第七叶。

予观乡党一篇。每读一事。必为三叹。(首)醉生梦死。虽名为人。实异物也。呜呼。(末)

春秋讲义五首 见卷十三。全卷题迺英春秋进讲。

夏。曹伯来朝。(一)齐人归公孙敖之丧。(二)六月辛丑朔。日有食之。数用牲于社。(三)

春秋讲义 发题 见卷十四第一叶。

孟子曰。王者之迹熄而诗亡。(首)辄为诸君言之。(末)

次题隐公元年。春王正月。

送陈朝彦序 见卷十六第四叶。

昔有客求教龟山先生。(起)亦以自警云。(末)

孟声远字序 见卷十六第五叶。

绍兴庚申余谪守邵阳。(起)夫何远之有。子益谨诸。下年月日姓名。(末)

王耕耘字序 接前篇。

农人治田。有耕有耘。(起)不则余何敢言。(末)

【68】前月廿三日奉手教。谨诵悉。黄陆两集至少在四千元以上。弟即函达徐张两君。告以定价五千元。不能析售。如系熟人。可作九折。发信后租界适有停电之事。心烦事冗。而徐张两处亦无回信。故迟迟未复。昨又得七月九日书并代抄补衍一卷。感谢之至。先一日张石铭来信。谓拟出六折。并可再留数种。然又未说出何书。当复以允为转达。然相去太远。只可作罢矣。罗子敬迄未来。潘明训弟亦久未见面。应否与商。敬祈指示。白帖尚未照。因赶印续藏、道藏之故。新五代已照毕。弟亦校读一过。甚有佳处。今附去跋语一通。然匆匆一校。漏去必尚不少。兄前曾以殿本校过。可否乞录示一分。然讹误及脱漏之字。仅以殿本比对。亦有四百余。最重者为卷卅二及五七。各约脱去一行。当时不知何以率略若此。以印巨册。似非所宜。南齐声价逊于欧史。前兄意拟四部各配一种。办法最善。惟甲部最不易得。只可徐徐为之。此数书之印行。尚须另看机会耳。饮膳正要为木老所

收。甚善。甚善。将来如须借印。当再与商。弟近向瞿氏借得残宋本旧唐书凡六十九卷。现已发影。将来印入旧本廿四史内。颇有价值。此书恐系海内孤本。不知吾兄曾见于他处否。如不能得。则以明闻人诠刊本补入。两书行款相同。亦正可配合也。需阅明刻横浦集。今日已由邮局挂号寄去。计共六册。到乞察收。道藏第四期以种种耽阁。迄今未能出书。前属开报收付账目。已属会计科清查。近两月来。时局纠纷。人心不定。诸事不免停滞。故至今未能报命。此间罢工事至今未了。敝公司所用电力已被租界工部局停止。甚为困难。现已自设发电机。约一礼拜后可以发动。不知能否合用。又不知彼时大局如何。吾辈在此。真如巢幕之燕。想兄闻之亦爱莫能助也。

夏剑丞诗笺两叶附上。 十四年七月十六日。

【69】 前月十六日肃上一函。计登签掌。时逾半月。尚未奉到复音。比来贵体如何。至为驰念。闻京师淫雨。民多疫疠。务祈加意珍卫。黄陆两集。石铭所还之价。自无容议。惟罗潘等处。应否进行。尚祈示及。寄去横浦集已否收到。新五代史跋语。计蒙鉴察。公前曾以殿本校过。可否假我一阅。公精于校勘。必能益我所无也。京师图书馆有宋刊残本一部。尊藏抄配各叶。惟第七十四卷四夷附录有十二叶可以补入。但不知板本是否相同。敬祈查示。瞿良士亦有此书。惟弟已向借旧唐书。不便再读。故拟向京师图书馆影补。徐森翁均系熟人。想必能助我也。前面托为小女相攸。务恳我兄及年嫂夫人留意。拜托。拜托。十四年八月三日。

【70】 本月三日肃上一函。次日即得京馆转来旧历六月初十日手教。谨诵悉。校书如此迅速。度必起居胜常。至为欣慰。闻京师雨多。自来水极不洁净。惟有专用沸水之一法。沸度愈高愈妙。务祈注意。前函尚未奉复。今又得六月十七日书。谨一并条

复如下。

发还各书。伯恒来信云俟天晴后。或有便人再寄下。故此时尚未收到。

永乐大典仓字四册自可留。湖江两册木老及刘蒋诸君必可留。惟光字二册甚无谓。鄙意每册如在一百二三十元之间。敝处可以购留。祈代谐价。此数想木老亦不以为过昂也。至汇印一节。只可俟诸异日。四库全书事。先得玉虎来电。属派代表接洽。因须有先决问题。故先复去一信。开具六条。请其核示。甫经付邮。又来一电。自此寂无影响。越两星期敝处又去一信。迄今月余。并无回音。玉虎事忙。未便为再三之渎。前日又托伯恒从旁探问。玉虎乃谓馆中无意为之。岂前信均未达到耶。抑以所开六条为无诚意耶。章行严为此事亦来一电。敝处去一电一信。时及两旬。亦未见答。所开六条以第六条为最重要。如办不到。此事直不可能。第二条亦甚有关系。第四五条本属相连。来示问能否照四部丛刊式版口。照此大小。原无不可。但必须用中国纸。馆中既印此书。总须印四五百部。现在中国断无如许一种之大宗纸料可以供我取携。故不能不用洋纸。洋纸即不能不用洋装。洋装即不能不用缩四为一之版式。字小则卷帙无多。而售价不致过贵。销数且可增多。商家办法与政府不同。即在此点。玉虎托伯恒来索敝处去年所定版式。亦已寄去。或者玉虎以此为未合式耶。今将与叶章往来函电留底寄呈。即祈察核。便请代询玉虎。此六条中何者可办。何者未能。乞其明白答复。如有其他办法。亦望见告。以便开会详细商酌。又行严所询与玉虎是否同出一源。将来不至使敝处有左右为难之处。否亦乞代为探示。并恳秘密。不宜当众宣布。恐从中或有不便也。

石铭处已去信问各书可否全留。全留可再减让。得复再告。

李鼎和小紫毫拾枝已飭购。另封邮寄。

前函乞假阅校宋新五代史。甚盼赐寄。

徐君金钵事已函询天津能否位置矣。又及。 十四年八月十日。

【71】 昨日复上寸函。今日又得旧历六月十七日手教。展诵祇悉。掷还二百元亦已收到。吾兄近况并非宽裕。何必如此急急。尚有二百元。台从启行时取用者。俟有余钱时再见还可也。前承代购纪元表萃忠传两书。共给价若干。乞示知。以便出账。石铭尚无回信。子经处容即往访。当遵命相机行事。新五代史查得江南图书馆有同样者一部。如钞配各叶均能补全。拟即在彼影照。已托人往查。尊处如未代照。乞稍缓。若已照。即速示为荷。 十四年八月十一日。

李鼎和紫毫小楷十枝。仅价银二元五角六分。但名目不差。如欲得较佳者。可退还另换也。又及。

【72】 八月十一日寄上一函。计蒙察入。李鼎和紫毫小楷十枝已收到否。石铭无回音。从旁探讨。似不注意。罗子敬出门。闻中秋节前始能归来。故售书事竟无可告语。李拔翁前日寄来手书一纸。属将白氏六帖寄还一校。未知是否需用原本。抑影出之本。若系原本则非有极妥当之人不可。若系影出。已成四分之三。不日可成。候示即寄去。新五代史已在南京图书馆将所缺各叶（即原系补抄者。）照来。系复宋本。且模糊殊甚。北京图书馆如较清朗。甚望代为补照。若相差无几。则不必矣。前允将所校武英殿本借阅。亟思一观。拔翁不久将南归。尚有南齐书。倘能一并托其带下。至为欣幸。前兄在沪时代购纪元表及萃忠传。合价金几何。务祈示及。以便清账。徐君金钵事屡承淳属。已分别函知京津两分馆。津馆复称。徐君现已患病回籍。京馆则称前曾在保定分馆任职。因故离馆云云。似此颇有为难。尚祈鉴谅。道藏账业已结出。敝处罢工以后忙冗异常。尚未复核。只可稍缓再

达。再前示永乐大典数册。近来有无谈及。甚以为念。 十四年九月五日。

【73】 迭奉八月初七日十三日两次手书。谨诵悉。事冗未克即复。甚以为歉。兹已过中秋节。馆事稍闲。谨逐条奉复如左。

兰泉所印营造法式。极欲购藏。昨拔可亦有信来传述尊谕。即请代购一部。书价四十五元。由京馆缴呈。白帖已完全照出。兹交邮局寄上。即望查收。敝处只存此一分。校竟后仍乞掷还。

南齐书及校殿本新五代史。蒙允交拔可带下。至感。五代史补照缺叶样本蒙寄还。已收到。京师图书馆既无可补。只得将就用此翻板矣。

尊意拟印宋本大版书数种。原拟俟续藏道藏印完后商办。如四库开办。则印刷力恐有不给。大部书同时出版。恐有为难。再既有史记加入。白氏六帖。乐府诗集。弟意最好另觅经部一种。配成四部。史记乐府两种叶数乞先查点开示。以便估计。

图书馆印文献通考。此书多至六千叶。此时更无暇承印。书大价昂。且不易售。为该馆计。似非计也。大典仓字号三册。如文友肯让。弟愿出伍百元。姑妄言之。乞便中一探。

翁文恭添售两部。断无不可。已属寄奉。由京馆赍呈。价仍照预约九折。该款即就近拨交京馆。公司曾有版税预约之书。过期后照定价出售之通告。伯恒过于拘谨。务祈原宥。

晋生世兄过于客气。弟往访数次。问有何事需我相助。仅囑署一保证书。其余均云已托李子东。即赴淞进校。弟请派人伴送。亦未允许。闻其未带蚊帐。弟请其到校后开示尺寸。当为代制。至今亦未交下。务请函属有事尽可交办。即须用款。亦可向弟处支取。万勿客气。子东见告。世兄身体似不甚强健。未知是否向来如此。果尔。则不能不注意也。

印四库事荷公鼎力从旁相助。得底于成。拔可入京办理此

事。弟尝譬之唐三藏取经。层层难关。均已度过。此时总算望见大雷音寺矣。白马驮归。尚未知在何日。尚望诸大护法家始终保佑。至属分四期运出。政府稳固。原无不可。但现在政府是否能保持五六年。即能之。而现在主张之人是否能不更变。来者恐未必。尚有许多书呆子(京中社会)尝言之取经之事。唐三藏亦只可一遭。若令往返数次。非独太危险。且恐送却性命矣。

委售各书。一日曾在友人处获晤石铭。询以有无收存之意。仍以价昂为辞。窥其意。近似别有所好矣。罗子敬已归。曾往询潘氏消息。亦称前与吾兄接洽。以后因彼此相距过远。即未再往云云。一时竟无售主。奈何。奈何。

小楷紫毫兄以为太好。校书可惜。弟则以为笔砚精良。人生一乐。不宜惜此区区也。如须另购。仍乞见示。道藏账目甚繁重。弟尚须细核。容另复。十四年十月五日。

【74】奉二月初六日手书。谨诵悉。徐氏书籍难买。周易单疏乃索八千。惟有望洋兴叹而已。此书已有数人给价三千。不图同好尚有如此多人。为之一喜。其姓名可见示否。密韵楼书目现正据以检查。未能寄奉。吾兄四月南游当再呈阅。其中有播芳大全一部。的系宋刻。所缺无多。闻之授经谓曾购得数册。已归邨架。不审可以让归敝处俾成完璧否。需价若干。甚愿闻悉。台从南来。并望携示一阅。至为祷盼。日前中孚银行孙君景西来信。谓伊叔章甫受吾兄之托。敝处有物托带。未知是否指寄存之书。言之不详。弟亦未奉来示。当复去一函。录副呈阅。报载都门近状甚为可骇。尊府想无惊扰。不胜悬念。十五年四月四日。

【75】奉五月廿六日手教。谨诵悉。困学纪闻先是四日由丁在君交到。书极珍秘。爱不忍释。记前示以八百圆得之。甚不贵也。开卷有于右任印记。想又掠自金陵。为丰润张氏之旧物。前见宋刻赵安仁所刊南华经。亦此君所有。不知曾入厂肆否。悖入

悖出。真不诬也。印售各事。昨已函商同人。弟此时已离馆。更不能不征取众意。尚未得其复信。容再奉达。弟之离馆。实出于万不得已。来示谓可调剂其间。为益滋大。此缘兄在旁观。不知内容。个中情节。非笔墨所能宣。俟台从南来。当再面罄。抄本徐常侍集既为乡贤遗墨。又有先人手泽。价三百圆诚太昂。然亦只可购之。叔弢当可推情让我。望转商。原笺附缴。祈察入。如能购定。书价乞向孙伯恒处先取。另附一笺备用。抄示横浦日新勘误表收到。感谢之至。 十五年六月三日。

【76】 六月三日曾上寸函。计蒙察及。旋得五月廿七日手示。属代购书数种。当向锦文堂取阅。黄杨集剡溪随笔均已购到。照码八折。另打九五折。共二十元五角二分。已交邮局挂号寄奉。计先递到。剡溪漫笔。来示谓若无笔记纪事者。可购。原信字迹不甚清楚。未知何意。此却无之。故购奉。如不合用。可请发还。当属东方图书馆收之。平妖传已售去。公羊注疏每册索三十元。其中已有明补。未免太贵。弟还以每册在十元内。未允。此等残书。不易得主。不妨徐徐商议。谨请示遵。道藏将印完。弟先离馆。竟将吾兄拟撰后跋一事忘却。今已发行。恐无及矣。徐骑省集叔弢能让我否。务乞代谋。至恳。至恳。 十五年六月十日。

【77】 昨谈甚快。蒋氏书目。计荷察入。明日午后拟赴图书馆看书否。如无暇。则后日亦午后二时。弟当至尊寓伴往。看罢同至敝寓。晚饭亦便。乞示遵。王佩初书目两纸乞发还。闻兄以谐价不成。均退还。信否。 十五年六月二十日。

【78】 困学纪闻校语。想已校过。乞付下两分。今晚奉约。拟六点钟遣车奉迎。可先与公司董事吴陈叶诸君一谈。复高君信如未发。可俟与诸人晤面后再去措。似更觉有力。谨俟卓裁。 十五年六月廿二日。

【79】 奉还示。知已到杭州。且入居山中。校书看山。其乐何极。甚羨。甚羨。谷水集志在必得。价若干可不拘。(已托杭分馆俞君代付)请酌定。齐巨山集附录两件。已抄成送宏文蔚代存。知念并告。 十五年六月廿六夕。

【80】 兹送去支票壹千贰百元。即乞查收。所以标宏文蔚号者。防有遗失也。即托该号盖章往取。亦甚便易。我兄冒雨远征。可谓宋癯之尤矣。博古斋岭上纪行。顷检书目。早经开单往索。据称已经售去。或居奇。亦未可知。如送到尊处。务祈代留。 十五年七月五日晨。

【81】 别后想途中起居顺遂。未知何日安抵都门。令侄病已见轻解否。甚为念念。困学纪闻样张业已印出。惟校勘各条。弟前经改定。未蒙发还。影印缘起。亦甚需用。务祈即日寄下为荷。属抄各书校补数条。适于台从登程之日抄竟。已由编译所径行寄上。想荷察入。前就经眼书目录出一纸。有尚可访求者否。并乞便中探示价值为叩。 十五年七月十三日。

【82】 别后曾上一函。托京馆转呈。计蒙察及。昨得伯恒兄信。惊悉令叔大人暨令侄先后作古。同深伤悼。吾兄频年迭遭变故。今复撙此逆遇。悲悼自不可言。此后责任益重。不得不勉留此身。为一家担当大事。时复炎暑。祈加意珍卫。无任祷盼。伯恒兄传谕在沪所移之款。稍缓归还。区区之数。何必挂念。有无相通。朋友之谊。况吾兄遭此意外之事。正在需用之时耶。专此奉慰。敬问起居。 十五年七月十九日。

【83】 前得伯恒兄信。知文旆抵京。迭遭两丧。当即肃函奉唁。昨又得初七日手书。言之凄恻。读竟尤为伤怀。然事已至此。徒悲无益。惟有请勉作达观。徐为善后计耳。买书之款。区区之数。何必挂怀。弟此时并不需用。尽可从缓。困学纪闻跋语。亦已奉到。已由编译所另复。兹不另陈。前面呈弟辞职信

稿。别未录副。如能检得。仍乞寄还。又横浦文集复呈一部。前北京图书馆有信来索。乞就近移拨。附信一件。同时飭送为叩。

十五年七月廿七日。

【84】 得七月初四日手教。展诵敬承。今年天气酷热。闻北方亦然。贵体若何。甚为驰系。龙龕手鉴询之公司。确在保险库中。当时不知何以提出交去。弟竟不复记忆。书账原有两纸。互有异同。前点交书籍时所凭一纸。适无此书。以致彼此均未觉察。致劳远注。甚为惭悚。现在谨当暂存。影宋东汉会要所需卷数。适直拔可病利。俟其痊愈到馆。当属检齐。与前书同时觅便寄奉。影印四库。现在本非其时。只因前见报载部议反责本馆不肯赶紧运印。故不能不递呈声明。使世人知责有攸归。部批云云。见者当能明白。如此一大事。因缘自不能不有许多魔障。但使吾辈力行不懈。终当有诞登彼岸之时。机缘一至。仍望吾兄力助其成耳。董事会允弟辞职。此由于弟之力请。京津股东晤及时务祈婉为陈述。前呈函稿已收回。但望公司当轴以后能加采纳。则宗旨相合。弟虽去职。仍可为公司竭尽义务也。前就吾兄经眼各书摘出若干种开呈一单。有可图者。仍乞留意。 十五年八月十七日。

【85】 十七日复上寸函。告知龙龕手鉴现存公司保险库中。觅便即寄。计蒙亮察。一昨得阅致董事会函并附到京津股东通告。展读之下。觉其中多阿私所好之语。殊深惭悚。至指摘公司各节。事非无因。然言之未免太甚。由来者渐非一朝一夕之故。弟在公司二十余年。身在局中而坐令至此。亦不能不分任其咎也。时至今日。改革万无可缓。弟身虽去职。而董事如故。不居名位。不受薪水。毫无所图。纯尽义务。转可与当局从容讨论。或较有接近之缘。正不必以不在其位不谋其政为虑。倘能从此认真改革。亦未始不可转危为安。至欲此时召集股东临时会议。弟

窃恐徒滋纷扰。利未形而害已先至。措置似不可不慎也。吾兄曾受众股东委托。莅沪商榷。当必有常相晤及者。务乞将上文所述代为解释。一言九鼎。裨益匪轻。临颖不胜祷企之至。 十五年八月廿二日。

【86】久未通讯。伏想起居安吉为颂。文郎来沪。匆遽入校。尚未得晤。甚念念也。需用影宋本东汉会要。业经拨可照原单检齐。拟托本馆前湘馆经理毛君(今在山东为官)带京。无如毛君请假多日去浙中。昨甫归。恐到京尚需时日也。梦旦出示手书。知在都中得大典一册。为未见之书。拟印行。甚善。甚善。顷知已将印价估去。每册二本须四圆有奇。封面尚不在内。(鄙意用外洋版纸。将来必不能平服。)定价每册必须售十圆。好古家究不多。恐不易销售耳。京友函告。见大典有未辑书凡八册。每册三百圆。已为日本人买去。与吾兄所见其一耶。其二耶。又言近以好书求售者甚多。然否。前借吾兄手抄经眼录曾摘出若干种。托为追查。不知有消息否。其单未留稿。可否乞属钞胥录示一分。不胜感谢。 十五年九月卅日。

【87】十五日寄去一函。想先到。翌晨往医院候世兄病。见精神较好。夜睡亦安。热度已退净。昨今两日有事未能往问。午后电询锺医。据称日来甚好。热度如常人。创口亦渐小。惟体气差弱。预料至快须一礼拜方能全愈等语。谨以奉达。

前承示有敝邑先哲钱半完诗稿、益翁散稿。不知能代收得否。甚念。甚念。 十六年五月十八夜。

【88】四日复上寸函。计荷察及。昨得七月廿八日手书。展诵祇悉。世兄此时度必抵京矣。途中想甚安吉。甚以为念。属付中国书店五十圆。已随函送去。取得收据一纸。谨附上。乞察存。景印清宫旧书。自是机会。前函谓卷帙过巨者恐难销。至多在五六百叶之间。今需在宫中照相。则成本尤重。益不能不严加

甄择。一切请仍与梦旦接洽可也。李木老允借两汉书。甚幸。其世兄想已抵沪。容当往访。徐司业遗书。知已開箱。何以吾兄只获见其什一。弟前月廿六日信所举各书。不审曾见及否。其他各书。如原刻或抄写均不恶。可以直付摄影者。敝处仍可购藏。但往返函商。颇需时日。不知估人能久待否。缘书恐重复。又须查对。敝处所藏板本而寄存外府。检取又甚不易也。道藏总账已催梦旦速办。带京面谈。新印大典收到三册。仅售其一。料去或有销路。有便乞寄一二十部来。当属试销。都中炎暑渐消。比来起居何如。诸惟珍卫。十六年八月七日。

如蒙赐函。请径寄敝寓。勿转宝山路。免致延阁。至托。

【89】 本月七日曾寄寸函。并附上代付中国书店五十番收条一纸。计荷察及。昨得八月十三日惠书。展诵敬悉。高梦翁北来。想经晤面。景印清室善本。鄙意书如习见者。必须版本特别。或印刷绝精。若为罕见之本。则不妨稍宽其格。一切请与梦翁商定。徐司业书目如已印出。望代索一分寄下。能并约梦兄一观。尤妙。借校各书已由梦兄带至十余种。计可收到。其余俟稍缓再检寄。丛刊再板。有须向邺架借用。如书已由公司函达梦兄径商。想邀俯允。余事续布。

世兄知已抵京。近体何如。甚念。十六年八月廿五日。

【90】 八月廿五日寄上一函。计蒙察及。一昨得九月一日手书。谨诵悉。景印清宫旧书。诚是一好机会。惟照原式景印。梦翁来信谓有版口甚大者。将来印行时不能不以小就大。又入宫照相。费用甚昂。成本过重。销路必滞。时局日劣。不能不面面顾到。已请梦翁就近与兄熟商。承寄示徐司业遗书目收到。谢谢。先是。该估已径寄一册来。即选出二三十种。托伯恒兄问价并索阅头本。尚未得复。来示谓索价奇昂。度必无可着手。今请伯兄将前单呈阅。并另开一单附上。如兄处亦选购若干。彼此合并。为

数较多。取价如在情理之内。或请伯兄先行酌付定银若干。将头本寄下一阅。照该目简章第四条。如不合意。原书退还。望仍以此意转达。若非然者。则竟可作罢论矣。可斋杂稿。敝处已有两部。无须复购。樊氏宋元人集。亦已并告梦翁酌议。

世兄近体。想已完全复元。甚念念。十六年九月十四日。

【91】梦旦南归。奉八月廿日手教。谨诵悉。欧阳文忠公集十二函。永乐大典二十册。承借暨掷还各书。据公司该管各员声称。均已如数收到。可请勿念。景印故宫旧书事。梦旦已详述一切。闻委员又有更动。只可暂缓。文奎各书索价过于离奇。来示晋书开二千元。未知是否即指宋刊载记三十卷。伯恒寄到各种首册。无可交易。只可留志书二三种。弟亦留藏密斋集一种。借以酬应文奎一番检点之烦。承示别见抄本。唐及西汉会要。可否代索首册一阅。馆中有西汉一种。亦系旧钞。为沈十峰所藏。然不足与蒋氏所有汲古景宋东汉比配。将来拟印入四部丛刊续编。故欲别觅一佳本也。所见两种。行款是否景宋。内容与聚珍本有无区别。如并无特色。则亦不必索寄矣。伯恒来信。传谕所藏宋本晋书有五分之二可用云云。未知是否邕架所藏。是何行款。尚乞见示。木老允假两汉晋书。索酬百元。公司中人认为过重。时局如此。即印出恐亦无甚销路。暂行缓议。（极快须明年下半年方能开印。）且晋书前已在南京图书馆照有小字宋本。稍有脱卷之叶。今查得硃石蒋氏所藏。行款相同。而南京馆本所脱者。却系完足。想脱落者必系复印之故。将来如能借补。则此书可不必另借矣。属查经世帝王图谱。行款另纸写呈。祈察入。京师分馆副经理朱国桢兄不久北还。前假阅各书尚有多种未及检奉。如能取出。当托带呈。余续布。

世兄近体何如。甚念。十六年十月五日。

【92】 令郎莅沪获诵九月廿八日手书。展诵敬悉。当即转送。敝公司令将各事逐一查复。甫据复到。而弟忽被盜劫。紮居彼中数日。幸获生还。又续展十月三日十日两次手教。并钞示元遗山集阙文三纸。先后寄来大典均已收到。兹将各事条列于后。

一。弟还寓后。知世兄已入同济。并承到沪慰问。可感之至。

二。清宫印书事已由高梦翁径复尊处。度经接洽。函中请先各照样张见示。甚以先睹为快。

三。寄来大典。据敝公司寄售股声称。先后四次共收到五十本。兹附上收条一纸。又转送蟬隐庐中国书店各五部。该两店收单各一纸。统乞查收。

四。属代设法推销。注重外国。鄙意大典可行。困学纪闻则非所尚。已属敝公司交通科拟具办法。其分寄传单一事。已属照行。惟在上海登两报广告。仅各一次。费钱甚多。收效恐少。故未决定。估单并广告稿附上。应否酌加次数。敬祈核示。

五。补定说郛及湘绮日记并有人托购四部丛刊一部。均已由公司径函伯恒向尊处接洽。一切均照来示办理。

六。抄示元遗山集阙文系据华刻。敝处所据者为弘治李瀚复中统本。并不阙。此所阙者。乃卷廿二之中顺张君碑。计脱一叶有二行。

七。徐氏遗书中有聚珍版三种。为敝处所未有。惟索价过昂。只可作罢。此并非急需之书也。

八。影印旧本廿四史办法。别纸开呈。祈指教。

近日上海绑票盛行。本月十七日竟有暴客数辈。持械直入内室。挟弟而去。留居彼中先后六日。尚无大困。所费亦有限。足纾绮存。

外附朱逖先信。祈飭送。 十六年十月廿八日。

史记 涵芬楼藏黄善夫本配震泽王氏本。

前后汉书 未定。

三国志 适园元池州本。每半叶十行。行二十二字。惜吴志末数卷配宋衢州本欠整饬。拟觅同样之书补完。

晋书 用南京图书馆宋小字本。略有疵累。

宋书 用京师图书馆宋本。缺廿七卷。以三朝本补。 已校。

南齐书 用尊藏宋本。 已照。

梁书陈书 用北京图书馆残宋本。以三朝本补。 已校。

魏书 同上。缺三十卷。以三朝本补。

北齐书 同上。缺三十四卷。以三朝本补。

周书 涵芬楼有精印三朝本。以上三朝本均不佳。如有残宋本能补入。不拘多少。均甚盼也。

隋书及南北史 涵芬楼元刊本缺卷。以京师图书馆同式版本补足。

旧唐书 用瞿氏残宋本。以闻刻补。

新唐书 用刘氏宋本。略有残缺。半叶十行。行十九字。拟觅同样之本补足。

旧五代史 拟用大典有注本。

新五代史 用尊藏本。 已校。

宋史 涵芬楼元刊本。

辽金二史 又元刊本。 已照。

元史 又明初本。

明史 武英殿本。拟附王芾卿先生明史考证。

前属代抄 皇朝传信录。 计四册。 毅斋诗集别录。 计一册。 北碕文集。 计四册。 均已抄成。并托人校过。容另

寄。

【93】 本月十九日肃上一函。言甚冗长。计当达到。昨得王君九兄来信。谓海源阁有宋元本二十六种。捆载到津出售。并抄来清单一纸。检对楹书隅录。均有其书。似非伪托。每种开价少者千元。多者乃至九千元。未免过于离奇。兹抄呈一分。敬祈察阅。开价者似甚外行。三谢诗仅一册。乃开千五百元。黄山谷诗十六册。(杨氏宋本。黄集只有此种。)亦仅开二千元。君九又云。两孟诗均已售去。弟疑而未信。际此时局。谁肯花此闲钱。度亦不过故作疑阵耳。弟已圈出。请君九设法各照半页。寄我一阅。并将杨氏善本选出若干种。托其探取。能否续运。(中有后汉书三国志晋书。又类书一种。有先八世祖收藏印记。尤为渴望。)公司未必能再办。此亦不过姑妄言之耳。其书恐未必到京。兄能赴津一看否。最好运动美日庚款购存。否则分散。亦殊可惜也。然大厦将倾。吾辈亦何必作此痴想耶。儿子久病。甫由医院还家。料量一切。殊忙迫。恕不多述。 十六年十一月卅日。

孟东野诗 一千。	} 云已售。	愧郾录 三千。
孟浩然诗 一千。		管子 三千。
范文正文集 二千。		说苑 五千。
淮南鸿烈解 四千五。		楚词 七千。
云庄四六余话 一千五。		山谷老人刀笔 二千。
吕东莱文 一千七。		孙可之文集 二千。
王摩诘诗 一千六。		端明集 六千。
黄山谷诗 二千。		三谢诗 一千五。
会稽三赋 一千。		陶诗 三千。
韦苏州诗 二千。		荀子 四千。
晋书详解 一千七。		新序 五千。
柳先生集 九千。		庄子 三千。

击壤集 二千五。

后村集 未开价。

皇甫杜岑常诗集 一千五。

以上王君九抄来。云书在天津。

【94】 新岁维起居纳福。潭第迎祥为颂。前月三十一日曾上寸函。托伯恒兄转递。计荷察及。承假南齐书。去腊校读一过。撰有后跋。谨呈阅。又校阅魏书宋书陈书。均已竣事。亦各撰有后跋。各书均另有校勘记。多者至千数百条。并呈上。统祈教正。阅过后请就近饬送朱君(逖先。住德胜门内草厂大坑二十一号。)为荷。景印旧本正史。极拟于本年内发售预约。逖来一意校勘。尚有兴趣。前承允为详细计画。甚盼见示。其他各条。亦求示复。

今春能南游否。甚盼望也。

既封函后。授经来托吾兄代问聊城杨氏所有扬子法言三谢诗两种能单售否。需价几何。乞示。又托。 十七年二月十五日。

【95】 梦旦交阅二月廿七日手书。谨悉一切。上海尚称平静。过客当不至被人绑票。苏杭目前亦无事。吾兄闰月初南来。必不至有意外之阻也。西汉会要既取到。下月南行可否携来一阅。涵芬亦有一部。欲一比对。再定购否也。四部丛刊目录前蒙审查。谓白虎通德论缪本多烂板填写。尊处有初印元本可改用。记得曾经乞借。据编译所称。未曾奉到。大约敝处漏开之故。今当补借。亦恳同时带下。至禱。寄呈南北四史校语知已递到。务祈削正。阅毕即乞转送敝同乡朱君逖先。昨有来信追问也。商馆营业大退。财力之绌可知。四库全书事恐无以副君厚望矣。十七年三月六日。

【96】 阔别两年。高轩过我。乐数晨夕。快何如之。惟寓庐仄隘。饮饌粗劣。殊愧东道耳。昨晨风日晴和。伏想海行舒适。

何日抵京。潭府定皆安吉。至以为念。河干别后。旋至商馆托发青岛电信。出至四马路。访得百新书店有广雅史部全集。不幸先数日为东人买去。遍询邻肆。皆无之。博古斋周书仓之读书要诀。亦为捷足者所得。仅购得受恒受渐斋文集。定价六圆对折。不允再减价。已付讫。(发票附呈。)书属径寄尊寓矣。留交百金。亦交商馆兑至苏州。扇面四叶则托杨寿祺带去。其余书籍。亦开单送与中国书店。(顷得回信。并将书单附回。今附上。)兄所购抄本宋元人集。曾索出一阅。写本甚精。殊不贵。携旧抄西汉会要二册。拟不留。匆匆竟忘缴还。今与刘子一册。并装挂号邮奉。即乞察收。丁氏毛诗要义。顷有人送来。却完全无缺。开价过高。并未还价。询以礼记集说。则云已在京津售去。但不肯明言何人所得。兄试为我探之。拜祷。

适收得文友堂信。并缴上。

又敝馆寄售股收货单并沈信。均呈上。 十七年四月十一日。

【97】 奉十一月廿日手教。祇诵悉。吴氏书目。务祈设法。暂留寄我一阅。敝处购否。当电复。叔鲁已回南。明日当往询之。或在彼处得见。亦未可知也。委至丁氏阅看旧书。容即往访。看过后再奉告。 [年]十一月廿四日。

【98】 前日肃上寸函。并附告世兄由扬返沪。照常入校。甫经交邮。又得三月十八日手书。附来世兄信。遵即转至吴淞。计必有详细复音上慰倚闾之望矣。横浦日新阙文二叶收到。感谢。尚有校正八九字。有暇仍恳录示。添购翁日记及饶君定道藏事。已转知公司。并属径复矣。 [一九二五年]五月八日。

【99】 前去汉口。拟返至南京即乘津浦车北上。诟到时铁道已阻。折回上海。阅报知英界被灾亦重。即发一函奉询起居。托王仙华兄转致。计荷察入。昨得旧历八月十二日书。知闾府平

安。藏书亦已移出。为之稍慰。贵体违和。想系劳顿所致。西报言积水甚秽。极易致病。冬令尚可。一交春后。必有疾疢。曷作图南之计乎。景祐监本史记信是奇物。未知从何处所得。得价几何。尚望见示。来书即送培老。(复信附上。)当亦同为公贺也。弟本欲北游。而两次被阻。兴遂大减。且天气已凉。海行又多风。恐须待来年矣。 [年]十月九日。

【100】 奉八月十三日手教。敬诵悉。李宝泉托寄书。系九月十九日交发货处装入书箱内寄京。计算此时总可运到。便中乞向伯恒处一查。蜀本史记闻尚未售去。公如欲得之。乞示限价。弟当为谋。此为乡邦遗物。公似不可不保留之也。前见杭州吴氏通鉴记是十五行。行廿六字。符否。如系宋刊宋印。索价二百元不为昂。幸勿失之交臂。配册几何。却不记忆。大典承代谐价。极感。藏经无精本。祈勿购。元本不甚罕见也。前代购皇明诏敕。计缺三册。前函已详陈。不审能向原估追补否。费神之至。伯恒来信言贵筑黄子寿之书全数出售。索万四千两。有样本两箱曾带至京。公曾阅过否。弟仅见十一种。似尚佳也。 [年]十月九日。

【101】 前数日寄上一函。为乞商减津浦铁路广告包费。不知已否达览。闻主其事者为孟玉双。务祈鼎力玉成。无任感禱。顷奉五月廿四日手教。展诵敬悉。条复如左。

公司借款承允于下半年先还一竿。谨遵。

抱经楼书曾续托蒋孟莘。云精本已有目录。不肯析售。余者书目尚未理出云云。故未奉复。今知华阳国志已经寄去。闻之甚慰。

公司印廿四史。系接收孙问清之书。问清已印十四史。无力再印。公司借款与彼。为之续成其书。即抵于公司。售出一部。得扣佣金廿两。两年后如售不去。不能归还押款。即以印价售与

公司。细算尚不吃亏。承注甚感。

胡本通鉴久思印。苦无初印精本。公司已排成一部。用三号字。但尚须勘误耳。

借去旧书。校阅后每种乞赐一跋。即以此为租赁之费。可乎。

旧书另设一柜。不另开店。丁隽丞保单已寄来。而人尚未到。去时允过午节后来。今已逾两旬矣。已托伯恒代催。亦无回信。此间急欲开办。公能为我敦促否。

吴佩伯遗书全售欲得万元。如果值得。公司亦可收购。必有详目。乞索寄一阅。此非为藏弃之用。将用以求什一之利矣。有最佳者。亦拟留出。

柳蓉村开书店未之一闻。容探明再告。

公司近因时局不佳。涵芬楼不敢购书。即有购者。亦以备旧书柜之陈列也。天一明本志书三种拟不购矣。

公司重出之旧书。须俟丁隽丞来方能清理。抄出目录。再行寄上。

陈松山欲售明诗纪事板。已屡托常德分馆。索一千四百元。此间以为过贵。查全书共三千零卅一页。印价竹纸约八元之谱。现在售价竹纸廿元。如归本馆。拟售预约十二元。去一成酬同业之劳。所赢仅二元八角。如以一千元购入。必须售去四五百部方能收回成本。闻现在销路。岁约百部。现即减价。至多销数不过加倍。然则须二三年后方能收回成本。且际此时局。犹恐未必。故不能不出以郑重。此书确系永久可售之品。现在是否千元可售。(公是否受原主之托。)其板尚存京师文友堂否。敬祈探示为幸。

半月以来。天气稍见晴霁。而云气可复四合。长此阴晦。令人闷损。想公亦同此感也。偷闲校书。大是乐事。健羨之至。

[一九一八年]六月廿八日。

【102】 阳历本月七日寄奉寸函。计荷垂察。昨日得旧历二月十七日手书。谨诵悉。朱君延昱交来颁赐掌故丛编一册拜领。谢谢。先由邮局递到五册。属转送王雪澂朱古微陈筱石刘翰怡董授经诸君。已于今日一一致送矣。承属交敝馆代销。即转商总务处。顷据复到。可以遵办。请拨寄二三十份。先行试售。定章均以六折结账。尊处委办之事。自可变通。俟台从到沪。再行商定。应立寄售契约。亦届时再行填写可也。我兄可以南来。闻之极喜。敝处可以下榻。惟房舍逼窄。且恐照料不周。将来尚祈原谅。顷寄一电。为苏杭可游。乞寓敝庐八字。由京馆转陈。计早达览。如此信到日。从者尚未启行。祈将尊藏之元刊白虎通德论及徐氏散出之抄本西汉会要。乘便携示一阅。又去年九月廿八日来示。称清室有宋刊后汉书。能否借景。其本子可景照否。并乞预为查检见示。相见伊迩。不多述。 [年]三月十六夕。

致朱希祖 逊先

【1】 奉九月一日手教。知刊印橋李文系征稿公启。已达清览。并蒙指示。甚为欣感。此事发起于葛君词蔚。近金钱翁南来。道出沪上。彼此谈及。谓不可再缓。遂由弟担任开办之事。各县采访。亦已有人。平湖最为踊跃。已增得数十家。其余亦均甚热心。惟石门一县。将来恐无结果。桐乡尚未知若何。原辑本以吾邑为最盛。弟近亦辑得百数十篇。内新增者五十家。百可园藏必有足资采辑者。当约徐氏言之。吾兄在京。必能广为搜罗。俾得增光简帙。承示有关本邑文献各书。盐邑艺文志。数年前在沪曾见一部。索价甚昂。未能购得。盐邑艺文续钞。为先八世叔祖所辑。系钞本。仅存□卷。余已散佚。马喙诗钞。知邑人尚有藏本。弟仅托人将族人著述录出。并未全钞。此外则均未之见。盐邑志林涵芬楼中已有一部。弟数年以来。亦锐意采购同邑先正著述。所得寥寥。别纸开呈。甚愧寒俭。建设图书馆。弟久有此意。责以提倡。弟何敢承。但愿先以一人之力从事收罗。俟机会到来。再以公之于众。我兄在京购得墨麟诗稿。闻之甚羨。此外如有所见不欲自留者。望随时见示。力所能及。必愿留存。贵友何君购得原刊入告编。弟夙未见过。如蒙转商见让。极为感荷。如何办法。并祈询示。

寄去十年九月四日复王荪昀同年信一纸。

马墨麟集中如有与先人唱和感怀之作及题咏涉园者。务祈录示。 十年九月六日。

【2】 逊先先生阁下。卧病都门。迭承存问。感幸何极。旅居无聊。不便调摄。勉强扶病南下。未克趋别。甚歉然也。归来

月余。迄未复元。西医强扶出游。藉以更换空气。由海盐澈浦而尖山。而吴兴。舟居尚觉安适。且有医生偕行。饮食起居。俱有节制。近日渐见痊可。归来得读本月二日手教。辱荷垂注。感何可言。承示近得先德遗著多种。闻之欣羨。笠亭先生诗学津逮。弟亦购得一部。书凡八种。不分卷。而来示乃云五卷。岂止五种耶。承启堂集弟亦有之。如欲抄配。当寄上。徐忠烈公遗集。则极难得也。茗斋先生客舍偶闻。穰卿已印入振绮堂丛书之内。敝馆所出涵芬楼秘笈。亦已影印数种。平寇志。弟已买得。卷端有龙湫山人李确序。四库谓其所著而语气实非。自序所谓管葛山人即茗斋先生者。殆或不诬。平湖葛氏所藏茗斋诗集系分体。并无序例目录。中亦有重出者。弟处所藏。则以年月分编。仅存四册。为卷三、四及八、九。与葛氏本对校。彼此互有歧异。以私见测之。弟处一部似为原编。惜不全耳。原拟印入四部丛刊之中。继以葛氏藏本体例未善。故未列入。异日如出续编。或当采录秀水学校所藏。海盐文献志。王芾昀同年来信谓编辑者乃田菽蘅。而非王文禄。不知何以传讹。已托照录一部。拟即补入櫟李文系。孝辕先生图经流传虽少。尚未绝迹。以云影印。恐未易易。蒙示近见乡先辈著述。如张开福山樵书外纪及汪仲洋之海堦唱和诗。均请代购。书值二元五角。即飭书估送至琉璃厂敝分馆照书领取。彝斋文编则敝处已有之。倚晴楼绿蕉馆两种均系新刊。南方尚易觅。亦不敢多渎也。钱琦临江集是何时抄本。有无衬纸。皇明风雅是何时印本。尚请亲查。然索价过昂。此时力有不逮。徒呼负负而已。学海类编系傅沅叔委印之书。并非本馆自己出版。故无折扣。何君雅意极可感。明春尚拟北来。届期当先拜观一过。再以奉慰。文系遗稿知已抄得百叶。甚善。甚善。其姓名篇目。可否乞先开示。俾得知照。各收稿免致复出。原拟旧历年终截止。现以收稿甚少。只得转缓数月。但求美备。本不急于成功也。 十年十

二月七日。

【3】 逖先先生阁下。春寒渐褪。伏维动定纳福。昨奉二月廿日手书。展诵敬悉。瀛濡唱和诗二册。山樵书外纪一册。知承代购。顷已由敝分馆递到。展阅之余。曷胜感荷。但万万不敢拜赐。书价几何。务祈赐悉。必当照缴。以后尚有购书之事欲以奉托。否则何敢再相渎耶。四部丛刊中史通系用万历张鼎思刊本。张有跋。自言据嘉靖陆本订正。友人孙君亦藏有蜀本。谓曾对勘一过。蜀本实逊。此书已印成。今寄上毛样一部。另封邮呈。不知与兄所见张之象本比较奚若。乞见示。此样本即以奉赠。不必掷还。海盐续图经察似初印。非修补本。与公所见当不同。兹寄去首册。果系两板。如欲取校。当将余册寄去。承启堂集十本。一并附上。三书共装一包。收到之日。乞示数行为幸。茗斋先生百花诗。屡索迄未交来。云检查不得。近又促之。不知尚在否。迩来购得郑端简公全集。系常熟天放楼赵氏故物。所缺不过数篇。此外又得陈宝摩小信天巢诗钞。其诗颇佳。徐觐周先生(名昌治)所辑辟邪集。乃专攻天主教者。书为日本刊本。亦颇罕见。尤可喜者。族祖春溪先生曾宰甘肃徽县。有爱吾庐诗钞曾经刊行。迄未得见。近乃买得徽县志。即先族祖所修者。中有先生文五首。诗六十余首。将来可以补入家集。想公闻之亦为我欣然也。海盐文献志已托王荭昀同年觅人照抄一部。恐抄成须在数月后耳。闻辑得文系未收稿甚多。乞即寄示。手复。敬颂著祺。 十一年二月二十六日。

【4】 前日肃复一函。并寄呈承启堂集全部海盐县续图经一册。又影印张鼎思复版史通全部。托北京敝分馆转呈。谅荷察入。史通与张之象本实比张鼎思本为优。敝处颇拟购藏。不知阁下可否见让。其价值可否商减。若百元则未免过昂。万一阁下必须自留。则购定后拟祈惠借一阅。无任祷盼。前呈样本卷七第十一叶后

八行究系如何舛误。此间竟无他本可对。不知都中尚有同样之书可以参订否。如能以张之象本订正。俾得复见真面。则甚幸矣。尊辑稿李文系补稿。甚望寄示。 十一年三月四日。

【5】 奉三月八日手教。展读敬承。寄奉各书计此时必可达览。包件例比书函为迟也。海濡唱和集山樵外纪两书必欲惠赐。只可拜领。并奉明示。后不为例。尤深钦感。马墨麟先生集价仅六元。极欲得之。即祈代购。书价托京馆拨奉。附去一笺。乞飭送。邑中先哲著述暨先德遗书。必为留意。小瀛洲唱和诗。去秋蒙属代购。归寓即书往询。云已售去。此次杭州某书店寄书目来。适有一部。亟驰书去。则又为捷足者先得。迄未报命。甚慙然也。张之象刊本史通极不易得。即费百金亦不为贵。公已搜集多种。复得善本。详加校勘。与大著刘氏年谱同付枣梨。甚盛。甚盛。他日梓成。尤以先睹为快耳。敝处影印张本。错简蒙允校示。衔感之至。弟明日将有粤东之行。约两三星期返沪。倚装肃答。不尽欲言。 十一年三月十三日。

【6】 前月因事赴粤。归后又转赴里门省墓。奔走月余。近始遄返海上。展诵三月十四日手书。敬悉一切。承示史通版本异同。藉开茅塞。张鼎思本校勘矜慎。且亦罕见。故敝处为之印行。查长洲县志。鼎思确字睿甫。累擢江西按察使。见第二十三卷。绎累擢二字之义。必其先曾官他职。或即郭序所称之观察欤。张之象本已否购定。甚为企念。命估影印嘉靖本古诗纪。照四部丛刊式。自可照估。惟囑照原样长短。则未见原书。无从揣度。且全书叶数未知共有若干。估算亦难精确。可否乞寄示一二本。并查明全书叶数。当为飭估。至代售预约一层。再四筹商。殊难应命。缘手续甚繁。前曾偶为友人代办。终以损益不能相抵。发行部分不愿接受。惟印成之后可以寄售。若并委印刷。则取价当属格外从廉。此则弟所可稍效微劳者耳。近见尚斋先生治

经堂诗集十二卷(有无文集。全书未见。未知其详。尊处所藏诗文集合二十九卷。)印刷颇精。不知近来尚易得否。价值几何。并祈核示。承代购马墨麟诗集一部。已由京馆寄到。谢谢。书值已由京馆付给。并闻。

前函缮就。续奉四月十八日手示。敬诵悉。此信十日乃达。盖为津浦路之故。史通张本即以陆本剗改。此为言版本者所未知。闻之甚快。彭茗斋先生百花诗。询之博古斋。云已售之津门购者。何人则不复能举其姓字。明纪事本末补编。敝处藏有残本五卷。已印入涵芬楼秘笈第五集中。陈乃乾大约即据是刻校勘耳。承示都中近日好书甚多。未知何书。倘蒙举以见示。为敝处所欲得者。当恳阁下为我购买。临颖不胜祷企之至。 十一年四月廿八日。

【7】 逖先先生阁下。本月十一日接奉八日手书。知弟出京后曾蒙枉顾于六国饭店。益以濒行未及诣辞为疚。所呈荆公诗注已登斐几。甚幸。甚幸。惟见还之承启堂集及海盐续图经二书。惠函日期已久。尚未送到。望飭向邮局一询。吾乡先哲遗著。近又搜得数种。缮列别纸。寄请鉴核。不审与尊处所得有无踵见也。文学凋敝。读书种子殆绝。先生撝研乙部。直接乾嘉诸老之席。撰著仇校。用思精深。其书满家。沾溉靡尽。所勘史通及盛著各种。固皆以一一遍读为快。惠而好我。企盼何似。专此。复颂道安。 十一年九月二十一日。

【8】 橈李文系补稿。承示已得百余叶。闻之甚喜。极盼早日寄示。雪芽诗选。歌风堂诗钞。另封邮呈。即祈察入。湘管联吟正续集还价两元。灯庵诗钞四元。锺贵溪四体诗仅给一元。据复必须十元。似乎太昂。只可作罢。尊意如何。 复十二年一月二十二日来函。十二年一月三十日。

【9】 奉一月廿二日手札。展诵藉悉潜心史学。将编一新梁

书。甚盛。甚盛。承询购求志书方法。弟从事于此已十余年。且有各省分馆以为之助。至今尚未满十之八。云贵川甘极为难得。然安徽福建广西等省亦颇不易。洛阳固称罕见。然固始兰阳难尤过之。（兰封恐未有志书。兰阳亦修于乾隆之世。敝处迄未买得。仅向友人处借抄。）近如省会。如江苏之长元吴。浙江之仁钱。福建之闽侯。人文荟萃之区。宜必以时编纂。流传甚多矣。然皆绝无而仅有。每遇一部。皆非数十元不办。（敝处亦仅有长元吴仁钱五志。而闽侯则至今未见。）章氏各志。弟从未见过。永清尚有书。其他皆绝迹。恐当日未必刊行也。敝处凡遇时代不同之本。一律收藏。故有一县多至数部者。现尚向各省搜求。然愈收愈难。而亦愈贵。如北京大学有意收罗。敝处亦可相助。现尚登报访求。故各省尚有开单求售者。只请将所缺各种抄一清册存在敝处。即可代为购办。但须定一标准价格。且须指定若干省。则彼此可以相避。不致重出。未知尊意以为何如。 十二年一月三十日。

【10】 前月回籍扫墓。归后得展三月十九日手书。因旧仆乐志华被租界捕房苛虐。代为伸理。忙冗万状。久久未复。近又奉四月二十五日惠函。展读之下。知劳锦注。至深惶愧。承寄下代购红豆诗人集四册。又掷还雪芽诗选歌风堂诗钞各一册。均已先后收到。可祈释念。闻近得善本甚多。健羨无似。夷氛纪略洪杨类纂史略两书有关史料。可否惠假一阅。尊意欲将所得之书择要印行。敝处极愿效劳。请将卷叶若干及行款开一清单寄下。当代估计。为价廉及求速计。自以石印为宜也。直说通略敝处确有一部。惟断至后周为止。闻适之言。此书已归北京大学图书馆。前半稍有残缺。两处凑合。可成完璧。如欲取阅。乞示即寄呈。万季野先生明史稿从未见过。新得之本如为万稿。则至为可宝。不知尚有他书可以取证否。王芾卿明史考异想已校过。不知异同若何。

并望示及。钱琦临江集索价三十元。实属过昂。二十四元如不能商减。亦请为弟购下。书价除前购红豆诗人集。尚须找付若干。乞示知。即托京馆转呈。近在上海见有郑端简公年谱。版本甚佳。正在谐价。书仅四册。据称非三十元不售。今日买书真大不易矣。贵校欲收买川甘云贵四省方志。属敝处代为搜罗。极愿效劳。惟须请将贵校尚未购得该四省之志书。开一清单交下。敝处即可通知各该省之分馆及代理。按单收买。所有书价应否限制。亦祈明示。惟有一节。敝分馆及代理正在搜求。而尊处在京适遇有各该省之志书。势难失之交臂。则彼此必有重复。此最为难。应如何处理。并祈核示。兼请贵校图书馆界一正式委托公函。是为至幸。敝处志书重出不少。亦由于同时购买。无可避免之故。兹寄去清单一纸。均属于各该省者。如贵校未备。尽可奉让。敝处志目现正重印。印就即寄呈。事冗稽答。无任歉仄。统祈鉴宥。再浙江省山阴会稽两县志。极为难得。敝处均有重本。但售价较昂。不知贵校已备否。 十二年五月十五日。

【11】 奉五月二十五日手教。盥诵敬悉。适弟患重感冒。卧病旬日。致稽裁答。甚以为歉。需用志书十种。遵即检出。附入敝处货箱运至北京敝分馆。托其转呈。时日不免稍有耽搁。然比之邮寄。则省费多多矣。书价另单开呈。此四省邮费转重。故价亦较昂。至山阴会稽。则书极罕见。不能以寻常本论。尚祈鉴察。如尊意认为过昂。此两种亦可剔除。仍请交还敝分馆。尚有他省重出各志。另附清目。伏祈察核。敝处如续有所得。当随时奉告。合则留。不合则去。尽可随便也。夷氛纪略洪杨类纂两书。蒙允假阅。感荷之至。临江集已被人取去。不妨作罢。倘必欲索回。恐书估不免居奇。受其挟持。殊不值耳。 十二年六月八日。

云南 永昌府志 十四本 六元

贵州 贵州厅志 六本 以下每本四角。凡四十二本。共十六元八角。

四川 新都县志 六本

又 清溪县志 四本

又 大宁县志 八本

又 忠州志 八本

又 江油县志 四本

又 成都县志 六本

浙江 山阴县志 八本 十六元

又 会稽县志 十本 二十四元

【12】 奉六月七日(信面十七日。)手书。展诵祇悉。云贵四川各志除新都残缺外。均蒙留用。所有书价只二十元零四角。钱氏临江集如承代购。感谢之至。书价二十四元。除归还红豆集三元外。尚余五元存尊处。以志书价划抵外只应找下一元四角。来示称三元八角者。未将新都志价除出故也。章宝斋永清县志。近肆上有一原刊本。正在谐价。凤山志却未曾有。惟皮之不存。毛将焉附。故亦不欲得之。有负雅意。山会两志。价诚甚昂。北大如不购用。尽可退还。即请连新都志交还敝京馆。近正有人议将敝处重出志书整数购去也。洪杨史略夷氛纪略二书。承假阅极感。朱汇丞尚未到。大约不久即可带来明史稿。果是。万氏原稿可称环宝。敬贺。敬贺。全书刊行不易。最好取明史撰一考异。将来与王黻卿本并行。庶不负万氏一番苦心。未知卓见以为何如。台从赴陕演讲。此时行路大难。务祈格外小心。如见有肤施甘泉榆林三县志。巩昌庆阳凉州诸府志。幸乞代购。拜托。拜托。十二年六月二十一日。

【13】 逖先先生有道。朱君汇丞来。奉六月廿二日手教。续又奉无月日一函。均谨悉。代购钱临江集四册。又假我洪杨类纂

史略十二册。夷氛纪闻四册。书价找款银三元八角。均已收到。志书价计廿二元八角。已由敝处划付清讫。附去发票及收条各一纸。又山会两志发票一纸。统乞查收。山会志价四十元。将来即请就近交付敝分馆可也。抄本洪杨类纂史略来示谓将付刻。鄙见此两书体例尚须斟酌。伏候卓裁。专复。敬颂台安。十二年八月九日。

又去一信。通知两书于昨日寄出。十二年七月三日。

承假夷氛纪闻洪杨类纂史略两书。略读一过。似当时亦不过随意采辑之本。尊意欲以印行。似宜再加斟酌。昨日已封固寄北京敝分馆。附货箱内寄呈。属其送上。惟运递稍须时日。不能如邮递之速。先此陈明。尚祈鉴察。关中之行曾得异书否。便中并祈示及。山会志价四十元。倘蒙惠付。即请径交敝分馆为幸。十二年八月九日。

【14】承赐不秋草堂稿。代购西域考古录。感谢。朵山先生遗著归于旭丈。实获我心。弟近日搜罗先代著述暨所刊各书。偶有所得。辄自怡悦。推己及人。当亦如是。弟固愿得是书。尤愿旭丈之先我而得也。张渭渔遗书先是曾运至湖州。弟曾见其书目。不允析售。书至京后沅叔有信来告。并代收涉园旧钞两种。而不言书在何家。弟急向友人处借来书目。开单托代购。今读来示。知为吾兄所得。且不料有如此之多。可贺。可贺。展阅抄目。如逸在山人文稿。祇欠庵集。双桥居诗草。半村诗稿。闽游小草。调斋诗钞。梁溪政略。浪吟集。均为邑志所未载。而亦为弟寄沅叔单内所未列者。今归邨架。得以保存。而来书且有刊刻之志。是真先哲呵护有灵。故得有此遇合。茗斋诗初集为弟族祖春溪公官甘肃徽县时所刻。同时尚刻射山诗选。见诸家乘射山诗选。弟已觅得。而茗斋诗集则未之见。乞借阅。拟印入涉园丛刻中。想蒙见允。陆咸仲毛诗鸟兽草木本旨前三卷。弟前在海盐收得。亦

手写稿本。有芑堂先生藏印。与尊处新收之本必为一书。今以是奉赠。俾作延津之合。另缄邮寄。伏乞莞纳。承示尚存双桂堂集。自得斋吟草。半村诗稿。敝处均未曾有。敬祈代购。渭渔书目中尚有涉园杂录一本。与涉园题咏并列。度必别为一书。涉园题咏弟已印入丛刻之内。而杂录则从未之见。曾函托沅叔踪迹。而寄来者则仍是涉园题咏。今请吾兄再为搜求。倘能得之。衍感何极。弟处所得同邑先辈遗著。均曾抄寄书目。如与尊处重出而为敝处所未有者。均恳为我代购。沅叔事繁。亦不便为再三之渎也。近亦收得吾亦庐文稿二册。为拜经楼抄本。不知与尊处所得有无异同。兹一并寄去。乞阅过寄还。如有异同。并乞见示。此外有西圃轩集。亦崔君所著。又有读杜随笔。则陈言扬先生所著也。新得各书中有涉及寒家之作及与先人倡和篇什。乞抄示一目。近来搜辑不少。然不厌其多也。 十三年三月四日。

【15】 逖先先生阁下。昨得本月十一日手教。知前寄之书均已递到。咸仲先生毛诗鸟兽草木本旨得归邺架。俾成完璧。聊表寸忱。何敢受谢。吾亦庐文集首篇缺叶蒙允代补。至感。吾亦庐诗稿初集弟先购得。亦用拜经楼格纸所写。但确系手稿。惜卷末亦稍有残缺。此外又有西圃轩集。亦似原稿。然又不在先生自写全稿之内。大约系未定之本。如需阅览。乞示即寄。双桂堂集自得斋吟草。半村诗稿。共六册。均收到。价虽昂。不能不购。今托敝分馆送去十二元。又西域考古记价十四元。共廿六元。即祈察收。茗斋诗初集辱承允让归敝处。极感。然弟窃有无厌之求。射山诗选本系合刻。弟曩得一册。蠹伤甚重。多缺字。我兄所得既系初印本。可否求一并慨让。俾得同时付印。有珠联璧合之观。如蒙俯诺。乞示价值。当同缴也。伦金两君均欲借抄茗斋诗。弟他日印成必各馈两君一部。代践尊约。如能勿钞。固属甚妙。否则乞其万勿影写。缘墨迹渗印。于后来影印甚有碍也。承

开示贵族专集数种。惟寿闲斋吟草尚未觅到。如承远贶。谨当拜领。再张氏遗书目中尚有文会堂诗钞一种。下注胥溪朱氏家集。记得尊藏已有此书。如尚存。亦乞代购。朱大龄曹家载两集未知需价几何。乞示再定。 十三年三月十六日。

【16】 星门聚首。匆匆作别。前月到杭州晤敏庵。知台从先已数日行。月之一日由杭返沪。季臣舍弟来告。则文旆又已北上矣。怅望无似。季臣交到尊府家乘。少虞先生乔梓。崔骥云诗集各一部。辱承嘉贶。拜领谢谢。前由盐返沪得都中寄来书籍一包。属转交吾兄者。私意湖上归来必可相遇。可以面交。詎料竟尔相左。兹托敝分馆送还。敬祈察收示复。弟在杭州购得鄂桦联吟稿一部。似有残缺。另附清目。记得文英阁亦有此书。似已归于邨架。敬祈代检。尚可补全。拟借钞耳。玉堂先生所著淡巴菰唱和合刻。兹亦寄上。并乞检收。茗斋诗选如已钞成。甚望寄示。 十三年五月六日。

抱朴居诗 二卷 又续编 二卷 马绪撰

愚庵续稿 不分卷 马国伟撰 无初稿似缺

少白初稿 又存稿 又续稿 均不分卷 马用俊撰

墓田丙舍录 文诗 附录 题词 诗 白洋墓图说 有说无

图

鄂桦联吟处图 只有半幅

题赠录诗 缺第一叶至十八叶 又诗余

又续录诗 诗余

寿闲斋吟草。妙吉祥室诗钞。弟处遍查不得。想已遗失。尊处如有重出本。乞赐一部。

【17】 杭州归来于本月六日寄上一函。不数日即得五月七日手书。展诵祇悉。因患便血。馆事又忙。迟迟未复。前日又奉到本月二十二日惠函。知前信及寄还书籍一包。又淡巴菰唱和合刻。

均已递到。翌日又由北京敝分馆寄来茗斋诗初集一册。(附有我兄跋语。)射山诗选一册。妙吉祥室诗钞六册。寿闲斋吟草二册。桂影轩丛刊一册。西斋净土诗一册。均已收到。茗斋诗不敢拜赐。书价十五元今托敝分馆送上。敬乞察收。至射山诗选前示与敝处一部互易。今查敝处一部蠹损颇重。互易亦有未安。拟借影后仍奉缴。其余各种。则谨拜嘉惠。谢谢。鄂铤联吟稿蒙允借钞。极感。硖川诗钞正续编。祇欠庵集。小梅花馆诗词。漱红山房诗草四种。弟均欲得之。祈费神代购。书价三十三元亦托敝分馆送去。统乞汇收。荅卿师遗稿。甚盼一读。异日自当印行。此为后死之责。况当年雪立耶。敝处所藏盐邑艺文续编并无茗斋先生之诗。所收系有明一代。起洪武。迄崇祯。似系全书。今将人名录呈。此书亦宜印行也。陆太冲诗钞写本极精。凡十五卷。茗斋先生诗弟处共有六册。无暇详校。新钞一册系摘选之本。无甚可取。其他则均属旧钞。尚系原编。并未改动。将来未知能否为付割刳耳。家集另抄一目。一并寄去。统祈察阅。续修邑乘自是要事。树屏慨捐巨款。尤为难得。此事只可偏劳。弟学殖荒落。且精力衰颓。断难膺此重任。无论何等名义。概不敢居。如有所知。当效壤流之助可耳。编纂体例如已写出。甚盼见示。展览会极是盛举。但恐无人能办。既开之后。亦恐无人来看。现在本县能任此事而又热心者共有几人。弟于家乡之事。甚为隔膜。兄能南归在家主持数月。此事必可举行。否则。恐不易办。就弟所知。现在本地办理地方公事者均不能胜任也。承示此次回里。收得乡贤著作数十种。不胜欣羨。乞缮示目录。祷盼无似。杭州归来获诵六月七日手教。展诵敬悉。先是京师敝分馆寄回掷还银币十五元。正拟去函缴奉。今诵来示。藉谂雅意殷拳。只得拜领。敬谢。敬谢。寄来硖川诗钞。祇欠庵集。小梅花馆诗词并小峨嵋山馆五种。均已收到。此马氏家集。与敝处一部比对。乃知

所缺甚多。今已发钞。恐稍需时日。方能寄还。至寄呈之吾亦庐文稿。淡巴抓唱和合刻。尽请从容留阅。不必亟亟掷寄也。承示新得邑集家集清目。不胜健羨。中有盐邑艺文续编一册。注明不全稿本。此为先八世叔祖竹庄公所辑。敝处曾收得第一册。前有总目。兹录出一纸呈阅。不知新得一本系何门类。敬祈检示。异日尚拟借钞也。虹舫先生所著从政观法录。敝处未有其书。敬祈诸价代购。价金几何。乞告知京师敝分馆。当属奉上。至明人诗钞续集。早与正集同时购得。前目漏列。可勿复购。承注感悚。续修邑志事论理万无可辞。惟年来精力衰减。而商馆之事又不能摆脱。前与钱孙词蔚两兄发起续辑樵李文系。至今尚未结束。每一念及。为之彷徨。倘再担任如此繁重之事。直不啻蹙其命运。务乞鉴原。许如前请。至开设展览会。倘得阁下回里主持。弟于故乡文献有可供参考者。必悉数贡诸左右。言不尽意。

近在杭州又购得旧钞本茗斋先生所著客舍偶闻一册。与振绮堂刊本比对。无甚异同。惟彼本彭暉之跋缺去两行。此则完全耳。 十三年六月二十一日。

【18】 奉七月五日手书。展诵祇悉。续修邑志。桑梓之事义无可辞。惟年来精力就衰。现办商馆之事。已觉十分竭蹶。断无余力可以兼顾。前日汪知事亦来一信。有所商榷。已复去一函。今以留稿附呈。伏祈察入。前六月廿一日去信。备陈下情。兹不复述。务求鉴宥。志局既开。将来如需向葛氏借书。弟必尽力从旁说项。纂述之事苟得吾兄主持。乡里必无异言。即敏安蔚如诸君子。亦无不乐为之助。不肖如弟。苟管蠡所及。仍当贡诸左右也。麟祥病体就痊。闻之极慰。但久病之躯。岂能再膺繁剧。每一念及。殊为悬悬耳。钞示盐邑艺文续编残本目录与敝处所藏一部第一册人名次序完全相同。前函所称族祖竹庄公所辑者。乃盐邑艺文续钞。误认为此。妄思借钞。今知乃为续编本。 年五月三十

去信曾将是书人名附呈。计蒙察及。卷首阙去六人。想系漏写或佚去。且查张宁诗凡一百十八首。朱朴凡九十三首。钱琦凡六十四首。许相卿凡三十五首。来书谓此四家独多。然则必系同一书矣。下册辑至明末止。尚有六十七人。而彭茗斋尚不在内。大约列于清代之首。尊处如欲补钞。俾得多存一部。弟当觅便寄奉。每人有小传一首。颇足为文献之征也。从政观法录六册。漱江山房诗集两册。顷已由京师敝分馆寄到。费神之至。书价十八元尚未据该馆报帐。已属呈上。 十三年七月九日。

【19】 前月九日肃上一函。计蒙垂察。续修邑志故乡诸老及县宰复有信来。强以相督。弟自惭寡陋。何敢膺此重任。业已具复。他日有关涉文字之事。如有所见。当共商榷。至于名职。无论为何。概不敢居。先生知我。当能鉴其苦衷也。树屏兄言弟若不为。则兄亦必退。此断断不可。我兄年富力强。不可与元济衰朽相况。千秋之业。责在贤者。窃望毅然任事。勿重弟之罪戾。叩祷。叩祷。马氏小峨嵋山馆五种已钞补完毕。原书五册。今由邮局挂号寄还。敬祈察入。盐邑艺文续编尊处所得一部。稍有残缺。弟处一部可以钞补。如需用。乞示即寄去。近日搜得乡先辈著作数种。一。陈讬勾股引蒙。二。陈洗易卦玩辞述。诗经述。(续图经有此人。而县志不收。)三。吴宁大复山人精华录。四。吾祖望渔璜诗。又钞得陈则梁菴园集半部。若郑端简奏议。为项笃寿所刊。近甫发钞。尚未成也。曩承代购从政观法录。漱红山房诗集。书价十八元知已由敝分馆缴上。不知近日续有所见否。余容续布。 十三年八月三日。

【20】 数月以来。南北扰攘。闻都中有若干时日亦甚惊惶。伏想潭府安善。至为驰念。上海虽未作战场。然枪炮之声时时得闻。闸北驻兵尤多。几如遍地。火线随时可以爆发。敝公司有数千人倚以为生。勉力支持。卒未停辍。幸叨福庇。竟获安全。不

可谓非意外之事。至今思之犹令人有余悸也。前于七月九日。八月三日迭上两函。又由邮局挂号寄还马氏小峨嵋山馆丛刻五册。度均上达典签。万一尚未递到。敬祈示悉。以便追查。近于本邑先哲著述续有所得否。前示朱大龄曹宗载两集已为他人取去。不知有退回之望否。实价几何。并祈探示。弟近来一无所得。惟在徐晓霞处见有明万历钱懋穀所辑钱氏家史一部。凡十四卷。亦已不全。又托人向贵族拙安君处借得张云槎补梅居士诗选四卷。即照录一份。诗不甚佳。然亦有可采者。卷首有斗南子传。为未谔先生手笔。似光绪初年修邑志时未经见也。弟迹日颇喜钞书。尊藏淳村集。曹氏先德录。浪吟集。廉让堂诗集。拟先乞借我钞录。倘蒙俯允。祈于暇时检寄。吾亦庐文稿暨淡巴菰唱和诗如已阅竟。亦乞同时掷还为幸。十三年十二月八日。

【21】 逖先吾兄惠鉴。奉本月十六日手书。藉悉今夏尊府曾染时疫。悼失掌珠。闻之至为惋惜。入秋以来。伏想起居绥和。潭第安适。敬念。敬念。前得明史稿。知在余姚县志证明为万氏原本。至可矜贵。昇平署旧档。近又购得千数百册。此皆史部之宝。多文为富。以斯言奉贺。虽有残缺。然此外恐无第二本。清史正在属稿。其礼乐志中恐未必采录及此。吾兄倘能摘要选录成一昇平署志稿本。上诸馆中。俾完一代制作。此于史学文学。裨益匪浅。允于整理完毕钞寄目录。至为感荷。能否影印。俟见全目。再定进止。昭代箫韶。前弟在隆福寺某书肆中见一残本。以索价过昂。未能购得。似是镜古堂。兄试踪迹之。或可得也。马氏小峨嵋山馆丛刊。知蒙察入。甚慰。前函允假浪吟诸集。蒙允检寄。极感。借书互钞。昔人尝行之。况为保全故乡文献之事。弟极愿遵办。需用茗斋先生未刻诗稿及平寇志。兹由邮局挂号寄上。总共十册。伏乞察收。茗斋先生著述。弟所有者为湖西遗事。虔台逸史。彭氏旧闻录。太仆行略。均已印入涵芬楼秘笈

中。来示谓在厂肆中近见先生杂著三种。不知与以上所举不相同否。如不重复。小汀丈不欲购存。即请吾兄代为谐价。乡贤遗著断不可交臂失之也。北湖先生手写诗文稿本自宜归诸闾声。万望代留。弟已专函报知。属其径与尊处接洽。次云先生竹隐庐吟草稿何以散出。度必昔年寄呈忠愍公。后遭庚子之难。流落人间。是宜劝蔚如丈速为刊本。兄盍与言之。再有恳者。弟近拟辑印百衲本廿四史。除旧五代用四库抄本。明史用殿本外。其余均用宋元明三朝刊本。(旧唐只有明刊。新五代元本皆漫漶不能摄照。拟用汪谅本。元史亦有明初刊本。其余皆宋元旧槧。)南北诸史凡京师图书馆所藏宋元残本。均已尽数摄照。然残缺颇多。周书至竟无一叶。世间所存三朝本大都字画磨灭。不易影印。厂肆为古书渊藪。不知能觅较佳之本否。敬乞代为留意。除嘉靖补刊无须外。其余如有宋元旧槧尚属清朗者。即一二残册。亦愿得之。但乞勿告以为敝处所求。此意当蒙鉴察。余续布。敬贺岁禧。兼颂潭福。 十三年十二月二十二日。

【22】 昨日复上寸函。计先达到。敝处藏彭茗斋先生诗凡三种。旧钞者两种。一四册。一一册。其一钞本较新。亦一册。昨云四册。实误记也。今日交邮局寄上。(并平寇志)因分量不相剂。故分为两包。寄到或有先后。恐劳廛注。故各包上均注明。并祈鉴及。 十三年十二月二十三日。

【23】 逖先先生有道。一昨归自维扬。展诵十二月三十一日手书。祇悉一是。承假曹氏先德录一册。浪吟集一册。淳村集六册。(有夹板。)廉让堂集三册。(连夹板。)又掷还吾亦庐文稿二册。淡巴菰唱和合刻一册。又代购茗斋杂著三册。均已收到。杂著写本颇工。且装订亦雅。似非新装。价银三十元。今托敝分馆送奉。即祈察入。楚台疏略从未闻知。府邑两志均不载其名。大约必无刊本。未知全书共有若干叶。索价几何。统祈见示。张北湖

集每册若售在三元以内者。即请代为购入。以非本邑人。不欲出重价也。近在舍亲葛词蔚家借得蒋泰来之寅谷诗钞。黄仙根之银藤花馆诗集两种。正在彙录。昨得信云又检出盐邑艺文前编。系胡孝辕所辑。尚未寄到。弟先收得续编两册。皆有明一代之诗。今得前编。异日钞成。可称全璧矣。承示宋元本史可设法摄照。天禄琳琅所藏。甚善。甚善。阅报知已着手清查。未知何日可查到。天禄琳琅又未知何时方许摄照。最著名者为宋刊两汉书目录。称其字大如钱。纸白如玉。此最宜摄照。其他印刷精美者当亦不少。如有所见。并祈记录大概。示知为幸。专此布复。敬贺春厘。十四年一月十五日。

【24】 逖先生阁下。奉二月四日手书。谨诵悉。明钞宋本水经注极为难得。阁下愿公诸世人。闻之欣快。照原书大小影印。成本必巨。惜敝处四部丛刊先已用聚珍本印行。且用大本。于营业亦不相宜。图书馆所存十一卷不知能影出否。俟量准尺寸。数明篇叶示下。再为计画。楚台疏略蒙代商伦君。至感。却不必亟亟。惟价昂则恐不胜耳。张北湖稿亦以此故。殊可惋也。蒋氏之书此时并未散出。书多而且好。敝公司究系营业。与此事不近。亦无得之之意。新得扬州何氏之书。以丛书为最多。近人集部亦不少。宋刊本则只有洪盘州集一部。此时尚未理齐。容再详告。手复。顺颂台安。十四年二月十一日。

【25】 逖先生阁下。奉二月十九日手教。展诵祇悉。命估影印明钞宋本水经注印价。照原样大小。每张连史纸只能印六叶。每石只能印两叶。故甚为吃亏。兹附去估单一纸。敬祈察核。依此计算。成本须二千三百余元。每部定价十二元。预约八元。全数售尽可收入四千元。托人代售尚须给以手续费。所赢不过千元。如改为四开式。比原样缩小纵一寸弱。横一寸强。内匡必须缩小较多。则成本可减轻三分之一。定价亦可较廉。销数自可较旺。

统祈裁酌。如为再版计欲留底版。则尚须加底版价。第二次印成本较轻。利益较厚。出版家能获利者。亦即在此。若仅印一次。不复再印。即令初印之书尽数售去。亦终归于损失也。再。发预约手续甚繁。敝公司不克代办。缘同行甚多。援例要求。殊难应付。谨先陈明。尚祈鉴谅。另示传奇目一单。颇有罕见之本。未知索价若干。是否可以选购。抑或必须全收。敬祈示悉。如力所能及。当再奉恳。昨日购得盐邑志林一部。毫无残缺。费银百元。尚不甚贵否。手复。顺颂台安。十四年二月二十六日。

【26】 去岁得二月九日手书。知文旆于清明前后南下。故未即复。延企久之。而五卅之事起。内忧外患。接踵而至。扰攘至今。迄未宁靖。台从因未降临。而弟亦未有一字达于左右。怅歎奚似。今日晨起稍闲。展阅前此来书。谨伸纸奉复如左。

一。某旗人所藏传奇。未知曾收得几种。甚为企羨。前示敝处各款购藏。可就所开单内各种。注明价值。弟于此事完全外行。不敢妄对。甚负雅意。愧悚之至。

二。借下曹氏先德录一册。浪吟集一册。淳村集六册。(有夹板。)廉让堂集三册。(有夹板。)均早钞完。兹京津交通已复。而直鲁战事又作。甚恐海递到津之日。铁路又为兵车所阻。只可暂存敝处。俟大局稍安。再行寄缴。

三。乡贤著述。近又收得金华诗录。系贵族笠亭先生在彼处掌教时所辑者。此外有李杜诗通。胡孝辕著。香杜草。任昌运著。石鼓文释存。张燕昌著。端石拟。陈龄著。地理辨正疏。张心言著。九山补志。李天植著。又有方洲集。张宁著。读书杂录。胡震亨著。石窗山人诗稿。胡焯著。铿尔词。彭贞隐女士著。盐邑艺文前编。樊维城辑。则皆借自葛君词蔚录存副本者也。尊处自数月以来续得何本。并乞见示。

四。楚台疏略不知询过伦君。肯见让否。需价几何。甚盼

告我。

五。新印先始祖横浦文集。六世叔祖东谷公手书尺牍两种。各奉赠一部。寄北京分馆转呈。恐递到不能甚速。

六。承示天禄琳琅所藏宋元本史可设法影照。有嘉定本史记。元补淳化本两汉书。均尚存。闻之神往。借恐有何种章程。祈探示。十五年一月十八日。

【27】 逖先先生阁下。献岁发春。伏维动定纳福。昨得二月七日手书。展诵祇悉。前承假抄之淳村集。廉让堂集。浪吟集。先德录。已经裹扎。正思付邮。而尊函适至。嗣思津南尚有战事。倘再进一步。京津交通难免梗阻。故仍撤回。俟军事稍平再寄。敝处存尊斋之书。即用毕后。亦可如斯办理也。族祖东谷先生尺牍。大约已经遗失。兹补呈一份。即乞察收。横浦文集因寄赠京友部数较多。附入敝分馆货箱运去。轮舟拥挤。且转折亦多。故到达较迟也。先始祖著述甚夥。仅有孟子传一种见于四库全书。缺去尽心两卷。敝处亦藏有抄本。但季沧苇书目则作孟子解。近见故宫物品点查报告第一编第三册昭仁殿第一十一号书架有孟子解八本。抄宋本一函。编为第十二号。未知是否此书。又连类而及者。论语解五本。抄宋本一函。编为十三号。先始祖当时所著四书皆全。查四库提要孟子传下注明内府藏本。颇疑名异而实同。当检查时。吾兄亦躬与其事。不知尚能记忆否。如不能记忆。可否于开放之时。代为查阅。先贤著作。固宜流通。眷怀祖德。尤惧散佚。倘果所料不差。未知有何方法可以借出抄录。俾便印行。务祈鼎力玉成。感激匪可言喻。至于史汉等书。均系明版。伪托则可置诸不议矣。承示乡贤。列名明季复社者尚有五人。事迹未见邑乘。敝处图书馆现有书籍涉明季事实者不少。倘有余闲。当搜讨。至冯裕宗冯景裕二人。恐系与冯明卿同族。惟闻近甚式微。舍亲三乐堂冯氏。并非同宗。亦未闻有族谱也。近

日邨架善本益增。闻之健羨不置。天启实录以邸抄补足四年。至可珍贵。乡贤著述。方洲集极为罕见。弟近向友人处借得。照录一部。盐邑艺文前编亦然。征吾录敝处亦尚未有。他日尚思借钞。邑志称董硕甫先生所著有四存。杂存已刻入盐邑志林。弟近收得达存疑存两种。而吾兄适得鸣存。竟成完璧。可喜之至。县志重修已五十年。及今续辑。以时则可。惟弟自愧寸力不逮。兄亦因故辞却。只可期诸后贤。所辑金石志料二百余条。画家小传八九十人。真不为少。异日亦尚拟假录副本。贻诸后世也。手此布复。敬颂著祺。十五年二月二十日。

【28】逖先先生阁下。得五月十四日手书。知危城剧战之中虽受惊恐。而阖潭无恙。闻之稍慰。横浦文集前于二月十一日交敝公司装箱运京师分馆。此时尚未寄到。交通梗滞若此。亦可见兵争之为害烈矣。前托代查昭仁殿所藏抄本论语解。孟子解两书。现在不便。自当作罢。俟日后遇有机会再湊清神。元济炳烛余光。亟思将先代遗著陆续印行。藉绵先泽。况吾祖为宋代大儒。其书又今世孤本。设不早谋刊布。终必化为烟云。唯吾兄深体兹意。故敢奉托。今已印成者有词林纪事。寄吾庐初稿选钞。竺岩诗存。西泠鸿爪。张氏艺文。(凡得三十六人。)现正排印者有先伯文圃公之半农草舍诗选四卷及弟新辑之涉园题咏续编。尚有数种。未曾编定。俟汇集成帙即付装也。承示续得乡贤遗著多种。至为欣喜。沈子培新刊敢水嘉禾两志。寓中有无此书。遍检未得。此系新刊之本。异日借抄。终易设法。嘉靖海宁志敝处亦尚阙如。今蒙指示。容即访购。弟近所得者。有陈恂之余庵杂录。谈迂之枣林外索。徐豫贞之逃薨诗钞。万高芬之皆山堂诗钞。叶耕之清啸堂集。(仅存前三卷。)徐人杰之疏影山庄吟稿。朱和春之笠渔偶吟。(为桂卿先生之曾祖校正清本。尚未印行。)印氏之贞义诗文。(纪印鸿玉之妻徐氏守节事。)释源瀚之水云集。徐德瑜之舍真录。

无著人名氏之金粟寺志。刘尧珍之惠盐治录。(书凡四卷。仅存卷首及卷一。)以上数种。不知吾兄有曾见过否。寄下吾亦卢文稿二十四页。寄庠楼诗二十二页。均已收到。写资几何。乞示当缴。若斋诗及平寇志仍请暂存。俟邮政大通再寄不迟。郑端简公杂记二册。为其孙心材所抄。自是可贵。其所记如与吾学编古言今言等书不相复者。八十元能酌减最佳。否则。弟亦愿得之。邹元标精忠传全部。六册。实价二百元。殊太昂贵。如能商减。拟代东方图书馆购存之。便中介孙君伯恒与之磋议。无任感荷。再李君正奋所著魏隋艺文志。诚难能可贵。惟此类书籍。销路有限。际此时局不靖。更不易推销。只得暂行割爱。尚祈鉴亮。又影印古本正史。所需用者为六朝之梁陈魏周北齐数种。至三朝本国志。敝处先有一部。因系明补明印。不能摄照。近已借得元刊。业已照出。至传奇一类。近来或借或买。种数亦颇不少。因印刷过忙。恐须二三年方能印毕。故此时拟不添购。辱承介绍。谨谢盛意。前属抄敝藏乡贤著述清目。近已录成一册。另邮寄奉。乞察存。邛架珍藏。弟均于得信时录出。惟去年夏间寄到三纸。皆台从于清明时节回里所收得者。近遍检不得。可否乞补录一份。(只此三纸足矣。其余均有。)再前示有互相借抄之约。极愿遵办。兹另开一单。俟交通无阻之时再求检寄。每次以十册为度。抄毕更换。敝处各书需借抄者。亦乞开单见示为荷。专此。复颂台安。

十五年五月二十九日。

此单均拟借钞者。

珊网集。一册。碧里鸣存。一卷。长生长乐之居吟草。一卷。文会堂诗钞。八卷。河汾旅话。二卷。倚云楼遗草。一卷。征吾录。二卷。小莲花室遗稿。诗绪辑雅。六卷。春华秋实斋诗稿。五卷。桂之树轩杂录。一册。乐安任氏家集。四册。指马楼诗钞。四卷。顾

毓珠诗稿。一册。蒙吉堂稿。指马楼词钞。一卷。逸在山人文稿。调斋诗钞。景山小稿。一卷。桑桥居诗草。梁溪政略。讷庵小草。二卷。闽游小草。徐忠烈公集。盐官竹枝词。竹隐庐吟草。高僧摘要。

【29】 逖先先生有道。奉六月廿四日手教。知寄还淳村集。浪吟集。廉让堂集。先德录等书。均已递到。承抄示续得邑人著述书目四纸并校正查师遗稿讹字一纸。均经奉到。感谢。汉魏六朝女子文选乃必吾妹所辑。吾家道韞于家乘中可添一佳话矣。赐借珊网集。文会堂诗钞。乐安任氏家集。甚感。现在途中。不日必可递到。春华秋实斋诗。指马楼诗钞。蒙允在京觅人代钞。至为感幸。费用乞示遵寄。印有抄书格纸。即日寄奉三百页。如不足用。候示续寄。至校对。即责成写官兼任。由吾兄抽查。当不至于苟且从事。不敢全以相扰也。物望志四册。吴忠节年谱二册。盐邑艺文续编二册。枣林外索一册。佩韦斋外集一册。遵命检呈。又笠渔偶吟亦同时寄去。藉便参对。均托傅沅叔带奉。到乞查收示复为幸。托询桂卿先生遗著。先拟借抄。如为绵薄所及。尚拟为之印行。复印盐邑志林。同时辑印续编。弟亦久怀此愿。惟年来从事搜集家集。同时并举。力有不逮。姑悬此鹄。以待将来。茗斋百花诗已在友人处觅得。可以抄补。不再奉渎。茗斋先生诗名甚震。而此百花诗佳者殊寥寥。题目过窘。虽名手亦无法也。胡宣子先生县志列入文苑。而一无著作。弟近购得其所著谷水集一部。有诗二十卷。诗学温李。文亦骈俪为多。陈光祿为之笺注。康熙时所刻。印刷极精。胡君尚著有谷水谈林。涵芬楼藏有残本半部。恐补全亦不易矣。郑端简杂记既已刻于盐邑志林。不必复购。天禄琳琅之论语解。孟子解。虽甚渴想。然吾兄为要求当事特别组织。从事审查。专为此书。未免过于费事。此则弟所不敢请者也。精忠传此间却有一部。已函告孙伯恒。请其转

达作罢。谨谢介绍盛意。河南固始县志十六册。价廿四元。已得葛君回信。如无残缺。即请代购。书价即缴。十五年七月二日。

【30】 逖先先生有道。顷奉七月十三日手教。谨诵悉。前托傅沅翁带去各书。知均递到。物望志。吴忠节年谱。此两种均甚罕见。抄本中则盐邑艺文续编。亦属难得。尊处能彙录一分。俾世间多一传本。至可喜也。先集指马楼诗钞。已经发缮。断无重钞之理。桂卿先生诗文集。惟未知卷帙几何。弟正辑印先世遗集。为数亦正不少。如卷帙过多。只可从缓。然无论如何。甚愿借来录副。以备异日之用。茗斋先生诗。当溯葛氏确有一部。系分体编辑。昔年曾借阅一过。将两部互勘。录一细目。其彼此同异之处。一一摘出。兹另邮寄呈。兄正校阅是书。祈乘便复阅。将来即可据此补钞。但葛本编次是否以年代为先后。则不复记忆矣。敝处所存四册。卷帙甚厚。大约尚缺去六册。葛本卷帙较薄。行数亦疏。恐不能钞补完全。此亦无可如何之事。弟于茗斋诗未能卒读。且诗学尤为门外汉。然以百花诗推之。则尊评固认为确当也。先文忠所著论语解。孟子解。固极盼彙录一分。然检阅过于为难。则亦不妨从缓。固始县志稍有烂板。敝处一部。如能抄补。固佳。否则。词翁得之。亦慰情聊胜。书价廿四元。兹托敝分馆送去。即乞察收。转付三州辑略。未知需值几何。亦祈探示。精忠传系去岁傅沅翁在沪代购。当时匆促。不知何以漏未列册。现正检寻。尚未觅得。然沅翁则谓确有此事。想不致遗失。容再奉复。一昨本邑沈知事与张树屏兄过访。又谈及续修邑志事。弟仍力辞。惟葛词翁见告宣统三年截止之说。沈君亦颇赞成云云。并以奉告。十五年七月十六日。

【31】 固始县志收到。葛属道谢。朱桂卿师遗稿如在临侯处。弟可径商。不敢屡渎。乞示。故宫论语解。孟子解与所期

者名同实异。虽失望。而盛意则尤可感。邵亭书目所注。恐系刘疏雨所谓瞑琴山馆。非今之嘉业堂也。涵芬楼藏有孟子解一部。有善本。承介绍极感。幸诚斋文脍系选本。无甚可贵。三州辑略有全本自佳。五十元过昂。乞索寄首尾。如旧抄非衬订者。每册二元。全书合卅二元。何如。近又得吴遵程成方切用。并查得第三种为本草从新。其一二种为何书。无从查知。乞见教。十五年八月七日。

[32] 前缴还楚台疏略钞费三十四元。知蒙察入。转交伦君。甚感。临侯处碌碌迄未去信。今汇丞既已来京。且寓尊处。桂师遗稿仍乞代商借录。前购何氏书现正清理。忽检得钞本三州辑略一部。录呈卷目。不知与兄所见有无异同。如无异也。代购云云。可即作罢。近日书肆有无可购之书。兄如不自购。务祈介绍。弟兼收嘉郡人著述。并乞留意。惟已得三百余种。虑见者多重复耳。十五年九月十日。

[33] 逖先仁兄阁下。奉九月十九日手教。谨诵悉。碌碌尚未复。又得同月廿二日惠函。开诵之余。甚感盛意。都门善本层见迭出。闻之令人神往。惜价格高昂。涵芬楼虽频频收书。然不免出纳之吝。大典未曾辑出之孤本最为可贵。今已为日人购买。亦只可成事不说矣。旧钞本元人曲韵。价二百元。又增广钟鼎篆韵。未知能与隶释析售否。（隶释敝处已有明本。）此二书不知能影照上石否。拟请介绍。与敝馆孙伯恒兄一阅。如能上石。即请其就近谐价。至旧抄铁网珊瑚十册。梦窗甲乙丙丁稿。既为寒家旧藏。且有先人手泽。辱承远告。至为感幸。索价百元。能否磋商酌减。弟不敢遥制。统祈吾兄代为作主。成议后即请伯恒兄暂为垫付可也。敝馆辑印古本正史。弟从事于此几及十年。近渐就绪。拟即开印。允以珍藏嘉靖初印补宋本陈书慨借。欣感之至。京师图书馆仅存宋本八卷有半。（为列传卷二十二第十八页至卷

三十。)已悉数照来。其余只可以南雍本补足。涵芬楼储有两部。均不甚好。尊藏为白棉纸初印本。自必较精。甚欲乞假。如蒙检交孙伯恒兄。(列传后八卷可以除出。)当有妥便可以携带南来也。南齐借得沅叔宋本。其如宋梁魏北齐。凡京师图书馆所有残宋本。均已照来。宋书仅缺四分之一。魏书敝处有元印本。补配所缺亦无多。独缺周书。而涵芬楼适有南雍精印白棉纸本一部。可以凑足南北七史。总算差强人意。最难得者为宋本旧唐书。亦觅得六十余卷。行款与闻人本同。所缺即以闻人本补入。新五代有宋本。(弟已校阅一过。曾有后跋一通。兹寄呈。乞教正。)宋辽金三史均有元初印本。兹书一出。差可为乙部生色也。两汉书宋本不易得。李木斋有之。然后汉一种颇为历来藏书家所诋诮。虽宋不如明。颇欲用大德正统本。而涵芬楼所有印本均不精。有可用者又不全。难于上石。不知都中可能觅得否。如卒不可得。则拟用汪文盛本。未知尊意以为何如。敝馆所藏方志目录。前年即已印成。竟未寄奉。疏忽之至。另封一册寄上。即乞晒存。出版之后续收者又三百余种。皆目所未有也。其他书目。现正编印。印成再寄上。十五年九月二十六日。

【34】 逖先先生阁下。顷奉十月一日手教。展诵祇悉。校五代史记跋文。蒙指示讹谬。曷胜感幸。初意只欲表扬宋刻之佳。故不复追改之说。以为曾三异刻本。或不由于监本。而出于别本。且既据纂误追改。而同光二年四月己卯册刘氏为皇后。既经改己卯为癸未。不应再脱二月二字。故妄意认为别祖一本。然究嫌臆测。不如尊旨仍用追改之说为长。至异同二百五字云云。自专指殊异者而言。然曾本亦有不如监本及殿本之处。异日影印之时。或悉遵原本。或依某本订正。别撰校勘记。现尚未定。还祈指示。尊著新辑宋代书目四种。甚以先睹为快。时局扰攘至此。而吾兄端居一室。从事著述。真所谓天下愈乱。吾心愈治。钦佩

之至。铁网珊瑚及梦窗词稿两书。兄为代留。承代请价减至银六十元。以有先人手泽。亦不嫌其昂贵。即请代为定义。书价向敝京馆孙君伯恒处划付。费神感感。元人曲韵。增广钟鼎篆韵两书。已为捷足先得。可惜之至。蒙借陈书。已交敝京馆。想不日必可觅便寄到。先此布谢。顺颂著祺。 十五年十月五日。

【35】 逖先先生有道。奉双节手教。谨诵悉。承示考得曾三异事迹数条。备新五代史跋文之用。甚感。甚感。曾刻五代史卓见定为第三刻本。其第二刻本是否即以吴兴思溪王氏所刻当之。其年月不知尚可考否。尚望见示。铁网珊瑚。梦窗甲乙丙丁四稿。蒙代购定。衔感无既。书价托敝京馆拨付。如尚未交到。望径索取。弟已去信关照矣。其书并惠假陈书。孙君伯恒来信云已收到。觅便寄南。可请勿念。陈书补版无多。甚望其可以摄照也。专此布复。顺颂台安。 十五年十月十四日。

【36】 敬再启者。承示有崇禎刻本金圣叹评水浒传三十六册。索价一百六十元。减让四十元。已承代留一礼拜。至为感幸。涵芬楼亦藏有明本一部。但系李卓吾评本。而非圣叹所评。如我兄所见实系崇禎刻本。自是可购。惟取价甚昂。拟请再为商减。一切已托孙伯恒兄径行接洽。屡屡琐渎。且感且悚。再颂著祺。 十五年十月十四日。

【37】 昨复寸函。计先达览。匆匆忘将附笺封入。兹再补呈。敬祈察核。祇颂大安。 十五年十月十五日。

【38】 十四十五日迭复两函。计蒙垂察。顷奉十月十五日手教。开示曾三异事迹两条。展读甚感。甚感。又知近辑中兴馆阁书目。续得材料甚富。欣羨之至。苕溪集敝处已有二部。均五十五卷。书录解题称非有斋类稿五十卷。恐今不可得见矣。式斋文集敝处亦有抄本。从弘治本出。系王西庄所藏。惟卷七卷卅三稍有残缺。不审兄所见一本能借来代为抄补否。前示见有陈奕禧

行书查石丈墓志墨迹十一叶。末钤涉园主人鉴赏印记。未知索值几何。族人有欲得之者。属为奉询。谨再渎陈。惶悚无似。沪杭铁路已停止两日。谣传甚恶。不识能否转危为安。惟此时却未开战。知念附及。十五年十月十八日。

再近拟辑印古本正史旧唐书。已觅得残宋本六十一卷。业经照出。此为常熟瞿氏所藏。极罕见。其行款与闻人诠刻本相同。所阙各卷即以闻人本补足。宋刻校勘人名如苏之勤霍文昭徐俊卿张嘉宾朱倬等。不知可考其履贯否。倘蒙指示。曷胜感荷。

式斋稿缺叶。

卷十七 祭叶文庄公文

赖公成就。奄其逝矣。予行贸。(以下缺)

卷三十三 封事

计开言事十件 第七件 一件处置凶顽。量其所犯情罪重轻。或迁口外。或迁畿内。(以下脱落不全)

如蒙代抄。抄资几何。候示遵缴。

【39】 迭奉十月十七日廿五日两次手教。展诵祇悉。代购贯华堂本水浒传暨寒家旧藏书籍两种。又蒙慨借三朝本陈书。均由孙君伯恒先后寄到无误。费神。感谢。铁网珊瑚。梦窗词稿。先人遗物得为合浦之还。尤当永矢勿谖也。陈书检阅一过。惜纸黯墨淡。不易摄照。拟将清朗各叶选出付影。稍迟方能寄缴。尚祈见谅。承示考订宇文虚中事略。至为详尽。朱倬履贯除本传外。其涉于校刊唐书之事。恐未必有甚可考。屡承教益。感荷无似。陈奕禧墨迹需价六十元。已转告族人。因价高。拟不购。渎扰悚。十五年十一月四日。

【40】 再承假文会堂诗钞四册。乐安任氏传家集四册。又珊网集一册。顷已钞竣。兹仍由邮局寄还。敬乞查收。拟续借徐襄阳诗集三卷。石壑诗草一卷。高阳诗草一卷。游艺诗草一册。抑

隅堂诗钞一册。张北湖集三册。倘蒙俯允。乞包好交京分馆觅便带下。屡读感悚。 十五年十一月四日。

【41】 逖先先生惠鉴。前奉十一月十四日手教。展诵祇悉。先德指马楼诗钞。春华秋实斋诗钞。代抄将毕。闻之至感。承借徐襄阳诗集。石壑诗草。高阳诗草。游艺诗草。抑隅堂诗钞。张北湖集。知己交京师商务印书馆分馆。惟尚未接到。容再催询。大著考订宋国史艺文志四种。向尊处远承介绍。不胜欣感。惟商诸同人。均以价昂。不愿购进。敬祈婉谢。俗事全集。致稽裁答。抱歉无似。

再告知词林纪事印成。不久即托分馆送呈。运输恐需时日。又武昌友人得茗斋诗稿数册。允借观。前借去之各册。盼寄还。便比对。 十五年十二月四日。

【42】 逖先先生有道。本月四日肃奉寸函。计荷垂察。前日奉十二日手教。承示近见扃腹斋稿本。似为族祖手抄。且有未刊之诗七十六首。并蒙抄示题目。良朋雅意。感不能忘。弟前在本邑亦曾见一抄本。当时即将未刊之诗全数录存。与来目互较。略有异同。然相差不过数首。谨就来目附注寄呈。按扃腹斋诗钞为六世祖手订。是必当时认为未能惬意。故未舍弃。以是未敢续印。仅录一分。留示后人。惟既为族祖手抄。亦愿收回。藉存先泽。但未便贸焉定价。还乞代询。并查明有无寒家印记。须费清神。感难言喻。吴忠节集缺字。蒙代补完。甚幸。所假各书。尽可从容留校。不必亟亟掷还。至慨假诸种。尚未由京分馆寄到。容再函询。大著稿成。闻之欣快。能否先以副本寄我一阅。不胜禱盼。马啉诗钞已迳录过半。不久将毕。此间钞费尚不甚昂。每千字一角七八分。用纸在外。校对在内。然尚有错字。尊处如欲借阅。当即寄奉。如欲在沪代抄。亦可照办。候示祇遵。 十五年十二月十二日。

【43】 逖先先生有道。昨得十二月八日手书。藉悉贵体违和。近日想早康复。至为驰念。扪腹稿本何人手写。未能决定。遍检家乘。亦无文藻。其人想系曾经收藏之辈。所载未刻之诗。与敝处所藏别本无大殊异。今有涉园旧藏宋本庄荀二子。正在商议。索价极昂。时局如此。不敢放手。只可姑舍。惟有负盛意为不安耳。大著蒙录副畀读。曷胜欣感。俟寄到。当示同人。与商办法。汉书跋稿捧读录出。谨缴还。汪文盛本既有此瑕疵。自当舍置。崇祯补叶钱跋。亦有微词。此时尚在搜求宋元本。至均不可得时。当再取用。马啖诗钞。遵托人代抄一部。惟校对难得好手。讹字终不能尽免。承借各书。已函询京馆。尚未得复。当不致有误也。 十五年十二月二十二日。

【44】 逖先先生有道。前日肃上寸缄。托孙伯恒君转交。甫寄出即收得寄还书籍两包。计吴忠节年谱两册。盐邑艺文续编两册。平寇志六册。惟茗斋诗稿只有五册。均旧抄本。一四册。一壹册。当时寄去尚有抄写稍新者一册。未蒙掷还。包皮上亦注明六册。想系漏封。还祈查核。扪腹斋稿既非先人手抄之本。且未刊之诗与敝处存本无甚异同。故不愿出重值。给价过低。转有不便。故前函敬请婉却也。嘉靖本明诗纪最不易得。涵芬楼初只有万历本一部。极思补购嘉靖本。去岁收得密韵楼书。其中适有此本。已偿宿愿。朝野杂记亦有一不全之本。拟将来补抄若干册。便可配全。其他二书较为冷僻。用处甚少。均拟不购。谨谢盛意。寓京某君购有明史稿。曾托沅叔介本馆印行。已拒之矣。前属购吴江县志。遍访各店。均无之。敝馆有康熙(不全。)乾隆光绪三部。如欲阅何种。当代借出寄呈。 十六年一月十六日。

【45】 逖先先生阁下。数日由敝公司交到惠寄抄本楚台疏略十册。弟适患流行性感冒。为势甚剧。未能即复。病榻展读。其特参承天备监靖灭福府贍田诸疏。可谓言人之所不敢言。一士溷

譔。令人生敬。惟讹字尚多。当重加校勘耳。昨得本月廿五日手教。知贵体尚未全复。至为驰念。吾辈户外运动太少。故多有胃病。此不可不力矫其弊。愿与兄共勉之。邨架近得乡贤遗著多种。沈氏支谱。其家不知在城在乡。起讫在何时代。尚祈见示。石窗山人诗稿。弟处前抄得者为六卷。尊处如多两卷。异时尚拟借阅。至宝拙堂遗稿。银藤花馆诗集。均略有残缺。敝处却均完全。可请将所缺叶数起讫画就格纸寄下。当代抄补。俾成完璧。承询滋溪文稿。敝处有不全抄本。乌程张君石铭近已刊行。可托熟人索取。但甚不易耳。已飭查馆中有无此书。所需一文。当属抄呈也。

再前年承示购得明抄宋本水经注。甚为王君静庵所赏。曾代估影印工价。议而未行。至今悬望。敝馆近日复印四部丛刊。中有水经注一种。原用武英殿聚珍版本。静庵来信谓不如改用尊处抄宋本或黄省曾刊本。鄙意兄所藏从宋本出。黄本究逊一筹。因思吾兄本有流通之意。不揣冒昧。敢为陈请。倘许借印。拟薄助买书之资百廿元。聊将微意。想不责其唐突也。专此奉商。伏候裁示。十六年一月三十日。

【46】 逖先先生惠鉴。一月三十日曾上一函。翌日又寄去抄录苏滋溪修史条议一文。均挂号邮递。计早达览。今将匝月。尚未得复。前知贵体有肠胃病。未审近日起居何如。甚用悬系。茗斋先生诗稿近已由友人寄到。凡十二册。的系先生手写。中有先生名号印记数方。兹抄呈清目一纸。敬祈察核。第一。第四。第九。第十。第十一诸册及第七册之前半。第八册之后半。均为我处所无。而我处残本之第九册。又为彼中所缺。适可补入。惟尚缺庚子至癸卯四年之作。全书除吁上鉴外并无序跋。按先生生于万历乙卯。王防孙亭为先生撰传。称其博闻才辨。名噪一时。启祯之间。三吴文社邀执牛耳。不应至廿七岁始有诗。恐以前尚有

所缺。但都不敢断言。客舍偶闻先生族孙暉跋。已不获见全集。我辈生数百年后竟得先生写定之稿十分有九。往年印四部丛刊时弟极思以葛氏抄本列入。以无序跋。遂尔中止。今正编辑续集而此稿适见于世。不可谓冥漠中无呵护之灵。此实有可印之价值。可惜缺去四年。一无序跋。故踌躇不能决。未知先生何以教之。葛氏一部记是分体。不知有可补入者否。前寄呈抄目一分。又另有先生诗抄本一册。统祈掷还。以便检对。诗余一册与别下斋刊本比对。完全相同。但原稿次序凌乱。似是未定之本。既有刊本。将来即列入丛刊。此亦可以不印矣。葛词蔚来信称金箴孙函告厂肆有梅谷丛刊一部。索价四五十元。渠先已购得。劝弟收之。寄来清目一叶。乃是大笔。敬乞代为谐价。如不过三十元。即留之。否则作罢。费神之至。再前函奉询两事。一应否代借吴江县志。一乞假明抄水经注印入丛刊。如蒙慨允。士林同幸。贵恙倘已大痊。统祈示复为盼。承假石壑诗草一卷。高阳诗草一卷。合一册。游艺草一册。均已抄成。其徐襄阳诗集一册。敝处已有之。抑隅堂诗钞一册。张北湖集三册。因与本邑无甚关系。均即日另邮寄上。续有乞借。容开单呈鉴。 十六年二月二十七日。

【47】 逖先先生惠鉴。久未得信。比来起居何如。甚念。甚念。一月十六日三十日二月廿七日迭上三函。廿七日又挂号寄还前借本邑先正著述七册。计均递到。前承见惠茗斋诗初集一册。昨取出与新借稿本一对。乃为丁卯至丁丑所作。编次体例。完全相同。前函谓先生不应至廿七岁始有诗。于此益可证明。稿本首册起于辛巳。是其间尚缺戊寅己卯庚辰三岁。加以庚子至癸卯先后共阙七年。倘能觅补则先生之诗可称大全矣。近日贵体如已康复。前寄去葛氏抄本先生诗目。又漏未寄还之抄本诗各一册。望即付邮掷还为荷。马啖诗钞已发抄。并照原样专印格纸一种备用。

附去一叶。并祈察入。专此布达。祇颂台安。 十六年三月九日。

乞假蒙吉堂稿选本。征吾录。竹隐庵吟草。小莲花室遗稿。

【48】 逖先先生阁下。三月九日复上寸函。托傅沅叔兄转呈。续奉三月八日手教。展诵敬悉。贵体就痊。至为欣慰。上海发生战事。人心皇皇。迟迟未复。甚为歉仄。今日又得同月十八日惠书。知前寄一函。已届一句尚未达览。大约因邮局罢工之故。寄还乡先哲著述七册。尚未贻误。差堪称幸。茗斋先生诗。续检族祖春溪先生刊本。乃知先生少年之作。已于三月九日去信声明。惟尚缺七年。则恐终不可得见矣。寄还抄目一分。选本一册。已于数日前收到。可请勿念。明抄水经注。尊意仍拟单行。甚善。嘉靖刊本。敝处亦有一部。且有惠定宇先生校笔。同人之意。拟仍用武英殿聚珍本。不再改用。盛意谢谢。梅谷丛书既不允售。只可作罢。沈长水集诚极难得。葛词翁处却有一部。亦系万历刊本。弟当时误认为海盐人。曾拟借抄。嗣知籍隶当湖。故遂中止。乡邻文献。且索重价。只可割爱。词翁所藏种数是否完全。容代函询。如须收藏。当再奉达。八旗通志。东方图书馆只有乾隆刊本。嘉庆续修向未收得。原拟购藏。惟默察沪地形势。大祸在前。何必再取此罕见之书。来作覆巢之卵。雅意拳拳。徒呼负负而已。马啖诗钞已录成两册。其余不敢续发。前三月九日去信。乞假蒙吉堂稿。征吾录。竹隐庵吟草。小莲花室遗稿。亦祈从缓付邮。异日重见太平。再为一瓶之借。再承属文郎在东方投稿。业已查询。复笺附览。涵芬楼所藏方志目录系三四年前所印。兹寄上一册。续收有三四百种。尚未列入。至其他书籍。现正编辑新目。俟印成后。当再奉呈。专复。顺颂台安。

同年六月二日又去一信。托沅叔转寄。告知马啖诗钞已续发抄。如有好书。乞示。 十六年四月六日。

【49】 逖先先生有道。前月今日肃上寸函。托傅沅叔转交。计蒙察及。阅报知都门大热。起居何如。甚以为念。马嘯诗钞已钞过大半。大约再需两月可以竣事矣。近日见翻明天启本两浙名贤录。书凡六十二卷。著者为钱塘徐象梅。字仲和。卷首有樊维城序。中有数语。曰余宰盐邑。生旧附籍西乡。亦以序问云云。撰阅姓氏。徐君之次为平湖陆澄原。同时参阅者。亦以海盐人为多。共十二人。如姚士舜。鍾祖述。许士奇。郑忠材。郑端胤。陈昌慤。陈梁均与焉平湖七人。然则徐君似曾侨寓吾邑者。然县志均不载。岂其人以布衣终。故弗之及乎。我兄于桑梓文献。研究素深。敢以奉询。敬求指示。前示有征吾录拟售四十元。乞代还价七折。未奉还示。度未必肯售也。专此。敬颂台安。 十六年八月七日。

【50】 逖先先生有道。前得九月一日惠函。因候横浦文集。故未即复。及书到而小儿染患肠炎。病势颇剧。入居医院。日日须往料理。无暇握管。迨小儿稍有转机而弟又被绑票。紫居盗窟。凡六昼夜。幸得生还。复奉本月十四日手书。致劳廛注。殊深惭悚。信简有清华学校字样。吾兄是否任彼讲席。至为企望。横浦文集为本支后裔复刻。不见著录。辱蒙代收。感荷不尽。承示有抄本明文案出售。此书却不多见。然敝处于五年以前曾得明文海一部。凡一百四十册。此书成在文案之后。增益三百余家。大山可包小山矣。宛丘集卷数却比右史集为多。然江南图书馆藏有两部。当时借影甚易。不知孙君星如何以不取此六十卷之右史集。今四部丛刊再版。业已印成。亦已不及更换。仰荷介绍。至感雅意。马嘯诗钞成已将匝月。拟每册抽校若干叶再付校勘之费。然卒卒罕暇。因循未果。稍缓必当发愤为之也。近又购得乡先辈遗著毕星海六书通摭遗。冯昌临易学参说两种。并以奉告。余事续布。顺颂著祺。 十六年十月二十六日。

【51】 逖先先生阁下。前月廿六日肃复寸函。越三日后得同月十九日二十日并封手书。猥以弟偶遭强暴。殷殷垂问。感荷无似。以先寄一函。略述近状。计当达览。故未即复。弟在彼中仅及六日。饮食起居。尚无大困。若辈初以商馆为弟一人私产。故所望甚奢。嗣经解释。亦遂恍然。并属详细调查。越日复来。自认误会。以是较易解决。所耗甚属有限。然在弟则已负担綦重矣。还家以后。贱体尚堪支持。家人虽受惊恐。亦各无恙。足纾绮廬。马啖诗钞。业已写竟。计十八万七千四百八十六字。分装十一册。原阙卷十。而溢出朱鸿绪一人之诗一册。未知何故。写成后曾托人校对。另出校资。弟每册均将前十叶复校一过。仍有错字。然弟实无暇。不能手竟。（即自抄一部。至今亦未校对。）应否即行寄上。抑或另行雇人复校。敬候示遵。两月内原书尚可留在敝处也。再抄校之费。每千字一角七分。共银三十一元九角二分。又代印格纸八百叶。计银四元。两共三十五元九角二分。弟有托尊处代抄之书。将来彼此划算可也。明文案。宛丘集两书。前函已陈。兹不述。十六年十一月五日。

【52】 明文海卷帙过多。商馆以营业为主。际此时局如斯。巨籍恐难销售。只可稍缓再谋进行。先六世叔祖旧藏明初刻本元丰类稿。未知印本如何。能寄首册一阅否。今岁自遭劫质。损失殊重。不能不节省。毛诗之数。苦其昂贵。如见书后令人可欲。当节衣缩食为之。近有一事堪以奉告者。则彭茗斋诗集中间缺去数年。借得葛氏抄本。大约可有补齐之望也。此颂著祺。十六年十二月十八日。

【53】 逖先先生有道。前月十三日肃复寸函。计荷鉴及。旧历更新。伏维潭第安吉为颂。委抄马啖诗钞。早经告竣。前奉手书。属觅人就原本对校一过。舍侄振声在商务印书馆任事。夜间尚有余闲。因令对勘月余。始得藏事。当酬给伊银币五元。收条

附上。连前印纸及缮写。共费去四十元九角二分。真不菲矣。今书及余纸已于昨日付邮。挂号寄去。敬祈察核。但恐几尘落叶。仍拂扫难尽耳。近日校阅宋齐梁魏四书。撰有后跋。寄由傅沅翁处转呈。敬祈赐教。其中以南齐为最佳。余三种均有明补。而陈书较多。都下时有秘籍。兄如见有宋刻残本以无明补者。甚盼见示。即一二卷亦可贵。当设法通假也。 十七年二月五日。

十七年三月三日又去一信。寄查师诗二十本。如不足。示知再寄。问宋齐梁魏书四跋。沅叔如未送到。望索取。又宋刻眉山七史无明补者。遇有残本。即一二册亦欲得之。倘能补入。得将明印各卷换出。何幸如之。

十七年六月十二日去信代买吴江县续志连邮费共洋三元三角六分正。

【54】 逖先先生有道。三月初旬曾由邮局挂号寄查荃卿师诗集二十本。四月十七日又续上一函。昨得同月十四日手教。似所寄诗集尚未到。何迟迟也。附下令郎所著日本侵略满蒙之研究稿。已转送敝公司。乞其郑重审查。优给酬报。将来当由敝公司径复。大著读书题识拟从容展读。须稍迟方能寄还也。陈宋斋先生为第八世外祖所辑宋十五家诗选。读杜随笔。均先购到。而唐省试诗笺。访求甚久。迄未获得。今蒙赐。为之距跃三百。拜领谢谢。掷还物望志并代购容庵存稿。均收到。又校读宋齐陈魏书跋文四通。乃蒙夸饰。殊多惭愧。承示近收郑端简文集及吴东发群经字考。甚为欣幸。郑集疏奏多与奏议相重。然次第颇为凌乱。亦有不见于奏议。未知何故。群经字考。敝处有一残本。仅存三卷。如续遇有所见。幸乞代留。若终不可得。则异日尚拟借抄也。弟近印成涉园丛刻续编。当托敝分馆送呈。大约一月必可递到。 十七年四月二十六日。

告知在日本访得陈书。(已足。)三国志。(亦可商。)又在

国内购京蜀大字本后汉。今岁古本廿四史必可印行。

又访得中庸说。并借到孟子传。

又买得马青上梅游对山诗余别集。县志不载其人。

又借到衡门集并杨雍建弗过轩诗钞。

问海三隆福有善本散出否。有所得否。(十八年二月二十日。)

十八年二月二十五日又去一信。问清史。

【55】六月廿七日曾上一函。到庐山后又寄一信。计均达览。弟已于月初返沪。俗冗碌碌。殊罕淑状。承询彼此抄书帐目。别纸开呈。敬祈察核。先德两著。编纂方法未能明了。前已别纸疏列。敬祈明示。敝处借去书籍未蒙发还只有枣林外索一种。正不必亟亟也。前知从者正清史稿。想已竣事。同人多已交卷否。此书究竟能否发行。抑或竟予搁置。尚望见告。厂肆近来有无善本发见。闻取价仍甚高。不知信否。邛架续得何书。邑中先哲遗著比又增益几种。甚愿闻知。前借得郑端简衡门集。业已抄完。惜书主索还原书甚急。不获复校。是则可憾耳。迹又觅得金粟笺说。紫云先生年谱。宜圃随笔。均系小品。正在传录。兄如需抄何种。示知即寄。尊藏吴东发群经字考。董穀碧里鸣存续编。胡石窗山人小稿。蒙吉堂稿选本四种。拟乞抄寄。倘蒙惠寄。不胜感幸。十八年九月廿四日。

致张寿春 伯苓

暴日无道。辱我平津。贵校竟遭殃及。先生四十年之经营毁于一旦。为之悲愤。然敌人所可毁者我有形之南开。而无形之南开已涌现庄严。可立而待。读报纸所载先生言论。又令人为之兴奋。吾不信我中华民族终长此被人蹂躏也。闻贵校已在蜀省设有分校。信否。现在如何规画复兴。甚愿知悉。风便祈赐示一二。专此奉慰。伏维珍重。 民国二十六年八月二日。

致胡适 适之

【1】 适之先生阁下。得五月七日手书。文旃次日北行。当日午后即诣客利奉访。未获把晤。翌日未能趋送。至为怅望。比想早已安抵都门矣。伏维起居绥和。潭第安吉。甚念。甚念。掷下文选笺证价银十五圆。支票一纸已收到。此款先已付尊账。当将支票交至敝公司会计科。其回信及收条附上。即乞察入。京师教育前途经此之后。不知可稍减障碍否。政局变化。究竟如何结果。兄当有所见。便希告我。 十五年五月十六日。

再弟辞去商务印书馆职务一事。辱承海勉。曷胜感愧。弟亦知此是重要的教育机关。现在是有风浪的时期。亦未尝不思再支撑几年。但于事实上。再做下去。恐有损而无益。此中情形。笔墨不能代达。只可于他日见面时再细谈耳。 十五年五月十六日。

【2】 蒙赐大著白话文学史上卷一册。拜领多谢。书本厚重。非摊案上不能看。故未终卷也。世间万物新陈代谢。今文生而古文死。亦时势之所必然。正无庸少见多怪耳。前数年有所谓国音字母。其意本欲用以统一国语。然若果通行。正恐与大著第一章第六叶云云成反比例。未审卓见以为何如。 民国十七年六月二十四日。

【3】 顷奉交阅教育部公文一通。与前报纸所载无甚殊异。鄙见窃愿我兄置之不答。正所以保我尊严也。犹忆数年前美国某邦。不许学校教师讲授达尔文学说。世界认为奇谈。以彼例此。均听其留作学术史之资料。供后之评议可耳。 民国十八年十月七日。

【4】 昨日下午收到中古哲学史第三四章的大稿。随即钉成本子。一口气读完。晚上临睡在床上又重读了一半。觉得那李斯一节。说来最透彻。最和平。真是有价值的。现在一班屠狗卖僧的和那乡下老太婆（我想吕雉年轻的时候。一定是一个狠会卖俏的姑娘。所以会给刘邦看中）都上了台。而且人人都要想做孔子诛少正卯。又要将那二千年前的故事扮演一回。恐怕革命成功之后。统一专制局面又要回来了。学术思想的自由仍旧无望。这怎么好。谢谢你的书稿。 民国十九年四月十六日。

【5】 梦翁出示二月六日手教。备承垂注。慰勉有加。展诵感极。商务印书馆诚如来书。未必不可恢复。平地尚可为山。况所覆者犹不止于一簣。设竟从此渐灭。未免太为日本人所轻。兄作乐观。弟亦不敢作悲观也。所最望者。主持国事皈依三民主义之人。真能致民于生。而不再致民于死。则吾辈或尚有可措手之处。否则。摧灭者岂仅一商务印书馆耶。报称国难会员已在北平集会。我兄必有纾难之策。甚愿闻知。近人好以党国并称。弟窃恐二字不能并存。且恐并亡。未知卓见以为何如。岫兄室庐未毁。昨日冒险往取书物。书亦未失。但仅能取出十一。拔翁亦无恙。因馆事过忙。属为代复道谢。敝寓平安。贱体转觉增健。足纾廛注。东方图书馆全焚。可惜者为二万二千余册之方志。此则不可复得。闻之者无不为之痛惜。 民国二十一年二月十三日。

【6】 适之先生。前读致高梦翁信。知贵体已复元。闻之欣慰。拟办周报。屈计此时当已出版。何上海尚未之见。延企不已。弟已托伯恒兄代订。想不至延期或中止也。兹有读者。儿子树年在纽约大学肄习商科。来信今夏提出论文。题为东三省自建铁路。搜集材料颇觉枯窘。而于各路资本管理规则营业状况尤为缺乏。沈阳旧有机关完全破坏。曾托分馆访求。竟不可得。东方图书馆荡焉无存。沪上亦无从着手。前闻我兄言。东省搜罗本国

人材不少。所有自造各路并未假手外人。又言乱后人才星散。有某君已为开平煤矿延聘。畀以重要之职。旧时筑路之人吾兄所识必多。上文所举三项。身任其事者度必留有各项章程报告及种种印刷品。可否乞为代借寄下。弟当属小儿用毕即行寄还。断不遗失。琐琐上渎。无任惭感。岫庐兄月初丁外艰。丧葬既毕三日即到馆视事。不讣告亦不受赙。已登报通告。可谓脱尽恒蹊。梦翁亦日日相见。贱体尚堪支柱。足慰绮存。余无善状可以奉告。专此敬颂著祺。弟张元济顿首。民二一年四月十九日。

【7】适之先生阁下。奉五月一日手示。捧诵谨悉。承示东省自办铁路情形。并赐寄外交部供给国际调查团说帖一件。昨已收到。上渎清神。不胜感谢。儿子在美毕业文题。蒙属就美国事件立论选材较易。至佩雅意。当即转谕。惟恐已不及更改耳。周报不知何日可出版。引领以盼。已托北平分馆代订一分。商务印书馆事两月以来众人精神完全对付工会。弟不忍三十余年之经营一蹶不振。故仍愿竭其垂敝之精力。稍为云五拔可诸子分尺寸之劳。在此数十日中可谓吃尽生平未尝所谓资本家之苦。辱荷关爱。衔感何穷。贵体新痊。诸惟珍重。弟张元济顿首。二十一年五月九日。

【8】适之先生阁下。梦麟兄来。询知起居安善。尚未入医院重疗旧疾。独立评论先已解决一切无事。然未见续出卷号。此心仍悬悬也。蔡鹤翁病转危为安。真所谓吉人天相。弟前日后候。至榻前相见。略谈数语。神气甚佳。音容如昔。且知一切遵医生嘱咐。以后必可无虞。可请放怀。并告梦兄为荷。秦中之变。国将不国。近闻且论及金钱。传告世界。真可谓奇耻大辱。岂独降为奴隶。直行同禽兽耳。前托挽劝夏君文鏊。至深感蒙。近弟有致葛领事信印稿附呈。得便乞再代致意。琐渎□复。敬颂冬祺百益。弟张元济顿首。二十五年十二月二十一日。

【9】 适之先生阁下。去岁十月十三日复上寸函。托岫庐先生附寄。先是五日又由留美学生侄孙婿翁兴庆处附呈一函。计均达览。俟将半年。续未通候。伏想起居安居。前岁偶发心脏病。谅早痊愈。驰念之至。校史随笔早托香港分馆寄去。想经递到。此仅摘其大要。不过什之一二。全部之校勘记现托旧同事整理。恐未必能有出版之机会矣。弟于三年前辑有中华民族的人格一书。选自左传国策史记。凡十余篇。译为白话。意在供中小学校学生之诵读。颇慨叹近来人格之堕落。思从少年身上加以挽救。不料近来堕落日甚。上海各报时借是书发言警众。是书出版已经三年。不知先生曾见及否。兹姑寄呈一册。乞赐小序。当俟再版时录入简端。借以增重。前月得徐大春世兄信。甚感吾兄之指导。亦颇思自励。故人有子。良堪欣慰。附去复信。敬求觅便转交。又侄孙婿翁兴庆在美国中部 Purdue University, West Lafayette, Ind. (住 208 South Street) 专习电学。今年可以毕业。拟入工厂实习。前函代求。现在为期已迫。亟盼有一机会克求进步。该生以旧家子弟。而肯为此力作之事。务乞鉴其有志。为之玉成。临颖不胜企祷之至。国事殆无可言。私料远东战祸必须俟欧洲战局定后。方能解决。但不识美国能别有拯救之方否。贱体日衰。幸尚堪支拄。寓中亦各托庇平顺。差慰绮廬。手布。顺颂台安。 弟张元济顿首。二十九年三月二十六日。

【10】 适之先生有道。前数月托王云五兄寄呈拙著校史随笔二册。徐世兄大春来美。又托带一函。计荷垂察。前日昆三兄录示九月二日大函。辱承廬注。不胜感谢。近来贵体如何。报纸云我兄因病辞职。果有其事否。又云将以某某继任。斗箕之人焉能继轨。必谣传也。兹有读者。常熟翁君兴庆。弟之侄孙婿。先师文恭公之玄孙也。(其父字克斋。向在开滦煤矿公司。任兄或与相识也。)由上海交通大学赴美游学。在 Purdue University, W.

Lafayette, Ind. 肄业。专学电学。明春即当卒業。思入工厂实习而苦无门径。仅以一纸之书自向工厂陈请。多被拒绝。翁生以世家子弟。不愿作朝官而肯与工人为伍。似当在可造之列。我兄提挈后进夙抱热忱。可否借重鼎言为之介绍。俾遂其向学之诚。除由翁去自呈履历并志愿外。谨代祈请。无任企祷之至。敬颂台安。

弟张元济顿首。二十九年十月八日。

【11】适之吾兄有道。敬复者。奉到十四日手教。藉悉近以大典本及各本水经注互校残宋本。知大典所据者为南宋复刻以前之本。可以订正宋刻之讹。来书云在此天翻地覆之时。我乃作此小校勘。念之不禁自笑。此真所谓天下愈乱吾心愈治。正惟斯人有治之心。故能救天下之乱。否则与之俱乱。不知伊于胡底矣。大公报载我兄辑述三国曹孙二氏校事史迹。此真有关世道之文。世人无不骂曹操。然骂者自骂学者自学。吾独虑学者未必能见此文也。中华民族的人格不过弟一时兴到之作。当时正校史记。感于诸人之举动足以振励末俗。故写成此书。我兄指为范围过狭。诚是诚是。但欲增加建设方面诸人物。是为著述之事。雅意殷拳。非弟衰孱所能胜任。自传云云屡闻明命。惟自问浮沈斯世。无可告人。故迄未预备。倘加我数年。生事稍能暇豫。或能仰副厚望乎。二十余年前商务印书馆曾在北平购得藏文经集。似即为吾兄所介绍。后为俄人岗和泰君借阅。归还之日东方图书馆已毁于倭寇。故即寄存北平图书馆。汇为九十二包。彼均有函件为凭。是书为洮州杨氏土司所辖卓尼禅寺印本。民国十七年全寺被毁经板无存。闻北平只此一部。此后恐更不易得。东方图书馆恢复无期。且此间亦无要求阅读之人。如能得价颇拟售去。以疗商务目前之贫。不知我兄能为估值否。琐琐奉渎。惶悚无似。春寒尚厉。伏维珍卫。弟张元济。三十六年二月二十八日。

致顾廷龙 起潜

【1】 起潜先生阁下。夙从博山昆仲饴闻行谊。久深企仰。先后获诵鸿箸憲斋年谱。章氏四当斋藏书目。尤钦渊雅。近复承寄燕京大学图书馆报第一三〇期一册。大作嘉靖本演繁露跋。纠讹正谬。攻错攸资。且感且佩。敝友叶君揆初雅嗜藏书。堪称美富。以沪上迭遭兵燹。图书馆被毁者多。思补其乏。愿出所藏。供众观览。以弟略知一二。招令襄助。事正权舆。亟须得人而理。阁下在燕京研究有年。驾轻就熟。无与伦比。揆兄驰书奉约。亟盼惠临。闻燕馆挽留甚切。桑下三宿。阁下自难恕焉舍去。惟燕馆为已成之局。规随不难。此间开创伊始。倘乏导师。便难措手。务望婉商当局。速谋替人。一俟交代停妥。即请移驾南来。俾弟等得早聆教益。异日馆舍宏开。恣众浏览。受惠者正不知凡几也。专此奉恳。伏祈垂察。兼颂起居。 二十八年五月二十五日。

【2】 旬日未晤。甚念。前由揆翁交阅大稿。附注管见。想由揆翁送还。仍祈核定。书籍整理想已著手。书片等已否制成。均甚悬念。前承示需用写官。已否雇定。并乞示及。 二十八年八月十三日。

【3】 敬复者。前日奉手教并编定四部分目表暨后幅详说。展诵再四。具见虑周藻密。至深钦佩。惟既承垂问。窃愿再进一言。四库总目。疵类诚多。然本馆收藏既以国粹为界。四库奉行已久。且集历代之大成。鄙见既已奉为准衡。则凡四库已收之书。原属之类。似不必加以移改。移改究属少数。或去或留。事有未周。言之亦难成理。至于近出之书。无可比附牵合者。则以增析济其穷。原表所增所析。经阁下再三斟酌。自无可议。原稿

缴上。即希察入。此为弟泥古偏见。是否可行。仍乞卓裁。并请揆翁核定。 二十八年八月三十日。

【4】 旬余未见。伏想俚祺曼福为颂。昨得袁君守和来信。为充实图书馆月刊季刊材料起见。属为代求。如合众图书馆所藏善本有昔人题记可供观览者。恳祈录示。谨代陈。并请于晤叶揆翁时道及。又前呈景印四库全书四册如已阅毕。祈便中发还为幸。 十月十六日。

【5】 昨承枉临。晤谈为快。需借涵芬楼善本书六种。顷已函属先提。山书及彭尺木文稿两种。径送尊处。如果发抄。务祈转招写官至馆或揆翁府上迳录。勿任携归私室。至恳。外日本书目六种附呈。祈察入。 二十九年一月五日。

【6】 前日辱荷枉临。失迎甚歉。亟思走答。以近日双足均患皴痂。行动不便。未能如愿。尚乞鉴原。稼轩词已付印。不久当可出版。知念附陈。 二月十七日。

【7】 前购残本稼轩词。辱蒙介绍。得使乐昌之镜归于复合。甚感雅意。顷景印已成。谨以一部呈览。伏乞莞纳是幸。 廿九年三月三十日。

【8】 前数日呈上新印稼轩词一部。计登签掌。下星期日在寓薄具蔬酌。奉约驾临一叙。附呈小柬。千乞勿却。同时兼约博山昆仲。并祈代邀同莅。至为祷盼。 四月十二日。

【9】 前日奉还示。谨悉。发还书籍两种已收回。敝处所有嘉兴人著述。原拟按日检呈。今因商务印书馆暂行停业。无从领取。只可中辍。现在寓中检得四种。先呈上。前承惠假陈仲鱼恒言录补注。迟迟尚未奉缴。欲得钱氏原本一读。如贵馆有之。拟求续假。琐渎。感悚。 四月廿七日。

【10】 昨承枉顾。晤谈欣快。今晨奉到天籁集第二卷。歌谣周刊各一册。至深感谢。歌谣周刊甚为合用。尤以王国栋君之河

北省谚语类辑为佳。凡分十三类。所收仅十之一。共见六期。不知此周刊于第二卷后有续刊否。戛然中止。殊为可惜。如有所知。尚祈见示。天籁集已阅竟。谨先缴上。乞察收为幸。 七月廿二日。

【11】 迭奉廿三日廿五日两次手教。展诵祇悉。发下第三卷歌谣周刊暨抄本吴下方言考均收到。因贱体又小有不适。致未即复。甚为歉仄。前承交阅图书馆筹备一年记略。捧读一过。巨细不遗。足备异日编辑馆史之助。谨缴还。又吴下方言考。卷二三歌谣周刊。均已阅过。一并呈上。统乞察收。蒙开示有关方言谚语诸书。其孙锦标朱雨尊两人所著业经访得。其余各种亦已函托敝馆各分馆搜访。辱承指示。不胜感荷。肃复布谢。 三十年七月三十日。

【12】 昨奉手教。谨诵悉。选借明板书目一叶亦收到。据馆员声称。约须迟一二星期方可发篋。当可先检呈数种也。王摩诘集四册已阅过。先六世叔祖讳元龙。字雨岩。别号晓堂。为雍正己酉拔贡。官昌化县教谕。又红药山房印章似是马寒中家故物。马氏书散。或就近入于吾家。然校笔则非出先人手。当尚在其前也。景郑兄慨然见惠。万不敢领。谨缴上。乞察入转交为荷。景兄均此道谢。

闻曩在商务馆修旧书倪云峰君在贵馆修书。信否。如有余闲。弟有昔人评点杜诗汉书。拟令包修。可否。乞示。 十月八日。

【13】 涵芬楼藏陈树华左传考正六本。外传考正二本。昨已取到。谨呈上。乞察入。给以数行。俾便存查。又卷耑眉批不少。朱笔系卢抱经手书也。且行字颇长。字亦太小。须占纸幅甚宽。可否用敝馆前印郡国利病书例摘出附入卷末。又印刷工场必不宽敞。火患堪虞。可否分册发照。勿留外校。统祈裁酌。

八月廿九日。

【14】许久未见。伏想兴居安吉为颂。前月友人卢君润泉以三水梁燕孙年谱二册见贻。其中颇有史事关系。因为贵馆代乞一部。知已交到商务印书馆。属即径呈。不知已否送上。又昔年北平学界印行蒲留仙之白话文。尊处如有藏弃。乞惠假一阅。

九月五日。

【15】昨奉手教。谨诵悉。校本恒言录的是仲鱼先生着意之作。除跋语外通体完善。惟八百元未免过昂。如能购成。异时尚拟假读。贱体承注。极感。依然行路难。闷极闷极。原书六册奉缴。乞察收。 九月十七日。

【16】许久未见。伏想兴居安吉为颂。前承惠假直语补证抄本。续恒言录。磨难曲。留置案头甚久。业经翻阅。谨缴还。又辛白谪诗谥。指陈当日时事。所可揣者。均已分见眉端批注。此外竟无可裨益。一并奉还。即乞检收。蒙古游牧记敝馆只有铅印本。不可信。贵馆如有刊本。拟乞假一阅。琐渎主臣。 十一月十四日。

【17】昨承枉顾。适午后小睡。失迎甚歉。留示聊斋白话韵文一册。此弟求之数年而不得者。忽焉睹之。忻喜无极。容读毕再奉缴。尚有三篇。不知后来曾觅得续印否。亦极欲快睹也。元月十二日。

【18】昨奉手教并假阅宛陵集两种。甚感甚感。修补明本细与万历颜本比对。笔迹微有不合。已将管见附识卷首。敬祈核阅。柯本序称从袁本出。其年月在枝凤重修之后。至卷一以次柯氏姓名均剗去。则不知何因矣。元丰官制考名实不符。又清太祖史料。鄙见皆书估作伪之作。编目时姑仍其名而纠正于下。何如。各书均缴。乞察。辛白谪诗谥。暂留读。 三月十四日。

【19】昨奉还示。谨诵悉。唐音戊签损伤两册。蒙允饬匠代修。极感。惟工价必须由弟认缴。务祈开示。缘此系寄存书籍。

(不止此一种。尚有若干种。后当呈上。)万不能混合言之也。今又送去海盐人著述三包。乞检收。中有俞浩西域考古录。前揆初兄曾问及。乞检出送与阅看为托。 三十年三月廿二日。

【20】春寒。唯起居安吉为颂。曩弟搜辑嘉郡先哲遗著。多历年所。亦积有数百种。去岁曾为兄言。拟归之合众图书馆。俾免散佚。不意冬间一病。侵寻数月。遂致久延。各书本寄存东方图书馆所赁市楼。今当陆续取回。呈诸左右。今日先送去第一批。以后当排日检奉。惟中有蠹蚀者。如不便收拾。则竟弃去可耳。七邑之中以海盐人著述为多。鄙意拟暂时留出。冀异日敝邑或有图书馆之设。则仍以归诸故土。稍助乡邦文献之征。合先陈明。务祈鉴察。昨日检得刘君翰怡昔年景印宋刊汉书零卷。谨以一册奉赠。伏乞莞存。胜老逝世。曷胜人琴之感。设奠有日。望先示知。贱体尚未复元。脚力衰乏。故迄未能诣谢。言不尽意。

三十年四月二十三日。

【21】前日晤谈。提及旧藏讎文数通。今送去。又从旧书中检得道光庚子科顺天乡试题名录一纸。镌印极为恶劣。然亦一骨董也。又杂书数种亦并呈上。统乞察收为幸。闻拔可兄言。馆中存有新出古今杂志。中有冒鹤亭摹海花索隐。拟祈惠假一阅。

【22】敝处所藏嘉郡人著述。兹又检出数种。中有稍属罕见者。敬祈察入。此项书籍将次告罄。拟将海盐县一部陆续呈上。前经陈明。将留存备作本邑图书馆之藏弃。不知在于何时。今拟陆续送去。作为寄存。仍可听人检阅。异日重见太平。果能不虚所望。仍欲履行前约。不知可邀允许否。再弟欲检阅子史精华。拟求慨借一阅。缘东方图书馆现正整理。一时未能借书也。 三十年七月十九日。

【23】前于本月十一日送去逊国逸书三册。知荷察收。昨又检得胡适之兄辨正。是书之出于伪造若干纸。今补呈。乞察存。

倘能装在本书之后。则尤便观览。乞酌之。 三十年七月廿三日。

【24】蒙假阅洪文卿师尺牍。已读过。谨缴还。命作题词。不敢污褻前贤笈札。仅于卷末署一观款。以识鸿爪。大著明代版本图录亦捧读一过。琳琅溢目。信为必传。自惭鄙陋。不能赞一辞。原稿并缴。统乞检收为幸。嘉靖东壁图书府本王摩诘集有先六世叔祖藏印。原书未知何家所藏。乞示及。

涵芬楼藏书洪武本却有数种。建文本已不见。想毁去矣。永乐宣德本亦间有数种可用。烬余书录如需阅。候示检呈。 十月三日。

【25】昨示谨悉。涵芬楼烬余书录稿本十册呈上。乞察阅。馆藏善本寄存金城银行。原在平地室中。近因潮汛高涨。已移楼上。因逼窄。只能将书篋层累。且转折亦无余地。故取书较难。异日借影。如其本适在下层。恐难从速。合先陈明。藏园自述并无余本。弟得一分。容稍缓。当与其六十自述检出并呈。 十月四日。

【26】前日奉手教。祇悉。需用明本书景印有年号篇叶者。尽可先请开示。不妨多举若干种。其为所最要者。另作记号。当交馆员依便检取。并乞裁酌。外书一包。乞检存。 一月六日。

【27】今送上日本景印古写本庄子九卷。又校勘记一册。又淮南鸿烈解一卷。（写在卷背。墨色极黯淡。能录写一分。较便展阅。）乞察收。同等之书尚有若干种。近将迁移。如不嫌其妨碍。当一并呈上。乞示。 三十年八月廿日。

【28】旬余不晤。惟兴居纳福为颂。移居想已竣事。已布置妥贴否。尚有书若干种拟送呈也。敝友伍君昭辰。五十年前之留学生也。喜读线装书。居与馆邻。属为先容。如许看书。尤所欣幸。专此布达。叶揆翁闻已乔迁。均此问候。 九月廿九日。

【29】 昨奉手教。并蒙赐新印明代版本图录一部。捧读欣感。际此乱世。搜辑材料。居然保全。且印刷亦殊不恶。是有天幸。亦二公之志愿有以成之也。名山寿世。堪操左券。手复布谢。敬颂

起潜景郑两兄著安。 元济。元月廿二日。

【30】 昨宵电话陈明。今日在敝寓开张氏旅沪同族会。族人集者颇多。拟将前赠贵馆有先人手迹各件。借回陈列。藉供众览。仰蒙俯允。不胜感幸。谨开具清单。计共九种。伏祈检付来人带回。阅过即缴。琐渎。感悚。 六月六日。

拟借回各件如左

东谷先生遗墨 要真迹 一本
文忠公书妙喜泉铭 一幅
才调集 张上宗下松手批 首册
选唐人诗 张宗樾手抄 四本
李长吉诗 张宗樾手校 首册
桂林风土记 张载华题词 一册
梦窗词稿 张宗樾补抄 二本
宋诗抄 张宗樾手校 首本
螺浮公乡会试联捷稿 一本

三十二年六月六日。张元济乞借。

【31】 前日奉手教。谨悉。赐题涉园图。捧读一过。载明两家世谊。尤足使此图增重。感谢。感谢。首数语褒奖逾格。万不敢当。至云巍然尚存。亦非事实。今亦满目榛菅。仅存遗址而已。务祈改正为幸。原稿缴上。又册府元龟两册。同时送去。统乞查收。 八月二十日。

【32】 旬日未见。伏想起居纳福为颂。前命题秀楚草堂图。久未报命。近始属笔。以寒家涉园图相况。楚弓楚得。其事非尽

出偶然。顷已写成。谨送上。便时乞属写官录示一分。涉园图亦同时检呈。拟乞吾兄与揆初先生为题数行于后。即以庋存贵馆。景郑世兄属题祖庭所绘兰石。一并缴上。统乞查收转致。馆中如有大字本聊斋志异。乞惠假一阅。三十一年十月廿八日。

【33】 赐题涉园图拜读一过。感荷不尽。陈叔翁诗亦已读过。谨缴上。乞察存。命题诸氏弄藏王烟客尺牋。亦已题就。并缴奉。[三十一年]十一月八日。

【34】 昨辱枉顾。晤谈为快。景兄见赐润资。万不敢领。专函奉璧。敬祈转致。并望代陈。幸勿亟馈。长素甲榜系乙未会试。其乙榜似系癸巳。否则与揆翁同年。并祈就近代询。或揆翁能知之也。送去旧法酱油一瓶。乞试尝之。如可用。弟可介绍往购。但价亦不菲。且每日所售亦有限数耳。十一月卅日。

【35】 敬启者。蒋竹庄先生交来钱氏新印琳叔先生伉俪合传一册。属送贵馆。谨呈上。乞察入。蒋君逢星期一五日均到鸿英图书馆。如与通信可交该馆转交也。六月四日。

【36】 昨冒雨归。奉叨覆幬。免被淋漓。不胜感谢。洋伞附缴。敬乞察收。八月廿一日。

【37】 昨手教谨诵悉。墨一枚收到。弟于此物素无所知。两月之前曾乞陈仲恕兄代为评定。许为佳品。故敢呈阅耳。政治官报等给价一百元。即日转告。谢君昨来言拟让去。五十元。未知尊旨若何。又前信所云方志。系东方杂志之省文。为数却不少。但多残缺。不知馆中需配否。有清单在商馆店中可取呈也。九月十七日。

附呈英国斯泰音博士游历新疆图一幅。如有用。乞收存。否则弃去可耳。弟曾购得其游记一册。归国后不数月为人窃去。甚可惜也。

【38】 昨揆翁过访。交来秀埜草堂诗集一册。并传谕购油无

成。谨悉。侠君先生为先人所赋诗三首已录出。原书缴上。又送还涉园图咏一卷。敬乞赐题数行。务祈将先世交谊叙入。三百年世交。恐世间不多得也。命题吉云居书画录。拟一后跋。别纸写上。祈教正。随原书送去。统乞察收。再书画录付印时。行款似尚须整理。原稿颇觉凌乱也。 十一月廿八日。

【39】 前日辱荷枉临。颁赐新印书画录二种。至深感谢。弟先是未能详知良斋先生履贯。曾转询其族人陈君鸣伯。固得制成后跋。可否乞再赐一册。以便持赠陈君。陈君能得其族中遗著。定当快睹也。弟为生事所迫。妄思鬻书为活。附呈润例数纸。敬乞介绍与苏垣之笈扇店。请其代为招徕。此间通例。以收墨费一成。并润资十分之一。作为酬报。亦拟援例相待。并乞转告。琐琐奉渎。无任惶悚。前承惠假聊斋志异。业已阅毕。谨缴上。乞察收为荷。 元月十八日。

【40】 昨谈为快。今送去唐人写本文心雕龙影片四十五张。又重复者八张。(浅深不同可以互证。)又学生杂志两册。统祈察收。昨承示某丛书。及章太炎门人某于是书均有校记。便中祈检借一阅。将于此竟其校勘之役。又钱功甫钞本。不知藏于何家。未知是否瞿氏所藏。四库提要指为伪托。若见原本。或能辨之。 十月廿二日。

【41】 前日承示敝同乡朱旭辰丈收藏各科乡会试硃卷甚富。昨已托金箴孙敝同年转询。如肯出让。请示一目。并开售价。箴兄与旭丈为儿女亲家。据云有明清之际所印者不少。此却甚难得也。先此奉达。 三月十日。

【42】 前日奉手教。谨悉。大著屠敬山小传读过。弟亦无可增益。惟僭加二字。乞核。弟与屠君踪迹亦甚疏。昨已向常州友人询假其行述或墓志。如得到。即送呈。 四月一日。

【43】 许久未见。伏想兴居安吉为颂。前属问敝同乡朱君旭

人所藏历科硃卷可否出售。当托金箴孙同年转询。顷得朱君令弟复信。系复箴孙兄者。据称检查甚属费事。已抄成清册一本寄来。今送上。并附说帖一纸。祈核阅。朱君信又云。另有破碎及蛀损者尚未列入册内。此一千五百余本堆垛匪细。几高及丈许。将来如何运寄。亦非易易。理合陈明。应如何答复之处。敬祈核示。 [一九四八年]六月十九日。

【44】 久未晤。想兴居安吉为颂。昨金通尹世兄来。出示朱小汀丈七月廿五日收信。述及尊处购买硃卷事。曾晤范思(通尹云即北平兴业银行中人)。云已接洽。迨向索前寄清目以凭点交。则无回音。并云续又发见数百册。拟俟第一批了结后再开单寄阅。通尹又言。近在平湖又得朱君信。言范思仍无复音。未知是否离平。抑别有事故。乞即转告揆兄速即去信。并乞查明缘由。示复数行。以便转达通尹为幸。(约两三日即返平湖。) 九月二日。

【45】 蒙假阅吾学录两册谨缴还。又呈上本年出版第三、四、五、六期时代四册。又旧报十一册。号数全不连贯。统乞察收。近来该报被禁登载战讯。弟因不购阅。合并陈明。 三月十四日。

【46】 前承垂询四库珍本初集提要。业经制成纸型。出版科估价信呈上(阅过乞发还)。不知蒋慰兄有意收购否。乞转询示复为荷。 三十七年十一月二十四日。

【47】 今日午前电示之事。有无挽救方法。揆兄寓如何均甚悬念。乞示一二。 三十八年五月十七日下午。

【48】 昨辱枉临。适值赴商务印书馆。失迎甚歉。留示复浙江兴业银行信稿。僭易数字缴上。仍呈核定缮成。即乞代钤贱章径送。昨日金圆大跌。五亿未知共易得多少。甚念。 三十八年五月廿一日。

【49】 前日奉示祇悉。幼达兄属书撰翁墓碑。今写就送去。左边二行似太蹙。应放宽。并乞交去时转告为幸。 [一九四九年]五月廿三日。

【50】 东方送与政府。其报目录共有廿四本。编次芜杂。昨交来样本一分。即须交还。兄如愿一视。乞枉临翻阅。卷帙繁重。不克送呈。乞恕。

【51】 今送去书籍杂志等共一包。请察收。今日休沐。如有余暇。可否于雨止后枉临一谈。企盼无似。 [一九五一年]四月廿八日。

【52】 昨奉还示。祇悉。山海经提要稿今日可交读。甚感。天雨不敢劳驾。当遣人走领。应在何时。乞电示。郝懿行本并祈假阅。同时发下至幸。 二月四日。

【53】 蒙假阅光绪戊子江南闾墨一本。又朱逊先读书题跋二十二种一本。今送还。乞收回。颉刚先生闻已入京。逊先似已作古人。通讯时乞托探听其所藏书尚未散否。弟有管见。欲面陈。晴霁得暇。乞枉临为盼。 二月十九日。

【54】 假读清儒学案五册。已阅。谨缴还。乞察入。赵敦甫有信来。附呈台阅。敦甫诚有心人。明日须送商务诸君答复。敦甫在何机关任何职。乞示。 三月廿六日。

【55】 昨检旧文件。获有汪衮父手札三通。衮父我故人也。睹其遗墨。不胜感怆。其子弟闻有在此者。如能宝爱其父兄之手泽。请转畀之。否则可储之馆中。衮父吴中名下士。亦有保存之价值也。 三月廿九日。

【56】 连日积存有少许信件。今检呈。乞察存。昨检得有汤蛰仙初任都督时属弟为充议和代表信数通。不知昨已乘便呈览未。今日尚拟来搜落卷否。 七月十二日。

【57】 前昨两日迭奉手示。代查争苏杭甬路等事之起年月

日。费神感感。又乞代查上海市各界人民代表会纪要。该册于今年六月廿一日送去。该次会议于何年何日举行。见示为幸。兹又送去杂书若干种。载送书簿。乞察收为幸。 八月十四日。

【58】 昨上一函。以近日事烦恼乱。送出后追思不知所云。故遣佣索回。归言已荷展阅。知其谬误。闻之慚悚。日来检阅昔年积存函牍。中有故人傅沅叔、沈子培、宗子岱、叶玉虎、金甸丞、丁在君诸君手札多通。惟马□□忆不得。多言潮州丁氏、松江韩氏、聊城杨氏散出书事。今均检呈。惟玉虎尚存。余均已作古人。乞赐阅。如有可存者。即留之馆中。亦书林故事也。内有汪允中记旧五代史一则。差有关系。又李君宗恩昆仲。托售所藏各书事。弟适不在沪。迨归后询知。已被高君草草售去。其中有山东王筠治说文稿本两种。极为可贵。不知散归何处矣。 四月七日。

【59】 前开示四部丛刊需补各书清单。顷取出查阅。甲单似指再版改用之本。其中牧斋有学集注字未明。乞再示。然亦想系改用本也。乙单是否不拘初版改版。然以王文成全书抵之。想亦指改用本也。统祈明示。原单附上。 八月十五日。

【60】 昨示读悉。惠借遍行堂集正续。共廿七册。今缴还。乞察入。澹归和尚昔年到海盐。寓涉园。写赠水龙吟词。为先八世祖寿。已查得在续集第十六卷矣。国龙同人虽未查得。然费盛心。均谢。 八月廿一日。

【61】 前数日蒙假阅五六月大公报。谨缴还。乞收回。并承代查唐古忒字。感感。曩承示如有友朋往来函札。可交馆中留存。前日无意中检得梁任公二通。熊秉三一通。黄齐生二通。今送去。乞察收。黄君于前数年在延安。为共产党与蒋介石谋和。由重庆乘机返延安。中途机陨殒命者。兄当能记忆及之也。馆中如有闻一多遗集。乞借阅。 八月廿五下。

【62】 属与颜棣生兄信。谨呈上。原信随缴。乞察核。承示远生遗著馆中存有初印本。祈假我一阅。又复印本尚有残余多部。祈畀我卷一一册。又前清末事。弟曾参加争回苏杭甬铁路建造权。曾以与袁那问答抄本呈阅。未知是在何年何月。又弟被任邮传部参议。及开办外务部储才馆事。在某年月。均记不得。祈遇便代为查示。无任感荷。 八月十二日。

【63】 昨上一函并还书两册。想荷察及。承示文管会在故纸堆中检得葛洪集。已托徐森翁借到。始以为即抱朴子。詎知乃同姓同名。为南宋淳熙时人。宋史有传。亦罕见之书也。兄如未见。乞便中枉临一观。 九月四日。

【64】 今日为合众结束之期。若干年来。弟尤得读书之乐。吾兄十余载之辛勤。不敢忘也。苦心孤诣。支持至今。揆翁有知。亦当铭感。兹有致徐森翁一信。祈阅过转送为荷。顺颂起潜仁兄晨祉。 [一九五三年]六月十八日。

致励乃驥 德人

【1】 奉读本月六日惠书。辱承藻饰。不胜慙悚。垂询敝县先哲胡孝辕先生唐音癸签刊版时期。查商务拟印之书即系寒家所藏。其间刊有金陵刘鸣凤刻及戊戌秋刻。与来示所云完全相合。按戊签卷首杨鼐序作康熙丁卯。时为康熙二十六年。序中所言戊签于康熙乙丑先告竣。然宣子念斋二君所剞劂。至所称未及半者。是否专指戊签。抑甲乙丙丁四签同时并刻。而戊签独先出版。语意不甚分明。而癸签彼时并未成书。且未付刊。则可于言外得之。来示疑癸签所志之戊戌为顺治之十五年。鄙意四库癸签提要谓康熙戊戌江宁书肆得钞本刻行。维时全唐诗甫经刊成。风行海内。书肆以其出于统签。偶见两本。每选刊以牟利。尔事所可有者也。承示张文襄书目答问。载胡申之刻戊签引有甲乙癸签。业侵明季之语。惟弟所见则只有明崇祯刻本五字。并无上文云。不知阁下所见为何本。又敝藏戊签无申之引文。故宫所藏甲乙丙丁四签刊本有无序跋。其版式是否与戊签相同。尚祈见示。王渔洋分甘余话谓。康熙四十余年清圣祖购其全书。又云令曹寅刻于广陵。购而后刻。则所购必为稿本。曹寅在扬州所刻之书多有流布。不应是书刊成即以书版移藏内府。曩闻曹寅所刊似只有全唐诗。颇疑渔洋涉笔有误。此只可以故宫所藏版本验之矣。嘉庆□年敝邑张□昌序□石窗山人诗稿(即孝辕先生七世孙)。云以统签送稿数百册归诸山人。可见是时祖本尚存。圣祖所购金陵书肆所刻。皆不言为当时传抄之本。所可疑者明季既有刊本。何以世间一无流传。杨鼐序文亦全不道及。若谓故宫所存为康熙四十余年购后不刻。又何以刻成之后亦无印本流布于外。济自发见全书已

后。致怀疑莫释。承下问。因并及之。还求指示。又胡申之刻戊签引。先生业经见及。可否乞录示一分。无任禱企之至。

然何以解于故宫所藏又有刘鸣凤本。此或因圣祖所购原为抄本。后见刊本。抄不如刻。故以易之。然未免曲为之辞矣。

民国二十六年四月十日。

【2】德人先生阁下。奉四月二十九日还示。展诵祇悉。又奉到大著释□新嘉量。五量铭释二册又四叶。均收到。感谢之至。兹将各节奉答于左。

唐音癸签卷首。目录。卷一第一叶。卷七卷八末叶。敝藏一部均不缺。亦甚清朗。证之尊指各节。此为顺治戊戌所刊无疑。胡成之刻戊签。缘未知见于何本。敝藏一部无之。倘蒙录示甚感幸。范希仁除图经外未见。今亦未闻其后尚有何人。邢村地名亦无称之者。盖零落久矣。当向邑人士询考。异日如有所知。当再奉告。

胡氏世系略有增益。就原稿附注谨寄。

孝辕先生遗著。惟靖康咨鉴录从未见过。敝处有新读书杂录一种。又其子夏客所著谷水集。又其七世孙焯石窗诗稿。或可供先生纂著时采择。兹托友人带呈台阅。其赤城山人集残本。为乡人借去。容索回再寄。其杜李诗通及文献通考纂无甚关系。且卷帙较多。故未并呈。如须检阅。示知即寄。台从新得回溪史韵三卷。为阮氏所未见。恐系孤本。宛委别藏异日复印。当再乞借。四部丛刊影印真西山文集黄序末页。确系补抄。明版心史系敝馆王云五君购藏。有曹学佺林古度二序。当是福建重刊本。

致高梦旦、陶惺存、杜亚泉

梦旦
惺存
亚泉

仁兄大人阁下。七月廿九日肃上一函。计荷垂察。弟于卅日赴

箱根湖畔。寓松阪ホテル。翌日黄公度之弟幼达同年自芦之汤来访。又同往伊处宿两宵。浴硫磺泉。复返箱根。爱其风景幽静。颇欲多住数日。各处来信均托宫下富士屋主人代收。今日或能遣人送来也。此地为宜静处所。无报可阅。即有亦纪日本琐事。非我辈所欲闻者。昨遣人至汤本。购得朝日新闻时事新报。读之知开设国会期限已定九年。议院法及选举法亦已宣布。皇上并于今日誓庙。在海外闻此消息。不觉欣喜。但不知其言果可恃否。报中又有钦定宪法字样。此事恐为将来祸根。然能为祸与否。究视吾民之如何自待。平心而论。九年之说诚不为迟。但求上下一心。实力准备。庶免为各国所嘲笑耳。国内舆论若何。鄙见此时国民不必再与政府抗争。姑且返求诸己。将应办之事一一举行。二三年后稍有端绪。若得机会再行争辩未为失时。未知诸公以为何如。预备立宪公会。现在定何方针。鄙见不宜随声附和。宜时时从高一层落想。以为国民之向导。此意乞梦翁为苏盦言之。政法书籍亟宜着手编译。为公为私均不可缓。时事新报载上谕牒列应办各事。可否即就所举各事选定编译。次第先行试办。鄙意尤重在先编浅近诸书。层层解说。如何为议院。何为选举。每类一册(如条目过繁者即分数册亦可)。排列次第。如第几集第几编之类。成一丛书。专备内地绅士入门研究之用。文字宜稍优美而解释务宜明晰。理想切戒过高。

诸公如表同情。请即举办。至办理此事之人。则本所孟杨二

君外。蔡松翁亦可相助。闻石门朱立人毕业回国。其人与梦惺翁当相识。学行何如。能招之相助否。弟未深知。不敢悬断也。议院法选举法如确已宣布。亦可编撰释义。此事似可仍劳莼翁一手经理。中岛君所译商业教科可用否。博文馆出版儿童伽喃百种。如已寄到。可即请其翻译。长尾如无事。亦可姑办。弟拟初八日返东京。中秋前后尚拟至松岛一行。约于九月初内渡。如有应办事件。请速函示。肃此祇颂台安。弟张元济拜。

啸老近日病状若何。仍请德医诊视否。甚以为念。并乞致意。 [光绪三十四年]八月初五日。

致高凤池 翰卿

【1】 奉示谨悉。周君兼任广告公司事。如何酬报。应酌定再与商。英文研究会事。当请英文部拟出章程即举办。但英文部诸君与张君见解太不相合。甚望有相当之人能接手。方易融洽耳。陈君汉明尊意拟不聘用。自应遵办。即告邝君回复。惟鄙意公司事业日繁。人才甚为缺乏。且旧人中之不能办事者甚复不少。若不推陈出新。将来败象已露。临渴掘井断来不及。此等病象决不发见于今日。而病根实种于此时。迨病发之时。我辈或均已不在公司。虽可由后来之人独承其弊。然岂所以爱惜公司也。尊意开支过费。宜格外撙节。甚是甚是。然能退无用之人。而进有用之人。何尝糜费。且进一有用之人。可退三四无用之人。非独无糜费。且而可以节省矣。然此等进退之事。若不专断行之。而采取所谓舆论者。以为从速则沪谚有云。只有千日朋友。并无千日东家。此种积习深中于人心。恐受其毒者终在公司耳。且公主张用老人。弟主张用少年人。公主张用平素相识之人。弟以为范围太狭。宜不论识与不识。但取其已有之经验而试之。弟与公政见大不相同之处。然终不敢不为逆耳之忠告也。中华去岁大加裁汰。不得谓其由于无钱开支。仪器一部被裁者二十余人。不能谓非有意整顿。弟昔见其大兴土木。添招股分。均不甚以为事。今见其大裁冗员。而不能不为耸惕矣。一盛一衰恐判于此。惟祈明察。 民国六年二月十日。 （原注“此信未发”——编者）

【2】 前日奉手教。以锡三求添购打字机。而慨然于公司撙节之不易。并历言生平主张俭啬之旨。展诵一过至为钦佩。公司支出日见浩繁。营业至艰。何堪挥霍。然弟窃以公司之大凡支出

之款有当用者。即有不当用者。有可不用者。即有不可不用者。我辈主持全局。在乎权衡之适宜。权衡何在。在审乎用此钱之事之当办与否。及用此钱办此事之人之是否相宜。使其事当办而其人亦相宜也。则虽费万金固无伤于俭德。否则即糜一文亦不得谓之非奢也。不当用而不用。人虽以鄙吝讥。我亦所不惜。当用而用。人即以豪奢讥。我亦所不辞。吾辈只问事之办不办。而不问人之讥与颂也。公司为营利之物。与治家不同。固不能不力戒奢侈。然亦不能专事俭啬。何则专事俭啬。则事必有所不举。而人必有所不能展布也。事既不举。而人又不能有所展布。则公司尚复有何希望乎。来示谓发行所素来简鄙。不能如他所之舒泰完美。以弟观之。编译所近亦局促苟且甚矣。似不如印刷所之差胜。然公司非锻炼身心之地。吾辈亦非为淡泊明志而来。弟久以总务处地方逼窄。设备不全。于办事上甚为困苦。使再能添房舍两三间。而一切设备亦更舒泰完美。使吾辈精神益见愉快。其所收之效弟敢断言必有倍蓰于今日者。然为地势所限。无可如何。即欲为之。亦有不能。不过因公来函意有所触。一纵言之而已。至于撙节二字。在今日诚为要义。凡我同人咸当遵守。请公视我案上木插内之废纸。抽屉内之旧信筒。及椅背之绳索。弟虽不肖。亦未尝不愿步公后尘也。（原注“未递。济。六年八月十六日。”——编者）

【3】昨日承示鲁云奇亏空行为。闻之不胜骇异。图书公司向例每日将所收售货之款解交总馆帐房。公昨云于六年七月分起即未交来。帐房逐日收款。该公司解款忽然停止。即应查问。且其上更有监督之人。每日查看总馆滚存。稽核各馆解款。各有专责。该公司解款忽然停止。何以毫无觉察。仔细思维。殊属莫解。弟于财政之事未曾分劳。不能尽襄助之责。致公司受此巨亏。弟实愧对我公。愧对公司。又窃慨然于同事诸君。受公司之

委托而对于此等重要之帐款漠不关心。或竟知情而不告。事出之后。束手无策。徒令我公一人担忧。此真至可寒心者也。昨承示鲁君自拟清还之法。约有数端。鄙意以为恐有未妥。一。伊所办洋行存有货样。可以售出一二千元。该洋行既有他人合股。售出货价断不能为鲁所独有。且该行外欠必多。此项货样恐已各有所属。二。伊拟将洋行出名招股。招得之股即以拨还公司。此纯系欺骗行为。本馆若知情受领。将来一旦揭破。于公司大有不便。且于道德上亦说不过去。三。伊私编中国黑幕大观售出之后可有余利。按同人戒约。不得营同样之营业。鲁君为此。本当屏斥。若因其有亏空之故。令其即以私取公司之款所为同样之营业。抵还公司。鄙意以为近于济恶养奸。何则人能作弊不令公司知觉。可以私取公司之钱营同样之营业。幸而有赢。不至发露。利可以独归于己。不幸而败。不能掩饰。即举所营之业以归公司。于作弊之人毫无所损。而受其损者仍在公司。如此则人又何惮而不为此事乎。姑不论此是书为中华图书集成公司出面。此等小店毫无身分。其所售出之钱岂能保其必以归我。公昨云必令付钱取书。此在法律上有所不合。凡代印之书已付清印价。即应交货。我若不交。彼中华图书集成公司可以控我。若谓此书为鲁君之产。因有欠款故以扣抵。此则必须先法庭上证明鲁君确有欠款。是书为鲁君之产。经法庭判归于我。方能扣以作抵。且恐尚办不到。因是书已售预约。预约者为第一债权。我控诉在后。只能为第二债权。又现在市上同类之书约有数种。闻是书售出预约三千。可谓至幸。过此亦恐无人问及矣。四。伊已在家取得五十亩之坊单。将以抵押。即以抵押之款归我。昨闻公言。鲁君田产皆为伊母执掌。此五十亩之坊单。鲁君如以欺骗取来。伊母可以控告。鲁君在外抵押。即被控告。于我无涉。然我真欲得其抵押之款。必先取其坊单(公昨已有此意)。若我取其坊单。则其母竟可控我串同

窃产。虽将来可以辩明。而究属有所不值。以上四事弟思之再四。均以为有损无益。我公曲意求全。不欲将此事揭破。一面保全粹翁戚谊。一面保全我等名誉。苦心孤谊。至可钦感。然弟意事已至此。无可弥缝。鲁君此时所说种种方法。无非缓兵之计。其人荒唐至此。此外负人之事必尚不少。一旦途穷路绝。必以一逃了事。彼时股东责备我等。皆无立足之地。弟以为公与弟均受股东重托。平日用人不当。办事疏忽。咎无可辞。将来如尚欲办理公司之事。亟应自行检举。所有鲁君亏空之款。弟与我公及应负责任之人公同认赔。一面即将鲁君送交法庭。按律追缴。并转行松江官厅勒封田产。或尚可稍有著落。如此办理虽对于私人不免稍严。然此等不法之徒何足顾惜。且该公司近在咫尺。亏空如此之巨。我等形同聋瞶。为良心上。法律上。公理上起见。均不能不负赔偿之义务。否则不能责己。何能责人。以后公司大局恐不堪问。是否有当。即乞裁示。至公司范围既大。断不能如向来之苟简。诸事可以无法行之。以后究应如何严密稽察。俾不至再蹈覆辙。容再详细筹议。 七年一月廿三日。

【4】 昨交一函。想蒙察阅。面谈各节函中亦备言之。可互相参照也。尊意欲将此事消弭。然弟以为事至今日。即欲消弭。亦不过掩耳盗铃。以前该公司不解款。帐房诸人岂真不知。现在忽然多解五百一次。又千五百一次。情节离奇。帐房又岂不知。且代印中国黑幕大观之事。公与叶润元密商办法。则叶润元又已知之。且图书公司发行所中人。于其经理之作为亦无不知。如此多人俱已知悉。岂有不传播于外之理。鄙意断不可再为弥缝。须知担当大事之人。决不能事事从仁慈著想。古人所谓小不忍则乱大谋。我公举措。弟意窃以为近于小不忍矣。且不止此。如此营私舞弊之人。而不与惩罚。且为之弥缝掩饰。于公司后来大局不堪设想。弟为公司计。为我公职分计。不能不再进忠告。务祈采

纳乌堯。从速决断。再公与鲁君近来常常见面。词气之间稍有泄露。必即逃避。务祈注意。至于认赔一层。弟意已定。此事宣布之日即行缴出。合并声明。弟今日代人作伐。须请假一日。然如能早了。仍当到公司。 七年一月廿五日。

【5】再花红一事。公司拟给之数弟受之诚无所愧。十余年前责任较轻。事亦较简。弟曾有岁得四千元者。今比之只有减少。弟前且受之。今何不可受之。但彼时粹翁分得之数较弟为多。故弟敢受之。今公所得之数视弟较少。故特璧还七百余元。承示以后逐年照此推算。是今岁改定新章。故尤不便含糊。区區下忱。尚祈鉴谅。再吾辈分配花红。有百数以下之奇零。似亦非宜。统祈鉴察。 济。七年五月廿七日。

【6】敬启者。前奉五月二日手示。询以分任职务。当于次日面陈不敢承命。弟久思引退。今幸得时。惟尊意殷拳。且不免稍涉误会。至为惶悚。现再拟留试半年。借报知遇。惟精力所限。恐终不能久随左右耳。复蒙谆属令抒所见。弟亦不敢缄默不言。现在公司范围日广。罅隙日多。吾辈均年逾始衰。即勉竭能力。亦为时几何。且时势变迁。吾辈脑筋陈腐。亦应归于淘汰。瞻望前途。亟宜为永久之根本计划。若苟且因循。仅求维持现状。甚非计也。谨就管见所及。撮举纲要胪列如左。伏维鉴察。

一。就用人说。为公司全局计。为吾辈退步计。不能不急于储才。储才之道登进固宜稍宽。廪饩亦不宜薄。究之不过拔十得五。且恐尚未必。公司何能胜此糜费。故欲储才。不能不先汰冗。与公司休戚相关者。当别论。其仅著有劳绩者。可于辞退之时酌加酬赠。以所省赡养无用之人之款。移以培植新来有用之人。公司不致多所耗费。尚裁兵加饷之法。亦宜同时采用。

一。就财政说。于公司有益之事。公司力所能及。费虽巨不

宜吝。有可节省者。虽其事沿习已久。亦必停罢。劣伙盗窃。私人逋欠。皆由主持之人疏略。贍徇所致。是理财亟宜得人。会计制度缺点不少。宜聘有经验有学识者预备修改。

一。就组织说。鲍咸翁提议迁总务处于宝山路。利多弊少。宜决速举行。未迁前之布置。事与发行部混合者。先为厘析。各部分有不能同迁者。预令练习。已迁后之计划。裁减机关。省去头目。聘用西人。改良印刷。采用法治。勿图简便。

右列三端不过举其大概。是否实有裨益。弟亦不敢自信。然确见公司成立以来。制度实未完备。且积习已深。不速改革。于公司前途甚有障碍。且吾辈来日渐少。不能不预为退避之计。欲预为计。则不能不求可恃之人才。人才不可必得。则不能不有可久之规制。再四思维。实无策。辱承明问。故敢尽言。是否可行。并取进止。 七年五月廿九日。

【7】 前日奉诵复示。知弟前月三十日所陈三事。公亦认为公司之根本计划。但于我公性情不宜。不愿共同办理。主张分任。以如此之大公司。一切事务总经理与经理十分同意协力进行。尚不免有所阻碍。今公既声明无此毅力。且以分任为言。言外之意不啻驳斥。弟思彼此均系为公。惟见解不同。与其合之两伤。不如离之两全。弟何敢谓己所主张必无错误。且恐将来必大有弊害。弟不敢贻误公司。务乞俯鉴下诚。准其辞职。至于分任之说。弟前已力陈其弊。万万不敢承认。花红一事更不愿再湊矣。

七年六月十日。

【8】 前日承示。王莲溪兄之令郎。在美留学。根底颇好。拟由公司酌与津贴。异日学成归国。堪为公司效用。我公留意人才。预为储备。此弟平日最所希望者。闻之曷胜欣喜。惟我公所虑。公司有关系之人不少。恐他人援例。此节诚不能不虑。尚有一层。甲。公司同人关系较重者。均在公司有年。薄有储积。其

子弟席父兄之余荫。必不能如其父兄之知艰难。不知艰难之人。看事必易。用钱必费。乙。父兄既在公司居重要地位。其子弟在公司任事。设有不合之处。旁人碍于其父兄面子。必不肯言。则无形之中公司已受损不少。即使闻知。而主其事者以碍于其父兄之情面。不便斥退。于是用人失其平。而公司愈受其害矣。以此两故。为爱惜公司计。父兄在公司任职者。鄙意勿轻用其子弟。宁使其在外办事。多受磨炼。俟其阅历既深。能知甘苦。办事确有经验。确有能力。确能立定脚跟。再由公司延聘。彼时宁可特出重薪。以其与公司有密切关系。且又为实能办事之人。他人亦不能援例。则于用人之道亦无碍也。弟昔年亦主张公司宜预储人才。津贴学费。以为异日收用之地。然至今收效者。无论有关系无关系。仅仅郁君厚培一人。其他即在公司亦未必能得力。而离去公司或竟不来公司者。更无论矣。由是以观。不如收罗现成人才。较易措置。若不合用。可即随时裁汰。公司不过损去数月之薪水而已。辱承下问。故敢贡其愚诚。以为刍蕘之献。尚祈鉴察。弟张元济启。七年九月廿一日。（原注“未交”——编者）

【9】近以公司用人之事。弟与公意见凿枘。谨将所持之故。为阁下详言。非敢持异也。为公司大局计。不得不尔也。公司事业日益进步。往过来续。理有必然。五年前之人才未必宜于今日。则十年前之人才更不宜于今日。即今日最适用之人。五年十年之后。亦必不能适用也。事实如此。无可抗违。此人物之所以有生死。而时代之所以有新旧也。公拳拳于故旧。宅心仁厚。至为可佩。弟亦非不重视旧人。无论其他。即谢宾来郑峻卿二人。皆以其为旧人而用之也。旧人于公司阅历深。感情厚。关系密。比之新进固为不同。然必因其有用而后可用之。若其人精力已衰。或敷衍塞责。甚至至于营私舞弊。则于公司为无益。为有害。不能专以其为旧而仍用之也。即念其在公司久。昔曾出力有功于公

司。则精力已衰者。辞退之时优加酬赠。俾还家有所贍养。其敷衍塞责。或营私舞弊者。则婉言辞退。保其颜面可也。若必以其为旧而仍留之。于公司且不能易其地位。是以人为重而公司为轻也。其流弊所及。大约有四。老朽日增。新进不易超擢。而公司办事必无精神。一也。凡稍有年资者。以为禄位永保。办事无庸尽力。二也。冗老愈多。耗费愈甚。三也。公司事业不能随时势进步。四也。积此四弊。公司有不日趋败坏者乎。公尝谓得罪旧人。旧人皆将寒心。公司必受其影响。弟则以为其人苟忠于公司。必能知公司如此用人为求免以上诸弊。相谅之不暇。奚至寒心。若非然者。其人本专为一己计。为友朋计。不为公司计。如此不忠之人。即不寒心亦有何益。不独此也。公司专为老旧无能之人保其地位。而新进之辈必将灰心。弟恐其害于公司者什伯于旧人之寒心也。公之宗旨在以新人辅助旧人。以旧人监督新人。此可于前月廿六日会议论安置郑峻卿事见之。使旧人果能尽其监督之职。岂不甚善。而无如监督之人皆尸位素餐。知识不逮之辈。新进之人何以心服。不服而尚能望其出力乎。如此用人。必至旧人新人皆不办事而已。而公司全局之毁坏不已。基此一念乎。公尝谓旧人总有一部分可用之处。弟亦谓然。然若其人薪水已优。名位已尊。则虽有一部分之可用。而亦不能用。何则以身居重要之人。而一旦令其改就简易之职。能减其薪水乎。能降其名位乎。其不能服人。而且使公司之事日趋于不治。亦犹之乎前弊也。公告拔翁谓必与弟一致进行。但稍有迟速之分。弟虽躁急。然自信非一无步骤者。公所谓迟速。不知以何为准则。一月与半月较。一月为迟矣。而以五年与十年较。则五年犹为速也。郑峻卿事屡议屡辍。公近且不谈包谢两君事。弟亦屡言之。而公绝不于会议提出。是公所谓迟者直是彷徨而已。延宕而已。此弟之所不敢赞同者也。弟生平宗旨。以喜新厌旧为事。故不欲厕身于政

界。后与粹翁相遇。以为得行其志。故甘为公司效劳。弟敢言公司今日所以能此成绩者。其一部分未始非鄙人喜新厌旧之主义之所致。公之地位对于公司固负莫大之责。弟在公司垂二十年。对于公司责任亦自谓不轻。所以敢与公争者。非意气所在。实理势所在。况以弟之主义施之公司。实已有成效乎。经云诸侯大夫有争臣。士有争友。弟虽不肖窃愿附于争臣争友之列。一贡其愚诚。幸垂听焉。 八年十月八日。

【10】 昨晤梦翁叔翁。转达尊意。闻命之下且感且惭。弟此次辞职。固于公之主张有所不嫌。然实为公司大局计也。吾国人每办一事。当危难之时。在事之人尚能同心协力。及其成效稍著。则彼此争权夺利之举动纷纷而起。而其事亦随之隳落。弟深悯粹翁遭难。董事会即以总经理相属。弟力推锡翁。锡翁既歿。董事会重提前议。弟又力辞。所以如是者。即以表示无争权夺利之心也。公既任总经理后。弟与公之宗旨往往背驰。甚自愧憾。今公司成绩甚著。公之宗旨相去愈远。恐以后争执愈甚。弟所以辞退者。亦以表示无与公争权夺利之心也。事仅数日。外人颇有闻知。而弟处询问者。为大局计。公宜即日召集董事会。选派继任之人。宣言于众。以免淆惑。弟言既出。决不再回。若再有以挽留之说者。弟当明白公布。区区下忱。伏维垂察。 九年三月三十一日。

【11】 昨日午后鲍咸翁传述尊意。谓俞君志贤恤款给二千元为数太少。弟问尊意拟送若干。咸翁谓阁下亦未明言。但称相去尚远。并谓人已云亡。不应将其错处说出云云。仰见阁下念旧隐恶。曷胜钦佩。惟窃以为个人道德固宜如此。至办理公共事业。则不能不分别功过。若其人有过而亦为之讳。且匪独为讳。必须表扬其有功。冀可为之掩饰其过。如此则是非不明。是非不明。则赏罚不公。夫至于赏罚不公。则其弊不可胜言。弟在公司

不能维此纲纪也。阁下谓不应将俞君错处说出。昨日吾辈斟酌恤款。不能不权衡其平日之功过。以定恤款之多寡。至二千之数已比印锡翁莫敬加倍。诚不为薄。请益之处。弟实不能赞同。特此奉复。 九年六月十二日。 （原注“未用”——编者）

【12】 兹有致董事会辞职书一件。敬祈阅过代递。弟年及六旬。奉职亦已二十五载。正所谓数过时可。亟思休息以终余年。务求玉成。无任感祷。惟以后诸事偏劳为不安耳。专此顺颂台安。

咸昌拔可仙华诸兄均此。 民国十五年四月二十六日。

【13】 翰卿仁兄惠鉴。昨奉六月二十一日手教。展诵慚悚。弟辞职之前早已陈明。与公政见不同。时事艰危。公司办事方针不能不期其一贯。同时又陈明。公年事较高。不应以难者相诤。而自趋于易。然弟与咸昌兄及印刷所诸君。所见相去更远。无从淡洽。故不能不以公主之。以上云云。公当日亦皆明认者也。天下事是非本无一定。而人心则确有一定之主张。即如卅周年纪念一事。来示以为粉饰升平。而弟则以为正用以挽救危局。（所谓危局。指外界竞争极烈。而公司安乐过甚。）岂非相反。十年以来。彼此共事。所见大都如此。不必远征。即以最近之事言之。改良管理委员会。弟认为有益。而公主停罢。一也。米价日昂。弟以为宜增米贴。陈说三次。而公以为不可行。二也。重庆经理易君。被同人攻讦。首次信到。弟即主张更动。曾具说帖。谓不动将来终有不妥。而公必从缓。属将同孙信稿重拟。三也。京华经理张君。被协理正帐数人公揭。及伯恒指斥。弟主张撤换。而公亦以为不可动。四也。当时我公之所以不能相同者。必有正当之理由。以为循此理由。必于公司有益而无损。而弟则断断不敢附和者也。迩来闻公宣言。只要弟回公司。无事不可商量。弟既不能舍己从人。亦断不愿强人从己。且公司之事如此繁复。又岂用强之一字所能办乎。十年以来。公与弟亦尝互相舍而互相从矣。彼

此所感痛苦。不可名言。使彼此受痛苦而有益于公司也。亦何不可隐忍而为之。然事至今日。岂此积极消极混合而成之政策所尚能维持乎。弟尝以医为喻。病势既重。则用药极宜审慎。倘以不寒不热忽寒忽热之剂按之。未有不促之死者。公司之病深矣。试问能以公与弟合开不寒不热忽寒忽热之方治之乎。弟已屡以此意言之董事。傅沅翁来。亦以此言语之。沅翁亦已了然。公诚为公司计。亦不可不剴切以此言之于董事。及来相诘责之人也。犹不止此。使弟亦有公之资格。为公司之发起人。为耶教教徒。与创办诸人皆有亲孳之谊。则弟亦未尝不可起而肩任。而无如弟皆无之。此弟所以毅然去职。以明示其与人无争。使公得以放手办事。且以一息平日之浮言也。来示谓大厦将倾。何至于此。即令有之。亦岂弟之一木所能支。此惟公之力可以支之耳。来示又谓皮之不存毛将焉附。谓弟离馆后。诸事可以不办。弟以为此言大误。公此时正宜如平日之挺身担当。则人心自能安定。旬日以前。公曾见告。拟彼此同退。立于监视地位。另换一班新人物。出而办理。弟再四思维。恐人心因此愈为动摇。故托同孙代陈。劝公勿再出此言。想蒙察及矣。琐琐上渎。临颖不胜惶恐之至。

弟张元济谨上。十五年六月二十二日。（原注“此信未发”——编者）

致 鲍 咸 昌

弟与吾兄订交二十余年矣。自入公司后。见吾兄实心办事。公正无私。知公司必能发达。故深愿竭其愚诚以为吾兄之助。而为中国实业造一模范。故凡涉公司之事。无论大小。知无不言。言无不尽。吾兄亦无不采用。故弟更感奋以图报。弟近来主张公司重要职员子弟不宜入公司。宜在外就事养成资格一节。亦无非为公司大局起见。不料昨日晤谈。吾兄词色愤懣。甚不谓然。弟深为惶愧。嗣后友人亦多以尊见来告。弟闻之尤为抱歉。公司用人。除重要职员须经总务处会议外。其余各所进退非重要之职员。本系所长之权。昨承面告。拟招庆林世兄再回印刷所。并声明非副所长问题。云云。弟原可以不问。惟以二十余年与吾兄既以友谊询商。弟即不能不以诚心相待。故敢本明日之主张。以为于公司不相宜。作朋友之忠告。且亦不专为公司计也。为世兄计。为吾兄办事计。亦有不相宜之处。此时吾兄气忿甚盛。弟亦不敢多言。容俟将来再行陈说。吾兄手创商务印书馆。勤劳已二十五年。弟亦追随二十年。致今日有此成绩。吾兄极爱公司。弟亦不敢不爱公司。故于公司利害有关之事。不能不言(今日王莲溪兄来言。亦反对弟之主张。谓鲍某某儿子可以进来。我的儿子亦要进来。凡重要职员的儿子都可以进来。云云。弟即告以人人都有儿子。都要进公司。恐不成话。并驳其为争夺权利之见。莲兄点头许我)。此时言之原属过虑。吾兄或不愿闻。吾兄必欲招世兄复回印刷所。吾兄尽可行使职权。弟亦何能阻止。但望日后遇有公司因此为难之时。追思老友之言。宽我今日之罪。则弟感幸甚深矣。冒昧陈词。惶悚无地。统祈恕宥。 民国十一年九月十日。

致孙壮 伯恒

【1】 审定书勘误表及续审定详语各件。均已收到。费神。感谢。兹将奉达各事条举于左。一。续批各书未知何时揭晓。此信到时如尚无通知。揭晓之信俟宣布后祈即发电示知。电文仍用书已发三字。二。照学部奏定去年筹备事宜清单。去腊应将中学师范学堂教科书一律审定。此事年前必须交卷。务请设法抄示。三。去年得胡文甫来电。言王云阁将来上海。拟来本馆办事云云。因彼此均未接洽。殊难决定。前有一信托探询王君意见。望示复。所有复胡文甫之信录出呈览。以便接洽。四。董氏史记首函尚未送到。价昂至此。恐不易购。姑待再商。五。罗叔蕴购入宋本史记。因吾兄为之帮忙。愿以全书借与本馆石印。兹致渠一函。请阅过封送。并请移驾前往。晤商一切。最好每本借出照像。并托彰生兄格外留意。照成之后交琉璃厂旧书店。照样装订送还。京华机器能抽出时候印刷否。全书共有若干叶数。统乞询明示知。又罗叔蕴前信并云。近内阁检书送交图书馆。有宋人手写玉牒甚多。问弟要印行否。渠可与宝侍郎商妥借出。弟复以全印太多难销。拟抽印数十页。最好能择其稍有关系者。叔蕴复信未曾提及。兹拟一并与商。叔蕴尚有隶古文尚书考证。约二十余页。送与本馆印行。弟已允之。拟即作为影印古书嚆矢。宋玉牒如能相配。即可同时发行。较不寂寞。至此等书将来究在何处印装。容再续函奉告。六。京汉各车站设摊售书并在车发售书报事。阮君能否订定办法。此时阮君恐已交卸。正任闻系郑君。为闽人。如需介绍。即请往访严又老。或高子益先容。当可续申前说。七。令业师冯公翁已归。乞代致意。前允向徐梧生君处假印古书。望再陈

请。八。前寄来林琴南文稿已收到。又此间寄上世界新輿图并地名词典三十二册已收到递送学部否。甚念。再弟今年拟作环球之游。定于二月初六日自沪起程。如有须接洽之事。望先筹示。

〔宣统二年〕正月初一日。

【2】 奉到去腊廿六日手书。敬悉。致王君书亦收到。公翁办理此事。前途应如何报酬。敬祈转询示复。又承介绍法人某君允假印敦煌石室书。甚感。现在函商。较费周折。弟今春二月有欧美之行。(定二月初六日动身。)必到法国。可否求公翁给函介绍。由弟亲往面商。较为直捷。至王芸阁事。昨胡文甫来此言。王君已应南洋公学之聘。拟即在此接洽。至弟西行之后所有编辑所各事。均请改寄高梦旦先生启阅。至寄王君要信。亦可寄交北浙江路二百四十五号梦翁住宅转交无误。明后日尚有递外务部学部呈文。即为游历请咨之事。到后尚乞代为投递。感荷不尽。〔宣统二年〕新正六日。

【3】 去岁归国奉手书并退还粹方惺存两公信。敬悉一切。隶古文尚书已收到。兹另封寄去。元代某汗寄法兰西王国书两通。系在巴黎时向彼国文库中影出者。敬祈阁下代觅一识蒙文者译为汉文寄下。费神之至。〔宣统三年〕正月八日。

【4】 前日寄上一函。附呈缪小山京卿一信。计荷察入。顷交邮局另寄俄文蒙古和林地方访古所得各物序目两纸。收到后乞代觅通俄文者一译。需送译资若干。请询明示知再定。至多只能送二三十元。未知如何。又前寄蒙古致法王国书两通。顷已从法文译本重译。可不必再请贡邸复译矣。即祈转致为幸。〔宣统三年〕三月十四日。

【5】 陶惺翁信送还。乞察收。呈稿酌加数语。乞飭友代缮取结递部。(候弟处通告再递。)惟先期须录一副稿。由弟处转呈林赞老。庶呈文到部可以接洽。修书价太昂。可作罢。前存两种

旧书乞掷还为幸。 [宣统三年]七月初三日。

退回魏子敬旧书四册及书单一纸。乞核办。又中国教育会章程。乞代催速印。明日开干事会。必须交到。鄙意宜多印。共五千。何如。

【6】 兹送去大唐新语一部。计六册。乞还与带经堂。(在隆福寺。)又夏承碑孔祭酒碑各一册。连信乞飭送宝瑞臣。(前数日缮就。已送去。因瑞臣赴西山。门房不收。)又还上岫云寺志。东方杂志各一册。乞查收。 [宣统三年]七月十日早。

【7】 翰文斋书计已送到。其肄雅堂所补各书。务求照原单点楚。另录书名卷数。以便查核。弟准二十日乘正太快车返京。当日七八点钟当可行抵前门。是日拟即暂宿馆中矣。魏子敏书系章一翁介绍。其书弟颇欲购之。乞转去一函。请为设法。容俟弟返京后接洽可也。(问明至少之数若干。勿说煞。)又弟托章一翁代购高宗御制诗四五集。如送到时。价乞代付。又平湖葛荫梧君如有王荆公诗注送到。价三十金。乞即代为还清。至恳。文选写卷是否能以千金购入。至多不逾二千元。 [宣统三年]七月十六日。

【8】 叶裕甫招集同人股买何鬯威所藏敦煌石室唐人写经。弟已预一股。昨有知单来。(摘要附呈。)如派廿三股。每股约七卷。派资二百一十元。(第一号多一卷。如抽得。当补缴卅元。)应于阳历本月廿八日前备款送交廊房头条新华银行方冠青君手收。拈阄之期。再行通告。届时弟或不在京。即乞公代表。倘荷俯允。感荷不尽。 [宣统三年]七月廿五日。

【9】 奉本月廿日手书。敬悉一切。谨条复如左。一。民政部注册执照第一次领出者。尊处于本月十五日寄出。惟敝处尚未接到。请飭查。二。盛宫保处容由弟再函催。得复再告。三。世德堂六子既无世德堂字样。弟不欲购。如以后觅得。再祈函示。又

通鉴纪事本末系明南监补修本。索价太昂。鄙意至多不过百五十金。（如该店无意。可作罢。）然仍须寄示首册及检查板心无字数及刻工姓名者共有若干叶。若过多则仍不值此价也。再中统本史记可否索寄首二册一阅。又唐百家集零种。前日缪小山来云系明翻宋活字本。敝处亦有二十余种。款式相同。请催一实价为荷。四。暹罗太子照片想不日可寄到。京中要人照片仍祈留意。不必单身。或同乡同衙门。或有特典公共之影片能借出。将所需之人放大翻照。亦可有用。未知能代办否。五。匍斋恐即须离京。日前有一电。请将伊处借来帖画速照。想已接洽。陶诗（恐是元板。）借到甚善。此次影片不知是干片抑系湿片。大本者必须缩印。尊处以后借得或得古书。最好先示书名。行款。内匡大小。并序跋。姓名。藏家印记。以便核定。免致重复。应如何缩小之处。亦可于同时奉告也。 四月廿六日。

【10】世德堂六子如系白棉纸。印刷清楚。可以照相作石印底稿者。拟以五十两购入。祈代检核裁夺。另宋本通鉴长编纪事本末八十四册。是否的系宋刊。可否请罗叔蕴代为审定。是否白纸。能做石印底子否。实价如何。亦请询示。

昨在发行所已托符干翁将大概先行奉复。计荷垂察。张文襄藏有宋本金陀粹编。不知真贋如何。果系真本。极愿借来影印。别附考订一纸。能借出请叔蕴一看。可托京华书局照相。将玻璃片寄来可也。九朝谈剩既是未刊之本。只能借钞。不能影印。至于艺文类聚。无甚价值。不欲印行。北监廿一史有人求售。因不知市价。故托探听。可与旧书店熟人一商。可出价若干。弟拟购入。又唐诗纪事有无翻刻。亦托查示。恐亦无书。亦乞探听时价。敝处却有一部。拟翻印也。 四月初六日。

元刊宋史

目录三卷。 首行大题在下。小题在上。 次行题开府仪同

三司上柱国录军国重事前中书右丞相监修国史领经筵事都总裁臣脱脱等奉敕修。前有进史表及官衔名。每页二十行。每行二十字。版心中间纪事表传各为卷第。鱼尾上左宋史几。右字数。鱼尾下左写人姓名。右刻工姓名。目录后有校勘臣彭衡倪中麦激岳信杨铸牟思善卜胜李源揭模丁士恒姓名。

孝宗本纪三(即卷三十五)第八页系黎州边事随宜措置八字开首。若明成化本则无此。又第九页明成化本系“措置营砦。检视沿江守备。”至“九月己酉杨存”(此二字改作地震)止。共四百字。实系卷三十三之第十一页。误刊于此。若元刊。则不然。

【11】奉三月初一日手示。谨悉一切。兹奉答并将奉恳各事牐举如左。

一。常王二君恐难应酬。已详致严又老函中。祈阅过封送。二。前年得尊示。言甸斋处有宋刊苏诗陶诗全集可以借来照相云云。不知其版本尚清楚否。如能照相。将来可以石印。拟乞阁下前往一商。并可派人前往照相。不必将书拆散。照时可以上页阴面。下页阳面并照。只须于将来上石时将中缝比准配合。便无痕迹。如原书纸色印刷均不甚精。照相不能清楚。只可作罢。三。汪穉卿所出刍言报于旧书事纪述颇详。该报言内阁检查旧书有睿亲王致史忠正(又有宋朝玉牒两种。)及唐通马科书。(已送交学部。)拟托伊往商。特许我处前往摄影。尚拟托借钞皇朝藩部要略及攬古录。封泥考略等书。请我兄移驾往访。声明拟搜印旧书古帖字画等事。托其遇便代为留意云云。四。附去致缪小山信。请阅过转送。最好请吾兄亲往面谒。(将信中所言索一回信。)庶可接洽一切。弟于二月初曾致伊一信。原稿录呈。请接洽。图书馆将来可抄可影之书必多。影印可照上文第二节所拟办法。借抄如何。可与缪公一商。五。朝中贵人相片。务祈设法收罗。愈多愈妙。 三日。

【12】 前晚自杭州归沪。十一晚托夏穗卿带上一函。计已先到。前月廿六七本月初二四六共五次手教。均诵悉。谨复如左。史记柳文周易等书已收到。通志堂经解南方（杭州）有。可配。肄雅堂如印本不精或每本价过三角。如尚未购定。均可作罢。因杭州补配较便宜也。镜古堂另有他书二册。亦系补配。未知曾留存否。如已退去。不必追索也。续轩渠集由正文斋购入者缺七至十。今有残本可补。乞即代购。能减固佳。否则勿靳。另配各书尚未到齐。想津馆转运迟滞之故。唐写文选购价不算昂。台从来沪祈带下为幸。罗叔翁信已到。矿务报告及殷商文字考第六批注册执照均未到。请速查究。余事续布。

【13】 得前月廿六日快信。诵悉一切。同时并得罗叔翁廿六日快信。言需用一千五百金。兄已代向交通银行押得千三百金。以应其急。甚善。甚善。叔翁此款作购买宋本史记之用。来信并云将来可假与本馆石印。则变为公司之事。须与粹翁商。交通一款可由公司作保。不当由阁下私负其责。前都中有董君来信。言有元板史记一部。愿意出售。端午帅已还过六百五十金等语。弟以其过昂。已还复之。兹再附去一函。请得便前往一商。并察阅其书有无破损残缺。（据云完善如新。）再与磋商实价。（渠云端午帅还过六百五十金。当可减少。）向取首册与叔蕴或其他识者一阅。（如不见信。或倩人作证。或令送到分馆。或存银为质。）统祈卓裁。如所需价尚属相当。即请代为购入。尊处年内恐无余款。已由总发行所函达京华书局酌留备拨。并告残书诚不易补。乞派人向小书店书摊搜寻。或可有得。又闻琉璃厂某店有元刊宋史残本一部。乞代访查。共缺若干册。需价若干。并示为荷。十二月初四日。

【14】 正封函间奉十四日快信。谨复如左。一。京汉铁路设摊并在车内销售书报等事。务祈速行设法。二。元刊宋史。如公

能自鉴别最好。附去考据一纸。祈察核。否则请识者一看。如确系元本。首册进史表目录完全。本纪亦完全。书内别无白纸衬订者为上。则可值四十金。进史表目录本纪不甚完全。百册之书不用白纸衬订者。又次之。不过二十金矣。若能属上等。则弟颇欲得之。即再与增加。亦无不可。其次则不得亦无可惜。一切统祈卓裁。 十二月十八日。

【15】 近颇思搜集宋元精槧本为世所罕见者。用石印出版。此于尊旨颇相合。但精本岂易购买。惟有借诸藏书之家。都中名流好藏古书。不知能设法借来照相否。（照相可两半页一照。不必拆卸。将来将中缝拼斗可耳。）祈与公度先生商之。如有办法。希见示再续布。至所需之书。宜检其有用者。经史子均可。惟集部拟割爱。再如汉魏六朝百三家集。全唐文。唐文粹及补遗宋文鉴。南宋文范。金文雅。元文类。明文衡。明文在。皇朝文颖。国朝文录等书。都中尚有善本否。售价如何。敬祈探示。又盛伯熙祭酒前选刻满洲文钞一书。（其名记忆不真。大略如此。）都中想有出售者。亦望询价见告。

兹有致振公一信。请面交。如无暇。加封送伊寓中亦可。张文襄所藏古书押在求宝斋者共有若干种。押价几何。敬祈代为打听。如有书目。能索寄一阅尤感。 十一月初八日。

即日有书单一纸寄呈。乞代配缺卷。先此奉达。

【16】 前函未发。又奉初四日手书。敬悉一切。白振翁函亦到。另包寄件未来。想在途中矣。承代配通志堂经解廿一种。择其卷帙最少者寄来作样。如可相配。再行全购。因敝处所购不全之书纸张甚好。且印刷亦甚清楚也。索价每本五角。未免过昂。祈磋商为幸。内五经蠡测一种只有卷四五。拟不购。 五月初九日。

【17】 前函缮就。又奉到初二日手书。祇悉一切。劝业会教

育报告表已收到。学部审定算学勘误表一册已收。另包内只有长白冈详秘图一幅及某君求售英文书一本。并无伍昭翁之西史稿在内。请即澈查。匋斋处宋板苏集陶诗如的系宋本。复印无妨。最好请叔蕴代为审定。若不甚精美。或真伪未判。则不如不印。再穰卿处有宣统三年统计表。乞代取。如无副本。请觅人抄校。但不知匋斋藏书尚有他种宋本否。百宋唐诗闻原版尚在。容再查。琉璃厂此书市价若干。祈探示。 四月初七。

【18】 昨奉手示内论及购旧书事。容查明再发。兹有各种书目。开列于后。祈觅购转编译所账。并告。楹书隅录正续八册(光绪甲午。山东聊城杨氏刻于京师。) 浙江采进遗书总录 季沧苇藏书目 叶氏棗竹堂书目 昆山徐氏传是楼书目 潘文勤刻士礼居题跋 吴□林拜经楼藏书题跋记 艺芸精舍宋元书籍目 述古堂书目 文瑞楼书目 汲古阁书目 天禄琳琅。(此书价恐昂。示知再定。) 五月廿九日。

【19】 敬再启者。弟自被推为公司经理。极思与翰卿先生同心协力共谋进步。无如翰翁宗旨不同。弟对于公司革新及久远之计划。于今数载勿获施行。补苴罅漏。殊鲜裨益。隐忍至今。负咎滋重。若终以顺为正。觉于良心未安。倘其遇事争持。仍于大局无济。迫不获已。业于前月廿六日向董事会陈明辞退经理职务。素蒙挚爱。用先奉陈。将来总务处当有通告也。弟与公共事十有余年。弟此举知公必不谓然。然此实为万不得已。两害取轻之办法。弟言既出。决不收回(董事弟仍当勉任)。千万勿以挽留之说见慰。惟望我公毋以弟去为念。合力进行。一如常时。则感激不尽矣。此后关于公司事务。请勿再函弟处。以省周折。不胜禱企之至。 九年四月二日。

【20】 前奉双十节惠函。尚未肃复。翌晚有暴客多人。持械登楼。劫弟而去。留居盗窟中六日。已于前夕托庇生还。同人见

告。远承电询。垂注殷殷。至为感荷。此事了结如此之速。殊非意料所及。耗费亦不为巨。然在弟则已觉匪轻。幸拘留期间饮食起居尚不至十分困苦。弟亦勉自镇摄。故贱体亦复无恙。在盗窟中成诗十首。今录呈。(万勿示外人。)借博一笑。堪慰绮存。都门朋好有询及者。即祈代达为荷。昨日复奉十六日手教。知浙江通志三原蓬莱两县志。均已购定。感荷之至。有便寄下。不必亟亟。其余各种未能购得。不足惜也。拔翁因身体不适拟暂时休息。并非辞职。然因时局变幻。仍日日到馆。余事续布。 [一九二七年]十月廿五夕。

致 胡 文 楷

【1】 文楷先生阁下。沪变突起。朋辈星散。每念贤者。不忘于怀。昨奉本月十四日来书。借审台从移寓绍兴。为之稍慰。承示近状。尤为悬念。此次公司猝遭巨患。同人殃及。为数尤多。彼此大难。后顾茫茫。正不知何以为继。计两月以来。公司专办清理事务。纷如乱丝。亦不知何时方能就绪。承询复业。此时尚未能计及。仅仅由北平香港两厂。稍印学校需用之教科书。暂以维持公司之生命而已。元济不肖。数十年来。惟思于教育上稍尽职责。虽遭挫折。此志不渝。衲史丛刊。苟有可以借手之处。仍思继续。但不知天能假我数年否耳。来书奖饰逾分。读之增惭。承嘱无不注意。手布敬颂侍福。 弟张元济顿首。二一年四月十六日。

【2】 夷白斋稿校出之字未录入校记者。如经修正。即不赘录。凡注抄字者。即不修。故补入校记。添注涂改之字。不甚碍目者。均照留。但有甚易修者。仍请修正或移正。过于碍目者。亦须修正。其仅属写法不同之字或通用之字。均删去。讹脱之字有关文义者。其字虽不补。原有各种符号仍留之。以醒阅者之目。但亦有字已补入而各种符号可留者。仍留之。间有移动行数之处。亦为悦目起见。又有校在栏外之字于文义有关不便移入校记者。只可照留。但制版时应注意装切。勿使有碍。凡无甚关系之字句。均删去。不必录入校记。如无错误之处。务乞胡先生订正为幸。 张元济。二五年二月一日。

【3】 前日晤丁英桂兄。云册府元龟毛样现由我兄率季安舍弟据明本检对卷页。未知何时可以完竣。开明本有脱去宋本全页

者。未知已检得若干页数在某卷之内。便中尚祈示悉。此上文楷先生台鉴。季安四弟同此。弟张元济顿首。二六年九月二日。

【4】宋板册府元龟。今归日本静嘉堂。原系皕宋楼故物。陆心源原有校记甚详。弟略加检阅。与尊校似有出入。兹将仪顾堂题跋一册。又前日交下册府校记一册。并送上。即祈复对一过。如有遗略即补校记夹行之内。千万不必另抄。此上文楷仁兄台鉴。

弟张元济顿首。[二六年]十月八日。

【5】昨示谨悉。代孙君校定之件收到。费神感感。元明杂剧八册收到剧目。旁注第□□号者。是否仅有此七册。祈示悉为荷。所注确非尧圃手笔。是否清常所书。亦难断定。尊见以为何如。复上文楷仁兄台鉴。弟张元济。二八年十二月十二日。

致 丁 英 桂

【1】 昨到辽阳路印刷厂询问。魏书毛样本星期可以打完。务祈将已打者赶紧裁折编订。厂中积存不少。务祈派人取回裁折。又所存铅皮印板如每种所缺无多者。可以设法补照。从速出版。如欧阳文忠集、郡斋读书志、谢幼槃集等。中缝甚清楚。只要看明抄出卷叶。千万不必打样。便可着手清理。又白墨已否买到。记得校史处前未用完。乞查移交物件清册示下。各书片请速订交下一阅。 一九三二年十一月四日。

【2】 东方杂志第五期底面百衲本二十四史广告第三期仍战前之言。殊有不合。赶紧停止改撰。须声明“原定如此。现须重照访补。或有改动。”以后关涉是书广告。务祈先送敝处看过再发。以免歧误。外公司航空信封八个。乞交仲明兄查收。 一九三二年十一月四日。

【3】 昨示谨悉。复袁君信稿已阅过。略有改动。送还。祈察入。仍托孙伯翁转递。以资接洽。白墨分装小瓶。宜用敞口。瓶虽小只可装七八分。若瓶稍大。则半瓶已足。瓶塞宜紧。装好后乞以一瓶送敝寓。四五瓶送蒋仲荪君。平斋文集十册缴还。卷末缺叶是否当时漏照。抑未印。此必须觅补。另附呈跋语一通。祈发打字三分。以一分留尊处。备出版时排印插入。二分交下为荷。 一九三二年十一月二十日。

【4】 平斋集跋又改动若干字。送去一分。乞察存。稍闲当来总管理处。一检印成或未印现存之板片卷叶。希预为检备。 一九三二年十一月二十二日。

【5】 昨承示拟添人。赶于一个月内完了。甚幸。甚幸。鄙

意尚有几步工作。甲。查已印之书片。乙。查铅皮印版。丙。查小铅皮存版。(有印板者不必再查。即无印板而书已印过者。或将来不再印者。或不必亟印者。请分别四项以定先后检查。)丁。查清样。戊。查日本照来底片。应亟分别先后。拟定办法。(请酌定后开示。能于二三日交阅否。)再行着手。庶免枉费时间。永无成绩。 一九三二年十一月二十三日。

【6】 检查书片存版入月已及两旬。何时可以结束。此二旬中之成绩乞见示。已经订成之样本。即交下一阅为荷。 一九三二年十二月二十一日。

【7】 雍熙乐府卷二十缺第二十九、三十页。(北京照来原缺。)已托拔可先生于赴南京时商准江南图书馆借其藏本补到。今将玻片及照片送去。乞即查收晒存铅皮版为荷。 一九三三年二月十六日。

【8】 北史尚有残本。乞付下。又明监本二十一史中提阅南史卷五十四。即列传四十四。并同时发下为荷。

再明监本二十一史请托胡庄诸君代查某史为某官某姓名校刻。某史若干册。开一清单。如有藏印。亦乞开示。拟编提要列入烬余书录中也。 一九三三年二月二十日。

【9】 昨示悉。两日所借各史缴还。乞察入。汲古阁十七史如在尊处。乞检出南史五十四(即列传四十四。)一册。交下一阅。又监本二十一史检查时。刊书年号及校对人衔名。务祈留意。藏印初见之本。又每史首本。查毕时统祈同时交下一阅。 一九三三年二月二十一日。

【10】 太平御览册府元龟两书。祇请开示页数。其余传奇。则请照前例办理。明监本正史是否只存此十五史。其余各史。想系因已出版。无须查检。故退还。不意竟尔离析矣。曷胜悼惜。 一九三三年二月二十二日。

【11】一统志续查出十余叶。闻之甚喜。亦乞速查。查毕后共存若干页。或尚有他书。统祈开示。吴瞿庵君所借之书。重借补照。恐有为难。不知当时赔偿如何了结。吴君有何表示。并乞示知。 一九三三年二月二十五日。

【12】北监本晋书卷末有无唐杨齐宣序及音义三卷。新唐书有无释音附在卷末。又三朝本七史校史处记是完全。且有两部者。乞查明见示。传奇存版。已否查完。 一九三三年三月一日。

【13】三朝本七史。请便中代查。某史补板补至明嘉靖最后何年为止。不必汲汲。于暇时为之可也。又南监南齐书梁书各一部。陈书两部。请便中各检首本发下一阅。亦勿急也。 一九三三年三月一日。

【14】示及册府元龟印片及晒出样张。均悉。此书前曾晒出。傅沅翁借出若干册校对。弟曾见之。书甚精湛。(不知曾否寄回。乞示。)昨来样张大为减色。弟终疑是油纸渗透之故。请公司中知化学者一审。此时唯有赶紧晒出铅皮。愈快愈好。约需若干日子可以晒完。祈示。能添人。能加工加买铅皮。尤妙。 一九三三年四月十三日。

【15】昨示诵悉。现编涵芬烬余书录。尚未完毕。衲史过五月再着手。于敝处亦甚便利。缘两事手续。绝然不同。不能同时并举也。庆林先生属先发少数。当于一二星期内检呈若干页。又石印制版。照从前办法。每版六页。约需成本几何。乞略估示。

一九三三年四月十八日。

【16】魏书重照甚纠葛。拟请台从抽暇来寓一谈。(先期电示。)并将前(五月二十四日。)送去补照单件。全数携下。以便说明。 一九三三年六月五日。

【17】京馆寄来补照南齐书胶纸二页。兹送去。乞即落版打样二分交下。胶纸污晕甚重。想系衬纸不佳或包扎不紧之故。请

去信通知京馆。请其注意。又魏书元补模胡卷叶。均请抄示一分。并缓照。其余请速开照。先宋书、后魏书。随照随打样。如有照坏者。随时重照。 一九三三年六月十日。

【18】 昨示谨悉。吴骚合编缺叶自以向吴瞿安先生乞补为便。若然则应先將毛样寄去。顺便乞其撰一跋语。去函措词应申说一句。谓山东刘君將原书寄来。察其印本尚好。故未便退却。即行摄照。不意照成之后。细检尚有缺叶。(某卷某页。)只得仍请慨惜补全云云。鲁之春秋收到。暂行留阅。明后日送。跋文校记清样。均已校过。径送制版厂矣。 一九三三年七月五日。

【19】 百衲本梁书借刘氏补照。当时本馆尚未买得此书。今查本馆藏本胜于刘本者有若干页。另开单。应重照。并将原书四册及从前所照毛样。(重照完仍请发还。)一并呈上。统乞查收发照。照成即打毛样两分发下。 一九三三年八月二日。

【20】 陈书石印毛样两批。今送还。此次石印均拣难做之叶。应请早发专做。不然恐于出书有碍。又传真已发去数百页。亦请赶紧接续进行。如此炎热天气。弟复看补修。未尝稍停。无非欲保全公司信用。想兄必能鉴及也。外宋书误照毛样二册。弟补注页号。庶便检对。最后二册有三页号数已失。请查明补注发还。 一九三三年八月七日。

【21】 传真初样四十四批复校毕送还。黑眼花淡甚多。前弊疑系照相不佳。后弊疑系制版或打样不慎。乞查明设法改良。魏书二批知已径送蒋君。原有二分。其一分如在厂中。乞发下。 一九三三年九月二十日。

【22】 衲史已否开印。一二八前遗存书片应先补齐。用纸宜求颜色质料相近。每一书用纸勿杂。董君搭印一部。纸自备。已否送呈。石印样张已否发完。庄吕尘兄闻又病。信否。请假几日。均祈示复。 一九三三年九月二十二日。

【23】 新代傅沅叔君购到残宋本新唐书。只有列传。起二十二至一百五十。中缺三十三、四、五、六及一四七下、一四八上下、一四九上。凡八卷。共存三十四册。当由任心白兄送去。查东京所照列传五六、五七、五八、五九。系抄配。六十、六一。系补配别本。此六卷均请用新购本照出。又东京所照传四十六中缺一页。因行款不同。需照两页。全卷页数有限。亦拟照全卷。

又东京所照中有甚模胡之页。请派人一查。如确有模胡。将来不易修补。而新购残本却甚清朗者。请另开一清单。并将原毛样及新购残本同时配齐。送下阅过再行决定。

以上各节并祈速办。缘沅翁或须速取也。 一九三三年九月二十六日。

【24】 新唐书毛样三十九册知已收回。前日查过东京照来各卷。尚有缺页。(仅就卷面所注抄出。未能复查。)北平图书馆有残宋本。行款相同。可补。兹开去一单。上用红点为记。请就各该缺页前(抄出页尾十字。)后(抄出页首十字。)检出。派人对过(可请校对员办理。)交下。以便寄平馆再行借补。最好统查一过。毛样中缝甚不明白。应借殿本一对。(同时将毛样卷页在书眉上用硃笔注明。)费神之至。 一九三三年九月二十九日。

【25】 北平所照魏书毛样已齐。经尊处检对。刘氏宋本有较好者。有优劣互见者。有傅本为元刻而刘本为宋刻者。兹由蒋君开来一单。即附呈。请派人照单将刘氏藏本检出发下。由弟复看。应否改照。卷页必须对准。费神之至。 一九三三年十月十六日。

【26】 今有数事奉白如下。

送去宋书石印二十七页。此中有甚不易做者。请选出最难之一二页交最好手段之工友试做。做成打样。交弟阅看。如有不合。可即时修正。如果合宜。即以此试做之页作为标准。附去制

版须知。(请发打印多分。交下二分。)请详细解说。如工友有未明处。可请携带原样及制版须知到敝处当面说明。南齐书已印齐否。请速印。印成先装毛样一部交下。以便撰后跋。

各书补照之叶有大小相去悬殊者。请查照前三日去信。速为补救。

宋书石印制版须知。

此书制版较难。与他书稍有不同。务祈注意。

一。书中有断板痕。凡盖有断板勿拼小戳者。须留原有白线。

二。书中断板盖有“断板剪开。拼准修好。”小戳者。应将断板剪开。将字连拢修好。使无痕迹。

三。上下匡线批明勿连者。中间须留断口。其粗细应稍有分别。(须有古意。不可修光。)因此种拼嵌之版非同时所刻。前后相去或数十年。或数百年。其刻法必不能一律也。

四。左右匡线只须将太粗太毛太齷齪者修去。不可修光。

五。中间行线有太粗者。应修细些。须留古意。

六。凡遇断板之处。其字体与上下不同。大约补嵌者为明板。原有者为宋板或元板。其字体不可修成一样。要照原来各种字体。

七。但在全行中间偶然有一二字粗肥歪斜。其字形甚为难看者。应照上下左右字体。摹仿修正。

此外如有未能明了之处。请随时来问。 一九三三年十月二十三日。

【27】 昨谈照新唐书。作为北平东京两处所照模胡各叶备考之用。但原照之书如一卷中有数页模胡者。则不妨全照。预备将来亦可全数抽换也。宋书石印。请选最模胡一页交做。做成望即打样见示。 一九三三年十月二十六日。

【28】前月二十七日送去重照梁书底样二十五页。知三朝本梁书蒋君亦于同日送上。请速速照相打样。又北平补照唐书二十余页。知已寄到。亦乞翻存板打样发下。(只要一分。余一分存尊处。)又前呈宋书二十七页。梁书九页。十八页。(今日又送去十八页并校样)未知已制成石印若干版。请先送蒋君校阅。又南齐书后跋。乞催赶排。全书已印齐。一面发订作齐阑。后跋印就。即可装订。书根印具已备齐否。又分订册数须查明前出六种每册页数。宜相称。册数单先送下一阅。即打书根样。亦与前六种比拟配准。 一九三三年十一月一日。

【29】顷见发印部数戳子。是否各书印数一律如此。此次开印曾否与出版科详细商定。弟记得两汉三国所印亦只此数。此三史可单售。他史不能及也。又梁书存版打样送来七批。前此南齐宋书未知如何办法。宋书有存版存样者当不少。已印齐否。甚念。甚念。 一九三三年十一月十七日。

【30】宋书本纪四前来卷叶单计四叶。其实末叶为第五页。原阙第四页。应加空白一页。无论已印未印。该卷请即检付一阅。若已印。则第四页恐须重印也。现在四书底样敝处均已送完。此后全是照相制版印订之事。能否每日送校两次。以期迅速。又昨晤姜佐禹君。似宋梁陈三书封面尚未写。兹开去底样。乞察入。拟定即送请其速写。佐兄并云能将全部一气写完。尤便。(能办最佳。)

宋书 借北京图书馆南浔嘉业堂刘氏藏宋本。并以涵芬楼藏元明递修本配。

梁书 借北京图书馆藏宋本。并以涵芬楼藏元明递修本配。

陈书 借北京图书馆及中华学艺社景印日本东京静嘉堂文库藏宋本。(字句查三国志旧式。期归一律。)

请拟具样格。交下一阅。 一九三三年十二月四日。

【31】 此次衲史出书四种。修工极费。昨送呈描润始末记即详述个中情形。记末说明将原样及修好之样各附一页以备读者比较。不知曾否阅及。今请将宋书小铅皮存版打样三页。即备附印卷末之用。弟处尚选出传四十四第三十八页先行送上。俟打样三张交到后选定某页。再行奉达。最好即行开印。一原样。一正样。（即本书内印成之页。）赶紧印成。候跋记排印毕。即可装本印书根。明日仍请开工。能办否。乞示。 一九三三年十二月四日。

【32】 宋书纪四第三叶下补一空白叶作为第四叶。中缝用纪四第三叶翻。但除去刻工姓名。并于右阙外照左列之字属善作小楷同人写就。照地位排置。同时制入版内。制版打样交下一阅为盼。

“原阙。 实阙几页。因末页未编号。未能臆定。”

再上午如有送校之件。务请于上午十一点半钟送到公司收发处。 一九三三年十二月五日。

【33】 此记拟用普通三号字排印。加圆点。内匡高广应与后跋同。中缝用描记二字。最好于明日午前看毛样。外封面签条亦应先排先印。千万勿待全书印完再印。以免临时局促。 一九三三年十二月八日。

【34】 昨送下衲史校样。陈书尚有初样。甚为可讶。何以如此迟迟。请再代查。梁陈二书复样未全签字者几批。未送复样者几批。未送初样者几批。示悉为荷。又影印描润记现改办法。拟不订在宋书之后。专订小册。前附出书通启。随书送与定户。并随便送人。不妨稍缓一二日再印。或有改动。

宋书跋已看定。但有坏字若干个批换。并属今日必须付印。庶可早日订出。陈书跋亦已装版。尚须改一字。亦要换去坏字。此稍迟一二日再印不妨。统祈查照。两跋清样附呈。 一九三

三年十二月十三日。

【35】 谢宣城集记得打样后曾经送来。一时检不到。不知送还否。刻工姓名有模胡者。顷由北京抄到。乞将样本发下。当录入以备后来校对。 一九三三年十二月十五日。

【36】 平斋文集后跋有更动。料必在制版厂排版。已径送该处。以免耽阁。又梅亭四六标准。山谷外集注。吕东莱诗。饮膳正要四跋附上。如原未印就。即请排版补印。此足敷后两星期之用矣。群经音辨跋已印成。无庸议。又日本照来之书系六开本者。北碚文集外集速打样。四开本者搜神录乐善录。亦接打交阅。 一九三四年一月三日。

【37】 瞿凤起君昨晚交来第一单所借书五种。兹托任心白兄照原单查点。并将原单照打随书送上。望即查收。速即补照。照毕即还。索还公司正式收条。又孙伯恒兄来信。原函呈阅。雍熙乐府清样昨已送还。弟无可查对。故敢奉渎。一统志残页二十三张收到。 一九三四年一月十二日。

【38】 二十一日出书。宋之问集书虽少而跋颇繁。且有校勘表。恐来不及。能易他书否。所有已有书片及有版之书。均望从速理齐交下。以便预备后跋。又续借瞿氏书只借某卷者。瞿君云可由伊代检交下。望即开示清单为荷。

愧郗录程史跋均排好。已送承印股工场。今日可印矣。
一九三四年一月十五日。

【39】 瞿氏补借书已借到。共二十一册。已送总管理处办理收据。不久必可送呈。读四书丛说前序系补抄。只可照用。原阙一页。瞿世兄已将影抄本附来。可以补入。此书元刊本有模胡处。即可用影抄本校补。又如缺字太多。可即用影抄本嵌入。同时照出。斟酌之。 一九三四年一月二十一日。

【40】 再前交下刘氏宋刊魏书三十四册。又借北平傅氏照出

毛样一册。备与刘本比对者。弟已对过。蒋仲菲兄有清表一张。并附呈。又蒋君备有补照刘本各页清表两张。同时附去。又从三朝本照出毛样。分（甲乙丙三种。）为十册。其中有可用之叶。均已圈出。但仍请我兄比对。如制版不见比刘本为易。则仍请补照刘本。将来打样四周宜稍宽。并用好纸墨。

左传类编毛样三张先缴还。 一九三四年一月二十一日。

【41】 潘氏借书合同稿。往来信件（不止此。择其有关系者。）并查书记录。一并呈上。乞察入。后日赴苏可以带去。书单已送公司打印。明日再呈。 一九三四年一月二十三日。

【42】 昨晚未知何时回沪。天寒远行甚劳苦。想安吉。甚念。甚念。今送还大本书毛样武经七书。搜神秘览。乐善录三本。前请将武经七书制版。不知已着手否。如尚未着手。可从缓。丛刊续编各书有定期。只可提前先做。前送来韵补南唐书毛样已看过。均极易做。可即制版。现在照相甚忙。续古逸丛书各种可暂缓。应速照魏书及借潘氏各书。再瞿氏书中如吕氏家塾读书记。春秋胡氏传。又左传类编。均可陆续制版。难易应搭配。

今送去曲礼卷子毛样。请照批注办法割裱。先裱三四页送来看过。如合式。再继续下去。

又照相除魏书及借潘氏书外。尚有丛刊续编。百衲正史传真。（今年预备出一万四五千页。）现在设备工手能否敷用。应早为预算。并布置。 一九三四年一月二十六日。

【43】 晋书收到。许白云集补序可用。毛样一册。金华丛书二册送还。乞察收。云仙杂记明日先查他丛书。或可补。亦未定。潘氏还书借书事容明后日去信。李丞相周贺朱庆余三集。请即打毛样交下一阅。便可定。

马令南唐书暂缓印。南唐书最好二种同时出版。余一种用涵芬抄本。 一九三四年一月二十九日。

【44】文始真经原有两序。原书已失。今拟用子汇本卷首两序补入。第一行关尹子三字除去。第二页第十行“按陈氏曰云云”以下悉不必照。另印米糊胶纸重画行线改为半页九行。中缝但写文始序三字。第一页阑外右下角写据子汇本补五字。该书由任心翁送上。一九三四年一月二十九日。

【45】鄙见最好能将北平图书馆借来之书印二三种。约十册或八册之谱。又一统志未出以前能将已照或未照之书提出。每种有六、八、十册者。预备数种。最为便。则一统志出版之后。每期出小种较易配布。若此以小种配成十册。则后来较难着手矣。一九三四年一月三十一日。

【46】昨示谨悉。照出长安志六页请打样。并弟开去原单。乞掷下为荷。兹送去抄本南唐书六册。拟与照成一种同出。乞遇便即发照。(潘书为最要。此可次之。)照毕后接照元朝秘史。(涵芬楼藏。)此书卷帙稍多。可早出。又傅沅叔来借。弟恐借去后不知何日寄还。故先照。多打毛样一分寄去。原书即不必寄去矣。一九三四年二月二日。

【47】示悉。周书照完。赶照魏书。魏书完。再照南唐书、元秘史。魏书随照随打样。亟待制版也。

张乖崖集毛样一册送还。胡君以保存清样归还。馆中省事许多。将来出书之日应酌酬。一九三四年二月二日。

【48】昨赴苏州。天寒夜行。未审起居何如。甚以为念。前夕奉示。论照书次第稍有误会。弟请先照魏书。乃对南唐书、元秘史而言。至潘氏书。则仍须赶照。连周书在内。缘责任甚重。早了一日。早安心一日也。即南唐书元秘史二种。现在亦拟改动。即先照元秘史。后照南唐。但日后或可借到潘明训君一书。页数无多。则恐更须提在苏州潘氏书前矣。昨借照何书。乞电示。一九三四年二月五日。

【49】津馆来信。陶兰泉兄代抄。约十日后可寄到。已印书片。望从速整理。一俟补齐。便可出书。分本尚未定。且系花缺。能否先将一部分切订印书根。乞酌之。一九三四年二月六日。

【50】一统志里封面后匡格。昨复去拟写“据清史馆藏进呈官本。”兹将官字改作写字。祈察照为荷。再昨谈三月丛刊续编每期可否减少本数。鄙见如一统志预登广告。见报后可以少减。未见前不宜。一九三四年二月十一日。

【51】潘氏书拟再加宋刻周髀算经。宋刻孙子。张邱建九章算经。(在原目算两种。不知博山肯允否。)如快信尚未发。(已发则后日面谈。)请将以上两种加入待看。又拟借者为文苑英华纂要、名臣碑传、琬琰集。(是书明刻甚佳。往往前人误认为宋本。不无疑虑。吾兄如不能断定。可否乞先借一册携来。阅看再决。)算经如确系宋刻。不难印。亦即借回。至王荆公百家诗选。所缺过半。拟不用。文潞公集留在最后做伸缩。诸儒鸣道集同。云仙散录补钞一页。字太大似不称。字迹亦不类。如未印。乞暂缓。将云仙散录毛样交下比对再定。一九三四年二月十五日。

【52】示悉。韦斋集二册。校补自应用校记。石屏集缺叶前函询傅沅叔兄。无回信。只可用抄补叶。云仙杂记应与云溪友议(有校记。原本送去。后有两行应补照。照毕即发还。两行文如下。“康熙甲戌中秋。冯本校一过。”)同日报出。存复斋集可撤出。跋文校记撰成不少。制版厂因小学生文库要紧暂阁。云过二十二日即可照排矣。一九三四年二月十九日。

【53】送还石屏集毛样四册。广告已撰送推广科。(共十通。今晨送去。)三月中唯韦斋集及两南唐书未撰。韦斋集乞先发下。南唐书已送姜佐翁否。即乞一催。马令南唐书(跋已印。恐须另撰。缓装。)已制几版。如有可疑之字。请原校人摘录于印就之校记

格纸上。(附去一纸。请向任心白兄索取。)备作校记之用。(韵补亦然。以后各书均依此办理。)再各书毛样。敝处拟各存一部。以备检查。省得常常向尊处索回。尊处如有不便。送还亦可。候示遵。四月份应出之书乞早开示。 一九三四年二月二十日。

【54】 送还宋刻诸儒鸣道集三册。又丛刊续编毛样二十三册。均已分定本数。请分别难易配搭制版。云溪友议跋已排好。可印。校记已催。尚未来。陆游南唐书取汲古本。速托佐禹兄一校。张子、龟山语录跋已签字。校记正发排。括异志跋亦已发排。余均未就。焦急之至。戴石屏集应否撰跋。已忘记。请将毛样再发下。

今日十一钟前后能至总管理处一谈否。即商馆外校阅事。
一九三四年二月二十三日。

【55】 昨得施敬康兄信。一统志欠叶已借回津馆赶抄。逐日寄来。请即移驾至敝寓。商定出书日期。以便登报。 一九三四年三月三日。

【56】 示悉。一统志出书既经登报。鄙意本月出书不妨减少。拟改如下。

十一日出张子龟山两语录。 许白云文集。(四本。)

十八日出梦溪笔谈。(四本。)

二十五日出韦斋集。(三本。)

其余均可不出。

再一统志拟印传单。乞选动目样张三四页。送交张叔良君。津馆昨寄到抄补四页。附上。乞速发抄。 一九三四年三月五日。

【57】 周书毛样前交来一部。想同时必打存两部。余一分。乞交下。潘氏麟溪集决借影。金陀粹编续编本馆有一部。已请任心翁提出送去。请带去比较。如果印刷胜于本馆。可以借来。否

则作罢。此外尚有何书可借。弟不复记忆。祈再示下。 一九三四年三月二十八日。

【58】再如马氏陆氏南唐书工友每日可做若干版。乞查明见示。能电告尤感。

七经小传跋已撰就付排。但尚有藤花榭刊本拟觅校。跋文尚须缓印。故下月拟不出书。交来通志堂本一册附还。此系翻刻。检查尚可。若据作校记。恐原本不误。徒据翻本。未免贻笑大方。乞告胡君。 一九三四年三月三十日。

【59】示悉。晋书样张一页收到。甚好。甚好。以后即可照此着手。惟不知当时曾否用朱笔批描某字应修。抑或由工友自行着手。祈再示。马氏南唐书为涵芬楼旧藏。潘氏书拟续借程雪楼集、潜溪集、宋刻算经。程集、潜溪集必须极清朗方合用。应与金陀粹编续编择其较清朗者用之同。如均不佳。即少一二种亦不妨。拟于此次作为结束。又周书纪第一页系抄补。不能用。有三朝本可补。今送上。乞改照。 一九三四年三月三十一日。

【60】今送上晋书一册。附制版须知。乞察入。其中缝书名一节。应否如此办理。请酌。以下各册。第不能照此册描修。只能将应改之字。或于不全之字。偶然修补。应请尊处派人担任。即以此册为标准。再衲史石印之书。今年恐不少。以后即陆续发去。尊处请将可做此事之工友。预为指定。

晋书纪传制版须知。

一。原书笔画甚细。修时切勿加粗。

二。凡应改之字。均用朱笔写明。应照改。

三。凡应修之字。均用朱笔描润加△为记。应照修。

四。凡有墨污损及各字笔画者。亦加△为记。应仔细照修。

五。上下栏中段如有断缺或污损者。应修好。

六。书中有墨晕污点。均应修净。

七。每卷首尾两页中缝不记书名。应将本卷他页移补。

请照打多分。交下两分。第七条请决定后即照打。 一九三四年三月三十一日。

【61】 内子久病。日见危迫。前尊处交来各种毛样及已校过者。竟无暇过目。恐久搁遗失。谨先送还。乞察入。其中乐善录及读四书丛说二种。似可付印。乞酌。 一九三四年四月四日。

【62】 晋书样张十二页收到。校对似可从宽。今阅过送还。

胡庄二君朱校毛样(晋书)第二册。容阅过。即送还。

晋书目末一叶。请缓发制。载记如何加入。容酌定再补入。

载记似不甚龌龊。传真亦可。须细看再定。

通历已由姜君校过。尚须斟酌。可缓发制板。

诗集传毛样因有抄配。尚须补照宋本。今送还。办法另详。

发唐律疏义毛样与董君。何如。先送一部分已足。不必全部。

左传类编原本当向瞿氏商借。由弟发函。

切韵指掌图。墨海金壶与十万卷楼两本。似有异同。瞿氏尚有一抄元本。拟一并借来一校。

七经小传书名。可用。

送去重广会史。请发照。照毕续照周易要义。礼记要义。皆涵芬楼宋本。

山东来书隶释一种。试照连眉批(将本书稍缩短些。)一二张交下一阅。其余各书。均可即照。

潘氏书毛样均未见。请打出交阅。 一九三四年四月五日。

【63】 发印周书应有制版须知。谨补呈草稿一纸。乞多打数分备用。发下二分。

潘氏书记得似只有宋刻算学书数种。此外均已全用。是否。乞核示。

周书制版须知。

一。是书断版甚多。盖有断版勿拼戳者。切勿将原断之字连拢。或有因字形太劣。或断痕太宽。批明应剪开拼修字样者。修正之后。仍留断痕。

二。有断痕之字往往有上下两半。字体绝然不同者。应各依其字体按原来部位分别修好。但有字形太劣者。应加改正。但仍不可失去原来字体。

三。断板歪斜致上下字不对榫者。均应移正。

四。盖有“断板剪开。拼准修好。”戳者。方可将断痕剪开。对准拼好连拢。

五。行线成颗粒形者。应修好使成线状。有太粗者。应稍修细。其余断缺。均不必修。

六。凡△出之字间有未加朱笔描正或描而未全者。务须相度形势。将应修之笔。逐一修好。

七。笔墨较淡之字△出应修者。仍应参照四围墨色程度。期其相称。不可过浓。 一九三四年四月十七日。

【64】 示悉。五月分拟出丛刊续编之书。可如来单所定施行。 一九三四年四月二十四日。

【65】 姜佐禹兄送来武经七书。又清明集各一种。均已校过。弟欲复看而实无暇。搁此已二三星期矣。今送还。乞查收。周氏清明集闻尚存。已请总管理处商借。借到即照。照出即送姜君校阅。 一九三四年四月三十日。

【66】 明后二日公司放假。如有校样。务请今日尽数发下为荷。 一九三四年五月四日。

【67】 山东来之隶释等。河南来之伊雒渊源录已否照出对核完毕。如尚未。应请速办。对外信用有关也。 一九三四年五月二十六日。

【68】 兹送去郑师山集两本。上册较损破。有二三页中缝边字字已磨损。乞属修书人细心修补。应计工资开示照缴。此书为弟所有。极不易得。将俟修补后看能否照相。拟印入丛刊也。
一九三四年五月二十八日。

【69】 瞿氏书四种。均借到。计十册。今送上。乞查收。速校速还。刘子新论样张五页。亦附上。瞿氏原信阅过。即发还。又北山小集阙字两页。乞检出掷下。瞿氏送来节本一册。或可觅补也。
一九三四年五月二十九日。

【70】 切韵指掌图拟不撰后跋。即录瞿氏书目本书提要一则(有两部。所要录者为影抄宋本。)为代。款式如下。

低一格写。不排印。写毕后。下一行低二格写“右录铁琴铜剑楼藏书目录一则。”

尽言集后跋已撰。明日发排。 一九三四年六月十一日。

【71】 约半个月后。弟或将有庐山之行。丛刊续编七八九三个月之书。不能不提早预备。二皇甫集尚须借明刻本一种再校。真经三种中有二种极为纠葛。须极费脑力。方能解决。支道林集页数太少。须觅他书配订。故须赶紧另行预备。鄙见每次至多不过三四册。以一种为限。务祈从速拟定开示。麟台故事。寇忠愍诗集。三山郑菊山清隽集。法书考。均可列入。缘跋稿现成。且三种已经校过也。
一九三四年六月二十一日。

【72】 校书事本极难。丛刊续编校记跋文。时于印成后发见讹脱。此甚不妥。鄙人精力日衰。实有不逮。已告制版厂多派一人复校。请尊处知照承印股印刷工场。于收到印版之后。勿遽付印。先将清样送尊处复阅一过。兹将最近底稿四种送上备用。用毕仍乞发还。
一九三四年六月二十八日。

【73】 示悉。各书收到。阅过送还。法书考有数字不全。疑系原书如此。不必动。惟蛀损之字。能补最好。即告公司访购曹

棟亭刊本（外间似有石印本十二种。不能拆买。）对校。如再校不出。只可作罢。急就篇亦看过。均已分别批注。罪惟录拟十月。迟则十一月出书。如何编次。乞与何柏丞先生接洽。棠阴比事急就篇跋原稿均交还制版厂。乞催取。 一九三四年七月 日。

【74】 急就篇有三本。均由尊处取用。故送还。又昨日面交毛样数种。均已看过。或在卷面。或在书内眉端批明。兹亦送还。望交校员详阅。后跋校记如图画见闻志等四种昨晚仍未交来。请代催。今日必须送到。又吴骚合编应撰后跋。最好请吴瞿安君执笔。应即制版。制成后将清样一分装订。送与吴君。去信略云前书奉还之后。友人刘君交来一部。印本尚好。已印成。奉呈一部。乞撰后跋云云。即由我兄具名去信。看其如何答复。再丛刊续编续借各书在前售预约目录外者。共有若干种。应将卷数。版本。何人批校。开一清单交下。以便登报。 一九三四年七月四日。

【75】 昨示夷白斋集（陶氏借来。）仅有十二卷。乃系最初刊本。然则恐不能用。如未照。请将陶氏书及已照毛样发下一阅。再行决定。 一九三四年七月六日。

【76】 夷白斋两部编次不同。瞿本为原编本。陶本为后来辑补本。（卷末有张习跋。）自以瞿本为佳。陶本不必照。但两本编次互异之处。应派人摘录。备撰后跋用。如有陶本有而瞿本无者。应抽照。将来如何用法。再定。瞿本似已校过。最好再请人一校。勿携出外。张习刊本难得。失去机会。殊可惜也。 一九三四年七月六日。

【77】 昨示敬悉。先天集缺字无可补。只可照印。惟寇忠愍公集。以宜秋馆刊本一校。此书大有斟酌。只可从缓。俟弟回沪。再行酌办。原毛样及宜秋馆本。一并送还。乞察收。除去此种。尚有十二种。每星期一种。可至九月底。罪惟录最好于十月

中出书。又读书分年日程。已向董东苏君借到。陆清献公刊本一册。今送上。乞并收。校毕后即用公司名义去信。云张某前借此书。已用毕缴还云云。用回单簿送去。 一九三四年七月八日。

【78】 得九月一日手书。谨诵悉。奉答如下。

一。琬琰集杭本模胡者。改用瞿本清楚之叶。甚是甚是。但不知多否。两本是否同刻。殊难以一二页评断。浙本勉强可用者。仍用浙本。办法亦妥。

二。郑菊山清雋集应列入乙等。前日函致总管理处。请印梅花喜神谱。(弟不须撰跋。)亦于十月出书。可作甲等。

三。瞿氏所藏宋太宗实录。卷数不同。自应借照补入。赁金照送。

四。郑守愚集用席刻百家及全唐诗作校记。甚好。胡君校毕及跋。可勿寄下。拟归沪再读。

五。校件第十一十二次。今日由快件寄去。魏书三四批。石印八十五页。传真三百八十一页。托昭辰先生带回。

过十五日后。校件勿寄。弟拟下山也。 一九三四年九月六日。晨起灯下。

【79】 前日奉示祇悉。各书收到。雪窦摩补两半叶极佳。未知何人手笔。又胡君后跋亦阅过。稍有疑问。注原稿上。先并原书及题签书根印法一纸送还。乞察入。余书俟阅过再复。丛刊续编。此三月中恐大忙。应预行布置。已照存诸书今年可以赶出者。请开示一单。以便配搭。

外呈金石录龟溪集各一部。乞发照。 一九三四年十月六日。

【80】 唐大诏令已略翻一过。觉原校颇细。书旁加○□|等符号。必有体例。所校讹文脱字与张刻本亦不尽合。应觅顾氏思适斋文集一看。此书恐今年赶印不及。如唐诏令不出。则宋诏

令亦不宜单出。若抽出此两书。则尚缺书四十册。春秋正义(亦有十余本。)容即检寻。此外敝处尚有彭茗斋集。(原目补目均未列。然无碍。且易照易校。)系钞本。甚精。约可订成二三十册也。瞿凤兄交来辍耕录毛样三册。又陶刻十册。今送去。属从速送还。 一九三四年十月十八日。

【81】 汉上易传跋撰上。乞发排。姜佐翁稿中有天禄琳琅云云。遍查是书不见。乞转询见于某卷某页。以便引证。最好月底与孔氏祖庭广记同出。乞设法。又雪窦四集广告已撰送推广科矣。 一九三四年十月十八日。

【82】 再瞿世兄虽甚热心。然鄙意不宜为无厌之求。即如辍耕录陶刻。可托平馆访购。即不能得。径函陶君。终可觅到。此后非不得已。鄙意不必屡向瞿氏借书并托代校。 一九三四年十月十八日。

【83】 示悉。魏书毛样四册。晋书三批。又毛样两册。均收。其他奉答如下。嵩山集十一月十一日来不及。可否出仪礼疏。此数期中非尽赶不可。如并在末一二期。甚不好看。能否将做衲史传真一部分工友移做丛刊续编。两书均于年底结束。衲史趸出。续编可提前也。友林乙稿昨细看。恐系翻刻本。(姑俟中国书店访得复本比对再定。)已送瞿氏。请其校补缺字。

彭茗斋集昨日配搭本数。因原有分定。起讫厚薄。不能平均。大约不过二十四五册而已。

唐律疏义。似尚不难。困学纪闻可加入。

易礼两要义已交校史处做传真。即日动手。一月完成。

一九三四年十月三十一日。

【84】 龟溪集校记由承印股送来。首末页纸独黄。殊不合。木已成舟。请转示主者。以后不可如此草率。又礼记周易要义。校史处允本月赶完。但恐难践言。请移后。茗斋集能提前最好。

因本数较多也。清本龙龕手鑑不可依据。宋本亦缺者。只可仍之。金石录借到善本拟一校。亦须移后。春秋正义已照出否。

一九三四年十一月九日。

【85】 示悉。嵩山集跋语补文甚妥。尚须修改一字。即请付印。容斋后跋所指删削各节。依据何本。乞询示。各件容星期二日缴上。拟借瞿氏各序。请即由尊处直接去信。或明日移驾往商。 一九三四年十一月十日。

【86】 礼部韵略跋已撰就。径送制版厂。请再催。今日必须送初样。瞿世兄送到活字本容斋五笔。凡三本。今送上。其随笔序仍缺。查北平图书馆有宋刻元印本。又明弘治刻本即翻宋本。又明刻本。均有随笔续笔。请飞函孙伯恒君。托其借照两序。从速寄下。至活字本之续笔序。不妨姑行照存。如北平能照到较佳。则弃之可也。 一九三四年十一月十三日。

【87】 示悉。剧谈录阅过缴还。易礼两要义后跋须金石录校毕后(明后日可毕)方能复看再送去。茗斋集照葛氏本甚纷纭。明诗照毕可即速照。须拼配也。又杂著两本有讹字。弟亦须复阅。亦盼先照。 一九三四年十一月十四日。

【88】 送还金石录毛样三册。如何修法。已在眉端注明。商量语五条已分别答复。统祈察核。另呈校记一册。乞派人就毛样比对卷叶行次。如有错误。即予改正。即发排。跋文已撰。并径付制版厂矣。 一九三四年十一月十七日。

【89】 北平补照魏书五叶已到。请即落存板。各打毛样两份交下。又晋书载记补缺一纸。亦已查过。兹附上。可即发抄。可照江南图书馆照来样子。写出再缩。太小不易写。又金石录中有吕氏避家讳字。已在清样第一页上注明。请属制版工友注意。

魏书清样两本。有改动处已注明在卷面。请查照。 一九三四年十一月十九日。

【90】李拔翁交来孙伯恒兄回信。知容斋五笔。洪氏前二集序。北平图书馆亦佚。瞿氏弘治活字本不知照全否。如完全。请即速印。能于二十五日出版最佳。总之。最后两期。每期约以十册为度。不宜过多。祈注意。 一九三四年十一月二十二日。

【91】易礼二书应于十六日出书。竟尔忘却。顷于枕上忆及。亟披衣而起。先将礼记要义跋及校记发排。已径送制版厂。又茗斋集出书不过半月。两日内无校件。乞督促。

诗词补遗已校过。送上。请制版。尚有诗词各一叶。已托方君雪江代写。中缺两首应补照。葛本附上。已夹签。 一九三四年十二月八日。晨起灯下。

【92】春秋正义跋顷已送制版厂发排。并托以长条一分送尊处帮校。一分径送敝处。弟近日事太烦。恐有校不到之处。故以奉托。又毛样三页校上。

北齐书跋已拼版。尚有改动。想明日必可付印。共六页须交印刷厂印。魏书跋。今日恐尚不能发全。 一九三四年十二月二十六日。

【93】日本照来史记毛样。敝处遍寻不著。去岁丧妻。家中不无纷乱。或被家人误移储藏什物房中。则大费周折。恐非一二日所能检得。来示称去年弟曾有信。是否指明日本照本。抑泛言史记。涵芬楼本昨又检得一分。恐即指此也。日本来片。昨示不免走样。至何地步。请晒示一二张为盼。日本印本春秋正义。乞送东方图书馆。说明系敝处赠送。 一九三五年一月四日。

【94】示悉。一统志表拟示行款甚合。鄙意新疆可与各藩并为一卷。缘彼时并未分省。且建设行省之后。编次亦不同原书。再印。纸可用江南毛边。定价五元五角未免太贵。鄙意只好定四元。能贱更佳。即商总管理处为荷。 一九三五年一月十日。

【95】名臣碑传琬琰集得傅沅翁回信。云书已售去。此时只

可向冯氏借补矣。

隶释卷十六原缺第五页。如有毛样副本。乞将第四第六两页抽出发下。拟寄平馆。托向北平图书馆补照。如无副叶。则不必专诚打样。 一九三五年一月十七日。

【96】 今送去隶释毛样七册。卷面附注制版要点数则。乞抄出一分交下并注意。此书可即制版。本书有刘氏跋。应打样。请其重写。(因初稿竟不知傅山为何人。令人轻视。)又校记跋文可先排长条。魏书重修是否均已完毕。南北史新旧唐书毛样。均望从速整理交下。 一九三五年一月二十四日。

【97】 再续古逸丛书拟出若干种如下。

公羊单疏(经) 水经注 清明集 (以上史) 武经七书 乐善录 搜神秘览(以上子) 乖崖集 竹友集(似无大本) (以上集)

已足八种。请即查明册数页数开送出版科为荷。 一九三五年二月三日。

【98】 兹送去郡国利病书毛样八册。抄目二册。(全书已完)又旧抄本四册。应补照五十余页。均分别签出。又活字本三册。备照成后与抄本对校。惟两本讹字均甚多。如有疑义。当再考订。统乞查收。又稿本本朝国朝皇明等字。往往被后人改作明朝或前明等字。遇见均须还元。弟前此未克留意。顷已电达。兹再声明。 一九三五年二月二十四日。

【99】 兹送去唐子西集毛样三本。又校记两本。乞查收。可即制版。此书已借到傅氏校本。弟又重校一过。瞿氏校记所采无多。已逐一标明。请属插入总校记内。毛样封面有关涉制版方法析录出交下。原稿即交校员。万勿弃去。末次校定。连毛样送鄙处一复。 一九三五年二月二十七日。

【100】 示悉。丛刊续编本年拟改名三编。整部续编印一千二百。另印单行甲、三百。乙、二百。鄙意今年续出销数未必如前。印

一千部已足。此书是否零售。拟请与总管理处商定。如须零售。鄙意亦不必加印。如售完。再版亦不迟。 一九三五年五月二十三日。

【101】 龟巢稿已向瞿氏借到。瞿君凤起先代校。昨将书送来。知两书编次不同。并附到对照表。今呈上。据云傅本似略多。惟题目有漏去者。但亦未指出。弟略翻一过。傅本缺文有可补者。讹字则瞿本颇多校正。应请胡君再校一过。至来示所称缺三页。甲卷四第十八页。乙卷十六第三十三页。丙卷十八第十二页。弟已查过。瞿本均接连。傅本系叶号之误。乙丙毫无疑义。甲难证实。然文理可以接连。亦似不差。兹将两书送上。乞察入。校毕仍发下复看。

胡君校例一页附上。将来复校瞿本毕。仍请同时发还。
一九三五年六月三日。

【102】 四部丛刊三编亟须预备。兹将续编未出各书检查一过。分别记明。(已出版者。抽去不印者均于原底上各加记号。)又新增书目计有两次。一并送呈。请复核。(其中有未记页数者。尊处可查即记入。其在金城库中者。可请任心白君提出一查。并核定制版之难易。)其中有已经制版者若干种。请逐一批注。以便提前出版。又书名上记有即出者。约须有五十册。即于发售之日。备主顾一面付钱。一面取书。总管理处意。明年六月底为本届书出全之期。以后每三个月(即本年十二月。明年三、六月。)出一百五十册。鄙意在此期内可以出版者。约须选定五百数十册。列为本届拟出之书。(即如续编之第一期书。)余均列入下届。此中固可伸缩。但亦不宜相差太甚。故此时不能不预为妥定。再本届大部书计有太平御览。(叶数未详。恐须有百三四十册。)郡国利病书。(约须有四五十册。)本届种数约须与续编相等。庶不难看。又明史抄略可即制版。所有原来点句。必须删去。(因点句之人太不通。十

错五六。大为阅者之障碍。)请速告潘博翁。并告以章炳麟君。跋中有此一语。亦拟节去。 一九三五年七月十三日。

【103】 示悉。云斋广录既翻照不宜。则即以此照片借与赵君万里。请即送交任君心白先行收存。俟赵君到馆面交。丛刊三编展迟出版。容商定再复。 一九三五年七月二十日。

【104】 丛刊三编目已编就。今呈阅。鄙意仍拟早出。如九月一日赶不及。则改于九月半发售预约。选定书十种。内已印者三种。已制版者五种。未制版者明史抄略。(跋文午后送上。)五代史补。(原底乞发下一阅。)页数有限。制版均不难。未有后跋凡六种。请将毛样或印成清样检齐交下一阅。又下届应出之书凡一百十六种。须编排续编七十五种。须撰提要。同时付印汇订成册。此则颇费手续耳。 一九三五年七月二十二日。

【105】 昨示悉。全唐文可补。徐钧矶集赋八首。阮氏本必从此出。可无疑义。今日仍请托人前往。与全唐文一对。所有阙文。务宜注意。原书一册及钧矶文集两本。均已送交任心白兄暂存。去人径向伊处领取可也。原撰后跋又有改动。今附上。诗本义跋亦撰就。请察收一并发排。先以长条送校为荷。 一九三五年九月二十三日。

【106】 钧矶文集校宛委别藏本异同字有可不必用者。即不必列入校记内。又诗集亦用全唐诗一校。昨已告胡君。并望速办。写出校记。望发下一阅。原书二册送还。衲史除元史外。今年拟出者。隋书。南北史。新旧唐书。约共一万二千页。新旧唐书均不易。望从速筹备估计见示。

又呈上唐言统签二册。(此系弟自有之书)中有徐寅诗。亦可一校。 一九三五年九月二十七日。

【107】 昨商总管理处。拟于丛刊三编预约书目内附印样张三种。复称已达尊处。望即选定交下一阅。速行制版。郡国利病

书能觅得与刊本稍异者最佳。如照相时未曾注意及此。则此时临渴掘井。可以不必。只选顾氏手笔可耳。罪惟录亦选查氏亲笔。

天下郡国利病书(附注样张右阑外)

“是本与坊间通行本甚有异同。此为亭林先生手写之叶。”

罪惟录(附注样张右阑外)

“此书与庄氏史案有关。从未刊行。此为东山先生手写之叶。” 一九三五年九月二十八日。

【108】 钧硃集已否钐校完毕。全唐诗、唐音统签如有佚诗可补者。亦乞开明卷帙见示。是书仍急速进行。密庵集跋已电索。属飞寄。到后方可取彼舍此也。太平御览尚须查校明本。亦已函托北平分馆代查。想三四日必有复音。再作说明。印入样张。想来得及。姜佐翁现校何书。所有三编各书封面可全数开出。乞其先写。 一九三五年九月三十日。

【109】 宋本样张

“是书以嘉庆鲍氏刊本最为通行。阙去此叶即以下叶改为第四叶。并改首行又曰二字为搜神记曰。以泯其迹。其他由鲍本出者。皆沿其误。即明代周堂活字本黄正色刊本。此叶亦阙。但未改又曰二字为搜神记曰耳。”

右稿用红色墨印在太平御览卷八八六第四页样张书眉之上。首行用宋本样张四字。隔开一行再印是书以嘉庆鲍氏至搜神记曰耳一段。印出后以样张一页见示。如无改动。再行付印。 一九三五年十月五日。

【110】 再细思御览所缺目录四卷。其中分部门类见于各卷。可以套用。但自日本照来之本有两种版本。前缺目录四卷。必须选与第五卷以下同样者套用。此为蜀本。(另有一版。字体稍异。不知为何本也。)不知有无障碍。又卷二十一缺去全卷。则部目无从摹套。此则须从他卷零碎选取同样之字。未免为难耳。又经史

图书纲目。日人所抄。断不能用。鄙意所有书名必分见于各卷。亦可由各卷抽出套用。只须觅一稍有理路之人。便可办理。以上所言。如不能十分明了。请移驾面谈为盼。 一九三五年十月十一日。

【111】丛刊三编样本预备续出之书。内有友林乙稿。注宋嘉定刊本。应请加注明复二字。即前照苏州潘氏本。仍可用也。 一九三五年十月十三日。

【112】再鄙人近日病目。正在用药。旧唐书字太小。目力不及。所有校样请仍送蒋仲蕓先生为荷。 一九三五年十月十四日。

【113】御览序跋照片八页。阅过缴上。乞检付印成样张一分并进书小引交下。拟寄北平。以便补照时查对。免至重复。各卷缺页。务望派人速写。即照相落板打样。庶可早日寄与平馆。又丛刊三编第二期书配就后即见示。如无后跋。尚须预备。 一九三五年十月十五日。

【114】兹发印南史传真第一批。计一百十八页。乞察入。制版规则与北史同。惟第三条上下各有中线。切勿漏去十字。改为“原书中缝上下偶有短线。应一律删去。惟补配之页有极阔之中缝。所谓阔黑口。仍应存留。”祈打出(只打出此一条。余只云与北史同)知照工友并发下两分为荷。 一九三五年十月二十三日。

【115】示悉。李君补写御览一页看过。合用。但格纸过小。行数甚密。过于束缚。殊欠生动。鄙见应将格子放大。落笔较为自如。所用之纸。亦不合宜。应用何纸。可问李君。宜选最为适用之品。不宜省钱也。元史称洪武刊本。可一律。 一九三五年十一月二日。

【116】隋书制版规则。

一。是书版刻不一。中缝最为纷歧。有竟不题书名者。现已

补注。如间有遗漏。应请查照前后同一版刻者。仿照补入。

二。中缝行款不一。只可仍其原式。但纪志传等字必须列入。如间有遗漏。应请查前后同一版刻者。仿照补入。

三。中缝上下短线。一较宽者。原有。一较窄者。原无。其原有者有时被填粉人误填。已用朱笔还原。但恐仍有遗漏。应随时注意。

四。是书印本较差。行线有颗粒形者甚多。应酌量修好。并非全修。万勿误会。但中缝左右两行如全脱者。应酌量修补。

五。断痕匡线。均照各书通例办理。

请打印多分。发下二分。 一九三五年十一月八日。

【117】东洋活字印本太平御览已由北平寄到六册。所缺二十六卷均在内。望即付照。将来制版如补行线。似较悦目。请试制一页。交下看过再决。并取鲍本一对。所有不同之字即用校勘记格纸抄出。又活字本板心刻工姓名是否均与宋本所有相同。统乞派人查阅。其余想不久亦可递到。所缺零叶。亦须一校。一九三五年十一月十二日。

【118】北平又寄到明抄本御览五册。兹送去。请即与金泽文库一校。(先校此本。后校鲍本。)千万注意。勿损勿失。 一九三五年十一月十四日。

【119】近患目疾。业已月余。专恃眼药救济。近日更甚。只得照本年一月通告。只出元史。隋书。南北史四种。昨已通知总管理处。尊处送来旧唐书七批。今日复看两批。十分勉强。无法进行。所有旧唐书在工友手中制版者。以该批制成为止。亦不必送校。其余亦一律停发。均候明年再做。现在请赶做南史。隋书。愈速愈妙。 一九三五年十一月十九日。

【120】御览活字本从蜀本出。本馆景印本有若干卷与蜀本不同。请将此若干卷之刻工姓名与活字本一对。如不同者。此景

印若干别本之姓名。请派人抄出见示。又鲍本有无刻工姓名。并祈查示。 一九三五年十一月二十二日。

【121】册府元龟照到卷数。乞查明开示。如已打出毛样。乞发下一分。若未打出。乞便中即依次打样两份。现在须早为预备。借补抄本。亦甚不易也。 一九三六年一月十日。

【122】昨送来唐律疏义等。已收到。兹所欲问者。

一。已印之一百五十页是否印板尚存。抑已毁去。印成片子是否尚存。

二。钞补之廿一页是否潘本原缺。抑系漏照。（此层甚关紧要。如记不真。应将所缺页数函询潘君博山。）

再已印各页分订。检查甚不便。兹送还。请派人将此一百五十页于左上角加盖已印二红字。仍散入各卷。依次钉好发还。方能检阅。 一九三六年一月十一日。

【123】辍耕录可即付印。（第一册五十六页嫌薄。加半衬十数页）陶兰泉刊本尊处前从何处借来参校。如为公司所有。乞转属送来。以便参看撰跋。又丛刊三编第三期出书拟用若干种。乞开清单。当择定着手预备。

傅沅叔先生尚有书几种。乞另开一单。当函请撰跋。 一九三六年一月十一日。

【124】居易堂集缺叶抄补一纸已阅过。可请托人照样誊正。字体能摹仿原书最好。缮成后先打样数页。（已函询舍亲平湖葛氏有无此书。）一寄北平。托孙先生就北平书肆访借。如能觅。即就近。如不能得。再取抄叶补照。再刘伯峰君原跋可抽出。另制一页。附印卷末。

集外文数页已看过。重行编定。并送瞿君转交原辑人复阅再排印。 一九三六年一月二十一日。

【125】北平图书馆近又检出初印元史若干页。孙君伯恒借

到照出二十页。想不日必可递到。兹抄来清单一纸送上。该照片寄到后即祈就单一对。所照为某卷某页。加○为记。原单发还。照到各页即翻铅皮版保存。(打样两分交下。)于版上旁注备再版用未曾修过字样。又于已印过之同卷页铅皮上。能加注再版另换字样。以资识别否。 一九三六年一月二十一日。

【126】白沙子毛样八册。又乾隆本三册送还。乞察入。制版略例计七条。已写在毛样首册封面。乞派人录出二分。一发下。一交制版部。又校勘记一页。请胡先生代复一过。如有遗漏。即补入。有讹。即更正。此稿阅过发还。尊处应否录存备查。乞酌。又夷白斋明刻毛样。似尚清楚。制版不甚难。兹先发还。又抄目一页。请即查照抄目并封面所注各节。抽出先行制版。其抄本尚未复看完毕。容再送上。窃有问者。抄本校在下栏之字是否全从张习刊本出。(胡君跋稿有此语)乞查明见示。颇欲一律移入校记。似较整齐。乞与胡文楷兄一商示复。再旧五代史昨已与总管理处商定。可以付印。

弟今日赴苏州。晚间方归。并闻。 一九三六年一月二十六日。

【127】昨示谨悉。东西汉会要不在本年应出书内。可从缓。律十二卷似即唐律疏义中之律文。(恐不能用。)兹送还。请派人与岱南阁本一对。(音义亦与岱南本及宋本一对。)如何之处。即示下为荷。夷白斋侯阅毕再送还。 一九三六年一月二十八日。

【128】昨示祇悉。律十二卷既重出。断不必印。音义七页可附入唐律疏义后。缘此尚从宋本出也。元秘史清样亦阅过。天地栏尚可稍宽。校修之字过严。拟请从宽。弟均已在字旁加○为记。乞转告庄胡二君为荷。 一九三六年一月二十九日。

【129】昨示祇悉。各书均阅过。分别在原书封面或来单作答。兹送还。乞察入。江南图书馆即请总管理处函宁馆往查。并

将应查各卷页打样附去。同时再打黄四如集、华阳集应查各页。分别装订交下。当函询傅沅翁。华阳集所有缺页。均请列入。瞿氏本暂缓补钞。俟傅氏回信如何再说。四如集傅氏确有之。华阳集则殊恍惚也。

台从中午枉临。弟如外出未返。乞稍待。 一九三六年二月一日。

【130】梨园按试乐府新声有不甚明了之处。弟已就校记附管见。其不甚明确者。均入校记。如此解决。可不求人矣。一九三六年二月三日。

【131】昨来黄四如集、华阳集抽出查缺毛样两份。已收到。现应请傅沅翁撰跋之书共有若干种。请开一单。以便函托。姜佐兄母病如何。已痊愈否。佐翁曾见否。 一九三六年二月五日。

【132】书板上下左右。俱宜宽展。否则蹙紧眉头。令人一见烦恼。此于人生。甚有关系。不仅系于书之格式也。望诸公注意。 一九三六年二月十七日。

【133】送去利病书毛样五册。抄目一册。乞察收。原编叶次昨又发见错简一处。（在浙江省内。）务祈转属庄吕尘兄。排版时必须将每页接榫处文理一对。设有错误。已后便无可著手矣。又昨送去顾氏手稿放大样一页。已收到否。甚念。姜佐禹兄来信云母病已愈。可以到厂办事。望与接洽。 一九三六年二月十九日。

【134】郡国利病书中由字多作由。此系避明末二帝之讳。乞告工友注意。 一九三六年二月 日。

【135】昨日午后右目酸痛流泪。即往访医。医嘱勿看书。以是停辍。利病书仅差四本未能重编次序。只可稍缓。前查存版东坡集。计有三种。（二种不记行款）兹将旧存报告单送上。（阅后发还）乞详查补打。 一九三六年二月二十二日。

【136】今送上抄本新唐书纠缪二册。上册第二十二页。下册第四十七页。请抽出缩照六开本。先请打样送阅。将来即印订在明本之后。又傅跋及鄙跋各一首。乞发排。傅跋如石印较便。即附照可也。但须先将二字改好。并用粉涂去朱点。乞酌行。一九三六年二月二十五日。

【137】昨示祇悉。丁氏刻参寥子集从明本出。黄尧圃所欲校而未成者。昨单（胡先生示询各节。）送还。原书二册亦附去。拟请派人对校一过。有不同之处。另抄记并乞从速。白沙子跋稿一篇呈上。乞发排。先排长条送校。通玄真经写补颇费事。今明有暇乞枉临一谈。（今已批注。先行送去。）鄙意原抄仍可用。或割裱。或用米糊胶纸剪排。惟增补之字。如何办法。尚祈裁酌。

一九三六年三月五日。

【138】昨知广东、西改分四册。编印例言须有改动。乞将排样二页全数发还。元朝秘史想已制版完毕。乞将清样发下。又叶氏刊本亦乞交来。以便撰跋。昨交来胡先生拟龟巢稿跋。稿中有阙文。已据瞿氏本补入。如何情形。弟已忘却。是否大片或一二字一律补足。祈查示。又原稿每卷首页。是否均不载著者姓氏。胡君跋稿入手注明著者姓名、别号。此必每卷首页无著者姓名方合。否则不宜。一九三六年三月七日。

【139】丛刊三编三期将齐。合并计算才得三十五六种。第四期书请即查选。须多用小种。除蔡端明文集外。均须用本编目内之书。中庸说、孟子传、宋太宗实录均可列入也。查选后请开一清单（即在预约样本标识可也。每书请注明页数。）交下为荷。

下月有蜀中之行。约须一个半月方能返沪。故须提早预备。一九三六年三月十五日。

【140】龟巢稿（及补遗）及通玄真经改补十三页。制版已否毕事。甚为悬念。如均有清样。乞付一阅。元秘史跋引用叶本蒙

语讹字。取材似乎过少。记得庄先生前于毛样校过一遍。如已收五字之外尚有可用者。请就毛样用签夹出发下。选定补入叶氏刊本。仍送还以便对阅。仍同时发下。又利病书有龙氏刊本是否在尊处。记得卷首卷尾有刊书人跋记。乞检出交下需用。 一九三六年三月十七日。

【141】丛刊三期书连今日只有三日。便须出书。明后日又须放假。不至延误否。尚有数种未见清样。何时可以发下。甚盼。利病书已有四十八册在此。只欠二册。不必重送。再四期书尽量选用清朗易做之书。元秘史跋尚须略有改动。拟一气呵成。请催取长条排样为荷。 一九三六年三月二十八日。

【142】寇忠愍集办法详记在毛样封面。请酌定见复。毛样、刻本并姜信送还。沈氏三先生集。明本并为八卷。西溪三卷。长兴二卷。云巢三卷。只能照此分订。长兴缺四页。可托人向南京图书馆查对。此书可即制版。所有宋讳。乞属校员照录一表。备撰后跋之用。蚁术诗选故宫本不知有无目录。此为极紧要一问题。请问明胡先生见示。 一九三六年四月一日。

【143】洛阳伽蓝记毛样已阅。缺叶暂缓抄。董刻跋云各家钞补不同。已将董本送瞿凤起兄。托就所补顾千里校本一对。此书近人有校注本颇详。应属图书室觅购备考。其余卷均可制版。

诗集传宋刊各卷。亦可先制。

编年通载。虚斋乐府。谭津文集。班马字类。复古编(此留下。当向瞿氏查补缺页。)同。

以上五种毛样发还。又刻本诗集传同缴。 一九三六年四月一日。

【144】送去查东山稿有可补罪惟录之缺者。计两册。有目七页。前经庄吕翁看过。即补入。亦只能附后。不能插入卷中也。又罪惟录编目及跋稿两册。统呈上备用。 一九三六年四月

四日。

【145】前请托杭又宁或平分馆查胡曾咏史诗、谭津文集、沈氏三先生集、眉庵、北郭、静居等集缺页缺字。为日已久。如尚无复音。请托总处催问。宋史盼已照完。

三编四期书有印成者。盼即发下。备撰后跋。如有空闲之毛样亦可。 一九三六年五月五日。

【146】蜀中之行约在二十日前后。丛刊四期书拟在此旬日之内。尽量赶办。请即为筹画。可否即将衲史停止。凡应有商榷者。均在此旬日内。能办多少最好。其无可如何者。则留待归后再办。约六月十五前可返沪。宁平查书事请速办。图画考请速抄。 一九三六年五月七日。

【147】孟子传南京图书馆亦有钞本。所有缺字各页。可否先检出毛样一分。托宁馆先校。（可由公司备信。）又宋史未照各卷页清单。甚盼见示。 一九三六年五月十六日。

【148】求法高僧传似可与磬砂藏本一校。前来六叶（送还）已有异同。（费君校出一字。）此似较胜。如有毛样。乞检出交下。（此却不必急急。）如未打出。能否即以软片就校。缘须校过如佳处较多方决印也。蚁术词选（至少加一本。）已由博物馆复到允借。信已送总管理处。请向出版科接洽。

洛阳伽蓝记跋如未印。请从缓。发下再改。又吾汶稿跋尚有改动。同时发还为荷。 一九三六年五月十八日。

【149】送还中庸说校样有若干页应稍修。修后请胡先生签定即付印。孟子传应描朱者五十三页。亦已完毕。今送上。乞即发照。甚盼能打出清样全分。弟可带在船上阅看。预备后跋。又编年通载模胡之字只补出几个。其无可补者。只能留原有痕迹。但墨污仍须修净。多修不能。不修又不合。须恰到好处。务祈注意。此书不必精修。但须看得过便可。再中庸说有末页现正查跋

璃。午后可送去。 一九三六年五月二十五日。

【150】 孟子传补字已由宁馆寄回。中庸说后幅附件亦看定。均在原件上注明。复古编跋稿。翠微跋校样。均送上。乞查收。复古编有一抄本可补三跋。(起六十三页。止六十八页。)兹将原书送上。即祈发照打样交下。又复古编毛样二本。卷面有说明。一并送去。请察阅。图画考想已抄就。刘子新论校样祈发下。拟撰后跋。弟大约三十日起程。廿九日前有事均可办。 一九三六年五月二十六日。

【151】 昨示诵悉。中庸说六开本不必加印。将来即在总数内购取可也。复古编补照三跋毛样已阅过。并附注管见连原书送还。以便补照未照各字及尊处校对之用。用毕即请还与任心翁。请其归库。又图画考有改定格式底样一本。昨未交来。请补发。丛刊四期书近日已成若干种。(务祈赶办。能于六月底赶出最好。)有已完成者。甚盼给示毛样。所有应行接洽之事。务请于二三日发下。如来不及。即用航空信。托汉渝二馆转交(汉口以下不停船。)亦妙。 一九三六年五月二十七日。

【152】 孟子传毛样一本。校记二页。班马字类附补遗(书签书根此三字均不可缺。)校毛样两本。又水经注。中庸说跋样均缴上。又送去宋本史记毛样全部。备查校字类之用。余书均记入回单簿中。请察收。尚有罪惟录十三册及刘子新论在此。午后或明日可送还。弟入蜀定明晚启程。 一九三六年五月二十八日。

【153】 翠微南征录校记。孟子传校记。不及详阅。先送还。又有跋文数通。须在船上复校。将来托汉口分馆寄还。孙伯恒兄信并补照北郭集后跋胶纸。并补诗三首。一并呈上。即乞察收为荷。 一九三六年五月二十九日。

【154】 丛刊四期通告尚须改动。排样乞即发下一阅。

姜佐翁已痊愈否。甚念。 一九三六年六月二十九日。

【155】 昨呈上班马字类。请补查史汉各字。并抄校记。务祈速办。能于一二日完成否。又罪惟录除抽出八十余叶。请迅速赶印。印就即装毛样连同底本发下。其余八十余叶。亦乞佐兄从速校定。校毕后即请将丛刊四期各书每种撰一提要。字数由八十至一百为度。不宜过详。只须撮要。随成随发下。 一九三六年七月十五日。

【156】 罪惟录传十三上第四十八页底样清样各一页送还。附注管见。请交佐兄。又传二十九魏忠贤传。似未完。应如他卷例补一空白页否。乞与佐兄商之。又张闾声原目颇有讹字。应与正文对准。(张有眉批。可排入本卷之后。低二格。)又闾声目录后之跋文。亦请排印。应独立。不能附目录后。均请从速先排长条。排就即送下一阅。 一九三六年七月二十日。

【157】 新唐书修行线要则。

一。要有古意。务要与左右之线相称。

二。不可成算盘珠式。

三。不可成树枝式。

四。中间如有断处。其断头务要有古意。

五。与原有之线相接处。不可露出相接之痕迹。

六。版子如有断痕。其断处务与左右之线齐一。勿稍高低。

工友修行线甚不得法。拟数条如左。请察核。如尚有应指出者。请补入。多打印若干分。分交各工友。并交下二分。 一九三六年八月十一日。

【158】 史记尚有数卷昔年仅照六开本式。中有为潘君明训所藏者。商借较费事。兹先将缩照毛样修润一页。姑请照大本试放。如能合用。则可省弟无数手续矣。放照成即打样交下一阅。 一九三六年八月二十日。

【159】 明史考证攷逸业已觅得。计十一本。王君九兄均经

校过。讹字均经订正。或补。或改。或删。亦有不必动者。弟均已逐一注明。兹送去。乞察入。全书前经查明系七百五十页。此书有两种办法。一。样本系割裱。弟已查过前两册。约可减少页数十分之一强。此不过约略估计。兹附去清单。(阅过乞发还。)祈察核。照此办法。全书约可省去八十页。一。即系照原书影印。两相比较。孰为相宜。先请详细估计见示。再行决定。又明史已由拔翁向刘翰怡兄处借到。确系白纸初印。不日可以寄来。将来制版。亦可省却工夫不少。

昨函陈王君子功近日情形。未蒙示复。甚念。 一九三六年八月二十七日。

【160】 示悉。王君能如此节俭。是佳子弟。工作退步。请随时勉励之。明史考证攈逸再向刘氏索借。似近无厌之求。鄙见以为不宜。已托总馆先在沪市访购。如不可得。再托平馆。 一九三六年八月二十八日。

【161】 兹送去宋本算书两本。系从潘君明训借到者。乞即照原书大小照出。拟与苏州潘氏三种配合印入续古逸丛书中也。并请从速。照成后即打样交下。 一九三六年八月三十一日。

【162】 近日迭次发印新唐书表。中有字甚小者。恐不易制版。应否先行放大。或即做石印。或改制传真。再行缩照。统乞裁酌。再白纸明史已经借到。记得此史曾有修补。(请查板心年月有无异样。)疑内容或有异同。从前用本馆藏板照过四分之一。务须严为区别。如已照者有为零叶。则必须将已照之叶与刘本对校。如有歧异。必须记出。预备制版时修正。以归一律。又明史考证攈逸。知已由公司送去二部。可用否。前请估计办法。盼示。 一九三六年九月一日。

【163】 昨呈上新唐书宋史页数帐。计荷察入。有无办法。祈即核示。昨得孙伯恒君信。知宋史补得一部。即日将所照胶纸寄

来。到时请即速翻板打样。以二分交至敝处。又前向瞿氏借照南唐二主词。如有样本。乞发下一阅。如无即请补打二分交下。

一九三六年九月三日。

【164】跋吾汶稿后 刘宣 三页

题跋吾汶稿后(不全) 失名 三页

跋重刊吾汶稿后 裔孙懋 二页

书重刊吾汶稿后 都穆 二页

右四跋见国粹丛书本后。请依现影印本行款字体补录。抬头空格。悉依原式。 一九三六年九月〇日。

【165】前日送来用成化本宋史配元本清样四页。甚合用。鄙意栏外不必注字。样张留在敝处。俟本卷发印时同时送还。

一九三六年九月七日。

【166】昨与总管理处商定。百衲本二十四史仍请尊处赶做。俟到十一月中旬。请再详细估计。彼时再定办法。又故宫沪库存品报称将运回南京。如有应校之书。应从速办理。勿延勿忘。切韵、山海经毛样需用。乞示即缴还。 一九三六年九月二十一日。

【167】宋史有经前人阅过动笔甚多者十八卷。由校史处撤出订呈。乞察阅。如有甚好之本。重照是否值得。弟看原底不算甚坏。然做传真极费工夫。如做石印。工程如何。乞检阅见示。原稿仍请发还。 一九三六年九月二十三日。

【168】昨上一函。计蒙察及。旧唐书跋文甚盼今日能将毛样长条发下。其他各事。统乞查明见示。企盼无似。南京图书馆宋史已查来。似可借用。季安于何日可以赴宁领书。祈即日商定示下。俾得预备一切。并约先期偕同来寓。逐一相告。

一九三六年九月二十九日。

【169】示悉。苏州潘博山君有残成化本。可补我处宋史之

缺。前星期日蒋仲翁赴苏。顺便托带一函。并开去访补卷页。(清单抄呈)今得复信呈阅。我处无人可往。阁下能抽暇一行否。不必汲汲。俟宁本将毕再去不迟。如列传卷一二五潘本可用。则钱穀抄本可以不照。其所云保险办法。弟已忘却。想兄必能记忆也。 一九三六年十月十七日。

【170】 前已托拔翁带回新唐书、宋史校样一包。计荷察入。弟昨日返沪。所有在杭续收暨昨在寓所收校件。均校毕送还。每日上午如能先发下若干。尤感。否则。统于晚间灯下赶校。目力殊苦不给也。 一九三六年十一月十四日。

【171】 昨奉回示。知宋史里线可以不必补成。先行直接晒版。由工友临时补画。则敝处即日停止此项工作。但有声明者如下四条。(请打印多份。标明年月日。分送工友并发下二分。)务祈转属徐震水君并各工友注意。

一。原来有线不全。所补之线粗细应与原线一律。

二。原来有线花淡或作颗粒形者。不妨用新线盖上。

三。只要补中间一段。约三分之二已足。但收梢处必须尖细。切忌粗秃。其补画转角线如「」亦同。只要短短一段可矣。

四。所补里线须与匡线平行。不可参差。 一九三六年十二月十八日。

【172】 如有校件。请尽今晚多多发下。免明后日闲废。 一九三六年十二月三十一日。

【173】 宋史宗室世系表人名无文理可言。不必与殿本对校。各表纵横行格应修好。

今日发上传真石印系表五卷。故特陈明如上。并乞将右两则录一分交下备查。 一九三七年一月九日。

【174】 北平图书馆有书约十种。多属记述辽沈事者。前曾交下谢君刚主跋文。业已阅过缴还。其书已否订成。如尚未订。

最好从缓。每种乞各检示一二页发下一阅。封面及版权页亦随意取示一种为荷。

前取宋史清样四页二分。用去一分。今缴还一分。 一九三七年一月十四日。

【175】 习艺初成之学生。应拣易做之底样交与练习。童云良君手段尚可造就。但底样过难。故有不能合用之处。请属注意。

一九三七年一月二十五日。

【176】 衲史总序乞属将原稿发还。有大改动也。江南图书馆宋史表可以校正之字不少。其无可考者。只得照原式。略去墨污。(切须十分留意。)兹送去宁本三册。本馆残本二册。又涵芬足本一册。并前日交来传石样张三迭。统乞查收。 一九三七年二月十二日。

【177】 明史本纪本馆所影印者。承示经胡文楷君与故宫本对过。全未改动。但不知表志传如何。乞询明见示。又影印明史尊处取到参考者共有几部。其中人地名(不专指本纪)照原刊者。已改动如考证摭逸所指者。(有改译人地名总辑十二页。)各有几部。统乞查明开示。其已经改译者如尚在尊处。乞将本纪前四卷及列传三二七至三二九(此总卷数)交下一阅为荷。

宋史石印已否完毕。乞示。 一九三七年三月五日。

【178】 昨看北平图书馆各书。兹在目录上选出若干种。于书名上加以红黑双尖。或上或下标记。均拟不印。可不必再数页数。惟周易玩辞。前日已列入丙类。通知不数页数。兹拟撤回前议。仍请照数。再尚有国朝诸臣奏议、西关志、丁鹤年诗集、盛世新声四种。似未曾见。不知是否漏看。抑弟看而未记。如已取出在外。请李君暂缓收存。俟雨霁有暇。当再诣藏书处补看。若未检出。俟后来编定书目时。如需用。当再请检。祈告李君裁酌。李照亭先生均此致意。 一九三七年三月十日。

【179】 照存宋本大易粹言。中有缺页(缺卷不补。)须补抄。已在杭州借到四库全书。约可补三十页之谱。拟即属校史同人缮写。请选用补抄之纸。须薄滑受墨者二三种。每种二张交下。以便选定。需用再索取。 一九三七年四月三日。

【180】 前在故宫照存山海经及韵书一种。已忘其名。可否做传真。乞查明见示。又南京检书之行。(请携带应查书目。闻总管理处有一分。并带检查页数表纸。)拟于明晚动身。乘夜车去。未知尊意以为如何。 一九三七年四月十二日。

【181】 元板济生拔萃方。本馆又配到数种。是何书名。乞示。闻配来云歧鍼法一种。尚不全。统乞查明见示。又阁下如到科学社。乞代查北平图书馆藏元大德本晋书行数字数。如有序跋。亦祈抄示。该馆善本书目有晋书数部。皆元刊也。 一九三七年五月五日。

【182】 国藏善本。昨得总管理处电话。可以定局。选用样张八种已否着手。尚书注疏、周礼疏、玉海故宫已否照来。山海经已照到。宋史全文、诸臣奏议(想已制成。)北平图书馆可取。皇明经世文编(用凡例。)北京大学已寄到。历代名臣奏议中央研究院如未寄到。或即向北平图书馆先借一叶。统祈与总管理处接洽。目录五十种请胡先生先行排定次序。交下一阅。 一九三七年六月四日。

【183】 宋史全文通鉴一书已采入国藏善本。必需摄照。望即向该馆办事处全数借出。昨来本书提要。望亦速排长条。先打草样。与正书同时交下。其中文字。似有须改动之处也。屏山集毛样二本发还。乞察收。其宋季三朝政要一书。即留此备做传真。不复缴上。又瞿氏续借书籍影印。是否仍照原订合同。宋本酬若干。元本酬若干。亦乞示下。 一九三七年六月十六日。

【184】 昨交到国藏善本提要并原稿。闻尚有续到若干种。拟

请从速排成长条发下。以便同阅。凡例撰成。亦祈交下。预约简章及样张等。可请先印。以期速成。 一九三七年六月二十四日。

【185】提要四十三种。昨交任心翁送还。想荷察入。国藏善本九月底至少出一百册。鄙见能多些更好。拟出何书。应早为预备。即祈见示为幸。 一九三七年六月二十五日。

【186】送上毛诗正义卷八一册。(以上均缺。此为第一册。)请即发照。照出后打毛样二分送姜佐翁。请其用阮刻注疏本一校。校出异同之字。用本馆印成校记格纸抄出。备撰后跋之用。

又迁安县显记纸厂所造之纸。虽用机器。然细看似无洋料。其文莹一种。可否代夹贡。棉连可否代料半。昨托杨守仁君转告。不知已达到否。

四部丛刊四编之书。如已查齐。乞即发下。 一九三七年七月六日。

【187】瞿氏册府元龟宋本共十三卷可配。计卷二四九、二五一、二五二、二五三、二五四、二六一、二六二、二七六、九〇一、九〇二、九〇三、九〇四、九〇五。另拟查页数诸书已开单。径送瞿氏。昨晤凤起世兄。云由伊处代查。不必派人前往矣。

册府元龟除出宋本外。即乞提取明本。查检页数。

四部丛刊(续、三)编实出若干种。乞查明见示。 一九三七年七月十七日。

【188】前影存毛样南词定律。乞发还一阅。又南史有刊书序。中缺一叶。后来补到。于末批书出版时补印分送。敝处所存一分无此叶。能捡得见畀。甚盼。 一九三七年七月三十日。

【189】昨交下宋史全文元本毛样两分。各六册。已收到。遵即交做传真。惟有各本均校不出之字。曾否用本馆所藏明残本校过。(有卷二十七至三十一、三十四、三十五可用作对校。)如未校

过。必须取出对校。瞿氏明本想未借校也。即示复为幸。丛刊四编目。排就即发下。 一九三七年八月七日。

【190】 演繁露毛样一册。阅过送还。此书已印。时局不好。暂缓发售。可先订出。陈明拔可先生先送刘君若干部。又北平图书馆残本元刊玉海。查点卷帙时。应同时注意版印是否可以照相及后来制版之难易。此层如未记明。应补办。 一九三七年八月十一日。

【191】 前在瞿氏借照宋刻韵补。中缺若干字。弟近借得潘明训兄所藏宋刻。板本相同。此数十字可补。拟请移驾敝寓。取去补照。今日雨止后能临尤便。明日正午至晡。弟恐不在寓也。 一九三七年十一月七日。

【192】 北平图书馆有宋刻明印通鉴纲目。又有通鉴纲目书法。又发明。又集览。未知曾否携至上海。如有陈孔硕跋。方介子跋及朱子所定凡例。拟借一观。(只借跋文及凡例。)乞得暇先问李君。再具正式借函。此托。 一九三八年一月五日。

【193】 昨谈纪录汇编百陵学山二书。拟就售出之数补印缺页。以便出版。鄙意俟折齐之后。再行查明函商港处。至快往返总须半月。中间不免停顿。似可先行查明售出之数。将现拟办法告知港处。并问明缺页某书约占十成之几。即可开印。得复信后。临时即可照办。不必停工待复矣。 一九三八年三月十八日。

【194】 昨示两京遗编原序。弟颇疑书估剽改。乞将该首册序文提出。并将春秋繁露八卷同时取出。再加研究。 一九三八年四月六日。

【195】 贵厂同人被捕房强迫出境。蒋文桂宋希文二君其家属如何情形。月得工资若干。在公司共有若干时日。乞示。 一九三八年八月十九日。

【196】 校史随笔应有目录。昨来稿阅过缴上。乞发排。尚

有小序随后送上。拟再乞傅沅叔君撰序。俟到后排成再印。是否留纸版。将来拟印连史纸。 一九三八年九月三日。

【197】 昨示谨悉。废书片送去一大包。请交工厂代为切作细条。每条约半寸阔。但书眉较阔之处。请另切出。另扎作一起。以便写便条用。费神之至。

又承校员代查名臣言行录校勘表增出字数。凡移作正文之字。是否不计。乞询明见示。 一九三八年十二月一日。

【198】 傅沅翁寄到校史随笔序一首。计六页。已送李拔翁阅看。再送尊处发排。想已交到。又全书内第百三页中有失检之处。应撤出重排重印。兹将原稿改正送上。即乞核发为荷。 一九三九年一月五日。

【199】 宝礼堂宋本书录。可以先行付印。弟尚有序一篇。约二三日送去排版。昨与潘君商定。料半纸五十部改用最上等磁青面纸。书签(连史一百五十部在内。)一并改用写刻。亦请姜佐禹兄秉笔。并标明一二三四等字。此数目字可以挖嵌。书签形式要狭长。约占全板直幅四分之三。写成乞发下一看。 一九三九年一月二十三日。

【200】 送上校过样本王荆公诗集一部。又瓷青色面纸三十五张。请交订作。代为装作八册。并加连史副页。瓷青纸于灯下选出。恐颜色不匀。请订作工友复选一过为幸。余纸仍乞发还。又木刻书签四方已无用。今送去。如铲去字迹。木材尚可用者。即请移作他用。此时物质艰难。不能不利用废物也。 一九三九年二月八日。

【201】 兹检得前校衲史时所用旧铅字并小铅字戳。今一并送还。请收入。可以还炉。 一九三九年二月十一日。

【202】 昨检得各种纸板数十张。大小厚薄不等。闻近来市价甚贵。此废物或可利用。故送去。乞察收。 一九三九年三

月十六日。

【203】 前日电示谨悉。也是园元明曲本。最好于三四日内交齐。则我处便可着手。仍望转达郑君为幸。何日开手交书。乞电示。弟能到必到。 一九三九年三月二十七日。

【204】 近日已晤郑君未。元明杂剧后半部未知何时可以移交。曾否请胡文楷君开始检阅。前半部修理约何时可完。前二十册弟已看过。尚有十二册。一二日后亦可完毕。照相恐须分几等。曾否筹有端倪。统祈示悉。 一九三九年四月二十日。

【205】 坊间有古名家杂剧选、十段锦杂剧。本馆图书室未有。各书店亦买不到。郑振铎君想必有其书。乞代借阅。费神之至。 一九三九年四月二十五日。

【206】 也是园元明杂剧前半部地字类刻本中有若干种为富春堂所刊。祈即查明见示为荷。 一九三九年五月十二日。

【207】 刘弘嫁婢校本。弟已费数日之力。复看一过。(字太小。每日只能看少数。)遗漏错误均所不免。弟已签注。今送还并复佐兄信。请阅过转送。外王君九兄寄还照片十种。分两包(未拆点)送上。乞陆续交佐兄校阅。 一九三九年七月十三日。

【208】 记得数年前有张佩纶所注管子。交本馆代为排版。仅打样若干分。并不正式印行。此书经过。吾兄如能知悉。祈示悉。如当时系别人经手。亦乞代查。费神感感。 一九三九年七月十九日。

【209】 元明杂剧地字类一七〇号飞虎谷存孝打虎与天字类七七号异处甚多。与锁魔镜一种相似。拟请补照交下为荷。 一九三九年十一月十一日。

【210】 前昨两日各上一函。计荷察及。稼轩词何日可看样。愈速愈妙。请用电话见告。

再弟不做事则已。做则必须一口气赶完。若中间停顿以后。

即不愿再做。祈见谅。 一九四〇年一月二十五日。

【211】 前日肃上一函。说明重写杨氏水经注疏一书无法办理。并请将格纸停制。计荷察及。兹将原稿第一册。又校记一册。又吾兄所拟缮写办法信稿。又最初检查此书意见两纸。傅君复信一纸。又试做石印样张两纸。一并送还。乞察收。另附致港处信一件。请阅过转送总管理处。照打四分。以两分留馆。两分交下。费神之至。 一九四〇年一月二十八日。

【212】 也是园元明杂剧中有僧尼共犯一种。当时列入元字类。记得未曾照出。现经查明。并未印过。请即补照为幸。并即打样交下。 一九四〇年三月五日。

【213】 得暇乞枉临敝寓一谈。商元明杂剧发排事也。 一九四〇年三月八日。

【214】 昨日谈及王君翁所定元明杂剧同一撰人。未知是否连在一起。此层却未查过。尊处毛样完全。即请依据一百四十四种清单次序查对。并望从速见示。费神之至。今日本拟写王君信。现在暂停。恐须改动次序也。 一九四〇年三月十八日。

【215】 宛陵集跋。昨亦已看定。可即付印。全书约何时可以出版。望示及。姜佐兄病状近日如何。便中祈再往探示。 一九四〇年五月七日。

【216】 昨交阅鄙人昔年朝考卷。已阅过。兹送还。得便乞还与振铎先生。并代致谢。 一九四〇年五月八日。

【217】 杨氏水经注稿影印事宜请速筹画。开示办法。并携带最难著手者一二册见示。以便斟酌。姜君近日病状如何。望每一星期往问一次。 一九四〇年五月十四日。

【218】 杨氏水经注卷一第十七叶前四行眉批。“先生未见大典本明钞本不得属之先生云云。”又第二十四叶前三行注文“守敬按。大典本黄本并作阻云云。”此二叶均请补照样张。方可说得明

白。如来得及。最好于今日下午一时三刻送至新关码头赴荷兰邮船之小轮上。否则飞寄港处。转交弟收。 一九四〇年五月十八日。

【219】昨呈上港处来信并承印广东丛书契约及书单。计荷察及。望即详细察核。如有应询问及声明之件。速即函达港处。最好枉临敝处一谈。又武溪集已照过两页。续请补照较为清楚者一页。前照之两页。试行制版。其制版程度亦只须做至与后照之一页原底（此只可不再加工。）相等为止。今日亦望交下。以便同时函达港处。 一九四〇年七月二日。

【220】元明杂剧已排三出。至今尚未见样。闻宛陵集尚须月底方能出版。近来厂中因何事如此忙冗。甚为驰望。又姜君近日病状如何。不知又有进步否。得便乞移玉往访。甚望其能早日复元也。 一九四〇年七月十日。

【221】武溪集缺页傅氏书可以补配。顷有信来。云书已交孙伯恒君。惟行款似有不同。请速将前此照出样张一二页寄去。如有不同。即请孙君缓照。最好请将缺叶前后接榫之处各一行抄一清单。同时附去。则即行款不同。亦可请孙君据傅本抄补。

善本丛书、广东丛书已否接到港处印单。善本丛书中由傅沅翁寄来之书已否查过。如何情形。望示及。据赵万里君云。原书中有沔烂太甚者数卷。无法照相。将来只可不印。因原书本系统残缺。多缺数卷亦无妨也。 一九四〇年七月二十二日。

【222】元明杂剧将来应否做布套。望预筹。一面估价通知港处。一面备料。又卷面拟照集成曲谱排剧名。

第三十七种锁魔镜。因需筹酌。故未发。 一九四〇年七月二十九日。

【223】姜佐禹兄连日校阅元明杂剧。弟屡劝其不必急进。不知其近状何如。吾兄得暇。乞往访问。并代致意。再水经注延阁

甚久。看去似可。即请傅君主校一面。雇人写缮。乞移驾过我一谈。 一九四〇年八月二日。

【224】 昨姜佐翁又交到复校元明杂剧两种。今送去。请发排。前日函请加派人手排版。务祈注意。材料恐亦须添备。否则年前出版恐来不及。又佐翁病体初愈。此时复校。最好以次渐进。免致过劳。万一再有翻复。则甚不妙矣。祈婉达为幸。

一九四〇年八月二日。

【225】 今送还水经注疏稿本一册。又校记一册。乞察收。昨请转告公司预备一信。请傅纬平先生指导抄写方式。最好拟具信稿发下一阅。再行缮发。 一九四〇年八月七日。

【226】 叶玉虎君来问。广东丛书年内能否出版。务请从速办理。并预计出版日期见示。又元明杂剧已排成若干种。君九先生所记评语应抄出备作提要。业经屡次奉达。应将已经排成各剧加派人手速抄。务必于明日午前交下。并附原本。以便敝处查对。以后每排成一种清样。即应将此项抄件先送交敝处阅看。以便与清样同时寄出。是为至要。 一九四〇年十月四日。

【227】 今晨送还杂剧三种。想荷察及。其中独角牛一剧有不识之刮字。经校员批注已见他本。此字必须签问追改。此后遇有相类之字。(已打纸版各剧。亦乞一查。)均请校员指出。又以后送阅排成清样。凡加夹注之处。均请于本行眉端之上加一记号。以便检阅。实缘目力不及。寻视甚苦。尚祈鉴谅。 一九四〇年十月二十八日。

【228】 前王君九先生曾商请将印在集成曲谱每集卷首之螭庐曲谈抽出单印。未知曾施行否。如已印成。请向公司借出一部。送与姜佐兄参考。再元明杂剧应印若干部(页数记得前已估计过。)寄至港处。(由弟寄去。)尊处当有存底。不知现在有无变动。应早日与港处斟酌。封面签条。亦应早写。 一九四〇年十一

月九日。

【229】 杂剧排版报告收到两次。将第二次与第一次参对。殊难明析。另拟表式并增加款目附还。两次报告请属竺永生君详细查明重制为荷。 一九四〇年十一月十一日。

【230】 昨见报告。王君校样至有三星期未曾寄回一种。弟早预料必有此事。凡事必须提前赶办。庶免临时局促。此书错在入手过于宽缓。现在事已如此。亦无法挽回。但千万不可因王君校迟。我亦迟寄。惟有加紧赶完。从速寄尽。迨全数寄出。弟当可向王君为进一言。

送来校样所作L O符号细。不能醒目。请属加粗。 一九四〇年十二月三日。

【231】 敝体患膀胱发炎。今日进医院。不能再复看排样。但请随校随寄北平。万勿延阁。所有粘签。务请我兄复核。姜君有可从之言。亦有万不可从之语。又校员(未知何人)于某剧中向君九先生问兀自兀那等字。弟已批明。对君翁殊失恭敬。此似有意掂斤播两。切切不可。千万注意。 一九四〇年十二月五日。

【232】 元明杂剧纸版已打成若干种。未打者尚有若干种。迭次奉询。未奉复示。甚以为念。提要已否排完。王君翁复校各种有无尚须商榷之字。久无来件。是否已经完毕。鄙人在病中。勉强相助。无非想早日出书。甚望阁下鉴及此意。

广东丛书于何日寄交港处。乞示。 一九四一年三月十三日。

【233】 兹托任心翁送上叶玉虎君来信全份并复信存底。请察入。并查照审慎办理。并随时函商叶君。以期妥协。弟不克有所襄助。歉歉。元明杂剧近日仍无校样送来。提要、校例、序言、封面均未见。甚盼。甚盼。 一九四一年三月十八日。

【234】 再提要中有无应寄与王君请示之件。如有。今日能

否寄出。校定之提要如可由敝处决定者。即不必寄去。早日交来。又封面剧目每册应排方框者。亦望速排。版权页至今未见。甚盼。 一九四一年四月十九日。

【235】元明杂剧提要清样签出。有许多处可不必询问者。王君病初愈。不宜过于烦渎。故已删去。有若干处语意欠醒。若干处漏未标出。均为改正。应将清样多打一分。将签出各条重写。又打一分。备君翁留存。昨已托黄仲明兄先函告。想知悉矣。

寄王君翁复校一分。第一页请注明由快件寄还字样。 一九四一年四月二十一日。

【236】昨晚接王君翁来信。将元明杂剧代为分本。似乎页数亦已配准。兹将原信及清单送上。君翁病后如此殷勤。似未便却其美意。是否可改订三十二册。望即速查。今日午后见复。以便明日答复。 一九四一年四月二十二日。

【237】昨示谨悉。君翁扶病为我编目。自未便却其美意。只可照改订三十二册。虽分类牵搭。微觉欠整。然西汉与东汉。释家与神仙。原编三十册。亦不能全然划清界限。不过彼此分一多少耳。 一九四一年四月二十三日。

【238】本馆印十种善本丛书曾借敝处盐邑志林。敝处现查未见此书。请就馆中再为一查。如能查得。即行发还为荷。 一九四一年八月九日。

【239】姜佐禹兄久未通问。未知近状何如。其太夫人近康健否。有无就事。闻曾以鬻字为生。不知收入尚可否。晤时祈代为问候。其鬻字润格并乞代索一分。费神之至。 一九四三年三月三日。

【240】本馆前照存宋本册府元龟。未知共成若干卷。去冬收回铅皮。久闻从事清理。已竣事否。此书底片共存若干。(是否软片尚存。)昔年记曾用连史纸打出底样。共有若干。现存何处。

能清查否。记得傅沅翁曾借阅一百卷。曾归还否。均祈见示。
一九四四年二月二十四日。

【241】补印百衲本二十四史久无校样送来。是否已经完毕。抑因事停顿。甚为悬念。便中乞示及。 一九四四年三月二日。

【242】魏书补叶旁注文字。昨有改动。想荷察及。写成后拟乞先发下一阅。 一九四四年四月十五日。

【243】昨示诵悉。金陀粹编三册收到。缺去行实纪年。所需正在此。已托检取付下一读。承示撤出与年谱存放一处。鄙见此办法甚为奇特。昔人年谱附本集后者甚多。如一一撤出。岂不甚劳。且令原书不全。如不装好。则撤出之卷页与原书均将散损。如重装。岂不徒费。鄙见以为只须于年谱类中另附一目。某书有某人年谱若干卷帙。则检查既便。而原书亦不致离散。徐先生专研究图书馆学者。乞以此告之为幸。又宣统曾复辟数日。未知在何年。编辑部当有记录。乞托查示为荷。费神感感。
一九四四年九月十一日。

【244】昨晤张君荣庆。知现存四部丛刊初编尚有零种数十箱。多为一部数十册者。不知究现有若干种。该种有若干部。如能向各分馆调回。及在本地或南京杭州旧书店收买所缺之种。配成若干部。事属可能。亦可稍助收入。乞与子宏兄商定。 一九四四年十月十六日。

【245】本月二十一日中华日报载有毛泽东朱德与蒋介石电各一通。他报想亦有之。唯新闻报独不载。馆中所阅各报如有此两电。拟请本馆同人司抄写者于暇时代为录出一分发下。(约二千四五百字。)如无暇。即不必勉强。 一九四五年八月二十三日。

【246】近日新闻报忽然被禁。云须停两三日。仍可出版。杂报不知何种较可信。亦不易购取。馆中每日所购阅者。傍晚乞检

交汪志清带下。俾得一读。此托。

本馆以前有无纪述(或编或译)朝鲜蒙古越南缅甸暹罗之书。乞托出版部查示。又托。 一九四五年九月十九日。

【247】日报广告有周报出版。(闻为郑振铎同辈所办。)已出三期。公司如曾购阅。祈付下一阅。外还二十一、二十二日报共六分。乞查收。

昨又查得满蒙及南陲书数种。原单呈上。乞查现存部数。 一九四五年九月二十四日。

【248】昨得叶玉虎兄信。知广东丛书第一集业已出版。已为公司清一宿诺。为之欣喜。信中属将印此书时向瞿氏借来之余襄公集还去。以清手续。乞即施行。如已还也。于何时交去。并望示悉为荷。 一九四六年八月八日。

【249】前日闻拔翁言。本月八日新闻报载有鄙人言论。拟借一阅。祈向图书室检付掷下为荷。 一九四六年八月十二日。

【250】检理善本事已完竣。拟于下星期日。即六月一日午后二时。在敝寓再开保管委员会。作一结束。届期务请携带有关各件早临为幸。 一九四七年五月三十日。

【251】本年春间傅沅叔兄函询战前托以旧纸附印宋本史记如何情形。曾蒙开示清单。列举已成未成之数。并余存未印旧纸若干。此书殆无续成之望。请即属将已成之书及未用之纸。一律检齐。附装平馆货箱之内。托平馆送还傅君。何日装出。并乞示知。 一九四七年十月二十九日。

【252】本月二十六日。即星期日午后三时。拟约本公司工会筹备委员枉临敝寓茶叙。(闻有七位。未知是否。)敬祈代约。并乞移驾偕临。无任企祷之至。

工会诸君子均此。恕不另启。 一九四九年六月二十四日。

【253】 今日午后散值后。拟请约石敏良詹家松二君同临敝寓晤谈。吾兄务必偕来。如石詹二君有事。即改期明日。并乞先期电示。 一九四九年八月一日。

【254】 交下复黄马二君信。已署名缴上。乞察入。马信只致弟。应用私人答复。答复黄信亦过于官样。因已写成。不必再改。黄信可寄京馆转送。马信俟其来沪时送永嘉路寓。今日阴天。难免下雨。已通知震生。改候晴日。再赴金城。 一九四九年十二月十九日。

【255】 本公司旧工人潘有更。十年前离沪投入新四军。改姓于名青。现在山东曲阜一带经理新华书店。其母仍在上海。今来沪省视。谨介其走访旧友。望接见并介见陈总经理、史久芸、韦傅卿、张雄飞诸君是幸。 一九五〇年六月九日。

【256】 前将涵芬楼善本每种写成卡片。有一大串。前日无意中。查出有回单簿。系民国二十八年二月八日送东方图书馆寄存。由任心白兄签收。前日已函请公司搜寻。如能觅得。拟与烬余录及附录草目一对。倘有多出之书。仍拟补入草目。此事拟请兄与胡文楷兄偏劳。俟寻得后再谈办法。 一九五一年四月十六日。

【257】 示悉。各件照收。已将拟改款式写在第一、五函卷数样纸上。两卷并作一行。字型可稍放大。不致过于拥挤。是否好看。须写出来方看得出。费先生所写一纸永乐大典四字。似尚嫌小。卷册八行。似占地过宽。如改四行。则不致有患矣。又下脚余地。似属过空。可再伸长一寸。将永乐大典四字放大。则下余空纸。亦不致太多。此朱笺应衬托白宣纸。四旁各伸出约二分之谱。粘在函面当中。其上端应离边缘约半寸。地位是否合式。请公同核定。布套何时可制成。一切手续完毕后。乞将全书送下一阅。此生不能再与此书相见。临别不无余恋也。 一九五一

年六月七日下午。

【258】鼎峙春秋残缺不全。乞抄出卷数。乘便到北京图书馆一查。伊亦有此抄本。不知相同否。如果不全。可否配合。一九五三年二月口日。

【259】午后得电示。称山海经今日须入箱。时提要稿尚未交到。即复请展缓。顷已交到。弟已改易数字。但缮写不及。即将原稿送去。附入本书卷末运京。请托同人录出副本。交下备查。其中引用原校词句或有不易辨认者。原校字亦甚模糊。顾君临校一过较为清朗。故将临校之本(用毕希发还。计两本。)一并送去。随王氏校本一同送上。统乞查收。一九五三年二月四日。

【260】前日交阅鲁之春秋。读李乾孙跋语。此书似借自彼处。亟应归还。乾孙今有一信与舍侄震生。属其呈阅。如季安舍弟(我与一信附去。可由公司派人送去。如路远即付邮。)不在上海。只可谋之海盐矣。一九五三年三月二十日。

【261】近闻旧五代史有出世之信。可喜。弟前撰有记载薛史踪迹长文一篇。(用何题目记不得矣。)中将汪允宗货书记全录。但不记忆印载何处。吾兄想曾见之。敬祈指示。如能代觅。尤感。一九五三年三月二十七日。

【262】昨日李乾孙君来寓。年亦已七十六矣。已将交来鲁之春秋全分面交。渠极口称谢。谓几历兵险。竟能保存。实为意料不到之事。并立具收条。今送上。乞察入。并保存。此皆吾兄之德泽。弟感亦如之。毛样弟已检阅一过。全书印齐。但未修改。不知此毛样今尚有存者否。乞代查示为荷。此笺并请总处诸公一阅。兼示震生舍侄。一九五三年四月一日。

【263】前阅涵芬善本点收清册。又古本戏曲丛刊初、二、三、四集目录四本。今送还。乞察收。一九五三年五月十二日。

【264】前谈戏曲丛刊有须与郑振铎先生商榷者。先打样张。

弟曾请将样张交下一阅。如有可不必商榷者。拟请抽去。以省周折。奉示约一周可以交来。计时已过。特再奉询。乞示。 一九五三年九月二十日。

【265】 戏曲丛刊承示十月底为第一批出书之期。不知能赶得及否。前示西游记样本将与郑振铎君商榷。不知有回音否。

续印各书如有问题者。均盼示及。弟不敢惮烦也。 一九五三年九月二十八日。

【266】 升仙记怀香记样本两册。遵示于今晨送还。以备装订。第一期印装完成馆中存留样本。乞畀我一看。勿急急。又合众图书馆存有旧本戏曲若干。如北京寄来底本有残缺者。彼处或可补配。届时可与顾起潜君一商。 一九五三年十月二十五日。

【267】 昨得周汝昌君信。续琵琶记的确见于红楼梦第五十四回。兹将原信送阅。如能告知郑振铎兄。当可坚其印入曲丛(全名是何)之意。 一九五三年十二月二十七日。

【268】 新岁维潭第纳福为颂。拟印曹棟亭续琵琶记。郑振铎兄有无复信。托裱已否竣工。鄙意不如直接照相。依曲丛尺寸照成打样。即以一分寄成都周汝昌君。总比抄写为便。曲丛二批岁底已出齐否。如有样本乞畀我一阅。 一九五四年一月二日。

【269】 先六世从祖辑有词林纪事。颇为士林珍重。顷检得旧本一部。其首册被鼠抓破。凡十三页。只可补抄。拟求吾兄代为料理。兹送上完全本一册。又破损本一册。祈觅相类之旧纸雇人代抄。(楷书即可。)抄成后并托代为装订。其封面亦须用旧纸。容再检呈。种种费神。感荷不尽。 一九五五年三月十日。

【270】 奉十八日手示。借悉送呈旧纸略短。请稍缓着手。当再检觅合宜者送上。同人高象初君允代抄补。至为感幸。需要拙

书。当检呈。 一九五五年三月十八日。

【271】 前以残本词林纪事(中缺十三页。)托兄倩人代抄。书已抄完。并经装订成册。写装两项应如何酬报。记似未曾见示。昨忽检及。谨特陈明。敬祈见示。久悬甚悚。尚祈见谅。近来冲思恍惚。忆及甚惭。并乞鉴宥。 一九五五年四月十一日。

为辞商务印书馆监理职致 商务印书馆董事会信

董事会诸公台鉴。敬启者。昔年元济罢官南旋。羁栖海上。获与粹翁订交。意气相合。遂投身于商务印书馆。共事十二年而粹翁遭难。时方收回外股。同业竞争至烈。危疑震撼。不得不勉为其难。元济原定五十退休之愿不获实行。今倏忽又届十年。故人墓木已拱。而元济精力亦愈衰矣。世变纷纭。商战弥剧。去岁罢工之事。一见再见。时局之危。宁逊畴昔。元济与公司休戚相关。处此艰难之会。自当尽力补救。借收桑榆之效。无如才识庸弩。即在平日已形竭蹶。况当此新旧递嬗。思潮猛进。一日千里。即勉竭其所知所能。亦不足以赴之。元济再四思惟。与其勉强敷衍。徒负踵决肘见之羞。何如早避贤路。犹有改弦更张之望。所有监理一职。谨当辞退。去岁公司迭遇不幸之事。对于股东。对于同人。元济愧疚万分。聊思自赎。务求俯允。感难言罄。抑元济更有请者。现在时势不同。思想解放。无论何事断不能墨守一二十年前陈腐之见解。简略之方法。以为因应之具。商店工场规模较大如本公司者。元济愚见尤必须用科学的管理。诚心的结合。勿以喜怒为赏罚。勿以恩怨为进退。虽然言之匪艰。行之维难。果欲行之。不能不破除旧习。不能不进用人才。人才何限。其已在公司成效昭著者。固宜急为拔擢。勿以其匪我亲故而减其信任之诚。其有宜于公司而尚未为吾所得者。更宜善为网罗。勿以其素未习狎而参以嫉忌之见。此为公司存亡成败所关。元济在公司二十余年。今临别赠言不辞苦口。诸公挚爱公司。当不嫌其哓哓也。再去年十二月罢工之后。元济即决定辞职。嗣因高翰翁

坚属从缓。并承淳命。当与翰翁约定。维持至本届股东年会。数月以来差幸无事。今当力践前约。元济所有监理任务。即以本年四月二十六日为止。一应经手事件。容当逐渐清理。妥为交代。合并陈明。迫切陈词。不胜慚悚之至。统维垂察。 中华民国十五年四月二十六日。张元济谨启。

复亲友询辞职缘由

承询敝处近日情形。弟之辞职确有其事。缘弟与总经理高君翰卿宗旨不合。弟意在于进步。而高君则注重保守。即如用人。弟主张求新。而高君则偏于求旧。隐忍五年。今乃爆发。嗣经董事会出为疏解。高君亦认弟之政策为是。并自行辞职。另推鲍咸昌。(现管理印刷所。亦创办人之一。)李君拔可继任。添招有年富力强。有新知识相助为理。高君与弟改任监理。专司指导监察。而不问公司之日行事件。如此办理是否于公司有裨。尚待试验耳。 民国九年四月廿六日。

写与源侄

字谕树源知悉。汝今将离我远行。我年亦渐老矣。所有涉世持身之要。以及现在求学后来成家之道。不能不为汝一言。臚举如下。汝其善为体会。

为人务须振作精神。不可稍形颓丧。人生处世必有不如意之时。愈不得意。愈能振作。便不难人定胜天。晏起亦不振作之一端。望汝终身戒之。

汝性情迟缓。最易误事。亟宜猛省。

汝作事往往无恒。最所不宜。即如去年代理北京高等女子师范教席。不过数日。即行辞去。此事甚对蒋老伯不住。又夏姨丈托绘屋图。汝已允许。后来始终未曾办妥。以后处世不可如此。切宜戒之。

汝平日不好整理。亦是一病。此种恶习若不痛自改除。日后担任大事。必受无量之痛苦。事物位置如井井有条。丝毫不乱。取用之时自必便利。凡有关涉之件。若不能分别门类妥为区处。使其极便检查。则临事之时必致手忙脚乱。又文字如有关系者。必须留存。妥为安放。其无用之件。不妨直行弃去。以免与有用者相混。此为办事紧要关键。能从吾言。必有裨益。

日记最有用处。汝可从即日起。将本日所作所为。所见所闻。所谋所虑之事。一一记录。行之有恒。受用不可胜言。

百病多从口入。饮食最宜谨慎。汝在京屡患腹疾。即是不知慎食所致。到美国后切宜留意。食果物亦不可贪多过量。

招人饮宴。在外时非万不得已。殊可不必耗财伤生。两无益也。回国之后。此等酬应之事亦宜节减。汝在京年余。已成习

惯。后宜戒之。

在学校时宜专心求学。交际之事只可以余暇为之。汝前有信致我。谓当注重联络。此断非宜。人当有实在本事。不能专恃友朋之汲引。且交友甚难。稍一不慎。反受其累。孔子云。无友不如己者。汝宜切记此言。择友之道在乎观察灵敏。若过于逆亿。实非处世之正道。曰诚曰直。宜时时勿忘此二字。

孔子曰。己所不欲勿施于人。又曰。小不忍则乱大谋。曰忍曰恕。此二字实互相为用。凡遇有得意失意之时。尤宜格外提防。

近来游学之辈。每有与外国女子结婚者。此实大误。彼此习惯不同。彼女尤多侈靡。终身受累。为患无穷。甚不愿汝为之也。即寻常交际。亦宜疏远。稍一不慎。便堕入情网。不能自拔。就令不至于此。而嬉游之费因此增加。精神财力均受耗损。甚无谓也。不独对外国女子。即凡中国女学生。亦然。

至于娼妓。尤宜远避。花柳病最易传染。非独本身。子孙兼受其累。汝曾为我言。绝不涉足此中。我所最喜。到美后切勿自食其言。

学问之事务求精确透彻。心有所得。否则于施用之时终觉隔膜。切勿自欺。

建筑学于绘图一事最有关系。务宜加意研究。

水泥工程必须联带钢铁克利。只谙水泥。凡有钢铁之事。必须仰人鼻息。汝宜引为前车之鉴。

铁路桥梁工程。我甚望汝能兼学。后来归国可以多一谋生之路。

学位文凭固在必得。然仅有虚名而无实际。亦无用处。此事关汝终身大计。当能自度。

汝汉文太差。将来回国办事。必有大不便处。汝在学校稍有余闲。即当用力钻研。此三四年是汝完全用功之光阴。若一错

过。后悔无及。

写字不求甚佳。亦须端正整齐。此与章身之衣服相同。若蓝缕不堪。必至令人生厌。汝在校时每日必须写数百字。

写字作文常常寄回与我看。西文功课每月底报告一次。以慰我心。

留美之期约以四年为度。彼时归来。吾年已六十矣。吾不愿汝久留。然亦不可缩短年限。为山九仞。功亏一篑。为学者所最戒也。

康乃尔学费。据克利云。四年前渠在校时每年约用至九百圆。我现在每年给汝美金壹千圆。务宜格外节省。否则难免不足。吾精力已衰。恐不能常此劳苦。汝宜知悉。孙豹君世伯之子祖瑞世兄。由清华派往美国留学。岁费只美金九百六十圆。每年尚节存若干寄呈乃父。汝能撙节动用。此数当不致短缺。至欲在美兼做他事。为练习所学则可。若专为补助学费。则断乎不可。节俭为人生美德。生当少壮。凡事尤宜刻苦。少用钱不过使身体上稍减其愉快而已。若以宝贵之光阴殉之。岂不可惜。

汝在家时值我光景宽裕。起居食用不免过于舒服。比汝父及我幼时大不相同。此去三四年中。我望汝能吃一番苦。日后必有受用之处。

用钱必须一一登记。于终身关系非浅。务须养成习惯。现在留学期内所有出入。亦每月寄我一账。

汝在京时喜借钱与人。此固朋友通财之谊。然舍己耘人亦属非智。我每年畀汝学费无多。只能专顾自己。万不可再借与人。然亦不可向人借贷。

外国多可歆可艳之物。不必购买寄回。即归国之时。亦可不必要。我只望汝携回真实学问。

师友亲戚每岁宜通问三四次。此人生交际之要。切勿疏忽。

但不必寄赠物品。

汝年已长。续娶之事汝可自决。但我之意见。在外国之女学生。恐不宜。性喜务外。不耐家政。且起居服食习于外俗。亦非汝之力量所能担负。切勿殉一时之情感。贻终身之大累。

汝在我处已十七年。彼此相依。诚为甚乐。然人贵自立。父子兄弟能分居。总以分居为是。且我处房屋太窄。以后断不敷用。汝学成归国。即宜赶紧续娶。自立门户。祥保亦同时领回教养。我年渐衰。数年之后。汝回国时不知能否相见。故不能不预为言明。

海盐虎尾浜房屋。系祖父遗产。三房共分。四叔无后。承继未定。此产日后当为汝与英弟所共有。一切应公同处置。

古人云。遗子黄金满籝。不如一经。我令汝游学。即遗汝一经之意。然白手起家。亦大不易。汝回国时。学问果能成就。恪听吾言。不沾染各种恶习。我与汝婢当畀汝洋银壹万元。所有续娶立业之事。均由此数内支办。我勤劳半生。稍有积蓄。无非以血汗易来。汝其慎用。

汝在美国。每月至少须寄我一信。

我介绍美国朋友。此次路上如有招呼。到学校后宜一一专函致谢。并将彼等招待情形。详细告我。我亦当作书答谢。以后每年宜通信两三次。耶稣诞日及新年。必须寄贺柬。日后旅行如经过其所居之处。宜亲往拜候。但切不可有请求或借贷之事。

如有疾病即速入医院。克利告我。学校附属之医院甚佳也。

与渠庵表弟同居。务宜相助相谅。彼此脾气或有不同。汝年长。总宜退让。

无论何人相处。总宜谦和。切不可自以为是。使人难堪。

我所欲与汝言者。一时亦不能尽言。汝其善体吾意可也。

菊生述。十一年八月十五日。

旅学弦韦——给年儿

英儿收阅。

汝生二十五年。从未远违父母。今将远适异国。离家庭而入社会。且为习惯不同。性情不同之社会。我殊难放怀。故书此数纸。以为汝教。

一。关于身体者。

饮食最宜小心。勿酿成肠胃病。

凡未吃惯之物。最好不吃。

华人饮食店。多欠清洁。其所售生冷之物。不宜吃。

美国人好饮冰水。最伤齿。宜忌之。

齿病最多。每半年请医生检验一次。

如旅行。不可过劳。登山临水。宜谨慎。

运动不可少。剧烈者宜避之。

一有疾病。宜速就医诊治。切勿耽延。

身体为万事之本。若不强健。虽有学问。无益也。

二。关于学问者。

勿贪多。宜深造。

勿求速成。宜熟习。

多到图书馆看书。

不易购之书。遇有后来需用者。宜随时抄录。记明某家某年出版。某书第几叶。

同科同学。有用功者。宜亲近。常相讨论。

本科教习。如有机会。最好常常亲近。多多请教。

指定为学生顾问之教习。更宜常往请教。除教习本人表示不

愿外。不必谓他人不往。我亦不往。

如认为必须入大商店或银行实习者。我旧友 Plimpton, Roberts, Morrow 及此次各人所介绍之辈。如平日见面亲热。意肯帮助者。可以申说己意。看其如何答复。果允相助。到时再行请求。如须我或原介绍人写信。即来信通知。

三。关于交友者。

无论同国人非同国人。均宜慎加选择。勿滥交。

待人宜谦和。勿稍形骄傲。我生平犯此二字之病。汝宜戒之。

好冶游之人。必须远之。如有人邀往妓院或舞场等处。亟宜婉言谢绝。中国贫弱。为人所鄙。学生不知自爱。更为辱国。

喜挥霍之人。切不可交。终必受其累。

异国之人。性情不同。习俗不同。初交之时。一切均宜审慎。

既为友朋。相知已深。见其举动有不是处。宜忠告善导。如至再至三不肯听从。以后即宜渐渐疏远。

遇外国妇女。礼貌最宜讲究。切勿稍涉狎昵。

中西风俗不同。男女交际。难得恰当。与其贻笑失礼。毋宁勿与为友。

四。关于用财者。

我平生不肯滥用钱。且可省即省。故此时不至于空乏。深望汝知此意。

此时金贵银贱。切戒奢侈。但亦不宜过于刻苦。

总之当用则用。可省则省。

到美国一两月后。诸事略有头绪。应先造一预算表寄我。

遇友朋借贷。察其实系正用。且有迫不及待者。宜酌量通融。宁紧毋滥。

犒赏之事极宜斟酌。须用得其当。保持学生身分。不可从丰。

五。其他各事。

每半个月寄家信一次。至亲好友。每年宜通问一两次。

随时将功课报告与我。

存钱将罄。两月前来信通知。银行透支之款。非不得已时。不用最好。

二十年八月十六日。父字。

为乐志华案致上海宁波同乡会

【1】 宁波同乡会会长暨在会诸君公鉴。敬启者。敝处旧仆乐志华。籍隶镇海。家住县属小港十字街。年廿一岁。本年阴历二月间。由敝处汽车夫励秀如（即志华之母舅）。介绍充当跟车。兼习开驶。旋向捕房投考及格。领得凭证。在敝处前后数月。并无过失。只以性近愚钝。故虽考得开车凭证。迄未能在外谋得枝栖。至七月间。即自行告退。四日之前忽由虹口捕房中西包探三人。携至敝寓。据包探声称。志华在某西人处服役。窃取银币数百元。（嗣闻仅上工三日。该西人即系捕房包探。）讯知寄存敝处。故来追查。其时鄙人并不在家。志华双手拳系。面色青肿。哀求拯救。并请暂为承认。免再受刑。敝处未便置词。只得挥之使去。泊鄙人还寓。即令汽车夫秀如出外探听。旋据归报。捕房包探又偕志华至伊胞兄励秀清家中。谓有赃物存在彼处。亦经质证。全属无凭。统观前后情节。殊属离奇。当即函托丁榕（斐章）律师代为查问。此本月五日事也。次日丁君电告。谓已至捕房查看。见志华遍体受伤。询其犯窃情形。甚属可疑。恐被诬指。已将受伤情形告知捕头。并有捕房医生验取伤单为证。昨晨解送公解。丁律师愿任辩护。并邀鄙人到场作证。嗣经堂讯。立时开释。律师并陈明受伤情形。公堂亦极为注意。此可证明志华之毫无罪状矣。鄙人察其伤势甚重。当即约定素相熟识之英国柯师医生。于午后四钟前往诊验。据谓右足恐成残废。且难免性命之忧。并属鄙人即速送往同仁医院疗治。此本月七日事也。鄙人昨日到堂。见志华狼狈之状。嗣在柯师医生处。又见其胸背下部手足种种伤痕。不禁为之泪下。询之本人。据称除拳打掌击足踢不计外。迭

受重刑三次。以两足分系方桌脚上。全身揪伏桌面。桌前又有人拉住两手。以皮鞭藤条痛打下部。晕而复苏。苏后复打。有时反系两手。紧缚两足。复以布扎闭其口。横施鞭挞。鄙人昔官刑部时。清廷尚未停止刑讯。即审问重要盗犯。亦从无此种酷刑。何号称文明国所辖之捕房。乃竟如此。吾国今日业经禁止体刑。夫以有罪之人尚不许加以体刑之罚。何捕房对此无罪之人乃施以如此残酷之体刑。对无罪者尚如此。则真有过犯者更不知如何虐待。向尝闻捕房种种黑暗。终不敢信。今睹此事。证以昔闻。则道旁累累每日捕房系送公廨之人。正不知有几何惨受私刑。呼吁无闻之吾同胞在其中也。人非木石。能不动心。

贵会主持正义。关怀桑梓。尤抱热诚。鄙人素深钦仰。乐志华于鄙人有主仆之情。贵会于乐志华有乡里之谊。且事关公益。鄙人确有见闻。理当代为陈达。谨将柯师医生验单附呈。伏祈察核。并请派人亲赴同仁医院察验。更可明确。贵会为乡谊计。为人道计。为租界中数十万无告之民计。想必有以处此也。十二年二月八日。

【2】会长暨诸位先生公鉴。敬启者。旧仆乐志华被捕房无辜虐待。仰蒙贵会诸公仗义执言。延聘律师为之起诉。延历数月。案经已结。工部局亦已赔给千圆。本月廿六日元济挈同志华。前往哈华托律师处。由志华签字领讫。所有应付律师开支尾数。亦于所领千元内扣出付清。翌日元济往谒葆三先生。面陈情形。并将志华所领支票呈出。当蒙葆三先生准其收受。伏念志华身受冤折。呼吁无由。元济即欲为之伸理。非得贵会诸公登高一呼。亦属无以措手。今幸奇冤大白。并领到恤款得以稍事将养。无非贵会诸公之所赐。元济亦感同身受。昨日亲诣贵会面致谢忱。谨再备函陈明。伏祈鉴察。十二年六月三十日。

营救被捕学生函

吴市长宣司令同鉴。文治等蛰居本市。不问外事。顾学潮汹涌。愈演愈惨。谁非父母。谁无子弟。心有所不忍。实有不能已于言者。夫学潮有远因。有近因。远因至为复杂。姑置不论。近因则不过学校以内问题。亦有因生活高涨。痛齿切肤。而推源于内战。此要为尽人所同情。政府不知自责。而调兵派警。如临大敌。更有非兵非警。参谋其间。忽而殴打。忽而逮捕。甚至有公开将逮捕之学生送往中共地区之“谈话”。此诚为文治等所未解。学生亦人民也。人民犯罪。有法庭在。不出于此而于法外任意处置。是政府先已违法。何以临民。况中共区域已入战争状态。不知派何人以何种交通工具送往。外间纷纷传说。以前失踪之人。实已置之死地。送往中共区域。不过一种掩饰之词。文治等固未敢轻信。然“办法”离奇变幻。纲纪荡然。则万口皆同。伏望高瞻远瞩。临之以静。持之以正。先将被捕学生速行释放。由各学校自行开导。呼吁无悖于理者。亦予虚衷采纳。则教育前途幸甚。地方幸甚。

*

*

*

一九四七年六月三日，张元济先生集七十岁以上知名老人，致信吴国祯、宣铁吾，反对国民党镇压学生运动。信由张元济先生拟稿。签名者有：唐文治、张元济、张乾若、李拔可、叶揆初、钱崇成、胡藻青、陈仲恕、陈叔通、项兰生。——编者

致蒋中正 介石

介石先生大鉴。庐山把晤。快领教言。光阴迅速。忽忽已二十余年矣。此二十余年中。公所施为受国人之嬉笑怒骂者。可谓无所不至。然弟终不愿以常人待公。今者据有台澎。指挥四方。此固足以自豪。虽然。弟窃有更进于此者。今愿为公言之。公浙人也。弟亦浙中之一老民。千百年来。我浙江有一不可磨灭之人物。伊何人欤。则钱武肃。是钱之事迹。度公亦必耳熟能详。当北宋之世。武肃据有全浙八都。军威著于一时。能默察时势。首先效顺。而炎宗统治之局。因以底定。当今之世。足以继钱武肃而起者。舍公而外。无第二人。窃于公有厚望焉。此致敬礼。

一九五七年六月十五日。

张元济书札跋

张元济先生字筱斋，号菊生，浙江海盐人。清光绪壬辰进士，选翰林院庶吉士。历官刑部主事，总理各国事务衙门章京。参与戊戌维新运动，革职后寓沪，任南洋公学监学，主持译书院事。旋入商务印书馆任编译所长、经理、监理、董事长等职，以至终老。光宣间清廷一再起用，命为邮传部参议、学部副大臣均不就。辛亥革命前后数十年致力出版事业，以嘉惠后学为己任。迨蒋氏专权，国事日非，民不聊生，先生深以为忧。抗战军兴，上海沦陷，先生秉民族大义，韬隐沪滨，卖文鬻字为生。全国解放前，先生拥护进步事业，向往革命。开国初，参加第一次政治协商会议，当选第一届全国人民代表大会代表，任上海市文史馆馆长。

先生平时撰文、题识、通讯以及书翰扇册，均只署名。人则以号称之。文人雅尚，多取别号、室名，而先生不喜也。龙为编序跋集录时循旧例，不欲直呼其名，因冠以涉园，非先生意也。涉园者，先生八世祖小白先生貽之园林，遂沿用之。先生藏书致力于海盐人文，推及嘉郡著述，并张氏先世旧藏之本。至宋元秘笈，名校精抄，皆为涵芬楼所收庋，而朋旧文中记及藏本，往往署为涉园，实有未谛。近时编印前人遗著，均用其名，以便省记，今即以先生之名名其集。

先生文章不多作，而与友好书札频繁，声气广通。评论时事，商量学术，发抒己见，情见乎辞。由今观之，皆成史料。顾书札搜集不易，大都信笔捷书，未必留稿。间有属草，亦罕汇存。今所得者，乃录自各家旧藏原件，而得于存稿者无多。

诸札内容甚富，如与汪康年、梁启超、张謇等，昌言时政，力图自强，广开民智，致力于文教事业。其与缪荃孙、傅增湘等，则皆讨论古籍版本、校勘、影印等事，精微备至。其与岑春煊则代呼吁维

护华侨在国内投资事。与吴国桢则为营救反饥饿而被捕学生事，壹皆义正词严，读之令人肃然起敬。至引钱武肃故事劝蒋介石归顺，为统一祖国，明见昭然。家书两通，一与侄树源，一与子树年，干涉世持身之要，求学成家之道，谆谆教导，其示侄者，尤为殷切，不啻如己出。距今虽逾半纪，犹堪为弦韦之佩。抗战时，力求保存文献资料，创办合众图书馆，维护图籍，深谋远虑。虽在病榻，犹关怀备至。先生禀性纯厚，言必信，行必果，爱国热情，始终如一，其真性情，皆可于书札中见之。

尝闻人言，先生每日早餐后，即伏案作书，书就即付商务印书馆通讯员汪志清君分发。大病稍痊，仍坐床上支炕几作书如常，数十年如一日。龙常往谒，尚亲见之。

当清末，先生环游各国考察教育，时近一年。每至一地，必作家书，又必取当地风景明信片书之。几日有一片，可作日记视之。储之篋衍数十年，未及整理，内乱中，尽付劫灰。事后，目击者言之，殊深惋惜！

昔黄黎洲言，藏书难，藏久尤难。龙从事图书资料之搜集保存工作有年，初亦有此同感，且谓保存固难，搜集实尤不易。既而思之，今日缩微照相之业日益发展，若随手采获，即付摄影，亦可化身千百，以垂久远。斯可解黎洲之惑矣！

先生交游至广，书札散佚必多，当勤事访求，有所得，即先摄存，俟为续编。先生捐馆后，陈叔通丈即属龙纂辑其遗稿，拟编诗文、日记、书札、书跋、专著等。诗文录出，均经叔丈校阅。叔丈与先生为数十年之挚交，无让管鲍。未几，叔丈作古，又未几而“文化大革命”爆发，此事遂废。去年商务印书馆总编辑陈原同志来沪，商为先生编印遗稿事，先生哲嗣树年君检理幸存旧稿，增补重编。先将日记、书札付印。以龙尝与校理之役，命系一跋，因述所闻于卷末。

一九八一年七月顾廷龙。

统一书号: 10017·13